

全 唐 诗

（第二十四部）

· 全唐诗 ·

第八百六十一卷

卷 861_1【登杭州秦望山】

马湘

太乙初分何处寻，空留历数变人心。九天日月移朝暮，
万里山川换古今。风动水光吞远峤，雨添岚气没高林。
秦皇谩作驱山计，沧海茫茫转更深。

卷 861_2【题龙兴观壁】

马湘

世有无穷事，生知遂百春。问程方外路，宜是上清人。

卷 861_3【又诗一首】

马湘

昔日曾随魏伯阳，无端醉卧紫金床。

· 全唐诗 ·

东君谓我多情赖，罚向人间作酒狂。

卷 861_4【又诗二首】

马湘

省悟前非一息间，更抛闲事弃尘寰。徒夸美酒如琼液，
休恋娇娥似玉颜。含笑谩教情面厚，多愁还使鬓毛斑。
云中幸有堪归路，无限青山是我山。

何用烧丹学驻颜，闹非城市静非山。
时人若觅长生药，对景无心是大还。

卷 861_5【题壁（人有以炉火药术为事者，辞大哂之，命笔题其壁）】

张辞

争那金乌何，头上飞不住。红炉漫烧药，玉颜安可驻。
今年花发枝，明年叶落树。不如且饮酒，莫管流年度。

卷 861_6【上盐城令述德诗】

张辞

门风常有蕙兰馨，鼎族家传霸国名。容貌静悬秋月彩，

· 全唐诗 ·

文章高振海涛声。讼堂无事调琴轸，郡阁何妨醉玉觥。
今日东渐桥下水，一条从此镇常清。

卷 861_7【谢令学道诗】

张辞

何用梯媒向外求，长生只合内中修。
莫言大道人难得，自是行心不到头。

卷 861_8【别令诗】

张辞

张辞张辞自不会，天下经书在腹内。
身即腾腾处世间，心即逍遥出天外。

卷 861_9【赠吴生】

陆禹臣

露下瑶簪湿，云生石室寒。星坛鸾鹤舞，丹灶虎龙蟠。

· 全唐诗 ·

卷 861_10【丈人山诗】

李真

春冻晓鞞露重，夜寒幽枕云生。
岂是与山无素，丈人著帽相迎。

卷 861_11【醉歌】

殷七七

琴弹碧玉调，药炼白朱砂。解酝顷刻酒，能开非时花。

卷 861_12【阳春曲】

殷七七

愁见唱阳春，令人离肠结。郎去未归家，柳自飘香雪。

卷 861_13【寄杜光庭】

张令问

试问朝中为宰相，何如林下作神仙。

· 全唐诗 ·

一壶美酒一炉药，饱听松风清昼眠。

卷 861_14【上升歌】

吴涵虚

玉皇有诏登仙职，龙吐云兮凤著力。眼前蓦地见楼台，
异草奇花不可识。我向大罗观世界，世界即如指掌大。
当时不为上升忙，一时提向瀛洲卖。

卷 861_15【答常学士】

李梦符

罢修儒业罢修真，养拙藏愚春复春。到老不疏林里鹿，
平生难见日边人。洞桃深处千林锦，岩雪铺时万草新。
深谢名贤远相访，求闻难博凤为邻。

卷 861_16【渔父引二首】

李梦符

村寺钟声度远滩，半轮残月落山前。
徐徐拨棹却归湾，浪叠朝霞锦绣翻。

· 全唐诗 ·

渔弟渔兄喜到来，波官赛却坐江隈。
椰榆杓子木瘤杯，烂煮鲈鱼满案堆。

卷 861_17【察考取状答】

李梦符

插花饮酒何妨事，樵唱渔歌不碍时。

卷 861_18【答高安宰】

沈廷瑞

何须问我道成时，紫府清都自有期。
手握药苗人不识，体含金骨俗争知。

卷 861_19【赠僧昭莹】

沈廷瑞

南北东西路，人生会不无。早曾依阁皂，又却上玄都。
云片随天阔，泉声落石孤。何期早相遇，乐共煮菖蒲。

· 全唐诗 ·

卷 861_20【寄袁州陈智周】

沈廷瑞

名山相别后，别后会难期。金鼎销红日，丹田老紫芝。
访君虽有路，怀我岂无诗。休羨繁华事，百年能几时。

卷 861_21【垄穴遗诗】

沈廷瑞

虚劳营殡玉山前，殡后那知已脱蝉。应是元神归洞府，
更与遗魄在黄泉。灵台已得修真诀，尘世空留悟道篇。
堪叹浮生今古事，北邙山下草芊芊。

卷 861_22【大言诗】

谭峭

线作长江扇作天，鞞鞋抛向海东边。
蓬莱信道无多路，只在谭生拄杖前。

· 全唐诗 ·

卷 861_23【句】

谭峭

云外星霜如走电，世间娱乐似抛砖。

卷 861_24【望江南词咏鼓】

伊用昌

江南鼓，梭肚两头栾。钉著不知侵骨髓，
打来只是没心肝，空腹被人谩。

卷 861_25【题茶陵县门】

伊用昌

茶陵一道妇长街，两畔栽柳不栽槐。
夜后不闻更漏鼓，只听锤芒织草鞋。

卷 861_26【题酒楼壁】

伊用昌

此生生在此生先，何事从玄不复玄。

· 全唐诗 ·

已在淮南鸡犬后，而今便到玉皇前。

卷 861_27【题游帷观真君殿后】

伊用昌

日日祥云瑞气连，侬家应作大神仙。笔头洒起风雷力，
剑下驱驰造化权。更无戎夷添礼乐，永教胡虏绝烽烟。
列仙功业只如此，直上三清第一天。

卷 861_28【留题阁皂观】

伊用昌

花洞门前吠似雷，险声流断俗尘埃。雨喷山脚毒龙起，
月照松梢孤鹤回。萝幕秋高添碧翠，画帘时卷到楼台。
两坛诗客何年去，去后门关更不开。

卷 861_29【湖南闾斋吟】

伊用昌

谁人能识白元君，上士由来尽见闻。避世早空南火宅，
植田高种北山云。鸡能抱卵心常听，蝉到成形壳自分。

· 全唐诗 ·

学取大罗些子术，免教松下作孤坟。

卷 861_30【游溧阳霞泉寺限白字】

许坚

近枕吴溪与越峰，前朝恩赐云泉额。竹林晴见雁塔高，
石室曾栖几禅伯。荒碑字没莓苔深，古池香泛荷花白。
客有经年别故林，落日啼猿情脉脉。

卷 861_31【幽栖观】

许坚

仙翁上升去，丹井寄晴壑。山色接天台，湖光照寥廓。
玉洞绝无人，老桧犹栖鹤。我欲掣青蛇，他时冲碧落。

卷 861_32【题茅山观】

许坚

尝恨清风千载郁，洞天今得恣游遨。松楸一色古坛静，
鸾鹤不来青汉高。茅氏井寒丹已化，玄宗碑断梦仍劳。
分明有个长生路，休向红尘叹二毛。

· 全唐诗 ·

卷 861_33【题扇】

许坚

哦吟但写胸中妙，饮酒能忘身后名。
但愿长闲有诗酒，一溪风月共清明。

卷 861_34【上徐舍人铉】

许坚

几宵烟月锁楼台，欲寄侯门荐祢才。
满面尘埃人不识，谩随流水出山来。

卷 861_35【句】

许坚

道既学不得，仙从何处来。

卧久似慵伸雪项，立迟犹未整霜衣。（《病鹤》，
见《吟窗杂录》）

· 全唐诗 ·

卷 861_36【醉吟】

许碯

阆苑花前是醉乡，踏翻王母九霞觞。
群仙拍手嫌轻薄，谪向人间作酒狂。

卷 861_37【题南岳招仙观壁上（题此诗后数日上升）】

许碯

洪炉烹锻人性命，器用不同分皆定。妖精鬼魅斗神通，
只自干邪不干正。黄口小儿初学行，唯知日月东西生。
还为万灵威圣力，移月在南日在北。玉为玉兮石是石，
蕴弃深泥终不易。邓通饿死严陵贫，帝王岂是无人力。
丈夫未达莫相侵，攀龙附凤捐精神。

卷 861_38【武陵春色】

张白

武陵春色好，十二酒家楼。大醉方回首，逢人不举头。
是非都不采，名利混然休。戴个星冠子，浮沈逐世流。

· 全唐诗 ·

卷 861_39【赠酒店崔氏】

张白

武陵城里崔家酒，地上应无天上有。
南游道士饮一斗，卧向白云深洞口。

卷 861_40【哭陆先生】

张白

六亲恸哭还复苏，我笑先生泪个无。
脱履定归天上去，空坟留入武陵图。

卷 861_41【市中狂吟】

段穀

一间茅屋，尚自修治。任狂风吹，连檐破碎。科棋斜欹，
看著倒也。墙壁作散土一堆，主人翁永不来归。

· 全唐诗 ·

卷 861_42【诗】

赵自然

常欲栖山岛，闲眠玉洞寒。丹哥时引舞，来去跨云鸾。

卷 861_43【大丹诗四首】

李浩

混沌未分我独存，包含四象立乾坤。
还丹须向此中觅，得此方为至妙门。

煮石烹金炼太元，神仙不肯等闲传。
人能认得其中理，夺尽乾坤造化权。

百首荒辞义亦深，因传同道决疑心。
华池本是真神水，神水元来是白金。

取将白金为鼎器，鼎成潜伏汞来侵。
汞入金鼎终年尽，产出灵砂似太阴。

· 全唐诗 ·

卷 861_44【自吟】

徐钧者

曾见秦皇架石桥，海神忙迫涨惊潮。
蓬莱隔海虽难到，直上三清却不遥。

卷 861_45【踏歌】

蓝采和

踏歌踏歌蓝采和，世界能几何。红颜三春树，
流年一掷梭。古人混混去不返，今人纷纷来更多。
朝骑鸾凤到碧落，暮见桑田生白波。长景明晖在空际，
金银宫阙高嵯峨。

· 全唐诗 ·

第八百六十二卷

卷 862_1【同沈恭子游虎丘寺有作】

清远道士

我本长殷周，遭罹历秦汉。四渎与五岳，名山尽幽窜。
及此寰区中，始有近峰玩。近峰何郁郁，平湖渺瀰漫。
吟俯川之阴，步上山之岸。山川共澄澈，光彩交凌乱。
白云翳欲归，青松忽消半。客去川岛静，人来山鸟散。
谷深中见日，崖幽晓非旦。闻子盛游遨，风流足词翰。
嘉兹好松石，一言常累叹。勿谓余鬼神，忻君共幽赞。

卷 862_2【游春台诗】

春台仙

玉幢亘碧虚，此乃真人居。裴回仍未进，邪省犹难除。
日落烟水黯，骊珠色岂昏。寒光射万里，霜缟遍千门。
玉魄东方开，嫦娥逐影来。洗心兼涤目，恍若游春台。

· 全唐诗 ·

清波滔碧天，乌藏黯黪连。二仪不辨处，忽吐清光圆。

乌沈海西岸，蟾吐天东头。

凤凰三十六，碧天高太清。元君夫人蹋云语，
冷风飒飒吹鹅笙。

卷 862_3【醉吟】

酒肆布衣

阳春时节天气和，万物芳盛人如何。素秋时节天地肃，
荣秀丛林立衰促。有同人世当少年，壮心仪貌皆俨然。
一旦形羸又发白，旧游空使泪连连。

卷 862_4【又吟】

酒肆布衣

有形皆朽孰不知，休吟春景与秋时。
争如且醉长安酒，荣华零悴总奚为。

· 全唐诗 ·

卷 862_5【嫁女诗】

嵩岳诸仙

劝君酒，为君悲且吟。自从频见市朝改，无复瑶池宴乐心。

奉君酒，休叹市朝非。早知无复瑶池兴，悔驾骅骝草草归。

八马回乘汗漫风，犹思往事憩昭宫。宴移玄圃情方洽，
乐奏钧天曲未终。斜汉露凝残月冷，流霞杯泛曙光红。
昆仑回首不知处，疑是酒酣魂梦中。

一曲笙歌瑶水滨，曾留逸足驻征轮。人间甲子周千岁，
灵境杯觞初一巡。玉兔银河终不夜，奇花好树镇长春。
悄知碧海饶词句，歌向俗流疑误人。

珠露金风下界秋，汉家陵树冷修修。
当时不得仙桃力，寻作浮尘飘陇头。

五十余年四海清，自亲丹药得长生。
若言尽是仙桃力，看取神仙簿上名。

月照骊山露泣花，似悲先帝早升遐。
至今犹有长生鹿，时绕温泉望翠华。

· 全唐诗 ·

幽蓟烟尘别九重，贵妃汤殿罢歌钟。中宵扈从无全仗，
大驾苍黄发六龙。妆匣尚留金翡翠，暖池犹浸玉芙蓉。
荆榛一闭朝元路，唯有悲风吹晚松。

上清神女，玉京仙郎。乐此今夕，和鸣凤凰。
凤凰和鸣，将翱将翔。与天齐休，庆流未央。

玉为质兮花为颜，蝉为鬓兮云为鬟。何劳傅粉兮施渥丹，
早出娉婷兮缥缈间。

水晶帐开银烛明，风摇珠珮连云清。
休匀红粉饰花态，早驾双鸾朝玉京。

三星在天银河回，人间曙色东方来。
玉苗琼蕊亦宜夜，莫使一花冲晓开。

卷 862_6【吟】

饵柏身轻叠嶂间，是非无意到尘寰。
冠裳暂备论浮世，一饷云游碧落间。

谁知古是与今非，闲蹑青霞与翠微。
箫管秦楼应寂寂，彩云空惹薜萝衣。

· 全唐诗 ·

卷 862_7【授炙毂子歌二首】

希道

木津天魂，金液地魄。坎离运行宽无成，金木有数秦晋合。

近效宜六旬，远期三载阔。

魄微入魂牝牡结，阳煦阴滋神鬼灭。

千歌万赞皆未决，古往今来抛日月。

卷 862_8【李泌庭黑石诗】

隐者

神真炼形年未足，化为我子功相续。

丞相瘞之刻玄玉，仙路何长死何促。

卷 862_9【戏吟】

广陵道士

无事到扬州，相携上酒楼。药囊为赠别，千载更何求。

· 全唐诗 ·

卷 862_10【授马氏女诗】

黄冠野夫

女是寄生枝，男是冬青木。冬青驾白鹅，寄生跨黄鹿。
若遇寇相凌，稳便抛家族。早早上三清，莫候丹砂熟。

卷 862_11【歌】

蜀酒阁道人

尾闾不禁沧溟竭，九转神丹都谩说。
惟有班龙顶上珠，能补玉堂关下穴。

卷 862_12【吟】

章江书生

西去长沙东上船，思量此事已千年。
长春殿掩无人扫，满眼梨花哭杜鹃。

· 全唐诗 ·

卷 862_13【示边洞元】

萼岭书生

邂逅相逢萼岭边，对倾浮蚁共谈玄。
拟将剑法亲传授，却为迷人未有缘。

卷 862_14【示胡二郎歌】

成都醉道士

欲究丹砂理，幽玄无处寻。不离铅与汞，无出水中金。
金欲炼时须得水，水遇土兮终不起。但知火候不参差，
自得还丹微妙旨。人世分明知有死，刚只留心恋朱紫。
岂知光景片时间，将谓人生长似此。何不回心师至道，
免逐年光虚自老。临樽只解醉醺酣，对镜方知渐枯槁。
二郎切切听我语，仙乡咫尺无寒暑。与君说尽只如斯，
莫恋娇奢不肯去。感君恩义言方苦，火急回心求出路。
吟成数句赠君辞，不觉便成今与古。

卷 862_15【贻白永年诗】

樵夫

清秋无所事，乘露出遥天。凭仗樵人语，相期白永年。

· 全唐诗 ·

卷 862_16【留诗】

李公佐仆

我有衣中珠，不嫌衣上尘。我有长生理，不厌有生身。
江南神仙窟，吾当混其真。不嫌市井喧，来救世间人。
苏子迹已往，颢蒙事可亲。莫言东海变，天地有长春。

卷 862_17【木客】

李公佐仆

酒尽君莫沾，壶倾我当发。城市多嚣尘，还山弄明月。

卷 862_18【西山吟】

许大

自从明府归仙后，出入尘寰直至今。
不是藏名混时俗，卖药沽酒要安心。

· 全唐诗 ·

卷 862_19【东洛货丹】

许学士

三千功满去升天，一住人间数百年。
华表他时却归日，沧溟应恐变桑田。

卷 862_20【天关回到世吟】

许学士

九霄云路奇哉险，曾把冲身入太和。
今日东归浑似梦，望崖回首隔天波。

卷 862_21【送青城丈人酒】

紫微孙处士

深羨青城好洞天，白龙一觉已千年。
铺云枕石长松下，朝退看书尽日眠。

· 全唐诗 ·

卷 862_22【送王懿昌酒】

紫微孙处士

将知骨分到仙乡，酒饮金华玉液浆。
莫道人间只如此，回头已是一年强。

卷 862_23【送太乙真君酒】

青城丈人

峨嵋仙府静沈沈，玉液金华莫厌斟。
凡客欲知真一洞，剑门西北五云深。

卷 862_24【送紫微处士酒】

太乙真君

此中何必羨青城，玉树云栖不记名。
闷即乘龙游紫府，北辰南斗逐君行。

· 全唐诗 ·

卷 862_25【题法云寺双桧】

方壶居士

谢郎双桧绿于云，昏晓浓阴色未分。
若并毫宫仙鹿迹，定知高峭不如君。

卷 862_26【隋堤词】

方壶居士

尝忆江都大业秋，曾随銮辂戏龙舟。
伤心一觉兴亡梦，堤柳无情识世愁。

卷 862_27【画地吟】

太白山玄士

学得丹青数万年，人间几度变桑田。
桑田虽变丹青在，谁向丹青合得仙。

· 全唐诗 ·

卷 862_28【货丹吟】

邻道场人

寻仙何必三山上，但使神存九窍清。
炼得绵绵元气定，自然不食亦长生。

卷 862_29【灵响词】

无名氏

此响非俗响，心知是灵仙。不曾离耳里，高下如秋蝉。
入夜声则厉，在昼声则微。神灵斥众恶，与我作风威。
妙响无住时，昼夜常轮回。那是偶然事，上界特使来。
何以辨灵应，事须得梯媒。自从灵响降，如有真人来。
存念长在心，展转无停音。可怜清爽夜，静听秋蝉吟。

卷 862_30【度世古玄歌】

无名氏

始青之下月与日，两半同升合为一。大如弹丸甘如蜜，

· 全唐诗 ·

出彼玉堂入金室，子若得之慎勿失。

卷 862_31【鬻丹砂醉吟】

刘道昌

心田但使灵芝长，气海常教法水朝。
功满自然留不住，更将何物驭丹霄。

卷 862_32【龟市告别】

刘道昌

还丹功满气成胎，九百年来混俗埃。
自此三山一归去，无因重到世间来。

卷 862_33【摘紫芝】

李太玄

偶游洞府到芝田，星月茫茫欲曙天。
虽则似离尘世了，不知何处偶真仙。

· 全唐诗 ·

卷 862_34【玉女舞霓裳】

李太玄

舞势随风散复收，歌声似磬韵还幽。
千回赴节填词处，娇眼如波入鬓流。

卷 862_35【玩月诗】

曲龙山仙

曲龙桥顶玩瀛洲，凡骨空陪汗漫游。
不假丹梯蹑霄汉，水晶盘冷桂花秋。

月砌瑶阶泉滴乳，玉箫催凤和烟舞。
青城丈人何处游，玄鹤唳天云一缕。

造化天桥碧海东，玉轮还过辗晴虹。
霓襟似拂瀛洲顶，颢气潜消橐仑中。

危桥横石架云端，跨鹿登临景象宽。
颢魄洗烟澄碧落，桂花低拂玉簪寒。

· 全唐诗 ·

卷 862_36【句】

陈复休

夜坐空庭月色微，一树寒梅发两枝。

卷 862_37【句】

郑冠卿

不缘过去行方便，安得今朝会碧虚。
(栖霞洞遇日华月华君)

卷 862_38【句】

陈蓬

竹篱疏见浦，茅屋漏通星。(题松山)

卷 862_39【句】

伊梦昌

惟有松杉空弄月，更无云鹤暗迷人。(题攸县司空观仙)

· 全唐诗 ·

台)

露凝金盏滴残酒，檀点佳人喷异香。(题黄蜀葵)

· 全唐诗 ·

第八百六十三卷

卷 863_1【与薛昭合婚诗】

张云容

脸花不绽几含幽，今夕阳春独换秋。
我守孤灯无白日，寒云陇上更添愁。

幽谷啼莺整羽翰，犀沈玉冷自长叹。
月华不向扃泉户，露滴松枝一夜寒。

韶光不见分成尘，曾饵金丹忽有神。
不意薛生携旧律，独开幽谷一枝春。

误入宫垣漏网人，月华静洗玉阶尘。
自疑飞到蓬莱顶，琼艳三枝半夜春。

卷 863_2【留别卢陲】

崔少玄

得之一元，匪受自天。太老之真，无上之仙。光含影藏，

· 全唐诗 ·

形于自然。真安匪求，神之久留。淑美其真，体性刚柔。
丹霞碧虚，上圣之俦。百岁之后，空余坟丘。

卷 863_3【歌】

戚逍遥

笑看沧海欲成尘，王母花前别众真。
千岁却归天上去，一心珍重世间人。

卷 863_4【锦城春望】

卓英英

和风装点锦城春，细雨如丝压玉尘。
漫把诗情访奇景，艳花浓酒属闲人。

卷 863_5【理笙】

卓英英

频倚银屏理凤笙，调中幽意起春情。
因思往事成惆怅，不得缑山和一声。

· 全唐诗 ·

卷 863_6【游福感寺答少年】

卓英英

牡丹未及开时节，况是秋风莫近前。
留待来年二三月，一枝和露压神仙。

卷 863_7【答玄士】

卓英英

数载幽栏种牡丹，裹香包艳待神仙。
神仙既有丹青术，携取何妨入洞天。

卷 863_8【和卓英英锦城春望】

眉娘

蚕市初开处处春，九衢明艳起香尘。
世间总有浮华事，争及仙山出世人。

· 全唐诗 ·

卷 863_9【和卓英英理笙】

眉娘

但于闺阁熟吹笙，太白真仙自有情。
他日丹青骖白凤，何愁子晋不闻声。

卷 863_10【附：太白山玄士画地吟】

眉娘

学得丹青数万年，人间几度变桑田。
桑田虽变丹青在，谁向丹青合得仙。

卷 863_11【答张郁歌】

洛川仙女

彩云入帝乡，白鹤又回翔。久留深不可，蓬岛路遐长。
空爱长生术，不是长生人。今日洛川别，可惜洞中春。

· 全唐诗 ·

卷 863_12【附：张郁洛川沿步吟】

洛川仙女

浮生如梦能几何，浮生复更忧患多。
无人与我长生术，洛川春日且长歌。

卷 863_13【题玉壶赠元柳二子】

南溟夫人

来从一叶舟中来，去向百花桥上去。
若到人间扣玉壶，鸳鸯自解分明语。

卷 863_14【会真诗（杨敬真）】

云台峰女仙

人世徒纷扰，其生似梦华。谁言今昔里，俯首视云霞。

卷 863_15【会真诗（马信真）】

云台峰女仙

几劫澄烦思，今身仅小成。誓将云外隐，不向世间存。

· 全唐诗 ·

卷 863_16【会真诗（徐湛真）】

云台峰女仙

绰约离尘世，从容上太清。云衣无绽日，鹤驾没遥程。

卷 863_17【会真诗（郭修真）】

云台峰女仙

华岳无三尺，东瀛仅一杯。入云骑彩凤，歌舞上蓬莱。

卷 863_18【会真诗（夏守真）】

云台峰女仙

共作云山侣，俱辞世界尘。静思前日事，抛却几年身。

卷 863_19【仙诗五首】

吴清妻

道启真心觉渐清，天教绝粒应精诚。

· 全唐诗 ·

云外仙歌笙管合，花间风引步虚声。

， 君隐处当一星。
莲花山头饭，黄精仙人掌上经。

飞鸟莫到人莫攀，一隐十年不下山。
袖中短书谁为达，华山道士卖药还。

日落焚香坐醮坛，庭花露湿渐更阑。
净水仙童调玉液，春宵羽客化金丹。

摄念精思引彩霞，焚香虚室对烟花。
道合云霄游紫府，湛然真境瑞皇家。

卷 863_20【赠封陟】

上元夫人

谪居蓬岛别瑶池，春媚烟花有所思。
为爱君心能洁白，愿操箕帚奉屏帟。

卷 863_21【再赠】

上元夫人

弄玉有夫皆得道，刘纲兼室尽登仙。

· 全唐诗 ·

君能仔细窥朝露，须逐云车拜洞天。

卷 863_22【留别】

上元夫人

萧郎不顾凤楼人，云涩回车泪脸新。
愁想蓬瀛归去路，难窥旧苑碧桃春。

卷 863_23【题寺廊柱】

慈恩院女仙

皇子陂头好月明，忘却华筵到晓行。
烟收山低翠黛横，折得荷花远恨生。

湖水团团夜如镜，碧树红花相掩映。
北斗阑干移晓柄，有似佳期常不定。

卷 863_24【后土夫人】

蜀宫群仙

偶引群仙到世间，熏风殿里醉华筵。

· 全唐诗 ·

等闲贪赏不归去，愁杀韦郎一觉眠。

卷 863_25【王母】

蜀宫群仙

沧海成尘几万秋，碧桃花发长春愁。
不来便是数千载，周穆汉皇何处游。

卷 863_26【麻姑】

蜀宫群仙

世间何事不潸然，得失人情命不延。
适向蔡家厅上饮，回头已见一千年。

卷 863_27【上元夫人】

蜀宫群仙

思量往事一愁容，阿母曾邀到汉宫。
城阙不存人不见，茂陵荒草恨无穷。

· 全唐诗 ·

卷 863_28【弄玉】

蜀宫群仙

采凤飞来到禁闱，便随王母驻瑶池。
如今记得秦楼上，偷见萧郎恼妾时。

卷 863_29【太真】

蜀宫群仙

春梦悠扬生下界，一堪成笑一堪悲。
马嵬不是无情地，自迈蓬莱睡觉时。

卷 863_30【赠郭翰二首】

织女

河汉虽云阔，三秋尚有期。情人终已矣，良会更何时。

朱阁临清溪，琼宫衔紫房。佳情期在此，只是断人肠。

· 全唐诗 ·

卷 863_31 【附：郭翰酬织女】

织女

人世将天上，由来不可期。谁知一回顾，更作两相思。

赠枕犹香泽，啼衣尚泪痕。玉颜霄汉里，空有往来魂。

卷 863_32 【书任生案】

嵩山女

我本籍上清，谪居游五岳。以君无俗累，来劝神仙学。

葛洪还有妇，王母亦有夫。神仙尽灵匹，君意合何如。

卷 863_33 【临去书赠】

嵩山女

君子既执迷，无由达情素。明月海山上，秋风独归去。

· 全唐诗 ·

卷 863_34【与赵旭叩柱歌】

青童

白云飘飘星汉斜，独行窈窕浮云车。
仙郎独邀青童君，结情罗帐连心花。

卷 863_35【题壁】

观梅女仙

南枝向暖北枝寒，一种春花有两般。
凭仗高楼莫吹笛，大家留取倚阑看。

卷 863_36【歌】

吴彩鸾

若能相伴陟仙坛，应得文箫驾彩鸾。
自有绣襦并甲帐，瑶台不怕雪霜寒。

· 全唐诗 ·

卷 863_37【临化绝句】

王氏女

玩水登山无足时，诸仙频下听吟诗。
此心不恋居人世，唯见天边双鹤飞。

卷 863_38【赠华山游人】

毛女正美

药苗不满笥，又更上危巔。回首归去路，相将入翠烟。

曾折松枝为宝栴，又编栗叶代罗襦。
有时问却秦宫事，笑拈山花望太虚。

卷 863_39【在紫霄夫人席上作】

桃花夫人

昔时训子西可上，汉使经过问妾缘。
自到仙山不知老，凡间唤作几千年。

· 全唐诗 ·

卷 863_40【答孙玄照】

王仙仙

鸳鸯相见不相随，笼里笼前整羽衣。
但得他时人放去，水中长作一双飞。

卷 863_41【附：孙玄照琴中歌赠王仙仙】

王仙仙

相如曾作凤兮吟，昔被文君会此音。
今日孤鸾还独语，痛哉仙子不弹琴。

卷 863_42【临刑赋】

杨损

圣主何曾识仲都，可嗟社稷在须臾。
市东便是神仙窟，何必乘舟泛五湖。

· 全唐诗 ·

卷 863_43【别遥见诗】

妙女

手攀桥柱立，滴泪天河满。

· 全唐诗 ·

第八百六十四卷

卷 864_1【宴柳毅诗】

洞庭龙君

大天苍苍兮大地茫茫，人各有志兮何可思量。
狐神鼠圣兮薄社依墙，雷霆一发兮其孰敢当。
荷贞人兮信义长，令骨肉兮还故乡，永言惭愧兮何时忘。

上天配合兮生死有途，此不当妇兮彼不当夫。
腹心辛苦兮泾水之隅，风霜满鬓兮雨雪罗襦。
赖明公兮引素书，令骨肉兮家如初，永言珍重兮无时无。

碧云悠悠兮泾水东流，伤嗟美人兮雨泣花愁。
尺书远达兮以解君忧，哀冤果雪兮还处其休。
荷君和雅兮感甘羞，山家寂寞兮难久留，
欲将辞去兮悲绸缪。

· 全唐诗 ·

卷 864_2【铸镜歌】

龙护老人

盘龙盘龙，隐于镜中。分野有象，变化无穷。
兴云吐雾，行雨生风。上清仙子，来献圣聪。

卷 864_3【示韦泛禄命】

冥吏

前阳复后杨，后杨年年强，七月之节归玄乡。

卷 864_4【赠僧】

滕传胤

卓立不求名出家，长怀片志在青霞。
今日英雄气冲盖，谁能久坐宝莲花。

卷 864_5【赠人】

滕传胤

平生才不足，立身信有余。自叹无大故，君子莫相疏。

· 全唐诗 ·

卷 864_6【郑锋宅神诗】

滕传胤

浦口潮来初渺漫，莲舟摇曳采花难。
春心不惬空归去，会待潮回更折看。

忽然湖上片云飞，不觉舟中雨湿衣。
折得莲花浑忘却，空将荷叶盖头归。

卷 864_7【与郑德璘奇遇诗】

水府君

物触轻舟心自知，风恬烟静月光微。
夜深江上解愁思，拾得红蕖香惹衣。

纤手垂钩对水窗，红蕖秋色艳长江。
既能解佩投交甫，更有明珠乞一双。

湖面狂风且莫吹，浪花初绽月光微。
沈潜暗想横波泪，得共鲛人相对垂。

洞庭风软荻花秋，新没青娥细浪愁。
泪滴白蘋君不见，月明江上有轻鸥。

· 全唐诗 ·

昔日江头菱芡人，蒙君数饮松醪春。
活君家室以为报，珍重长沙郑德璘。

卷 864_8【笑巫诗】

李序

魍魎何曾见，头旋即下神。图他衫子段，诈道大王嗔。

卷 864_9【雪溪夜宴诗（诸神命丽玉唱公无渡河歌）】

水神

浊波扬扬兮凝晓雾，公无渡河兮公竟渡。
风号水激兮呼不闻，提衣看入兮中流去。浪排衣兮随步
没，
沈尸深入兮蛟螭窟。蛟螭尽醉兮君血干，
推出黄沙兮泛君骨。当时君死兮妾何适，
遂就波澜兮合魂魄，愿持精卫衔石心，穷断河源塞泉脉。

卷 864_10【雪溪夜宴诗（命曹娥唱怨江波三叠）】

水神

悲风淅淅兮波绵绵，芦花万里兮凝苍烟。

· 全唐诗 ·

虬螭窟宅兮渊且玄，排波叠浪兮沈我天。
所覆不全兮身宁全，溢眸恨血兮徒涟涟。
誓将柔荑抉锯牙之喙，空水府而藏其腥涎。
青娥翠黛兮沈江壖，碧云斜月兮空婵娟。
吞声饮恨兮语无力，徒扬哀怨兮登歌筵。

卷 864_11【雪溪夜宴诗（太湖神歌）】

水神

白露溥兮西风高，碧波万里兮翻洪涛。
莫言天下至柔者，载舟覆舟皆我曹。

卷 864_12【雪溪夜宴诗（松江神歌）】

水神

君不见夜来渡口拥千艘，中载万姓之脂膏。
当楼船泛泛于叠浪，恨珠贝又轻于鸿毛。
又不见朝来津亭维一舸，中有一士青其袍。
赴宰邑之良日，任波吼而风号。是知溺名溺利者，
不免为水府之腥臊。

· 全唐诗 ·

卷 864_13【雪溪夜宴诗（雪溪神歌）】

水神

山势萦回水脉分，水光山色翠连云。
四时尽入诗人咏，役杀吴兴柳使君。

卷 864_14【雪溪夜宴诗（湘江神歌）】

水神

渺渺烟波接九疑，几人经此泣江蓠。
年年绿水青山色，不改重华南狩时。

卷 864_15【雪溪夜宴诗（范相国献境会夜宴诗）】

水神

浪阔波澄秋气凉，沈沈水殿夜初长。自怜休退五湖客，
何幸追陪百谷王。香袅碧云飘几席，觥飞白玉艳椒浆。
酒酣独泛扁舟去，笑入琴高不死乡。

· 全唐诗 ·

卷 864_16【雪溪夜宴诗（徐处士衍献境会夜宴诗，并简范相国）】

水神

珠光龙耀火燿燿，夜接朝云宴渚宫。凤管清吹凄极浦，
朱弦间奏冷秋空。论心幸遇同归友，揣分惭无辅佐功。
云雨各飞真境后，不堪波上起悲风。

卷 864_17【雪溪夜宴诗（屈大夫歌）】

水神

凤鸾鸾以降瑞兮，患山鸡之杂飞。玉温温以呈器兮，
因砢砢之争辉。当侯门之四辟兮，瑾嘉谟之重扉。
既瑞器而无庸兮，宜昏暗之相微。徒剡石以为舟兮，
顾沿流而志违。将刻木而作羽兮，与超腾之理非。
矜子子于空江兮，靡群援之可依。血淋淋而滂流兮，
顾江鱼之腹而将归。西风萧萧兮湘水悠悠，
白芷芳歇兮江蓠秋。日晚晚兮川云收，棹四起兮悲风幽。
羁魂汨没兮我名永浮，碧波虽涸兮厥誉长流。
向使甘言盛行于曩昔，岂今日居君王之座头。
是知贪名徇禄而随世磨灭者，虽正寝之死乎无得与吾俦。
当鼎足之嘉会兮，获周旋于君侯。雕盘玉豆兮罗珍羞，
金卮琼斝兮方献酬。敢写心兮歌一曲，无谓余持杯以淹留。

· 全唐诗 ·

卷 864_18【雪溪夜宴诗（申屠先生献境会夜宴诗）】

水神

行殿秋未晚，水宫风初凉。谁言此中夜，得接朝宗行。
灵鼉振冬冬，神龙耀煌煌。红楼压波起，翠幄连云张。
玉箫冷吟秋，瑶瑟清含商。贤臻江湖叟，贵列川渚王。
谅予衰俗人，无能振颓纲。分辞皆乱世，乐寐蛟螭乡。
栖迟幽岛间，几见波成桑。尔来尽流俗，难与倾壶觞。
今日登华筵，稍觉神扬扬。方欢沧浪侣，遽恐白日光。
海人瑞锦前，岂敢言文章。聊歌灵境会，此会诚难忘。

卷 864_19【雪溪夜宴诗（鸱夷君歌）】

水神

雪集大野兮血波汹汹，玄黄交战兮吴无全陇。
既霸业之将坠，宜嘉谟之不从。国步颠蹶兮吾道遘凶，
处鸱夷之大困，入渊泉之九重。上帝愍余之非辜兮，
俾大江鼓怒其冤踪。所以鞭浪山而疾驱波岳，
亦粗足展余拂郁之心胸。当灵境之良宴兮，谬尊俎之相
容，
击箫鼓兮撞歌钟。吴讴越舞兮欢未极，遽军城晓鼓之冬
冬。
愿保上善之柔德，何行乐之地兮难相逢。

· 全唐诗 ·

卷 864_20 【为刘洪作】

辅国将军

乌乌在虚飞，玄驹遂野依。名今编户籍，翠过叶生稀。

个树枝条朽，三花五面啼。移家朝度日，谁觉。

卷 864_21 【语】

太白山神

三珠并一珠，驴马没人驱。岁月甲庚午，中兴戊己土。

卷 864_22 【月夜吟】

灊水神

夜月明皎皎，绿波空悠悠。

卷 864_23 【答郑生歌】

湘中蛟女

溯青山兮江之隅，拖湘波兮袅绿裾。

· 全唐诗 ·

荷拳拳兮情未舒，匪同归兮将焉如。

卷 864_24【风光词】

湘中蛟女

隆佳秀兮昭盛时，播薰绿兮淑华归。故里萸与处萸兮，
潜重房以饰姿。见雅态之韶华兮，蒙长霭以为帟。
醉融光兮渺渺瀰瀰，迷千里兮涵烟眉。晨陶陶兮暮熙熙，
舞袅娜之秾条兮，娉盈盈以披迟。酩游颜兮倡蔓卉穀，
流倩电兮石发髓施。

卷 864_25【附：郑生诗】

湘中蛟女

情无垠兮水汤汤，怀佳期兮属三湘。

卷 864_26【感怀诗】

龙女

海门连洞庭，每去三千里。十载一归来，辛苦潇湘水。

· 全唐诗 ·

卷 864_27【寄张无颇】

广利王女

羞解明珰寻汉渚，但凭春梦访天涯。
红楼日暮莺飞去，愁杀深宫落砌花。

燕语春泥堕锦筵，情愁无意整花钿。
寒闺敲枕不成梦，香炷金炉自裊烟。

卷 864_28【与崔渥冥会杂诗】

万里同心别九重，定知涉历此相逢。
谁人翻向群峰路，不得苍梧徇玉容。

春鸟交交引思浓，岂期尘迹拜仙宫。
鸾歌凤舞飘珠翠，疑是阳台一梦中。

鸾舆昔日出蒲关，一去苍梧更有还。
若是不留千古恨，湘江何事竹犹斑。

愁闻黄鸟夜关关，沔沔春来有梦还。
遗美代移刊勒绝，唯闻留得泪痕斑。

· 全唐诗 ·

方承恩宠醉金杯，岂为干戈骤到来。
亡国破家皆有恨，捧心无语泪苏台。

桃花流水两堪伤，洞口烟波月渐长。
莫道仙家无别恨，至今垂泪忆刘郎。

泾阳平野草初春，遥望家乡泪滴频。
当此不知多少恨，至今空忆在灵姻。

目断魂销正惘然，九疑山际路漫漫。
何人知得心中恨，空有湘江竹万竿。

常说仙家事不同，偶陪花月此宵中。
锦屏银烛皆堪恨，惆怅纱窗向晓风。

卷 864_29 【又湘妃诗四首（一作女仙题湘妃庙诗）】

渺渺三湘万里程，泪篁幽石助芳贞。
孤云目断苍梧野，不得攀龙到玉京。

碧杜红蕖缥缈香，冰丝弹月弄清凉。
峰峦一一俱相似，九处堪疑九断肠。

玉辇金根去不回，湘川秋晚楚弦哀。

· 全唐诗 ·

自从泣尽江蓠血，夜夜愁风怨雨来。

少将风月怨平湖，见尽扶桑水到枯。
相约杏花坛上去，画阑红子斗揶揄。

卷 864_30 【与何光远赠答诗（何光远伤春吟）】

何光远

檐上檐前燕语新，花开柳发自伤神。
谁能将我相思意，说与江隈解佩人。

卷 864_31 【与何光远赠答诗（龙女赠光远）】

龙女

坐久风吹绿绮寒，九天月照水精盘。
不思却返沈潜去，为惜春光一夜欢。

卷 864_32 【与何光远赠答诗（光远答龙女）】

何光远

澹荡春光物象饶，一枝琼艳不胜娇。

· 全唐诗 ·

若能许解相思佩，何羨星天渡鹊桥。

卷 864_33【与何光远赠答诗（催妆二首）】

何光远

玉漏涓涓银汉清，鹊桥新架路初成。
催妆既要裁篇咏，凤吹鸾歌早会迎。

宝车辗驻彩云开，误到蓬莱顶上来。
琼室既登花得折，永将凡骨逐风雷。

卷 864_34【与何光远赠答诗（龙女留别光远）】

龙女

负妾当时寤寐求，从兹粉面阻绸缪。
宫空月苦瑶云断，寂寞巴江水自流。

卷 864_35【寄紫盖阳居士】

黄陵美人

落叶栖鸦掩庙扉，菟丝金缕旧罗衣。

· 全唐诗 ·

渡头明月好携手，独自待郎郎不归。

卷 864_36【赠谢府君】

吴兴神女

玉钗空中堕，金钏色已歇。独泣谢春风，秋夜伤明月。

· 全唐诗 ·

第八百六十五卷

卷 865_1【冢上答太宗】

慕容垂

我昔胜君昔，君今胜我今。荣华各异代，何用苦追寻。

卷 865_2【遗画工诗】

释明解

握手不能别，抚膺聊自伤。痛矣时阴短，悲哉泉路长。
松林惊野吹，荒隧落寒霜。言离何以赠，留心内典章。

卷 865_3【夜吟】

巴峡鬼

秋径填黄叶，寒摧露草根。猿声一叫断，客泪数重痕。

· 全唐诗 ·

卷 865_4【愧谢诗】

河湄鬼

我本邯郸士，祇役死河湄。不得家人哭，劳君行路悲。

卷 865_5【掷裴武公诗】

介冑鬼

屡策羸骖历乱峒，丛岚映日昼如曛。长桥驾险浮天汉，
危栈通岐触岫云。却念淮阴空得计，又嗟忠武不堪离。
废兴尽系前生数，休衒英雄勇冠军。

卷 865_6【死后诗】

李叔霁

忽作无期别，沈冥恨有余。长安虽不远，无信可传书。

卷 865_7【洋州馆夜吟】

窦裕

门依楚水岸，身寄洋州馆。望月独相思，尘襟泪痕满。

· 全唐诗 ·

卷 865_8【献元载】

书生

城东城西旧居处，城里飞花乱如絮。
海燕衔泥欲下来，屋里无人却飞去。

卷 865_9【诗二首】

虎丘石壁鬼

高松多悲风，萧萧清且哀。南山接幽垅，幽垅空崔嵬。
白日徒昭昭，不照长夜台。虽知生者乐，魂魄安能回。
况复念所亲，恸哭心肝摧。恸哭更何言，哀哉复哀哉。

神仙不可学，形化空游魂。白日非我朝，青松为我门。
虽复隔幽显，犹知念子孙。何以遣悲惋，万物归其根。
寄语世上人，莫厌临芳尊。庄生问枯骨，三乐成虚言。

卷 865_10【祭后见石上诗】

虎丘石壁鬼

幽明虽异路，平昔忝攻文。欲知潜昧处，山北两孤坟。

· 全唐诗 ·

卷 865_11【咏浮云】

陆凭

虚虚复空空，瞬息天地中。假合成此像，吾亦非吾躬。

卷 865_12【呈李续】

韩弇

我有敌国讎，无人可为雪。每至秦陇头，游魂自呜咽。

卷 865_13【和崔侍御】

尉佗

千岁荒台隳路隅，一烦太守重椒涂。
感君拂拭意何极，赠尔美妇与明珠。

卷 865_14【赠窦丞】

刘溉

冥路杳杳人不知，不用苦说使人悲。

· 全唐诗 ·

喜得逢君传家信，后会茫茫何处期。

卷 865_15【叙幽冤】

郑琼罗

痛填心兮不能语，寸断肠兮诉何处。
春生万物妾不生，更恨香魂不相遇。

卷 865_16【过台城感旧】

沈青箱

六代旧山川，兴亡几百年。繁华今寂寞，朝市昔喧阗。
夜月琉璃水，春风卵色天。伤时与怀古，垂泪国门前。

卷 865_17【诗】

襄阳举人

流水涓涓芹努芽，织乌西飞客还家。
荒村无人作寒食，殡宫空对棠梨花。

· 全唐诗 ·

卷 865_18【踏歌】

河中鬼

河水流溷溷，山头种荞麦。两个胡孙门底来，
东家阿嫂决一百。

卷 865_19【题少陵别墅】

萧微

新构茅斋野涧东，松楸交影足悲风。
人间岁月如流水，何事频行此路中。

卷 865_20【梦张垂赠诗】

张省躬

戚戚复戚戚，秋堂百年色。而我独茫茫，荒郊遇寒食。

卷 865_21【秋月联句】

商山三丈夫

秋月圆如镜，--王步兵

· 全唐诗 ·

秋风利似刀。--萧中郎
秋云轻比絮，--梁璟
秋草细如毛。--诸葛长史

卷 865_22【天明联句】

幽树高高影，--萧中郎
山花寂寂香。--王步兵
山天遥历历，--诸葛长史
山水急汤汤。--梁璟

卷 865_23【赠张斑】

郑适

昔为吟风啸月人，今为吟风啸月身。
冢坏路边吟啸罢，安知今日又劳神。

卷 865_24【西轩诗】

甘露寺鬼

赵壹能为赋，邹阳解献书。可惜西江水，不救辙中鱼。

· 全唐诗 ·

伟哉横海鳞，壮矣垂天翼。一旦失风水，翻为蝼蚁食。

功遂侔昔人，保退无智力。既涉太行险，兹路信难陟。

握里龙蛇纸上鸾，逡巡千幅不将难。

顾云已往罗隐毫，更有何人逞笔端。

卷 865_25【降巫诗】

邵谒

青山山下少年郎，失意当时别故乡。

惆怅不堪回首望，隔溪遥见旧书堂。

卷 865_26【赠雷殿直】

石恪

衡阳去此正三年，一路程途甚坦然。深邃门墙三楚外，

清风池馆五峰前。西边市井来商客，东岸汀洲簇钓船。

公退只应无别事，朱陵后洞看神仙。

· 全唐诗 ·

卷 865_27【吟】

富春沙际鬼

移江三十年，潮打形骸朽。家人都不知，何处奠杯酒。

卷 865_28【又吟】

富春沙际鬼

莫问我姓名，向君言亦空。潮生沙骨冷，魂魄悲秋风。

卷 865_29【献高骈】

赵_畹

我昔胜君昔，君今胜我今。人生一世事，何用苦相侵。

· 全唐诗 ·

第八百六十六卷

卷 866_1【吟】

九华山白衣

涧水潺潺声不绝，溪垞茫茫野花发。
自去自来人不知，归时唯对空山月。

卷 866_2【诗】

田达诚借宅鬼

天然与我一灵通，还与人间事不同。
要识吾家真姓字，天地南头一段红。

卷 866_3【秋夜吟】

长安中鬼

六街鼓歇行人绝，九衢茫茫室有月（吟）。--
九衢生人何劳劳，长安土尽槐根高（和）。--

· 全唐诗 ·

卷 866_4【题窗上诗】

隔窗鬼

何人窗下读书声，南斗阑干北斗横。
千里思家归不得，春风肠断石头城。

卷 866_5【柱上诗】

巴陵馆鬼

爷娘送我青枫根，不记青枫几回落。
当时手刺衣上花，今日为灰不堪著。

卷 866_6【留别安凤】

徐侃

君寄长安久，耻不还故乡。我别长安去，切在慰高堂。
不意与离恨，泉下亦难忘。

· 全唐诗 ·

卷 866_7【附：安凤赠别徐侃】

安凤

一自离乡国，十年在咸秦。泣尽卞和血，不逢一故人。
今日旧友别，羞此漂泊身。离情吟诗处，麻衣掩泪频。
泪别各分袂，且及来年春。

卷 866_8【述怀】

商山客死生

家住驿北路，百里无四邻。往来不相问，寂寂山家春。
南冈夜萧萧，青松与白杨。家人应有梦，远客已无肠。
白草寒露里，乱山明月中。是夕苦吟罢，寒烛与君同。

卷 866_9【续郑郊吟】

冢中人

冢上两竿竹，风吹常袅袅。--郑郊
下有百年人，长眠不知晓。--冢中人

· 全唐诗 ·

卷 866_10【题壁】

崇圣寺鬼

禁烟佳节同游此，正值酴醾夹岸香。
缅首十年前往事，强吟风景乱愁肠。

策马暂寻原上路，落花芳草尚依然。
家亡国破一场梦，惆怅又逢寒食天。

卷 866_11【血书诗】

任彦思家鬼

物类易迁变，我行人不见。珍重任彦思，相别日已远。

卷 866_12【赠马植】

峡中白衣

截竹为筒作笛吹，凤凰池上凤凰飞。
劳君更向黔南去，即是陶钧万类时。

· 全唐诗 ·

卷 866_13【题芭蕉叶上】

张仁宝

寒食家家尽禁烟，野棠风坠小花钿。
如今空有孤魂梦，半在嘉陵半锦川。

卷 866_14【官坡馆联句】

崔常侍

床头锦衾班复班，架上朱衣殷复殷。
空庭朗月闲复闲，夜长路远山复山。

卷 866_15【亡后见形诗】

李煜

异国非所志，烦劳殊清闲。惊涛千万里，无乃见钟山。

卷 866_16【同鹿门少年马绍隆冥游诗·同望荆门】

庞德公

千年故国岁华奔，一柱高台已断魂。

· 全唐诗 ·

唯有岷亭清夜月，与君长啸学苏门。

卷 866_17【同鹿门少年马绍隆冥游诗·忆荆南】

庞德公

高名宋玉遗闲丽，作赋兰成绝盛才。
谁似辽东千岁鹤，倚天华表却归来。

卷 866_18【贻常夷诗】

朱均

平生游城郭，殂没委荒榛。自我辞人世，不知秋与春。
牛羊久来牧，松柏几成薪。分绝车马好，甘随狐兔群。
何处清风至，君子幸为邻。烈烈盛名德，依依伫良宾。
千年何旦暮，一室动人神。乔木如在望，通衢良易遵。
高门傥无隔，向与析龙津。

卷 866_19【空馆夜歌】

夷陵女郎

明月清风，良宵会同。星河易翻，欢娱不终。

· 全唐诗 ·

绿樽翠杓，为君斟酌。今夕不饮，何时欢乐。

杨柳杨柳，袅袅随风急。西楼美人春梦长，
绣帘斜卷千条入。

玉户金缸，愿陪君王。邯郸宫中，金石丝簧。
卫女秦娥，左右成行。纨绮缤纷，翠眉红妆。
王欢顾盼，为王歌舞。愿得君欢，常无灾苦。

卷 866_20【赠夫诗三首】

孔氏

不忿成故人，掩涕每盈巾。死生今有隔，相见永无因。

匣里残妆粉，留将与后人。黄泉无用处，恨作冢中尘。

有意怀男女，无情亦任君。欲知肠断处，明月照孤坟。

卷 866_21【答夫诗二首（唐晁妻张氏）】

张氏

不分殊幽显，那堪异古今。阴阳徒自隔，聚散两难心。

· 全唐诗 ·

兰阶兔月斜，银烛半含花。自怜长夜客，泉路以为家。

卷 866_22【附：唐晁悼妻诗】

唐晁

寢室悲长簟，妆楼泣镜台。独悲桃李节，不共夜泉开。
魂兮若有感，仿佛梦中来。

常时华堂静，笑语度更筹。恍惚人事改，冥寞委荒丘。
阳原歌薤露，阴壑惜藏舟。清夜妆台月，空想画眉愁。

卷 866_23【赠妻诗】

唐晁

峰阳桐半死，延津剑一沈。如何宿昔内，空负百年心。

卷 866_24【赠姊】

韦璜

修短各有分，浮华亦非真。断肠泉壤下，幽忧难具陈。
凄凄白杨风，日暮堪愁人。

· 全唐诗 ·

卷 866_25【赠夫二首（题云泉台客韦璜）】

韦璜

不得长相守，青春夭葬华。旧游今永已，泉路却为家。

早知离别切人心，悔作从来恩爱深。
黄泉冥寞虽长逝，白日屏帷还重寻。

卷 866_26【赠嫂（序云阿嫂相疑留诗）】

韦璜

赤心用尽为相知，虑后防前只定疑。
案牒可申生节目，桃符虽圣欲何为。

卷 866_27【与独孤穆冥会诗】

临淄县主

江都昔丧乱，阙下多构兵。豺虎恣吞噬，干戈日纵横。
逆徒自外至，半夜开重城。膏血浸宫殿，刀枪倚檐楹。
今知从逆者，乃是公与卿。白刃污黄屋，邦家遂因倾。
疾风知劲草，世乱识忠臣。哀哀独孤公，临死乃结缨。

· 全唐诗 ·

天地既板荡，云雷时未亨。今者二百载，幽怀犹未平。
山河风月古，陵寝露烟青。君子秉祖德，方垂忠烈名。
华轩一惠顾，土室以为荣。丈夫立志操，存没感其情。
求义若可托，谁能抱幽贞。（县主赠穆）

皇天昔降祸，隋室若缀旒。患难在双阙，干戈连九州。
出门皆凶竖，所向多逆谋。白日忽然暮，颓波不可收。
望夷既结衅，宗社亦贻羞。温室兵始合，宫闱血已流。
悯哉吹箫子，悲啼下凤楼。霜刃徒见逼，玉笋不可求。
罗襦遗侍者，粉黛成仇雠。邦国已沦覆，余生誓不留。
英英将军祖，独以社稷忧。丹血溅黼宸，丰肌染戈矛。
今来见禾黍，尽日悲宗周。玉树已寂寞，泉台千万秋。
感兹一顾重，愿以死节酬。幽显傥不昧，终焉契绸缪。
（穆答县主）

平阳县中树，久作广陵尘。不意何郎至，黄泉重见春。
（来家歌人诗）

金闺久无主，罗袂坐生尘。愿作吹箫伴，同为骑凤人。
（穆讽县主就礼）

朱轩下长路，青草启孤坟。犹胜阳台上，空看朝暮云。
（县主许穆诗）

露草芊芊，颓莹未迁。自我居此，于今几年。与君先祖，
畴昔恩波。死生契阔，忽此相过。谁谓佳期，寻当别离。
俟君之北，携手同归。（县主请迁葬诗）

· 全唐诗 ·

伊彼维扬，在天一方。驱马悠悠，忽来异乡。情通幽显，
获此相见。义感畴昔，言存缱绻。清江桂洲，可以遨游。
惟子之故，不遑淹留。（穆答县主）

卷 866_28【与李章武赠答诗】

王氏妇

怨鸯绮，知结几千丝。别后寻交颈，应伤未别时。
（章武赠王氏鸳鸯绮）

捻指环，相思见环重相忆。愿君永持玩，循环无终极。
（王氏答李章武白玉指环）

河汉已倾斜，神魂欲超越。愿郎更回抱，终天从此诀。
（王氏赠别李章武）

分从幽显隔，岂谓有佳期。宁辞重重别，所叹去何之。
（章武答王氏）

昔辞怀后会，今别便终天。新悲与旧恨，千古闭穷泉。
（王氏再赠章武）

后期杳无约，前恨已相寻。别路无行信，何因得寄心。
（章武再答王氏）

· 全唐诗 ·

水不西归月暂圆，令人惆怅古城边。萧条明早分岐路，
知更相逢何岁年。（章武怀念王氏）

卷 866_29【附：李助为章武赋】

李助

石沈辽海阔，剑别楚天长。会合知无日，离心满夕阳。

卷 866_30【与曾季衡冥会诗】

王丽真

五原分袂真吴越，燕拆莺离芳草歇。
年少烟花处处春，北邙空恨清秋月。

莎草青青雁欲归，玉腮珠泪洒临岐。
云鬟飘去香风尽，愁见莺啼红树枝。

卷 866_31【赠段何】

客户里女子

乐广清羸经几年，姹娘相托不论钱。

· 全唐诗 ·

轻盈妙质归何处，惆怅碧楼红玉钿。

卷 866_32【湖城厅吟】

密陀僧

黄帝上天时，鼎湖元在兹。七十二玉女，化作黄金芝。

卷 866_33【谢王轩】

西施

妾自吴宫还越国，素衣千载无人识。
当时心比金石坚，今日为君坚不得。

卷 866_34【附：王轩题西施石诗】

王轩

岭上千峰秀，江边细草春。今逢浣纱石，不见浣纱人。

· 全唐诗 ·

卷 866_35【附：轩诗】

王轩

佳人去千载，溪山久寂寞。野水浮白烟，岩花自开落。
猿鸟旧清音，风月闲楼阁。无语立斜阳，幽情入天幕。

卷 866_36【西施诗】

西施

高花岩外晓相鲜，幽鸟雨中啼不歇。
红云飞过大江西，从此人间怨风月。

卷 866_37【附：轩诗】

王轩

当时计拙笑将军，何事安邦赖美人。
一自仙葩入吴国，从兹越国更无春。

· 全唐诗 ·

卷 866_38【西施诗】

西施

云霞出没群峰外，鸥鸟浮沈一水间。
一自越兵齐振地，梦魂不到虎丘山。

卷 866_39【与萧旷冥会诗（甄后留别萧旷）】

甄后

玉箸凝腮忆魏宫，朱弦一弄洗清风。
明晨追赏应愁寂，沙渚烟销翠羽空。

卷 866_40【与萧旷冥会诗（织绡女诗）】

织绡女

织绡泉底少欢娱，更劝萧郎尽酒壶。
愁见玉琴弹别鹤，又将清泪滴真珠。

· 全唐诗 ·

卷 866_41 【与萧旷冥会诗（萧旷答诗）】

萧旷

红兰吐艳间夭桃，自喜寻芳数已遭。
珠珮鹊桥从此断，遥天空恨碧云高。

卷 866_42 【五原夜吟】

沙磧女子

云鬓消尽转蓬稀，埋骨穷荒失所依。
牧马不嘶沙月白，孤魂空逐雁南飞。

卷 866_43 【与颜濬冥会诗】

陈宫妃嫔

秋草荒台响夜蛩，白杨雕尽减悲风。
彩笺曾擘欺江总，绮阁尘清玉树空。

宝阁排云称望仙，五云高艳拥朝天。
清溪犹有当时月，应照琼花绽绮筵。

· 全唐诗 ·

素魄初圆恨翠娥，繁华浓艳竟如何。
南朝唯有长江水，依旧门前作逝波。

箫管清吟怨丽华，秋江寒月绮窗斜。
惭非后主题笺客，得见临春阁上花。

卷 866_44【驿楼诵诗】

湘中女子

红树醉秋色，碧溪弹夜弦。佳期不可再，风雨杳如年。

卷 866_45【赠杨蕴中】

薛涛

玉漏声长灯耿耿，东墙西墙时见影。
月明窗外子规啼，忍使孤魂愁夜永。

卷 866_46【葬后见形诗】

张太华

独卧经秋堕鬓蝉，白杨风起不成眠。

· 全唐诗 ·

寻思往日椒房宠，泪湿夜襟损翠钿。

卷 866_47【谢李若冲】

张太华

符吏匆匆叩夜扃，便随金简出幽冥。
蒙师荐拔恩非浅，领得生神九过经。

卷 866_48【幽恨诗】

安邑坊女

卜得上峡日，秋江风浪多。巴陵一夜雨，肠断木兰歌。

卷 866_49【和检诗】

韦检亡姬

春雨濛濛不见天，家家门外柳和烟。
如今肠断空垂泪，欢笑重追别有年。

· 全唐诗 ·

卷 866_50【附：检悼亡姬诗】

韦检

宝剑化龙归碧落，嫦娥随月下黄泉。
一杯酒向青春晚，寂寞书窗恨独眠。

卷 866_51【梦后自题】

韦检

白浪漫漫去不回，浮云飞尽日西颓。
始皇陵上千年树，银鸭金凫也变灰。

卷 866_52【与夫同咏诗】

苏检妻

楚水平如镜，周回白鸟飞。金陵几多地，一去不知归。

卷 866_53【与夫同咏诗】

苏检

还吴东去过澄城，楼上清风酒半醒。

· 全唐诗 ·

想得到家春已暮，海棠千树已凋零。

卷 866_54【冥会诗】

宫嫔

争不逢人话此身，此身长夜不知春。
自从国破家亡后，陇上惟添芳草新。

休说人间恨恋多，况逢佳客此相过。
堂中纵有千般乐，争及阳春一曲歌。

幽谷穷花似妾身，纵怀香艳吐无因。
多情公子能相访，应解回风暂借春。

恩情未足晓光催，数朵眠花未得开。
却羡一双金扼臂，得随人世出将来。

卷 866_55【与谢翱赠答诗】

金车美人

阳台后会杳无期，碧树烟深玉漏迟。
半夜香风满庭月，花前空赋别离诗。

相思无路莫相思，风里花开只片时。

· 全唐诗 ·

惆怅金闺却归去，晓莺啼断绿杨枝。

一纸华笺洒碧云，余香犹在墨犹新。空添满目凄凉事，
不见三山缥缈人。斜月照衣今夜梦，落花啼鸟去年春。
红闺更有堪愁处，窗上虫丝几上尘。

惆怅佳期一梦中，武陵春色尽成空。欲知离别偏堪恨，
只为音尘两不通。愁态上眉凝浅绿，泪痕侵脸落轻红。
双轮暂与王孙驻，明日西驰又向东。

卷 866_56【赠朋诗】

魏朋妻

孤坟临清江，每睹白日晚。松影摇长风，蟾光落岩甸。
故乡千里余，亲戚罕相见。望望空云山，哀哀泪如霰。
恨为泉台客，复此异乡县。愿言敦畴昔，勿以弃疵贱。

卷 866_57【题明月堂二首】

刘氏亡妇

蝉鬓惊秋华发新，可怜红隙尽埃尘。
西山一梦何年觉，明月堂前不见人。

· 全唐诗 ·

玉钩风急响丁东，回首西山似梦中。
明月堂前人不到，庭前一夜老秋风。

卷 866_58【诗（金陵黄进士梦遇台城故妓，白云今为吴神乐部）】

故台城妓

歌罢玉楼月，舞残金缕衣。匀钿收迸节，敛黛别重闱。
网断蛛犹织，梁春燕不归。那堪回首处，江步野棠飞。

卷 866_59【金陵词】

故台城妓

宫中细草香红湿，宫内纤腰碧窗泣。
唯有虹梁春燕雏，犹傍珠帘玉钩立。

卷 866_60【示宋善威】

无名女鬼

月落三株树，日映九重天。良夜欢宴罢，暂别庚申年。

· 全唐诗 ·

卷 866_61 【诗】

无名鬼

江上橈竿一百尺，山中楼台十二重。
山僧楼上望江上，指点橈竿笑杀侬。

仙人未必便仙去，还在人间人不知。
手把白须从两鹿，相逢却问姓名谁。

卷 866_62 【句】

稊华

柏堂新成乐未央，回来回去绕裴郎。

卷 866_63 【句】

张守中

薄命苏秦频去国，多情潘岳旋兴悲。

今夜若栖芳草径，为传幽意达王孙。

· 全唐诗 ·

卷 866_64【句】

无名鬼

荒花半落，松风晚清。

· 全唐诗 ·

第八百六十七卷

卷 867_1【浑家门客联句】

自与浑家邻，馨香遂满身。无心好清静，人用去灰尘。

--麻大

终朝每去依烟火，春至还归养子孙。--和且耶

曾向苻王笔端坐，尔来求食浑家门。--和且耶

卷 867_2【长须国驸马咏妻】

长须国驸马

花无叶不妍，女无须亦丑。丈人试遣惣无，未必不如惣有。

卷 867_3【原陵老翁吟】

原陵老翁

野田荆棘春，闺阁绮罗新。出没头上日，生死眼前人。

· 全唐诗 ·

欲知我家在何处，北邙松柏正为邻。

洛阳女儿罗绮多，无奈孤翁老去何，奈尔何。

正色鸿煮，神思化伐。穹施后承，光负玄设。呕沦吐萌，
垠倪散截。迷肠郗曲，雨对零霾噎。雀毁龟水，健驰御屈。
拿尾研动。袪袪晰晰。溜用秘功，以岭以穴。
拖薪伐药，莽櫟万茁。呕律则祥，佛伦惟萨。牡虚无有，
颐咽蕊屑。肇素未来，晦明兴灭。（狐书一）

五行七曜，成此闰余。上帝降灵，岁且溘徐。蛇蛻其皮，
吾亦神摅。九九六六，束身天除。何以充喉，吐纳太虚。
何以蔽踝，霞袂云裾。哀尔浮生，栲比荒墟。
吾复丽气，还形之初。在帝左右，道济忽诸。（狐书二）

卷 867_21【述怀】

严含质

昔为仙子今为虎，流落阴崖足风雨。
更将斑毳被余身，千载空山万般苦。

卷 867_22【题壁】

严含质

下玄八千亿甲子，丹飞先生严含质。谪下中天被斑革，

· 全唐诗 ·

六千甲子。血食涧饮厕猿狖，下浊界。景云元纪升太一。

卷 867_23【无题】

李微

偶因狂疾成殊类，灾患相仍不可逃。今日爪牙谁敢敌，
当时声迹共相高。我为异物蓬茅下，君已乘轺气势豪。
此夕溪山对明月，不成长啸但成号。

卷 867_24【维扬空庄四怪联句】

齐纨鲁缟如霜雪，寥亮高声予所发。--故杵
嘉宾良会清夜时，煌煌灯烛我能持。--灯台
清冷之泉候朝汲，桑纆相牵常出入。--水桶
爨薪贮泉相煎熬，充他口腹我为劳。--破铛

卷 867_25【柳藏经二绝句】

柳藏经

寒水停园沼，秋池满败荷。杜门穷典籍，所得事今多。

· 全唐诗 ·

谁谓三才贵，余观万化同。心虚嫌蠹食，年老怯狂风。

卷 867_26【太白山魔诤道士诗】

三秋稽颡叩真灵，龙虎交时金液成。
绛雪既凝身可度，蓬壶顶上彩云生。

卷 867_27【金缶魅诗】

色分蓝叶青，声比磬中鸣。七月初七夜，吾当示汝形。

卷 867_28【东阳夜怪诗（安智高咏聚雪为山）】

谁家扫雪满庭前，万壑千峰在一拳。
吾心不觉侵衣冷，曾向此中居几年。

· 全唐诗 ·

卷 867_29【东阳夜怪诗（安智高病中自述二首）】

拥褐藏名无定踪，流沙千里度衰容。
传得南宗心地后，此身应便老双峰。

为有阎浮珍重因，远离西国赴咸秦。
自从无力休行道，且作头陀不系身。

卷 867_30【东阳夜怪诗（卢倚马寄同侣二首）】

长安城东洛阳道，车轮不息尘浩浩。
争利贪前竞著鞭，相逢尽是尘中老。

日晚长川不计程，离群独步不能鸣。
赖有青青河畔草，春来犹得慰羁情。

卷 867_31【东阳夜怪诗（敬去文咏雪献曹州房）】

爰此飘飘六出公，轻琼冷絮舞长空。

· 全唐诗 ·

当时正逐秦丞相，腾踞川原喜北风。

卷 867_32【东阳夜怪诗（敬去文言志二首）】

事君同乐义同忧，那校糟糠满志休。
不是守株空待兔，终当逐鹿出林丘。

少年长负饥鹰用，内顾曾无宠鹤心。
秋草驱除思去宇，平原毛血兴从禽。

卷 867_33【东阳夜怪诗（奚锐金近作三首）】

舞镜争鸾彩，临场定鹘拳。正思仙仗日，翘首仰楼前。

养斗形如木，迎春质似泥。信如风雨在，何惮迹卑栖。

为脱田文难，常怀纪渚恩。欲知疏野态，霜晓叫荒村。

· 全唐诗 ·

卷 867_34【东阳夜怪诗】

乱鲁负虚名，游秦感宁生。候惊丞相喘，用识葛卢鸣。
黍稷滋农具，轩车乏道情。近来筋力退，一志在归耕。

卷 867_35【东阳夜怪诗】

为惭食肉主恩深，日晏蟠蛭卧锦衾。
且学志人知白黑，那将好爵动吾心。

卷 867_36【东阳夜怪诗（胃藏瓠题旧业诗）】

鸟鼠是家川，周王昔猎贤。一从离子卯，应见海桑田。

卷 867_37【田四郎求婚联句】

一点红裳出翠微，秋天云静月离离。 -- 田四郎

· 全唐诗 ·

天曹使者徒回首，何不从他九族卑。--(堂上人)

卷 867_38【黑驹别卢传素诗】

既食丈人粟，又饱丈人刍。今日相偿了，永离三恶途。

卷 867_39【笔精诗】

昔荷蒙恬惠，寻遭仲叔投。夫君不指使，何处觅银钩。

学问从君有，诗书自我传。须知王逸少，名价动千年。

能令音信通千里，解致龙蛇运八行。

惆怅江生不相赏，应缘自负好文章。

卷 867_40【二斑与宁茵赋诗】

晓读云水静，夜吟山月高。焉能履虎尾，岂用学牛刀。

· 全唐诗 ·

--宁茵

但得居林啸，焉能当路蹲。渡河何所适，终是怯刘琨。

--斑寅

无非悲甯戚，终是怯庖丁。若遇龚为守，蹄涔向北溟。

--斑特

卷 867_41【白田獭魅别村女诗】

潮来逐潮上，潮落在空滩。有来终有去，情易复情难。
肠断肠中子，明月秋江寒。

卷 867_42【邢君才旧宅三怪诗】

铁钲

昔日炎炎徒自知，今无烽灶欲何为。
可怜国柄全无用，曾见家人下第时。

卷 867_43【邢君才旧宅三怪诗】

破笛

当时得意气填心，一曲君前直万金。

· 全唐诗 ·

今日不如庭下竹，风来犹得学龙吟。

卷 867_44【邢君才旧宅三怪诗】

秃帚

头焦鬓秃但心存，力尽尘埃不复论。
莫笑今来同腐草，曾经终日扫朱门。

卷 867_45【维扬少年与孟氏赠答诗（孟氏游家园作）】

孟氏

可惜春时节，依然独自游。无端两行泪，长只对花流。

卷 867_46【维扬少年与孟氏赠答诗（孟氏赠答少年）】

孟氏

谁家少年儿，心中暗自欺。不道终不可，可即恐郎知。

· 全唐诗 ·

卷 867_47【维扬少年与孟氏赠答诗（少年答孟氏）】

少年

神女得张硕，文君遇长卿。逢时两相得，聊足慰多情。

卷 867_48【胡志忠题户】

恃勇祸必婴，恃强势必倾。胡为万金子，而与恶物争。
休将逝魄趋府庭，止于此馆归冥冥。

卷 867_49【高侍郎诗】

危冠高袖楚宫妆，独步闲庭逐夜凉。
自把玉簪敲砌竹，清歌一曲月如霜。

卷 867_50【吕氏宅妖誓师词】

天马斜飞度三止，上将横行击四方。

· 全唐诗 ·

輜车直入无回翔，六甲次第不乖行。

卷 867_51【袁少年诗（猿）】

风波千里阔，台榭半天高。此兴将何比，身知插羽毛。

峰峦多秀色，松桂足清声。自有山林趣，全忘城阙情。

罗浮南海外，昔日已闻之。千里来游览，幽情我自知。

卷 867_52【东柯院妖谿杜令】

虽共蒿兰伍，南朝有宗祖。莫打绿袍人，空中且歌舞。

堪怜木边土，非儿不似女。瘦马上高山，登临何自苦。

卷 867_53【嵩山小儿吟】

我本长生深山内，更何入他不二门。

· 全唐诗 ·

争如访取旧时伴，休更朝夕劳神魂。

卷 867_54【鱼腹丹书】

九登龙门山，三饮太湖水。毕竟不成龙，命负张胡子。

卷 867_55【鱼身字】

三度过海，两度上汉。行至勒漠，命属柏君。

卷 867_56【马作人语】

芦荻花，此花开后路无家。

卷 867_57【孙长史女与焦封赠答诗】

孙长史女

妾失鸳鸯伴，君方萍梗游。少年欢醉后，只恐苦相留。

· 全唐诗 ·

心常名宦外，终不耻狂游。误入桃源里，仙家争肯留。

鹊桥织女会，也是不多时。今日送君处，羞言连理枝。

但保同心结，无劳织锦诗。苏秦求富贵，自有一回时。

卷 867_58【石瓮寺灯魅诗】

凉风暮起骊山空，长生殿锁霜叶红。

朝来试入华清宫，分明忆得开元中。

金殿不胜秋，月斜石楼冷。谁是相顾人，褰帷吊孤影。

烟灭石楼空，悠悠永夜中。虚心怯秋雨，艳质畏飘风。

向壁残花碎，侵阶坠叶红。还如失群鹤，饮恨在雕笼。

卷 867_59【洛下女郎歌（红裳人）】

皎洁玉颜胜白雪，况乃当年对风月。

沈吟不敢怨春风，自叹容华暗消歇。

· 全唐诗 ·

卷 867_60【洛下女郎歌（白衣人）】

绛衣披拂露盈盈，淡染胭脂一朵轻。
自恨红颜留不住，莫怨春风道薄情。

卷 867_61【袁长宫女诗（摘萱草吟）】

彼见是忘忧，此看同腐草。青山与白云，方展我怀抱。

卷 867_62【袁长宫女诗（题峡山僧壁）】

刚被恩情役此心，无端变化几湮沈。
不如逐伴归山去，长笑一声烟雾深。

卷 867_63【真符女与申屠澄赠和诗（澄赠）】

一尉惭梅福，三年愧孟光。此情何所喻，川上有鸳鸯。

· 全唐诗 ·

卷 867_64【真符女与申屠澄赠和诗（女和）】

琴瑟情虽重，山林志自深。常忧时节变，辜负百年心。

卷 867_65【天桃诗】

铅华久御向人间，欲舍铅华更惨颜。
纵有青丘吟夜月，无因重照旧云鬟。

卷 867_66【青衣春条诗】

幽室锁妖艳，无人兰蕙芳。春风三十载，不尽罗衣香。

卷 867_67【明器婢诗】

独持巾栉掩玄关，小帐无人烛影残。

· 全唐诗 ·

昔日罗衣今化尽，白杨风起陇头寒。

卷 867_68【妙香词】

劝君酒莫辞，花落抛旧枝。只有北邙山下月，
清光到死也相随。

卷 867_69【庐山女赠朱朴（鲤鱼）】

但持冰洁心，不识风霜冷。任是怀礼容，无人顾形影。

知君久积池塘梦，遣我方思变动来。
操执若同颜叔子，今宵宁免泪盈腮。

卷 867_70【青萝帐女赠穆郎（榕树）】

团圆今夕色光辉，结了同心翠带垂。
此后莫教尘点染，他年长照岁寒姿。

· 全唐诗 ·

卷 867_71【褰帐】

揉蓝绿色曲尘开，静见三星入坐来。
桂影已圆攀折后，子孙长作栋梁材。

卷 867_72【题碧花笺】

珠露素中书缱绻，青萝帐里寄鸳鸯。
自怜孤影清秋夕，洒泪裴回滴冷光。

卷 867_73【白蘋洲碧衣女子吟】

碧水色堪染，白莲香正浓。分飞俱有恨，此别几时逢。
藕隐玲珑玉，花藏缥缈容。何当假双翼，声影暂相从。

· 全唐诗 ·

卷 867_74【新林驿女吟示欧阳训（生飞虫）】

月明阶悄悄，影只腰身小。谁是鸢翔人，愿为比翼鸟。

卷 867_75【击盘歌送欧阳训酒】

飞燕身轻未是轻，枉将弱质在岩扃。
今来不得同鸳枕，相伴神魂入杳冥。

卷 867_76【白衣女子木叶上诗】

桃花洞口开，香蕊落莓苔。佳景虽堪玩，萧郎殊未来。

卷 867_77【席上歌】

洞府深沈春日长，山花无主自芬芳。

· 全唐诗 ·

凭阑寂寂看明月，欲种桃花待阮郎。

卷 867_78【凤凰台怪和歌四首】

深闺闲锁难成梦，那得同衾共绣床。
一自与郎江上别，霜天更自觉宵长。

愁听黄莺唤友声，空闺曙色梦初成。
窗间总有花笺纸，难寄妾心字字明。

寂静璇闺度岁年，并头莲叶又如钱。
愁人独处那堪此，安得君来独枕眠。

卧病匡床香屡添，夜深犹有一丝烟。
怀君无计能成梦，更恨砧声到枕边。

· 全唐诗 ·

第八百六十八卷

卷 868_1【梦丹书】

李亨

厥不云乎，惟其惟时。上天所保，福祿不亏。

卷 868_2【梦黄衣童子歌】

李豫

中五之德方峨峨，胡胡呼呼何奈何。

卷 868_3【梦扬州乐妓和诗】

刘禹锡

花作婵娟玉作妆，风流争似旧徐娘。
夜深曲曲湾湾月，万里随君一寸肠。

· 全唐诗 ·

卷 868_4【梦中美人歌】

邢凤

长安少女踏春阳，何处春阳不断肠。
舞袖弓弯浑忘却，罗衣空换九秋霜。

卷 868_5【梦中诗】

石季武

耸轡排金阙，乘轩上汉槎。浮名何足恋，高举入烟霞。

卷 868_6【葬西施挽歌】

王炎

西望吴王国，云书凤字牌。连江起珠帐，择地葬金钗。
满地红心草，三层碧玉阶。春风无处所，凄恨不胜怀。

卷 868_7【秦梦诗三首·挽公主】

沈亚之

泣葬一枝红，生同死不同。金钿坠芳草，香绣满春风。

· 全唐诗 ·

旧日闻箫处，高楼当月中。梨花寒食夜，深闭翠微宫。

卷 868_8【秦梦诗三首·别穆公】

沈亚之

击髀舞，恨满烟光无处所。泪如雨，欲拟著辞不成语。
金凤衔红旧绣衣，几度宫中同看舞。人间春日正欢乐，
日暮东风何处去。

卷 868_9【秦梦诗三首·题宫门】

沈亚之

君王多感放东归，从此秦宫不复期。
春景似伤秦丧主，落花如雨泪燕脂。

卷 868_10【梦中诗】

卢献卿

卜筑郊原古，青山无四邻。扶疏绕屋树，寂寞独归人。

· 全唐诗 ·

卷 868_11【梦为吴泰伯作胜儿歌】

刘景复

繁弦已停杂吹歇，胜儿调弄逻娑拨。四弦拢拈三五声，
唤起边风驻明月。大声嘈嘈奔淅淅，浪蹙波翻倒溟渤。
小弦切切怨颼颼，鬼哭神悲秋瑟窳。倒腕斜挑掣流电，
春雷直戛腾秋鹞。汉妃徒得端正名，秦女虚夸有仙骨。
我闻天宝十年前，凉州未作西戎窟。麻衣右衽皆汉民，
不省胡法暂蓬勃。太平之末狂胡乱，犬豕崩腾恣唐突。
玄宗未到万里桥，东洛西京一时没。汉土民皆没为虏，
饮恨吞声空嗚咽。时看汉月望汉天，怨气冲星成彗孛。
国门之西八九镇，高城深垒闭闲卒。河湟咫尺不能收，
挽粟推车徒兀兀。今朝闻奏凉州曲，使我心神暗超忽。
胜儿若向边塞弹，征人泪血应阑干。

卷 868_12【梦中辞】

郭仁表

飘风暴雨可思惟，鹤望巢门敛翅飞。吾道之宗正可依，
万物之先数在兹，不能行此欲何为。

· 全唐诗 ·

卷 868_13【梦崔嘏妻诗】

国邵南

莫以真留妾，从他理管弦。容华难久驻，知得几多年。

卷 868_14【梦白衣妇人歌词】

卢绛

玉京人去秋萧索，画檐鹊起梧桐落。敲枕悄无言，
月和残梦圆。背灯惟暗泣，甚处砧声急。眉黛小山攒，
芭蕉生暮寒。

清风明月夜深时，箕帚卢郎恨已迟。
他日孟家坡上约，再来相见是佳期。

卷 868_15【梦舜抚琴歌】

张生

南风薰薰兮草芊芊，妙有之音兮归清弦。
荡荡之教兮由自然，熙熙之化兮吾道全，薰薰兮思何传。

· 全唐诗 ·

卷 868_16【梦康仙示诗】

漳郡守

卖药因循未得还，却因耽酒到人间。
有心只恋琵琶坂，无意更登山上山。

卷 868_17【梦中歌】

白氏

今夕何夕，存耶没耶？良人去兮天之涯，
园树伤心兮三见花。

卷 868_18【梦中歌】

张生妻

叹衰草，络纬声切切。良人一去不复还，
今夕坐愁鬓如雪。（为长须人歌）

劝君酒，君莫辞。落花徒绕枝，流水无返期。
莫恃少年时，少年能几时。（为白面少年歌）

· 全唐诗 ·

怨空闺，秋日亦难暮。夫婿断音书，遥天雁空度。
(为紫衣人歌)

切切夕风急，露滋庭草湿。良人去不回，焉知掩闺泣。
(为黑衣胡人歌)

萤火穿白杨，悲风入荒草。疑是梦中游，愁迷故园道。
(为绿衣少年歌)

花前始相见，花下又相送。何必言梦中，人生尽如梦。
(长须人歌答)

卷 868_19【梦王尚书口授吟】

张氏女

鬟梳闹扫学宫妆，独立闲庭纳夜凉。
手把玉簪敲砌竹，清歌一曲月如霜。

卷 868_20【歌】

病狂人

踏阳春，人间三月雨和尘。阳春踏，秋风起，
肠断人间白发人。

· 全唐诗 ·

五灵华，晓玲珑，天府由来汝府中。惆怅此情言不尽，
一丸萝卜火吾宫。

卷 868_21【题禅窟兰若】

陈季卿

霜钟鸣时夕风急，乱鸦又望寒林集。
此时辍棹悲且吟，独向莲华一峰立。

卷 868_22【题潼关普通院门】

陈季卿

度关悲失志，万绪乱心机。下坂马无力，扫门尘满衣。
计谋多不就，心口自相违。已作羞归计，还胜羞不归。

卷 868_23【江亭晚望题书斋】

陈季卿

立向江亭满目愁，十年前事信悠悠。田园已逐浮云散，
乡里半随逝水流。川上莫逢诸钓叟，浦边难得旧沙鸥。
不缘齿发未迟暮，吟对远山堪白头。

· 全唐诗 ·

卷 868_24【别妻】

陈季卿

月斜寒露白，此夕去留心。酒至添愁饮，诗成和泪吟。
离歌凄凤管，别鹤怨瑶琴。明夜相思处，秋风吹半衾。

卷 868_25【别兄弟】

陈季卿

谋身非不早，其奈命来迟。旧友皆霄汉，此身犹路岐。
北风微雪后，晚景有云时。惆怅清江上，区区趁试期。

卷 868_26【梦中句】

周延翰

紫髯之伴有丹砂。

卷 868_27【梦中和句】

任玠

故国路遥归去来（山叟），春风天远望不尽。（玠）

· 全唐诗 ·

卷 868_28【梦中语】

杜牧

辞春不及秋，昆脚与皆头。

卷 868_29【梦中诗】

胥偃

昔作树头花，今为冢中骨。

卷 868_30【梦中语】

曾崇范妻

田头有鹿迹，由尾著日炙。

卷 868_31【纪梦句】

张孜

上天知我忆其人，使向人间梦中见。

· 全唐诗 ·

第八百六十九卷

卷 869_1 【嘲苏世长】

李渊

名长意短，口正心邪。弃忠贞于郑国，忘信义于吾家。

卷 869_2 【戏题画】

李旦

唤出眼，何用苦深藏。缩却鼻，何畏不闻香。

卷 869_3 【嘲萧瑀射】

欧阳询

急风吹缓箭，弱手驭强弓。欲高翻复下，应西还更东。
十回俱著地，两手并擎空。借问谁为此，乃应是宋公。

· 全唐诗 ·

卷 869_4 【与欧阳询互嘲（无忌嘲询）】

长孙无忌

耸膊成山字，埋肩不出头。谁家麟角上，画此一猕猴。

卷 869_5 【与欧阳询互嘲（询嘲无忌）】

欧阳询

索头连背暖，漫裆畏肚寒。只因心浑浑，所以面团团。

卷 869_6 【为温仆射嘲竹】

裴略

竹，风吹青肃肃。凌冬叶不凋，经春子不熟。
虚心未得待国土，皮上何须生节目。

卷 869_7 【又嘲屏墙】

裴略

高下八九尺，东西六七步。突兀当厅坐，几许遮贤路。

· 全唐诗 ·

卷 869_8 【嘲崔左丞】

省吏

崔子曲如钩，随例得封侯。髀上全无项，胸前别有头。

卷 869_9 【嘲高士廉木履】

选人

刺鼻何曾嚏，蹋面不知嗔。高生两个齿，自谓得胜人。

卷 869_10 【书化度藏院壁】

裴玄智

将肉遣狼守，置骨向狗头。自非阿罗汉，焉能免得偷。

卷 869_11 【嘲许子儒】

窦昉

不能专习礼，虚心强觅阶。一年辞爵弁，半岁履麻鞋。

· 全唐诗 ·

瓦恶频蒙 瓠，墙虚屡被叉。映树便侧睡，过匱即放乖。
岁暮良工毕，言是越朋侪。今日纶言降，方知愚计嗃。

卷 869_12【与赵神德互嘲】

梁宝

赵神德，天上既无云，闪电何以无准则？--梁宝
向者入门来，案后惟见一挺墨。--赵神德
官里料朱砂，半眼供一国。--梁宝
磨公小拇指，涂得太社北。--赵神德

卷 869_13【与讲师互谑】

释元康

甘桃不结实，苦李压低枝。--释元康
轮王千个子，巷伯勿孙儿。--讲师

卷 869_14【咏兴善寺佛殿灾】

李荣

道善何曾善，言兴且不兴。如来烧赤尽，惟有一群僧。

· 全唐诗 ·

卷 869_15【叙可笑事】

张元一

朱前疑著绿，逯仁杰著朱。阎知微骑马，马吉甫骑驴。
将名作姓李千里，将姓作名吴栖梧。左台胡御史，
右台御史胡。

卷 869_16【嘲武懿宗】

张元一

长弓短度箭，蜀马临阶骗。去贼七百里，隈墙独自战。
忽然逢著贼，骑猪向南趣。

卷 869_17【又嘲】

张元一

裹头极草草，掠鬓不葦葦。未见桃花面皮，漫作杏子眼
孔。

· 全唐诗 ·

卷 869_18【咏静乐县主】

张元一

马带桃花锦，裙衔绿草罗。定知帟帽底，仪容似大哥。

卷 869_19【嘲格辅元】

杜易简

有耻宿龙门，精彩先瞰浑。眼瘦呈近店，睡响彻遥林。
埽囊将旧识，制被异新婚。谁言骢马使，翻作蛰熊蹲。

卷 869_20【始平谐诗】

石抱忠

平明发始平，薄暮至何城。库塔朝云上，晃池夜月明。
略约桥头逢长史，棂星门外揖司兵，一群县尉驴骡骤，
数个参军鹅鸭行。

· 全唐诗 ·

卷 869_21【咏傅岩监祠】

梁载言

闻道监中霤，初言是大祠。很傍索传马，僦动出安徽。
卫司无帟幕，供膳乏鲜肥。形容消瘦尽，空往复空归。

卷 869_22【嘲崔生】

刘行敏

崔生犯夜行，武侯正严更。幞头拳下落，高髻掌中擎。
杖迹胸前出，绳文腕后生。愁人不惜夜，随意晓参横。

卷 869_23【又嘲杨文瓘】

刘行敏

武陵敬爱客，终宴不知疲。遣共浑王饮，错宴延陀儿。
始被鸿胪识，终蒙御史知。精神既如此，长叹复何为。

· 全唐诗 ·

卷 869_24 【嘲李叔慎、贺兰僧伽、杜善贤（善贤长安令三人皆黑）】

刘行敏

叔慎骑乌马，僧伽把漆弓。唤取长安令，共猎北山熊。

卷 869_25 【嘲父】

陆子

陆余庆，笔头无力觜头硬。一朝受辞讼，十日判不竟。

卷 869_26 【回波词】

杨廷玉

回波尔时廷玉，打獠取钱未足。
阿姑婆见作天子，傍人不得柰触。

卷 869_27 【回波词】

中宗朝优人

回波尔时栲栳，怕妇也是大好。

· 全唐诗 ·

外边只有裴谈，内里无过李老。

卷 869_28【乞金鱼词】

崔日用

台中鼠子直须谗，信足跳梁上壁龕。倚翻灯脂污张五，
还来啗带报韩三。莫浪语，直王相。大家必若赐金龟，
卖却猫儿相报赏。

卷 869_29【又赐宴自歌】

崔日用

东馆总是鹄鸾，南台自多杞梓。日用读书万卷，
何忍不蒙学士。墨制帘下出来，微臣眼看喜死。

卷 869_30【咏痴】

吴人

榆儿复榆妇，造屋兼造车。十七八九夜，还书复借书。

· 全唐诗 ·

卷 869_31 【歇后】

封抱一

面作天地玄，鼻有雁门紫。既无左达承，何劳罔谈彼。

卷 869_32 【送司功入京】

魏崇裕

崇裕有幸会，得遇明流行。司土向京去，旷野哭声哀。

卷 869_33 【岭南归后献诗】

权龙褒

龙褒有何罪，天恩放岭南。敕知无罪过，追来与将军。

卷 869_34 【初到沧州呈州官】

权龙褒

遥看沧海城，杨柳郁青青。中央一群汉，聚坐打杯觥。

· 全唐诗 ·

卷 869_35【秋日述怀】

权龙褒

檐前飞七百，雪白后园强。饱食房里侧，家粪集野螂。

卷 869_36【喜雨】

权龙褒

暗去也没雨，明来也没云。日头赫赤出，地上绿氤氲。

卷 869_37【皇太子夏日赐宴诗】

权龙褒

严霜白浩浩，明月赤团团。

卷 869_38【哭李峤诗】

崔泰之

台阁神仙地，衣冠君子乡。昨朝犹对坐，今日忽云亡。

· 全唐诗 ·

魂随司命鬼，魄逐见阎王。此时罢欢笑，无复向朝堂。

卷 869_39【咏尹字（颋幼年，有京兆尹过父瑰命咏尹字）】

苏颋

丑虽有足，甲不全身。见君无口，知伊少人。

卷 869_40【咏王主敬】

张敬忠

有意嫌兵部，专心望考功。谁知脚趺蹬，却落省墙东。

卷 869_41【嘲邵景、萧嵩】

韦铤

一双胡子著绯袍，一个须多一鼻高。
相对厅前捺且立，自惭身品世间毛。

· 全唐诗 ·

卷 869_42 【嘲韦铤】

邵景

飘风忽起团团旋，倒地还如著脚馐。
莫怪殿上空行事，却为元非五品才。

卷 869_43 【咏毁天枢】

李休烈

天门街上倒天枢，火急先须卸火珠。
计合一条麻线挽，何劳两县索人夫。

卷 869_44 【与李全交诗（全交，监察御史）】

石惠泰

御史非常任，参军不久居。待君迁转后，此职还到余。

卷 869_45 【嘲刘文树】

黄幡绰

可怜好个刘文树，髭须共颔颐别住。

· 全唐诗 ·

文树面孔不似猢猻，猢猻面孔强似文树。

卷 869_46【尚书省门吟】

祖咏

落去他，两两三三戴帽子。
日暮祖侯吟一声，长安竹柏皆枯死。

卷 869_47【上马当山神】

王昌龄

青骢一匹昆仑牵，奏上大王不取钱。
直为猛风波滚骤，莫怪昌龄不下船。

卷 869_48【窃李义府诗】

张怀庆

生情镂月为歌扇，出性裁云作舞衣。
照镜自怜回雪影，来时好取洛川归。

· 全唐诗 ·

卷 869_49【答朝士】

贺知章

钁镂银盘盛蛤蜊，镜湖莼菜乱如丝。
乡曲近来佳此味，遮渠不道是吴儿。

卷 869_50【和知章诗】

顾况

钁镂银盘盛炒虾，镜湖莼菜乱如麻。
汉儿女嫁吴儿妇，吴儿尽是汉儿爷。

卷 869_51【续茅山秀才吟】

顾况

驻马上山阿（茅山秀才），风来屎气多。

· 全唐诗 ·

卷 869_52【樱桃子诗】

史思明

樱桃子，半赤半已黄。一半与怀王，一半与周至。

· 全唐诗 ·

第八百七十卷

卷 870_1 【讥元载诗】

高亭

上元官吏务剥削，江淮之人皆白著。

卷 870_2 【嘲赵谦光】

贺遂涉

员外由来美，郎中望亦优。宁知粉署里，翻作土山头。

卷 870_3 【答贺遂涉（时遂涉为户部员外，谦光答此）】

赵谦光

锦帐随情设，金炉任意熏。唯愁员外置，不应列星文。

· 全唐诗 ·

卷 870_4 【上浙东孟尚书】

孔颢

有个将军不得名，唯教健卒喝书生。
尚书近日清如镜，天子官街不许行。

卷 870_5 【嘲柳州柳子厚】

吕温

柳州柳刺史，种柳柳江边。柳管依然在，千秋柳拂天。

卷 870_6 【嘲黔南观察南卓（一云卓故人效吕温作）】

吕温

终南南太守，南郡在云南。闲向南亭醉，南风变俗谈。

卷 870_7 【戏简朱坛诗】

张祜

昔人有玉碗，击之千里鸣。今日睹斯文，碗有当时声。

· 全唐诗 ·

卷 870_8【戏颜郎官骑猎诗】

张祜

忽闻射猎出军城，人著戎衣马带缨。
倒把角弓呈一箭，满山狐兔当头行。

卷 870_9【嘲张祜】

朱冲和

白在东都元已薨，兰台风阁少人登。
冬瓜堰下逢张祜，牛屎堆边说我能。

卷 870_10【嘲妓】

崔涯

虽得苏方木，犹贪玳瑁皮。怀胎十个月，生下昆仑儿。

布袍披袄火烧毡，纸补箜篌麻接弦。
更著一双皮屐子，纆梯纆榻出门前。

· 全唐诗 ·

卷 870_11 【嘲李端端】

崔涯

黄昏不语不知行，鼻似烟窗耳似铛。
独把象牙梳插鬓，昆仑山上月初明。

觅得黄骝鞞绣鞍，善和坊里取端端。
扬州近日浑成差，一朵能行白牡丹。

卷 870_12 【咏崔云娘】

李宣古

何事最堪悲，云娘只首奇。瘦拳抛令急，长啸出歌迟。
只见肩侵鬓，唯忧骨透皮。不须当户立，头上有钟道。

卷 870_13 【嘲妓（牧罢宣州幕，经陕，有酒妓肥硕，牧赠此诗）】

杜牧

盘古当时有远孙，尚令今日逞家门。一车白土将泥项，
十幅红旗补破褌。瓦官寺里逢行迹，华岳山前见掌痕。

· 全唐诗 ·

不须惆怅忧难嫁，待与将书问乐坤。

卷 870_14【嘲游使君】

卢肇

白帝城头二月时，忍教清醒看花枝。
莫言世上无袁许，客子由来是相师。

卷 870_15【嘲李场题名】

韦蟾

渭水秦山照眼明，希仁何事寡诗情。
只因学得虞姬婿，书字才能记姓名。

卷 870_16【闻鹿鸣互谑】

严震

釜戴山中鹿又鸣，--中表
此际多应到表兄。--严震
表兄不是严家子，合是三兄与四兄。--中表

· 全唐诗 ·

卷 870_17【及第后寄李绅】

章孝标

及第全胜十政官，金鞍镀了出长安。
马头渐入扬州郭，为报时人洗眼看。

卷 870_18【答章孝标】

李绅

假金只用真金镀，若是真金不镀金。
十载长安得一第，何须空腹用高心。

卷 870_19【戏柳棠】

杨汝士

文章漫道能吞凤，杯酒何曾解吃鱼。
今日梓州张社会，应须遭这老尚书。

· 全唐诗 ·

卷 870_20【答杨尚书】

柳棠

未向燕台逢厚礼，幸因社会接余欢。
一鱼吃了终无愧，鲲化为鹏也不难。

卷 870_21【又忤杨尚书诗】

柳棠

莫言名位未相侔，风月何曾阻献酬。
前辈不须轻后辈，靖安今日在衡州。

卷 870_22【嘲郭凝素】

朱泽

三春桃李本无言，苦被残阳鸟雀喧。
借问东邻效西子，何如郭素拟王轩。

· 全唐诗 ·

卷 870_23【纪中表试案】

郑光业

新糊案子，其白如银。入试出试，千春万春。

卷 870_24【醉题广州使院】

郑愚

数年百姓受饥荒，太守贪残似虎狼。
今日海隅鱼米贱，大须惭愧石榴黄。

卷 870_25【拟权龙褒体赠鄆县李令及寄朝右（李令因之休官）】

郑愚

鄆县李长官，横琴膝上弄。不闻有政声，但见手子动。

卷 870_26【题沧浪峡榜】

郑仁表

分峡东西路正长，行人名利火然汤。

· 全唐诗 ·

路傍著板沧浪峡，真是将闲搅撩忙。

卷 870_27【戏妻族语不正】

胡曾

呼十却为石，唤针将作真。忽然云雨至，总道是天因。

卷 870_28【婢仆诗】

李昌符

春娘爱上酒家楼，不怕归迟总不忧。
推道那家娘子卧，且留教住待梳头。

不论秋菊与春花，个个能噏空腹茶。
无事莫教频入库，一名闲物要些些。

卷 870_29【嘲郑僂妓】

孙子多

相公经文复经武，常侍好今兼好古。
昔人曾闻阿武婆，今日亲见阿婆舞。

· 全唐诗 ·

卷 870_30【嘲赵璘】

薛能

巡关每傍擐蒲局，望月还登乞巧楼。
第一莫教娇太过，缘人衣带上人头。

不知原在鞍轿里，将谓空驮席帽归。

火炉床上平身立，便与夫人作镜台。

卷 870_31【口号】

薛能

素脊鸣秋杖，乌靴响暮厅。--薛能
刃飞三尺雪，白日落文星。--秦宗权

卷 870_32【嘲归仁绍龟诗】

皮日休

硬骨残形知几秋，尸骸终是不风流。
顽皮死后钻须遍，都为平生不出头。

· 全唐诗 ·

卷 870_33【咏螃蟹呈浙西从事】

皮日休

未游沧海早知名，有骨还从肉上生。
莫道无心畏雷电，海龙王处也横行。

卷 870_34【题中书壁】

郑瓘

侧坡蛆蛄蝓，蚊子竞来拖。一朝白雨中，无钝无喽罗。

卷 870_35【别庐州郡人】

郑瓘

唯有两行公廨泪，一时洒向渡头风。

卷 870_36【戏答成汭】

徐彦若

南海黄茅瘴，不死成和尚。

· 全唐诗 ·

卷 870_37【醉中谑浙江廉使】

崔立言

山夫留意向丹梯，连帅邀来出药畦。
常见浙东夸镜水，镜湖元在浙江西。

卷 870_38【戏题盱眙邵明府壁】

韦鹏翼

岂肯闲寻竹径行，却嫌丝管好蛙声。
自从煮鹤烧琴后，背却青山卧月明。

卷 870_39【题大梁临汴驿】

姚崧

近日侯门不重才，莫将文艺拟为媒。
相逢若要如胶漆，不是红妆即拨灰。

· 全唐诗 ·

卷 870_40【题仙娥驿】

李日新

商山食店大悠悠，陈鹄馐锣古餤头。
更有台中牛肉炙，尚盘数脔紫光球。

卷 870_41【嘲染家】

柳逢

紫绿终朝染，因何不识非。莆田竹木贵，背负十柴归。

卷 870_42【赠漳州崔使君乡饮翻韵诗】

黎瓘

惯向溪边折柳杨，因循行客到州漳。
无端触忤王衙押，不得今朝看饮乡。

卷 870_43【示妓榜子】

张保胤

绿罗裙下标三棒，红粉腮边泪两行。

· 全唐诗 ·

叉手向前咨大使，这回不敢恼儿郎。

卷 870_44【又留别同院】

张保胤

忆昔当年富贵时，如今头脑尚依稀。布袍破后思宫内，
锦袴穿时忆御衣。鹓子背钻高力士，婵娟翻画太真妃。
如今憔悴离南海，恰似当时幸蜀时。

卷 870_45【桂州筵上赠胡予女】

陆岩梦

自道风流不可攀，却堪蹙额更颓颜。眼睛深却湘江水，
鼻孔高于华岳山。舞态固难居掌上，歌声应不绕梁间。
孟阳死后欲千载，犹在佳人觅往还。

卷 870_46【戏答朝士】

李都

华絨千里到荆门，章草纵横任意论。应笑钟张虚用力，
却教羲献枉劳魂。惟堪爱惜为珍宝，不敢传留误子孙。

· 全唐诗 ·

深荷故人相厚处，天行时气许教吞。

卷 870_47【嘲僧惟恭】

荆人

灵岵作尽业，惟恭继其迹。地狱千万重，莫厌排头入。

卷 870_48【题酒户修孔庙状】

冯道幕客

槐影参差覆杏坛，儒门子弟尽高官。
却教酒户重修庙，觅我惭惶也不难。

卷 870_49【孔庙口号】

李花开

破落三间屋，萧条一旅人。不知负何事，生死厄于陈。

· 全唐诗 ·

卷 870_50【答妻】

冯晖

休说办不办，且看瓮里飞出雁。

卷 870_51【题僧院】

李涛

走却坐禅客，移将不动尊。世间颠倒事，八万四千门。

卷 870_52【咏垂丝蜘蛛嘲云辨僧】

杨苕萝

吃得肚婴撑，寻思绕寺行。空中设罗网，只待杀众生。

卷 870_53【自嘲绝句】

冯涓

取水郎中何日了，破柴员外几时休。

· 全唐诗 ·

早知蜀地区嫩与，悔不长安大比丘。

卷 870_54【哭亡将诗】

卢延让

自是硃砂发，非干骇石伤。牒高身上职，碗大背边创。

卷 870_55【咏王给事】

蒋贻恭

厥父元非道郡奴，允光何事太侏儒。
可中与个皮裈著，擎得天王左脚无。

卷 870_56【咏金刚】

蒋贻恭

扬眉斗目恶精神，捏合将来恰似真。
刚被时流借拳势，不知身自是泥人。

· 全唐诗 ·

卷 870_57【咏伧背子】

蒋贻恭

出得门来背拄天，同行难可与差肩。
若教倚向闲窗下，恰似箜篌不著弦。

卷 870_58【咏安仁宰捣蒜】

蒋贻恭

安仁县令好诛求，百姓脂膏满面流。半破磁缸成醋酒，
死牛肠肚作馒头。帐生岁取餐三顿，乡老盘庚犯五瓯。
半醉半醒齐出县，共伤涂炭不胜愁。

卷 870_59【五门街望有题】

蒋贻恭

我皇开国十余年，一辈超升炙手欢。
闲向五门楼下望，衙官骑马使衙官。

· 全唐诗 ·

卷 870_60【谢郎中惠茶】

蒋贻恭

三斤绿茗赐贻恭，一种颁沾事不同。
想料肠怀无答处，披毛戴角谢郎中。

卷 870_61【咏虾蟆】

蒋贻恭

坐卧兼行总一般，向人努眼太无端。
欲知自己形骸小，试就蹄涔照影看。

卷 870_62【住名山日陈情上府主高太保】

蒋贻恭

名山主簿实堪愁，难咬他家大骨头。
米纳功南钱纳府，只看江面水东流。

· 全唐诗 ·

卷 870_63【咏刺猬】

李贞白

行似针毡动，卧若栗球圆。莫欺如此大，谁敢便行拳。

卷 870_64【谒贵公子，不礼，书格子屏风】

李贞白

道格何曾格，言糊又不糊。浑身总是眼，还解识人无。

卷 870_65【咏月】

李贞白

当途当途见，芜湖芜湖见。八月十五夜，一似没柄扇。

卷 870_66【咏狗蚤】

李贞白

与虱都来不较多，撮挑筋斗太喽罗。

· 全唐诗 ·

忽然管著一篮子，有甚心情那你何。

卷 870_67【咏罌粟子】

李贞白

倒排双陆子，希插碧牙筹。既似牺牛乳，又如铃马兜。
鼓捶并瀑箭，直是有来由。

卷 870_68【咏蟹】

李贞白

蝉眼龟形脚似蛛，未曾正面向人趋。
如今钉在盘筵上，得似江湖乱走无。

卷 870_69【示女诗】

郾城令

深宫富贵事风流，莫忘生身老骨头。
因与太师欢笑处，为吾方便觅彭州。

· 全唐诗 ·

卷 870_70【寄女】

李令

有人教我向衡阳，一度思归欲断肠。
为报艳妻兼少女，与吾觅取朗州场。

卷 870_71【讽刘炎索贿诗】

太守

未到桃源时，长忆出家景。及到桃源了，还似鉴中影。

卷 870_72【被按自悔诗】

刘炎

早知太守如狼虎，猎取膏粱以啖之。

· 全唐诗 ·

第八百七十一卷

卷 871_1 【与王仙客互嘲（二人相友善，互以姓相嘲）】

甘洽

王，计尔应姓田。为你面拨獭，抽却你两边。 -- 甘洽
甘，计尔应姓丹。为你头不曲，回脚向上安。 -- 仙客

卷 871_2 【题濠州高塘馆（敬爱为御史，过宿处）】

阎敬爱

借问襄王安在哉，山川此地胜阳台。
今宵寓宿高塘馆，神女何曾入梦来。

卷 871_3 【题敬爱诗后】

李和风

高唐不是这高塘，淮畔荆南各异方。

· 全唐诗 ·

若向此中求荐枕，参差笑杀楚襄王。

卷 871_4【答日休皮字诗】

归氏子

八片尖裁浪作球，火中燖了水中揉。
一包闲气如长在，惹踢招拳卒未休。

卷 871_5【谑池毫二州宾佐兼寄宣武军掌书记李昼】

张鲁封

杜叟学仙轻蕙质，韦公事佛畏青娥。
乐营却是闲人管，两地风情日渐多。

卷 871_6【戏酬张鲁封】

李昼

秋浦亚卿颜叔子，谯都中宪老桑门。
如今柳巷通车马，唯恐他时立棘垣。

· 全唐诗 ·

卷 871_7 【即事】

杨鸾

白日苍蝇满饭盘，夜间蚊子又成团。
每到更深人静后，定来头上咬杨鸾。

卷 871_8 【嘲周顒】

座客

龙津掉尾十年劳，声价当时斗月高。
惟有红妆回舞手，似持霜刀向猿猱。

卷 871_9 【和座客】

周顒

十载文场敢惮劳，宋都回鹄为风高。
今朝甘被花枝笑，任道尊前爱缚猱。

· 全唐诗 ·

卷 871_10【答或人】

张鷟

宁可且将朱唇饮酒，谁能逐你黑齿常之。

卷 871_11【嘲崔嘏】

施肩吾

二十九人及第，五十七眼看花。

卷 871_12【岭南诗句】

苏芸

郭里多榕树，街中足使君。

卷 871_13【谐诗逸句】

包贺

雾是山巾子，船为水靽鞋。

· 全唐诗 ·

棹摇船掠鬓，风动水槌胸。

苦竹笋抽青橛子，石榴树挂小瓶儿。

卷 871_14【题洞庭湖】

蔡押衙

可怜洞庭湖，恰是三冬无髭须。

卷 871_15【戏令狐相】

温庭筠

自从元老登庸后，天下诸胡悉带铃。

卷 871_16【与罗隐互谑】

顾云

青蝇被扇扇离席，--顾云

白泽遭钉钉在门。--罗隐

· 全唐诗 ·

卷 871_17【引自落便宜句】

孙光宪

窗下有时留客宿，室中无事伴僧眠。

卷 871_18【嘲廩丘令丞】

商则

令丞俱动手，县尉止回身。

卷 871_19【题汉祖庙】

罗颖

项羽英雄犹不惧，可怜容得辟阳侯。

卷 871_20【自赋催妆诗】

陈峤

彭祖尚闻年八百，陈郎犹是小孩儿。

· 全唐诗 ·

卷 871_21【戏为举子对句】

何承裕

晓来犬吠张三妇，日暮猿啼吕四妻。

卷 871_22【答弟妇歇后语】

李涛

惭无窦建，愧作梁山。

卷 871_23【与释惠江互谑】

程紫霄

僧录琵琶腿，--程紫霄
先生鬻栗头。--释惠江

卷 871_24【与李荣互谑】

僧法轨

姓李应须礼，言荣又不荣。--僧法轨

· 全唐诗 ·

身长三尺半，头毛犹未生。 --李荣

· 全唐诗 ·

第八百七十二卷

卷 872_1【广州三樵歌】

无名氏

奉敕追三樵，随侯傍道走。回头语李郎，唤取尔朱九。

卷 872_2【三御史咏】

无名氏

韦子凝而密，任生直且狂。可怜元福庆，也学坐凝床。

卷 872_3【台中里行咏】

无名氏

柱下虽为史，台中未是官。何时闻必也，早晚见任端。

· 全唐诗 ·

卷 872_4 【讥裴休】

无名氏

赵氏儿皆尼氏女，师翁儿即晋公儿。
却教术士难推算，胎月分张与阿谁。

卷 872_5 【嘲四相（宣宗时曹确、杨收、徐商、路岩同秉政）】

无名氏

确确无余事，钱财总被收。商人都不管，货赂几时休。

卷 872_6 【放榜诗（太和八年放榜，进士多贫士）】

无名氏

乞儿还有大通年，三十三人碗杖全。
薛庶准前骑瘦马，范鄴依旧盖番毡。

· 全唐诗 ·

卷 872_7【改魏扶诗】

无名氏

叶落满庭阴，朱门试院深。昔年辛苦地，今日负前心。

卷 872_8【嘲举子骑驴】

无名氏

今年敕下尽骑驴，短轴长鞦满九衢。
清瘦儿郎犹自可，就中愁杀郑昌图。

卷 872_9【嘲崔垂休】

无名氏

慈恩塔下亲泥壁，滑腻光华玉不如。
何事博陵崔四十，金陵腿上逞欧书。

卷 872_10【嘲主司崔澹】

无名氏

主司何事厌吾王，解把黄巢比武王。

· 全唐诗 ·

卷 872_11【朝士戏任穀】

无名氏

云林应讶鹤书迟，自入京来探事宜。
从此见山须合眼，被山相赚已多时。

卷 872_12【题房鲁题名后】

无名氏

姚家新婿是房郎，未解芳颜意欲狂。
见说正调穿羽箭，莫教射破寺家墙。

卷 872_13【洛阳人嘲跋异】

无名氏

赫赫洛下，唯说异画。张氏出头，跋异无价。

卷 872_14【又嘲】

无名氏

李生来，跋君怕。不意今日却增价，不画罗汉画驼马。

· 全唐诗 ·

卷 872_15【蜀选人嘲韩昭】

无名氏

嘉眉邛蜀，侍郎骨肉。导江青城，侍郎情亲。
果阆二州，侍郎自留。巴蓬集壁，侍郎不识。

卷 872_16【嘲伧僂人】

无名氏

拄杖欲似乃，播笏还似及。逆风荡雨行，面干顶额湿。
著衣床上坐，肚缓脊皮急。城门尔许高，故自匍匐入。

卷 872_17【曲中唱语】

无名氏

张公吃酒李公颠，盛六生儿郑九怜。
舍下雄鸡伤一德，南头小凤纳三千。

· 全唐诗 ·

卷 872_18【改唱】

无名氏

张公吃酒李公颠，盛六生儿郑九怜。
舍下雄鸡失一足，街头小福拉三拳。

卷 872_19【街中又唱】

无名氏

莫将庞大作豉团，庞大皮中的不干。
不怕凤凰当额打，更将鸡脚用筋缠。

卷 872_20【吹火诗（前首邻人作，后首效作）】

无名氏

吹火朱唇动，添薪玉腕斜。遥看烟里面，大似雾中化。

吹火青唇动，添薪黑腕斜。遥看烟里面，恰似鸪盘茶。

· 全唐诗 ·

卷 872_21 【刘黑闼解嘲人语】

无名氏

水恶，头如镰杓尾如凿，河里搦鱼无僻错。（嘲水恶鸟）

骆驼，项曲绿蹄，被他负物多。（嘲骆驼）

卷 872_22 【村人学解嘲人语】

无名氏

绵绢，割两耳，只有面。

卷 872_23 【嘲刘师老】

无名氏

大府朝天升穆老，尚书倒地落刘郎。

卷 872_24 【嘲郑薰】

无名氏

主司头脑太冬烘，错认颜标作鲁公。

· 全唐诗 ·

卷 872_25【嘲蒋蟠金丹】

无名氏

张鹄只消千驮绢，蒋蟠惟用一丸丹。

卷 872_26【注苗张二进士题名】

无名氏

一双前进士，两个阿孩儿。

卷 872_27【袁州人谑彭伉】

无名氏

湛贲及第，彭伉落驴。

卷 872_28【洛中人语】

无名氏

昔娄师德园，今袁德师楼。

· 全唐诗 ·

卷 872_29【嘲毛炳、彭会】

无名氏

彭生作赋茶三片，毛氏传诗酒半升。

卷 872_30【右威卫嘲语】

无名氏

门缘御史塞，厅被校书侵。

卷 872_31【南唐伶人献先主词】

无名氏

惟愿普天多瑞庆，柳条结絮鹅双生。

卷 872_32【闽伶官戏主延政语】

无名氏

只闻有泗州和尚，不见有五县天子。

· 全唐诗 ·

卷 872_33【言志】

无名氏

腰缠十万贯，骑鹤上扬州。

· 全唐诗 ·

第八百七十三卷

卷 873_1【题洛阳县壁】

李兼

猾吏畏服，县妖破胆。好录政声，闻于御览。

卷 873_2【题书卷后语】

杜兼

倩倖写来手自校，汝曹读之知圣道，坠之鬻之为不孝。

卷 873_3【题李阳冰玉箸篆词】

舒元舆

斯去千年，冰生唐时。冰复去矣，后来者谁？
后千年有人，谁能待之。后千年无人，篆止于斯。
呜呼主人，为吾宝之。

· 全唐诗 ·

卷 873_4【判误书纸背】

裴谔

这畔似那畔，那畔似这畔。
我也不辞与你判，笑杀门前著靴汉。

卷 873_5【又判争猫儿状】

裴谔

猫儿不识主，傍家搦老鼠。两家不须争，将来与裴谔。

卷 873_6【断僧通状】

李翱

上岁童子，二十受戒。君王不朝，父母不拜。
口称贫道，有钱放债。量决十下，牒出东界。

卷 873_7【判僧云晏五人聚赌喧诤语】

韩滉

正法何曾执贝，空门不积余财。白日既能赌博，

· 全唐诗 ·

通宵必醉尊罍。强说天堂难到，又言地狱长开。
并付江神收管，波中便是泉台。

卷 873_8【判道士黄山隐】

皇甫大夫

道士黄山隐，轻人复重财。太山将比甌，东海只容杯。
绿绶藏云帔，乌巾换鹿胎。黄泉六个鬼，今夜待君来。

卷 873_9【碾驴鞍判】

罗绍威

邺城大道甚宽，何故驾车碾鞍？
领鞦驴汉子科决，待驾车汉子喜欢。

卷 873_10【批州符】

萧结

秧开五叶，蚕长三眠。人皆忙迫，划甚闲船。

· 全唐诗 ·

卷 873_11【判部民诉主簿牒】

王鲁

汝虽打草，吾已惊蛇。

卷 873_12【戏为冥吏判】

伶人

焦湖百里，一任作獭。

卷 873_13【自状】

张翱

有张翱兮，寓止淮阴。来绮席兮，放恣胸襟。

卷 873_14【刺左右膊诗】

赵武建

野鸭滩头宿，朝朝被鹄梢。忽惊飞入水，留命到今朝。

· 全唐诗 ·

卷 873_15【刺左臂膊诗】

宋元素

昔日已前家未贫，苦将钱物结交亲。
如今失路寻知己，行尽关山无一人。

卷 873_16【刺左右膊句】

张幹

生不怕京兆尹（左），死不畏阎罗王（右）。

· 全唐诗 ·

第八百七十四卷

卷 874_1【廉州人歌】

廉州颜有道，性行同庄老。爱民如赤子，不杀非时草。

卷 874_2【沧州百姓歌】

新河得通舟楫利，直达沧海鱼盐至。
昔日徒行今骋驷，美哉薛公德滂被。

卷 874_3【薛将军歌】

将军三箭定天山，战士长歌入汉关。

· 全唐诗 ·

卷 874_4【郢州人歌】

父母育我田使君，精神为人上天闻。
田中致雨山出云，但愿常在不患贫。

卷 874_5【雒县與人誦】

我有圣帝抚令君，遭暴昏椽惇寡纷。民户流散日月曛，
君去来兮惠我仁，百姓苏矣见阳春。

卷 874_6【黄獐歌】

黄獐黄獐草里藏，弯弓射尔伤。

卷 874_7【桑条歌】

桑条韦也，女时韦也乐。

· 全唐诗 ·

卷 874_8【景龙中嘲宰相歌】

礼贤不解开东阁，鬻理惟能闭北门。

卷 874_9【选人歌】

今年选数恰相当，都由座主无文章。
案后一腔冻猪肉，所以名为姜侍郎。

卷 874_10【鲁城民歌】

鲁地抑种稻，一概被水沫。年年索蟹夫，百姓不可活。

卷 874_11【王法曹歌】

前得尹佛子，后得王獺獺。判事驴咬瓜，唤人牛嚼沫。

· 全唐诗 ·

见钱满面喜，无镪从头喝。常逢饿夜叉，百姓不可活。

卷 874_12【得体歌】

得体乞那也，乞囊得体那。潭里船车闹，扬州铜器多。
三郎当殿坐，听唱得体歌。

卷 874_13【得宝歌】

得宝耶，弘农耶？弘农耶，得宝耶？

卷 874_14【崔成甫翻得宝歌】

得宝弘农野，弘农得宝那。潭里船车闹，扬州铜器多。
三郎当殿坐，听唱得宝歌。

· 全唐诗 ·

卷 874_15【袁仁敬歌】

天不恤冤人兮，何夺我慈亲兮。有理无申兮，
痛哉安诉陈兮。

卷 874_16【京兆二尹歌】

前尹赫赫，具瞻允若。后尹熙熙，具瞻允斯。

卷 874_17【黄州左公歌】

我欲逃乡里，我欲去坟墓。左公今既来，谁忍弃之去。

卷 874_18【又歌】

吾乡有鬼巫，惑人人不知。天子正尊信，左公能杀之。

· 全唐诗 ·

卷 874_19【舒州人歌】

邻邑谷不登，我土丰粢盛。禾稼美如云，实系我使君。

卷 874_20【建州人歌】

令我州郡泰，令我户口裕，令我活计大，陆员外。

令我家不分，令我马成群，令我稻满囤，陆使君。

卷 874_21【吴人歌】

朝判长洲暮判吴，道不拾遗人不孤。

卷 874_22【汴州人歌】

浊流洋洋，有辟其郭。阊道嚙呼，公来之初。

· 全唐诗 ·

今公之归，公在丧车。

公既来止，东人以完。今公歿矣，人谁与安？

卷 874_23【建昌民歌】

我有父，何易于。昔无储，今有余。

卷 874_24【巴州薛刺史歌】

日出而耕，日入而归。吏不到门，夜不掩扉。
有孩有童，愿以名垂。何以字之，薛孙薛儿。

卷 874_25【高苑令歌】

高苑之树枯已荣，淄川之水浑已澄，邹邑之民仆已行。

· 全唐诗 ·

卷 874_26【九龙帐歌】

谁谓九龙帐，惟贮一归郎。

卷 874_27【伪蜀鸳鸯树歌】

愿作坟上鸳鸯，来作双飞，去作双归。

卷 874_28【曲江游人歌】

春光且莫去，留与醉人看。

卷 874_29【蜥蜴求雨歌】

蜥蜴蜥蜴，兴云吐雾。雨若滂沱，放汝归去。

· 全唐诗 ·

卷 874_30【挽歌】

红轮决定沈西去，未委魂灵往那方。

· 全唐诗 ·

第八百七十五卷

卷 875_1【唐受命讖】

法律存，道德在，白旗天子出东海。

桃李子，莫浪语。黄鹄绕山飞，宛转花园里。

桃花园，宛转属旌幡。

桃李子，鸿鹄绕阳山，宛转花林里。莫浪语，谁道许。

桃李子，洪水绕杨山。

江南杨柳树，江北李花荣。杨柳飞绵何处去，
李花结果自然成。

· 全唐诗 ·

卷 875_2【劝进疏引讖】

东海十八子，八井唤三军。手持双白雀，头上戴紫云。

丁丑语甲子，深藏八堂里。何意坐堂里，中央有天子。

西北天火照，龙山昭童子。赤光连北斗，童子木上悬白幡。

胡兵纷纷满前后，拍手唱堂堂，驱羊向南走。

胡兵未济汉不整，治中都护有八井。

兴伍伍，仁义行武。得九九，得声名。童子木底百丈水，东家井里五色星。我语不可信，问取卫先生。

戌亥君臣乱，子丑破城隍。寅卯如欲定，龙蛇伏四方。
十八成男子，洪水主刀傍。市朝义归政，人宁俱不荒。
人言有恒性，也复道非常。为君好思量，何 禹汤。
桃源花 ，李树起堂堂。只看寅卯岁，深水没黄杨。

· 全唐诗 ·

卷 875_3 【符凤引讖】

黑衣神孙披天裳。

卷 875_4 【安禄山古讖】

两角女子绿衣裳，端坐太行邀君王，一止之月必消亡。

卷 875_5 【普满题潞州佛舍】

此水连泾水，双珠血满川。青牛将赤虎，还号太平年。

卷 875_6 【南省北街人吟】

放榜只应三月暮，登科又校一年迟。

· 全唐诗 ·

卷 875_7 【卢求榜讖】

裴头黄尾，三求六李。

卷 875_8 【清僧示赵宗儒】

梨花发后杏花初，甸邑南来庆有余。

卷 875_9 【又示段文昌】

去日既逢梅蕊绽，来时应见杏花开。

卷 875_10 【洛城五凤楼中歌】

天津桥畔火光起，魏王堤上看洪水。

· 全唐诗 ·

卷 875_11【延和阁诗】

延和高阁上干云，小语犹疑太乙闻。
烧尽降真无一事，开门迎得毕将军。

卷 875_12【唐旧讖】

兔子上金床。

卷 875_13【越中狂生题旗亭】

日日草重生，悠悠傍素城。诸侯逐兔白，夏满镜湖平。

卷 875_14【清泰三年歌】

丙申年，数在五楼前。但看八九月，胡虏乱中原。

· 全唐诗 ·

卷 875_15【蜀王氏讖文】

李祜西王逢吉昌，上德兑兴丹莫当。

卷 875_16【黄万祜题蜀宫壁】

莫交牵动青猪足，动即炎炎不可扑。
鸢兽不欲两头黄，黄即其年天下哭。

卷 875_17【孟蜀丐者语】

不得登，登便倒。

卷 875_18【孟蜀桃符诗】

新年纳余庆，嘉节号长春。

· 全唐诗 ·

卷 875_19【上蓝和尚晋汉二代谶】

石榴花发石榴开。

卷 875_20【又遗钟传偈】

但看来年二三月，柳条堪作打钟槌。

卷 875_21【又报王审知十字谶】

不怕羊入屋，只怕钱入腹。

卷 875_22【钱处士李氏谶】

仿佛之间一倍杨。

· 全唐诗 ·

卷 875_23【孙咸题庐山神庙诗】

独入玄宫礼至真，焚香不为贱贫身。秦淮两岸沙埋骨，
湓浦千家血染尘。庐阜烟霞谁是主，虎溪风月属何人。
九江太守勤王室，好放天兵渡要津。

卷 875_24【南唐江州风坠诗】

由来秉节世无双，独守孤城死不降。
何似知机早回首，免教流血满长江。

卷 875_25【杭州还乡和尚唱】

还乡寂寂杳无踪，不挂征帆水陆通。
蹋得故乡回地稳，更无南北与西东。

· 全唐诗 ·

卷 875_26【福州记】

潮水来，岩头没。潮水去，矢口出。

卷 875_27【黄涅槃讖】

先打南，后打北，留取清源作佛国。

卷 875_28【陈智广讖】

骑马来，骑马去。

卷 875_29【又讖】

功下田，力交连。井底坐，二十年。

· 全唐诗 ·

卷 875_30【僧緘示王处厚】

周土同成，二王殊名。王居一焉，百日为程。

卷 875_31【任叟书授刘生】

承欲往梁宋，梁宋灾方重，旦夕为人讼。
承欲访郑生，郑生将有厄。即为千里客，兼亦变衫色。

卷 875_32【昌明里中讖】

欲知修续者，脚下是生毛。

卷 875_33【宋善威诗】

月落三株树，日映九重天。良夜欢宴罢，暂别庚申年。

· 全唐诗 ·

卷 875_34【田承嗣诳李宝臣伪讖】

二帝同功势万全，将田作伴入幽燕。

卷 875_35【皮日休造黄巢讖】

欲知圣人姓，由八二十一。欲知圣人名，果头三屈律。

卷 875_36【附：上元初嵩山石记】

木子当天下，止戈龙。李代代不移宗，
中鼎显真容，基千万岁。

卷 875_37【上阳铜器篆】

长宜子孙。

· 全唐诗 ·

卷 875_38【永安渠石铭】

百年为市后为池。

卷 875_39【漳泉分地神篆】

漳泉两州，分地太平。永安龙溪，山高气清。
千年不惑，万古作程。

卷 875_40【含元殿丹石隐语】

天汉二年，赤光生栗。木下有子，伤心遇酷。

卷 875_41【长安空宅铭篆】

夏天子紫金三十斤，赐有德者。

· 全唐诗 ·

卷 875_42【莆田石记】

石敢当，镇百鬼，压灾殃。官吏福，百姓康。
风教盛，礼乐昌。

卷 875_43【符离树穴中石篆】

旁有水，上有道，八百年中逢桀桀。

卷 875_44【淮西池濠石铭】

井底一竿竹，竹色深绿绿。鸡未肥，酒未熟，
障车儿郎且须缩。

卷 875_45【罗池石刻】

龙城柳，神所守。驱厉鬼，山左首。福土氓，制九丑。

· 全唐诗 ·

卷 875_46【道者遗记】

武之在卯，尧王八季。我弃其寝，我去其扃。深深然，
高高然。人不吾知，又不吾谓。由今之后，二百余祀。
焰焰其光，和和其始。东方有兔，小首元尾。经过吾道，
来至吾里。饮吾泉以醉，登吾榻而寐。刻乎其壁，
奥乎其义。人谁以辨，其东平子。

卷 875_47【王璠石铭】

山有石，石有玉。玉有瑕，即休也。

卷 875_48【玄元观栋桷记】

山水谁无言，元年有福重修。

· 全唐诗 ·

卷 875_49【天台观石简记】

海水竭，台山缺，皇家宝祚无休歇。

卷 875_50【成都罗城北门石记】

五五复五五，五五逾重数。浮世若浮云，金石一如故。
与君相见时，杳杳非今土。

卷 875_51【青羊宫砖记】

太平平中元灾。

卷 875_52【铜雀台玉板篆】

上土巴灰除虚除，伊尹东北八九余。秦赵多应分五玉，

· 全唐诗 ·

丝竹木子世世居。但看六六百中外，世主难留如国如。

卷 875_53【显德道宫石记】

瑞云灵迹镇梁东，他日多应与古同。
岁月迁移人事改，再来闲处又兴功。

卷 875_54【南唐升元殿基下石记（江南将亡数年前掘得此）】

莫问江南事，江南事可凭。抱鸡升宝位，跨犬出金陵。
子建司南位，安仁秉夜灯。东邻娇小女，骑虎渡河冰。

卷 875_55【马殷浚城石碣篆】

龙举头，猴掉尾。羊为兄，猴作弟。羊归穴，猴离次。

· 全唐诗 ·

卷 875_56【王霸仙坛砖刻】

树枯不用伐，坛坏不须结。未满一千岁，自有系孙列。
后来是三皇，潮水荡祸殃。岩逢二乍间，未免有消亡。
子孙依吾道，代代封闽疆。

卷 875_57【刘龔石讖】

人人有一，山山值牛。兔丝吞骨，盖海承刘。

卷 875_58【南汉罗浮古剑篆文】

丁与水同宫，王将耳口同。尹来居口上，山岫获重重。

卷 875_59【司马承祯含象鉴文】

天地含象，日月贞明。写规万物，洞鉴百灵。

· 全唐诗 ·

龟自卜，镜自照。吉可募，光不曜。

青盖作镜大吉昌，巧工刊之成文章。左龙右虎辟不祥，
朱鸟玄武顺于旁，子孙富贵居中央。

卷 875_60【景震剑文】

摛雷电，运玄星。摧凶恶，亨利贞。

乾降精，坤应灵。日月象，岳渎形。

卷 875_61【高丽镜文】

三水中，四维下，上帝降子于辰马。先操鸡，后搏鸭。
己年中，二龙见。一则藏身青木中，一则见形黑金东。

卷 875_62【京西市放生池墓铭】

龟言市，蓍言水。

· 全唐诗 ·

卷 875_63【古墓卜地词】

尔后一千岁，此地化为泉。赖逢邬侍御，移我向高原。

卷 875_64【卫先生墓铭】

姜师度，更移向南三五步。

卷 875_65【隐者瘞男铭】

神真炼形年未足，化为我子功相续。
丞相瘞之刻玄玉，仙路何长死何促。

卷 875_66【乌氏墓碑】

牛领冈头，红箫笼下。葬用两日，手板相亚。

· 全唐诗 ·

卷 875_67【岩腹棺铭】

欲堕不堕逢王果，五百年中重收我。

卷 875_68【古棺石铭】

欲陷不陷被藤缚，欲落不落被沙阁，五百年后遇熊博。

卷 875_69【涟水古冢瓶文】

一只青乌子，飞来五两头。借问船轻重，寄信到扬州。

卷 875_70【沈彬圻篆】

佳城今已开，虽开不葬埋。漆灯犹示灭，留待沈彬来。

· 全唐诗 ·

卷 875_71【广陵古冢石刻】

日为箭兮月为弓，四时躬人兮无穷。但得天将明月死，
不觉人随流水空。山川秀兮碧穹窿，崇夫人墓兮直其中。
猿啼鸟啸烟濛濛，千年万年松柏风。

卷 875_72【王承检掘得墓铭】

车道之北，邽山之阳。深深葬玉，郁郁埋香。刻斯贞石，
焕乎遗芳。地变陵谷，嶮列城隍。乾德丙年，坏者合郎。

卷 875_73【马希振葬地碣】

乱石之壤，绝世之冈。谷变庚戌，马氏无王。

· 全唐诗 ·

第八百七十六卷

卷 876_1【二贺诗】

学行可师贺德基，文质彬彬贺德仁。

卷 876_2【四王语】

宁向儋崖振白，不事江滕蒋虢。

卷 876_3【时人为屈突语】

宁食三斗艾，不见屈突盖。宁服三斗葱，不逢屈突通。

· 全唐诗 ·

卷 876_4【杨刺史语】

宁食三斗蒜，不逢杨德幹。

卷 876_5【万年人语】

宁饮三斗尘，无逢权怀恩。

卷 876_6【赞皇人语】

太冲无兄，孝端无弟。

卷 876_7【高宗时语】

左相宣威沙漠，右相驰誉丹青。

· 全唐诗 ·

三馆学生放散，五台令史经明。

卷 876_8【时人为李义甫语】

今日巨唐年，还诛四凶族。

卷 876_9【洛州语】

洛州有前贾后张，可敌京兆三王。

卷 876_10【江淮间语】

贵如许郝，富若田彭。

· 全唐诗 ·

卷 876_11【河北语】

唯此两何，杀人最多。

卷 876_12【李昭德为王弘义语】

昔闻苍鹰狱吏，今见白兔御史。

卷 876_13【京洛语】

衣裳好，仪貌恶。不姓许，即姓郝。

卷 876_14【台中语】

侯知一不伏致仕，张惊自请起复。高筠不肯作孝，

· 全唐诗 ·

张栖贞情愿遭忧。

卷 876_15【吏人语】

不畏侯卿杖，惟畏尹卿笔。

卷 876_16【选人语】

有钱石上好，无钱刘下好，士大夫张下好。

硕学师刘子，儒生用与言。

今年柿子并遭霜，为语石榴须早摘。

卷 876_17【韦氏语】

大郎罢相，小郎拜相。

· 全唐诗 ·

卷 876_18【益州人吏语】

录事意，与天通，益州司马折威风。

卷 876_19【天授中语】

遇徐杜者必生，遇来侯者必死。

卷 876_20【时人为邹昉语】

萧佺驸马子，邹昉骆驼儿。非关道德合，只为钱相知。

卷 876_21【题张昌仪门语】

一两丝能得几时络。

· 全唐诗 ·

卷 876_22 【时人号李知远语】

李下无蹊。

卷 876_23 【又号李义语】

李下无蹊径。

卷 876_24 【窦仆射语】

窦仆射，前为韦氏国_着，后作公主邑丞。

卷 876_25 【时人为崔无谗语】

皇后嫁女，天子娶妇。

· 全唐诗 ·

卷 876_26【神龙中语】

崔冉郑，乱时政。

卷 876_27【斜封官语】

姚宋为相，邪不如正。太平用事，正不如邪。

卷 876_28【李处郁语】

飧若入咽，百无一全。

卷 876_29【景云初语】

前有裴马，后有卢李。

· 全唐诗 ·

卷 876_30【先天时京中语】

姜师度一心看地，傅孝忠两眼相天。

卷 876_31【时人号王丘、崔沔语】

丘山岌岌连天峻，沔水澄澄彻底清。

卷 876_32【吏部过官语】

麟之口，光庭手。

卷 876_33【郇公厨语】

人欲不饭筋骨舒，糒缘须入郇公厨。

· 全唐诗 ·

卷 876_34【四俊语】

令君四俊，苗吕崔员。

卷 876_35【八友语】

殷颜柳陆，李萧邵赵。

卷 876_36【罗吉口号】

罗钳吉网。

卷 876_37【里闾诅语】

若违教，值三豹。

· 全唐诗 ·

卷 876_38【陕州语】

不须赛神明，不必求巫祝。尔莫犯卢公，立便有祸福。

卷 876_39【真源邑语】

南金口，明府手。

卷 876_40【称二王语】

朝廷左相笔，天下右丞诗。

卷 876_41【代宗朝京师语】

常无分别元好钱，贤者愚，愚者贤。

· 全唐诗 ·

卷 876_42【戏谏司语】

韩谏议虽分左右，归拾遗莫辨存亡。

卷 876_43【裴度语】

鸡猪鱼蒜，逢著则吃。生老病死，时至则行。

卷 876_44【魏博语】

长安天子，魏府牙军。

卷 876_45【宝历宫中语】

宝帐香重重，一双红芙蓉。

· 全唐诗 ·

卷 876_46【京师人号牛杨语】

太牢笔，少牢口，东西南北何处走。

卷 876_47【又号牛李】

门生故吏，不牛则李。（李谓宗闵也。）

卷 876_48【荆南语】

旱不苦，祷而雨。雨不愁，公出游。

卷 876_49【郑仁表自语】

天瑞有五色云，人瑞有郑仁表。

· 全唐诗 ·

卷 876_50【湖苏二郡语】

湖接两头，苏联三尾。

卷 876_51【广明初都人语】

黄贼打黑贼。

卷 876_52【吏部旧语】

长名以前，选人属侍郎。长名以后，侍郎属选人。

卷 876_53【省中语】

后行祠屯，不博中行都门。中行礼部，不博前行驾库。

· 全唐诗 ·

卷 876_54【郎吏语】

司门水部，入省不数。

卷 876_55【谏院台省语】

遗补相惜，御史相憎，郎官相轻。

卷 876_56【御史台语】

事长如事端。

卷 876_57【京兆府语】

不立两县令，不坐两少尹。

· 全唐诗 ·

卷 876_58【翰林谏议语】

饶道斗上坡去，亦须却下坡来。

卷 876_59【举子语】

槐花黄，举子忙。

卷 876_60【明经进士语】

三十老明经，五十少进士。

卷 876_61【杂帖语】

常杂鲍帖。

· 全唐诗 ·

卷 876_62【闽人语】

欧阳独步，藻蕴横行。

卷 876_63【举场语】

欲入举场，先问苏张。苏张犹可，三杨杀我。

卷 876_64【大中后进士语】

欲得命通，问隍嵎都雍。

卷 876_65【大中时语】

郑杨段薛，炙手可热。欲得命通，鲁绍瑰蒙。

· 全唐诗 ·

卷 876_66【选举人语】

王凝裴瓚。舍弟安潜。朝中无呼字，知闻厅里，
绝脱靴宾客。

卷 876_67【科目举人语】

未见王褒，徒劳漫走。

卷 876_68【戏杜审权语】

座主审权，门生处权。

卷 876_69【崔沆放榜时人语】

座主门生，沆瀣一家。

· 全唐诗 ·

卷 876_70【唐末五代人语】

及第不必读书，作官何须事业。

卷 876_71【号沈宋语】

苏李居前，沈宋比肩。

卷 876_72【号钱郎语】

前有沈宋，后有钱郎。

卷 876_73【潘何诗赋语】

潘纬十年吟古镜，何涓一夜赋潇湘。

· 全唐诗 ·

卷 876_74【魏薛草书语】

前有虞褚，后有薛魏。

卷 876_75【薛稷书语】

买褚得薛不落节。

卷 876_76【时人为刘毕语】

刘郎中松树孤标，毕庶子松根绝妙。

卷 876_77【时人为黄筌语】

黄筌画鹤，薛稷减价。

· 全唐诗 ·

卷 876_78【时人为杨惠之语】

道子画，惠之塑，夺得僧繇神笔路。

卷 876_79【道杰语】

大头杰，难杀人。

卷 876_80【马周疏引俚语】

贫不学俭，富不学奢。

卷 876_81【杜甫引俚语】

城南韦杜，去天尺五。

· 全唐诗 ·

卷 876_82【孙光宪《琐言》引古语】

乘船走马，去死一分。

好事不出门，恶事行千里。

卷 876_83【杜重威引俚语】

逢贼得命，更望复子。

卷 876_84【建安语】

龙门一半在闽川。

卷 876_85【江陵语】

琵琶多于饭甑，措大多于鲫鱼。

· 全唐诗 ·

卷 876_86【汾晋间语】

欲作千箱主，问取黄金母。

卷 876_87【秦中儿童语】

颠当牢守门，蠨蛸寇汝无处奔。

卷 876_88【沧洲语】

不戴金莲花，不得到仙家。

卷 876_89【段成式《酉阳杂俎》引古语】

三守庚申三尸伏，七守庚申七尺灭。

· 全唐诗 ·

卷 876_90【佛书引语】

停囚长智。

赤脚人趁兔，著靴人吃肉。

· 全唐诗 ·

第八百七十七卷

卷 877_1【中宗引谚】

冬至长于岁。

卷 877_2【贾言忠引谚】

军无媒，中道回。

卷 877_3【李勣引谚别张文瓘】

千里相送，终于一别。

· 全唐诗 ·

卷 877_4【路励行引谚】

一人在朝，百人缓带。

卷 877_5【郝南容引谚】

三公后，出死狗。

卷 877_6【员庄谚】

上有天堂，下有员庄。

卷 877_7【娄师德引谚】

卒客无卒主人。

· 全唐诗 ·

卷 877_8【台中谚】

免巡未推，只得自知。

卷 877_9【宋守敬引谚】

双陆无休势。

卷 877_10【雒谷谚】

認洞入黄泉。

卷 877_11【三门谚】

古无门匠墓。

· 全唐诗 ·

卷 877_12【张果引谚】

娶妇得公主，平地生公府。

卷 877_13【哥舒翰引谚】

狐向窟嗥不祥。

卷 877_14【代宗引谚】

不痴不聋，不作阿家阿翁。

卷 877_15【鬼门关谚】

鬼门关，十人去，九不还。

· 全唐诗 ·

卷 877_16【河北谚】

山东一条葛，无事莫撩拨。

卷 877_17【李振引谚】

百岁奴事三岁主。

卷 877_18【王彦章引谚】

人死留名，豹死留皮。

卷 877_19【孙光宪《北梦琐言》引谚】

小舅小叔，相追相逐。

· 全唐诗 ·

卷 877_20【谚】

枣子塞鼻孔，悬栖阁却种。

蝉鸣螭螯唤，黍种糕糜断。

卷 877_21【宁茵事谚】

鸲鹆树上鸣，意在麻子地。

卷 877_22【鸲鹆谚】

鸲鹆不打脚下塘。

卷 877_23【盐铁谚】

扬一益二。

· 全唐诗 ·

卷 877_24【冯翊谚】

苦泉羊，洛水浆。

卷 877_25【丹徒谚】

生东吴，死丹徒。

卷 877_26【湖州里谚】

放尔生，放尔命，放尔湖州做百姓。

卷 877_27【益阳谚】

长沙益阳，一时相印。

· 全唐诗 ·

卷 877_28【昭潭谚】

昭潭无底橘州浮。

卷 877_29【江右四郡谚】

筠袁赣吉，脑后插笔。

卷 877_30【徐闻谚】

欲拔贫，诣徐闻。

卷 877_31【陇西谚】

郎驱女驱，十马九驹。安阳大角，十牛九犊。

· 全唐诗 ·

卷 877_32【荆棺峡谚】

九子不葬父，一女打荆棺。

卷 877_33【南中谚】

秋收稻，夏收头。

卷 877_34【事狐神谚】

无狐魅，不成村。

卷 877_35【李哲家怪引谚】

一鸡死，一鸡鸣。

· 全唐诗 ·

卷 877_36【俗谚】

白日无谈人，谈人则害生。昏夜无说鬼，说鬼则怪至。

卷 877_37【李白名许云封谜】

树下彼何人，不语真吾好。语若及日中，烟霏谢成宝。

卷 877_38【许氏碑阴谜】

谈马砺毕，王田数七。

卷 877_39【大明寺壁语】

一人堂堂，二曜同光。泉深尺一，点去冰傍。二人相连，

· 全唐诗 ·

不欠一边。三梁四柱列火然，除却双勾两日全。

卷 877_40【曹著与客谜】

一物坐也坐，卧也坐，行也坐（客）
（著应声曰：“在官地，在私地。”）

一物坐也卧，立也卧，行也卧，走也卧，卧也卧（著）
（客不能对。著曰：“我谜吞得你谜。”客大惭）

卷 877_41【客题青龙寺门】

龕龙去东海，时日隐西斜。敬文今不在，碎石入流沙。

卷 877_42【陶穀题南唐官舍壁】

西川狗，百姓眼。马包儿，御厨饭。

· 全唐诗 ·

卷 877_43【谢小娥梦盗姓名】

车中猴，门东草。禾中走，一日夫。

· 全唐诗 ·

第八百七十八卷

卷 878_1【牛口谣】

豆入牛口，势不得久。

卷 878_2【高昌童谣】

高昌兵马如霜雪，汉家兵马如日月。日月照霜雪。
回首自消灭。

卷 878_3【咸亨后谣】

莫浪语，阿婆嗔，三叔闻时笑杀人。

· 全唐诗 ·

卷 878_4 【调露初京城民谣】

侧堂堂，挠堂堂。

卷 878_5 【嵩岳童谣】

嵩山凡几层，不畏登不得，只畏不得登。
三度征兵马，傍道打腾腾。

卷 878_6 【李敬玄谣】

洮河李阿婆，鄯州王伯母。见贼不敢斗，总由曹新妇。

卷 878_7 【永淳中童谣】

新禾不入箱，新麦不入场。迨及八九月，狗吠空垣墙。

· 全唐诗 ·

卷 878_8【杨柳谣】

杨柳杨柳漫头驼。

卷 878_9【裴炎谣】

一片火，两片火，绯衣小儿当殿坐。

卷 878_10【武后长寿元年民间谣】

补阙连车载，拾遗平斗量。橐驼侍御史，碗脱侍中郎。

卷 878_11【续谣】

评事不读律，博士不寻章。糊心宣抚使，眯目圣神皇。

· 全唐诗 ·

卷 878_12【天枢谣】

一条麻索挽，天枢绝去也。

卷 878_13【武后时谣】

张公吃酒李公醉。

卷 878_14【武后时童谣】

红绿复裙长，千里万里犹香。

卷 878_15【神龙后乌鹊窠谣】

山南乌鹊窠，山北金骆驼。镰柯不凿孔，斧子不施柯。

· 全唐诗 ·

卷 878_16【吏部谣】

岑悵獠子后，崔湜令公孙。三人相比校，莫贺咄骨浑。

卷 878_17【黄犢子谣】

黄犢犢子挽紉断，两脚蹋地鞋麻断。

卷 878_18【安乐寺童谣】

可怜安乐寺，了了树头悬。

卷 878_19【鲤鱼儿谣】

可怜圣善寺，身著绿毛衣。牵来河里饮，蹋杀鲤鱼儿。

· 全唐诗 ·

卷 878_20【羊头山谣】

羊头山北作朝堂。

卷 878_21【金桥童谣】

圣人执节度金桥。

卷 878_22【天宝中京兆谣】

欲得米麦贱，无过追李岷。

卷 878_23【天宝初语】

义髻抛河里，黄裙逐水流。

· 全唐诗 ·

卷 878_24【杨氏谣】

男不封侯女作妃，君看女却是门楣。

卷 878_25【神鸡童谣】

生儿不用识文字。斗鸡走马胜读书。贾家小儿年十三，
富贵荣华代不如。能令金距期胜负，白罗绣衫随软舆。
父死长安千里外，差夫治道挽丧车。

卷 878_26【燕燕谣（安禄山未反时有此二谣）】

燕燕，飞上天。天上女儿铺白毡，毡上有千钱。

卷 878_27【幽州谣】

旧来夸戴竿，今日不堪看。但看五月里，清水河边见契

· 全唐诗 ·

丹。

卷 878_28【两京童谣】

不怕上兰单，惟愁答辨难。无钱求案典，生死任都官。

卷 878_29【两头朱童谣】

一只箸，两头朱，五六月化为胆。

卷 878_30【打麦谣】

打麦，麦打。三三三，舞了也。

卷 878_31【张权舆作裴度伪谣】

非衣小儿坦其腹，天上有口被驱逐。

· 全唐诗 ·

卷 878_32【马仆射谣】

斋钟动也，和尚不上堂。

卷 878_33【咸通七年童谣】

草青青，被严霜。鹊始巢，复看颠狂。

卷 878_34【咸通十四年成都谣】

咸通癸巳，出无所之。蛇去马来，道路稍开。
头无片瓦，地有残灰。

卷 878_35【乾符六年童谣】

八月无霜塞草青，将军骑马出空城。

· 全唐诗 ·

汉家天子西巡狩，犹向江东更索兵。

卷 878_36【僖宗时童谣】

金色虾蟆争努眼，翻却曹州天下反。

卷 878_37【黄巢军中谣】

逢儒则肉师必覆。

卷 878_38【中和初童谣】

黄巢走，泰山东，死在翁家翁。

卷 878_39【山阴老人伪谣】

欲识圣人姓，千里草青青。欲识圣人名，日从日上生。

· 全唐诗 ·

卷 878_40【胡楚宾谣】

胡楚宾，李翰林。词同三峡水，字值双南金。

卷 878_41【后唐军士谣】

除去菩萨，扶立生铁。

卷 878_42【周显德中齐州谣】

蹋阳春，人间二月雨和尘。阳春蹋尽西风起，
肠断人间白发人。

卷 878_43【天祐中江南童谣】

东海鲤鱼飞上天。

· 全唐诗 ·

卷 878_44【真人谣】

有一真人在冀川，开口持弓向外边。

卷 878_45【李后主童谣】

索得娘来忘却家，后园桃李不生花。
猪儿狗儿都死尽，养得猫儿患赤痕。

卷 878_46【秦人竹谿谣】

谿谿引黑牛，天差不自由。但看戊寅岁，扬在蜀江头。

卷 878_47【蜀人谣】

黑牛无系绊，棕绳一时断。

· 全唐诗 ·

卷 878_48【秦城芭蕉谣】

花开来里，花谢也里。

卷 878_49【蜀童谣】

我有一帖药，其名曰阿魏，卖与十八子。

卷 878_50【蜀中扫地和尚】

水行仙，怕秦川。

卷 878_51【福州谣】

骑马来，骑马去。

· 全唐诗 ·

卷 878_52【闽人谣】

风吹杨菜鼓山下，不得钱郎戈不罢。

卷 878_53【广州童谣】

羊头二四，白天雨至。

卷 878_54【桂管童谣】

大虫来。

卷 878_55【湖南童谣】

湖南城郭好长街，竟栽柳树不栽槐。

· 全唐诗 ·

百姓奔窜无一事，只是椎芒织草鞋。

卷 878_56【长沙童谣】

鞭打马，马急走。

卷 878_57【湘中童谣】

马去不用鞭，咬牙过今年。

卷 878_58【长沙童谣】

三羊五马，马子离群，羊子无舍。

· 全唐诗 ·

卷 878_59【丹阳语】

待钱来，待钱来。

卷 878_60【辽述律后谣】

青牛姬，曾避路。

· 全唐诗 ·

第八百七十九卷

卷 879_1【招手令】

亚其虎膺，曲其松根。以蹲鸱间虎膺之下，
以钩戟差玉柱之旁。潜虬阔玉柱三分，奇兵阔潜虬一寸。
死其三洛，生其五峰。

卷 879_2【打令口号】

送摇招，由三方。一圆分成四片，送在摇前。

卷 879_3【龙朔中酒令】

子母相去离，连台拗倒。

· 全唐诗 ·

卷 879_4【沈亚之】

伐木丁丁，鸟鸣嚶嚶。东行西行，遇饭遇羹（人）。
如切如磋，如琢如磨。欺客打妇，不当娄罗（沈亚之）。

卷 879_5【令狐楚、顾非熊】

水里取一鼃，岸上取一驼。
将者驼，来驮者鼃，是为驼驮鼃。（令狐楚）
屋里取一鸽，水里取一蛤。
将者鸽，来合者蛤，是谓鸽合蛤。（顾非熊）

卷 879_6【张祜】

上水船，风大急。帆下人，须好立。（令狐綯）
上水船，船底破。好看客，莫倚柁。（张祜）

· 全唐诗 ·

卷 879_7 【卢发】

十姓胡中第六胡，也曾金阙掌洪炉。
少年从事夸门第，莫向尊前气色粗。

十姓胡中第六胡，文章官职胜崔卢。
暂来关外分优寄，不称宾筵语气粗。

卷 879_8 【沈询】

莫打南来雁，从他向北飞。打时双打取，莫遣两分离。

卷 879_9 【姚岩杰】

遥望渔舟，不阔尺八。（卢肇）
凭阑一呕，已觉空喉。（姚岩杰）

· 全唐诗 ·

卷 879_10【裴勋父子】

矧人饶舌，破车饶楔。（父属醺云：“裴勋饮十分。”）
蝙蝠不自见，笑他梁上燕。（勋复父醺云：
“十一郎亦饮十分。”）

卷 879_11【方干、李主簿改令】

措大吃酒点盐，将军吃酒点酱。只见门外著篱，
未见眼中安鄣。（方干）
措大吃酒点盐，下人吃酒点鲈。
只见半臂著襴，不见口唇开袴。（李主簿）

卷 879_12【高骈、薛涛】

口，有似没量斗。（高骈）
川，有似三条椽。（薛涛）

· 全唐诗 ·

卷 879_13【南唐烈祖酒令】

雪下纷纷，便是白起。（烈祖）
著履过街，必须雍齿。（宋齐丘）
明朝日出，争奈萧何。（徐融）

卷 879_14【吴越王与陶穀酒令】

白玉石，碧波亭上迎仙客。（吴越王）
口耳王，圣明天子要钱塘。（陶穀）

卷 879_15【附：夷陵女郎鬼】

鸾老头脑好，好头脑鸾老。

· 全唐诗 ·

第八百八十卷

卷 880_1【城阳公主卜繇】

二火皆食，始同荣，末同戚。

卷 880_2【冯存澄为明皇占】

合因斩关，铸印乘轩。始当果断，终得嗣天。

卷 880_3【钱知微卜卖天津桥】

两头点土，中心虚悬。人足踏跋，不肯下钱。

· 全唐诗 ·

卷 880_4【王山人为李卫公按冥】

位极人臣，寿六十四。

卷 880_5【钟传客占历日包橘】

太岁当头坐，诸神不敢当。其中有一物，常带洞庭香。

卷 880_6【马重绩占随卦繇辞】

南瞻析木，木不自续。虚而动之，动随其覆。

卷 880_7【方龟精为钱元懿卜词】

太乙接天河，金华宝贝多。郡侯六十六，别处不经过。

· 全唐诗 ·

卷 880_8 【叶简占失牛】

占失牛，已被家边载上州。欲知贼姓一斤求，
欲知贼名十干头。（果邻人丘甲盗之）

卷 880_9 【又射覆橘子】

圆似珠，色如丹。傥能擘破同分吃，争不惭愧洞庭山。

卷 880_10 【射覆巾子】

近来好裹束，各自竞尖新。秤无三五两，因何号一斤。

卷 880_11 【射覆二鸡子】

此物不难知，一雄兼一雌。谁将打破看，方明混沌时。

· 全唐诗 ·

卷 880_12【天冲星占】

天冲抱极泣帝前，血浊雾下天下冤。

卷 880_13【占月语】

月如弯弓，少雨多风。月如仰瓦，不求自下。

卷 880_14【占雨】

乾星照湿土，明日依旧雨。

云行西，星照泥。

朝霞不出门，暮霞行千里。

天将雨，鸠逐妇。

· 全唐诗 ·

卷 880_15【占四时甲子雨】

春雨甲子，赤地千里。夏雨甲子，乘船入市。秋雨甲子，
禾头生耳。冬雨甲子，牛羊冻死。鹊巢下地，其年大水。

卷 880_16【占年】

要见麦，见三白。

正月三白，田公笑赫赫。

卷 880_17【树稼谚】

树稼，达官怕。

· 全唐诗 ·

卷 880_18【相书语（张璟藏论妇人相引此）】

目有四白，五夫守宅。

卷 880_19【葬书语】

葬压龙角，其棺必斫。

朱雀和鸣，子孙盛荣。

朱雀悲哀，棺中见灰。

安龙头，枕龙角。不三年，自消铄。

安龙头，枕龙耳。不三年，万乘至。

卷 880_20【阴阳书语】

乔木先枯，众子必孤。

· 全唐诗 ·

卷 880_21【本草采萍时日歌（唐高供奉作）】

不在山，不在岸，采我之时七月半。选甚癰风与缓风，
些小微风都不算。豆淋酒内下三丸，铁幞头上也出汗。

卷 880_22【和剂方补骨脂丸方诗】

三年时节向边隅，人信方知药力殊。
夺得春光来在手，青娥休笑白髭须。

卷 880_23【李廷珪藏墨诀】

赠尔乌玉块，泉清研须洁。避暑悬葛囊，临风度梅月。

第八百八十一卷

卷 881_1【蒙求】

李瀚

王戎简要，裴楷清通。孔明卧龙，吕望非熊。杨震关西，
丁宽易东。谢安高洁，王导公忠。匡衡凿壁，孙敬闭户。
郅都苍鹰，宁成乳虎。周嵩狼抗，梁冀跋扈。郗超髯参，
王珣短簿。伏波标柱，博望寻河。李陵初诗，田横感歌。
武仲不休，士衡患多。桓谭非讖，王商止讹。嵇吕命驾，
程孔倾盖。剧孟一敌，周处三害。胡广补阙，袁安倚赖。
黄霸政殊，梁习治最。墨子悲丝，杨朱泣岐。朱博乌集，
萧芝雉随。杜后生齿，灵王出髭。贾谊忌鹏，庄周畏牺。
燕昭筑台，郑庄置驿。瓘靖二妙，岳湛连壁。郗诜一枝，
戴冯重席。邹阳长裾，王符逢掖。鸣鹤日下，士龙云间。
晋宣狼顾，汉祖龙颜。鲍靓记井，羊祜识环。仲容青云，
叔夜玉山。毛义捧檄，子路负米。江革忠孝，王览友弟。
萧何定律，叔孙制礼。葛丰刺举，息躬历诋。管宁割席，
和峤专车。时苗留犊，羊续悬鱼。樊哙排闥，辛毗引裾。
孙楚漱石，郝隆晒书。枚皋诣阙，充国自赞。王衍风鉴，
许劭月旦。贺循儒宗，孙绰才冠。太叔辨洽，挚仲辞翰。
山涛识量，毛玠公方。袁盎却座，卫瓘抚床。于公高门，

· 全唐诗 ·

曹参趣装。庶女振风，邹衍降霜。范丹生尘，晏婴脱粟。
诘汾兴魏，鼈灵王蜀。不疑诬金，卞和泣玉。檀卿沐猴，
谢尚鸛鹄。泰初日月，季野阳秋。荀陈德星，李郭仙舟。
王恂绣被，张氏铜钩。丁公遽戮，雍齿先侯。陈雷胶漆，
范张鸡黍。周侯山嶷，会稽霞举。季布一诺，阮瞻三语。
郭文游山，袁宏泊渚。黄琬对日，秦宓论天。孟轲养素，
扬雄草玄。向秀闻笛，伯牙绝弦。郭槐自屈，南郡犹怜。
鲁恭驯雉，宋均去兽。广客蛇影，殷师牛斗。元礼模楷，
季彦领袖。鲁褒钱神，崔烈铜臭。梁竦庙食，赵温雄飞。
枚乘蒲轮，郑均白衣。陵母伏剑，轲亲断机。齐后破坏，
谢女解围。凿齿尺牍，荀勖音律。胡威推缣，陆绩怀橘。
罗含吞鸟，江淹梦笔。李廌清贞，刘麟高率。蒋诩三径，
许由一瓢。杨仆移关，杜预建桥。寿王议鼎，杜林驳尧。
西施捧心，孙寿折腰。灵辄扶轮，魏颗结草。逸少倾写，
平子绝倒。澹台毁壁，子罕辞宝。东平为善，司马称好。
公超雾市，鲁般云梯。田单火牛，江迺蓼鸡。蔡裔殒盗，
张辽止啼。陈平多辙，李广成蹊。陈遵投辖，山简倒载。
渊客泣珠，交甫解佩。龚胜不屈，孙宝自刎。吕安题凤，
子猷访戴。董宣强项，翟璜直言，纪昌贯虱，养由号猿。
冯衍归里，张昭塞门。苏韶鬼灵，卢充幽婚。震畏四知，
秉去三惑。柳下直道，叔敖阴德。张汤巧诋，杜周深刻。
三王尹京，二鲍纠慝。孙康映雪，车胤聚萤。李充四部，
井春五经。谷永笔札，顾恺丹青。戴逵破琴，谢敷应星。
阮宣杖头，毕卓瓮下。文伯羞鼈，孟宗寄鲋。史丹青蒲，
张湛白马。隐之感邻，王修辍社。阮放八隼，江臯四凶。
华歆忤旨，陈群蹙容。王濬悬刀，丁固生松。姜维胆斗，
卢植音钟。桓温奇骨，邓艾大志。杨修捷对，罗友默记。

· 全唐诗 ·

杜康造酒，苍颉制字。樗里智囊，边韶经笥。滕公佳城，
王果石崖。买妻耻醮，泽室犯斋。马后大练，孟光荆钗。
颜叔秉烛，宋弘不谐。邓通铜山，郭况金穴。秦彭樊辕，
侯霸卧辙。淳于炙輶，彦国吐屑。太真玉台，武子金埒。
巫马戴星，宓贱弹琴。郝廉留钱，雷义送金。逢萌挂冠，
胡昭投簪。王乔双凫，华佗五禽。程邈隶书，史籀大篆。
王承鱼盗，丙吉牛喘。贾琮褰帷，郭贺露冕。冯媛当熊，
班女辞辇。王充阅市，董生下帷。平叔傅粉，弘治凝脂。
杨生黄雀，毛子白龟。宿瘤采桑，漆室忧葵。韦贤满籝，
夏侯拾芥。阮简旷达，袁耽俊迈。苏武持节，郑众不拜。
郭巨将坑，董永自卖。仲连蹈海，范蠡泛湖。文宝缉柳，
温舒截蒲。伯道无儿，嵇绍不孤。绿珠坠楼，文君当垆。
伊尹负鼎，甯戚叩角。赵壹坎壈，颜驷蹇剥。龚遂劝农，
文翁兴学。晏御扬扬，五鹿岳岳。萧朱结绶，王贡弹冠。
庞统展骥，仇览栖鹰。葛亮顾庐，韩信升坛。王褒柏惨，
闵损衣单。蒙恬制笔，蔡伦造纸。孔伋缊袍，祭遵布被。
周公握发，蔡邕倒屣。王敦倾室，纪瞻出妓。暴胜持斧，
张纲埋轮。灵运曲笠，林宗折巾。屈原泽畔，渔父江滨。
魏勃扫门，潘岳望尘。京房推律，翼奉观性。甘宁奢侈，
陆凯贵盛。干木富义，於陵辞聘。元凯传癖，伯英草圣。
冯异大树，千秋小车。漂母进食，孙钟设瓜。壶公谪天，
蓊训历家。刘玄刮席，晋惠闻蟆。伊籍一拜，郗生长揖。
马安四至，应璩三入。郭解借交，朱家脱急。虞延克期，
盛吉垂泣。豫让吞炭，鉏麴触槐。阮孚蜡屐，祖约好财。
初平起石，左慈掷杯。武陵桃源，刘阮天台。王俭坠车，
褚渊落水。季伦锦障，春申珠履。甄后出拜，刘桢平视。
胡嫔争搏，晋武伤指。石庆数马，孔光温树。翟汤隐操，

· 全唐诗 ·

许询胜具。优旃滑稽，落下历数。曼容自免，子平毕娶。
师旷清耳，离娄明目。仲文照镜，临江折轴。栾巴噀酒，
偃师舞木。德润佣书，君平卖卜。叔宝玉润，彦辅冰清。
卫后发鬋，飞燕体轻。玄石沈湎，刘伶解醒。赵胜谢颙，
楚庄绝缨。恶来多力，飞廉善走。赵孟疵面，田骈天口。
张凭理窟，裴頠谈薮。仲宣独步，子建八斗。广汉钩距，
弘羊心计。卫青拜幕，去病辞第。郗寄卖友，纪信诈帝。
济叔不痴，周兄无慧。虞卿担簦，苏章负笈。南风擗孕，
商受斲涉。广德从桥，君章拒猎。应奉五行，安世三篋。
相如题柱，终军弃繻。孙晨槁席，原宪桑枢。端木辞金，
钟离委珠。季札挂剑，徐稚致刍。朱云折槛，申屠断鞅。
卫玠羊车，王恭鹤氅。管仲随马，苍舒称象。丁兰刻木，
伯瑜泣杖。陈逵豪爽，田方简傲。黄向访主，陈寔遗盗。
庞俭凿井，阴方祀灶。韩寿窃香，王濛市帽。句践投醪，
陆抗尝药。孔愉放龟，张顗堕鹊。田豫俭素，李恂清约。
义纵攻剽，周阳暴虐。孟阳掷瓦，贾氏如皋。颜回箪瓢，
仲蔚蓬蒿。糜竺收资，桓景登高。雷焕送剑，吕虔佩刀。
老莱斑衣，黄香扇枕。王祥守奈，蔡顺分樵。淮南食时，
左思十稔。刘惔倾酿，孝伯痛饮。女娲补天，长房缩地。
季珪土首，长孺国器。陆玩无人，贾诩非次。何晏神伏，
郭奕心醉。常林带经，高凤漂麦。孟嘉落帽，庾凯堕帻。
龙逢板出，张华台圯。董奉活甍，扁鹊起虢。寇恂借一，
何武去思。韩子孤愤，梁鸿五噫。蔡琰辨琴，王粲覆棋。
西门投巫，何谦焚祠。孟尝还珠，刘昆反火。姜肱共被，
孔融让果。端康相代，亮陟隔坐。赵伦鸱怪，梁孝牛祸。
桓典避马，王尊叱驭。晁错峭直，赵禹廉倨。亮遗巾帼，
备失匕箸。张翰适意，陶潜归去。魏储南馆，汉相东阁。

· 全唐诗 ·

楚元置醴，陈蕃下榻。广利泉涌，王霸冰合。孔融坐满，
郑崇门杂。张堪折辕，周镇漏船。郭伋竹马，刘宽蒲鞭。
许史侯盛，韦平相延。雍伯种玉，黄寻飞钱。王允千里，
黄宪万顷。虞马斐才望，戴渊锋颖。史鱼黜殡，子囊城郢。
戴封积薪，耿恭拜井。汲黯开仓，冯驩折券。齐景驱千，
何曾食万。顾荣锡炙，田文比饭。稚珪蛙鸣，彦伦鹤怨。
廉颇负荆，须贾擢发。孔翊绝书，申嘉私谒。渊明把菊，
真长望月。子房取履，释之结袜。郭丹约关，祖逖誓江。
贾逵问事，许慎无双。娄敬和亲，白起坑降。萧史凤台，
宋宗鸡窗。王阳囊衣，马援薏苡。刘整交质，五伦十起。
张敞画眉，谢鲲折齿。盛彦感螭，姜诗跃鲤。宗资主诺，
成瑨坐啸。伯成辞耕，严陵去钓。董遇三余，谯周独笑。
将闾仰天，王凌呼庙。二疏散金，陆贾分橐。慈明八龙，
祢衡一鹗。不占陨车，子云投阁。魏舒堂堂，周舍谔谔。
无盐如漆，姑射若冰。邾子投火，王思怒蝇。符朗皂白，
易牙淄渑。周勃织薄。灌婴贩缯。马良白眉，阮籍青眼。
黥布开关，张良烧栈。陈遗饭感，陶侃酒限。楚昭萍实，
束晰竹简。曼倩三冬，陈思七步。刘宠一钱，廉范五袴。
汜毓字孤，郗鉴吐哺。荀弟转酷，严母扫墓。洪乔掷水，
陈泰挂壁。王述忿狷。荀粲惑溺。宋女愈谨，敬姜犹绩。
鲍照篇翰，陈琳书檄。浩浩万古，不可备甄。芟繁摭华，
尔曹勉旃。

· 全唐诗 ·

第八百八十二卷

卷 882_1【宗庙九德之歌辞】

褚亮

皇祖诞庆，于昭于天。积德斯远，茂攸绪先。
维文应历，神武弘宣。肇迹 水，成功坂泉。
道光覆载，声穆吉先。式备牺象，用 牺牲。
礼终九献，乐展四悬。神贶景福，遐哉永年。

卷 882_2【太庙裸地歌辞】

陈叔达

清庙既裸，郁鬯推礼。大哉孝思，严恭祖祢。
龙袞以祭，鸾刀思启。发德朱弦，升歌丹陛。
遥享粢盛，堂斟况齐。降福穰穰，来仪济济。

· 全唐诗 ·

卷 882_3【阶前石竹】

王绩

上天布甘雨，万物咸均平。自顾微且贱，亦得蒙滋荣。
萋萋结绿枝，晔晔垂朱英。常恐零露降，不得全其生。
叹息聊自思，此生岂我情。昔我未生时，谁者令我萌。
弃置勿重陈，委化何所营。

卷 882_4【九月九日】

崔善为

九日重阳节，三秋季月残。菊花催晚气，萸房辟早寒。
霜浓鹰击远，雾重雁飞难。谁忆龙山外，萧条边兴阑。

卷 882_5【奉和九月九日应制】

许敬宗

爽气申时豫，临秋肆武功。太液荣光发，曾城佳气融。
紫霄寒暑丽，黄山极望通。讲艺遵先轨，睹德畅宸衷。
鹓岭飞夏服，娥魄乱雕弓。汗浹流赭，尘生埽散红。
饮羽惊开石，中叶遽凋丛。雁殚云路静，乌坠日轮空。

· 全唐诗 ·

九流参广宴，万宇抃恩隆。

卷 882_6【奉和守岁应制】

许敬宗

玉琯移玄序，金奏赏彤闱。祥鸾歌里转，春燕舞前归。
寿爵传三礼，灯枝丽九微。运广薰风积，恩深湛露晞。
送寒终此夜，延宴待晨晖。

卷 882_7【凌晨】

卢照邻

日掩鸿都夕，河低乱箭移。虫飞明月户，鹊绕落花枝。
兰襟帐北壑，玉匣鼓文漪。闻有啼莺处，暗幄晓云披。

卷 882_8【登北固山】

宋之问

京镇周天险，东南作北关。埭横江曲路，戍入海中山。
望越心初切，思秦鬓已斑。空怜上林雁，朝夕待春还。

· 全唐诗 ·

卷 882_9【陪群公登箕山赋得群字】

宋之问

许由去已远，冥莫见幽坟。世薄人不贵，兹山唯白云。
宁知三千岁，复有尧为君。时佐激颓俗，登箕挹清芬。
高节虽旦暮，邈与洪崖群。

卷 882_10【人日兼立春小园宴】

苏颋

黄山积高次，表里望京邑。白日最灵朝，登攀尽原隰。
年灰律象动，阳气开迎入。烟霭长薄含，临流小溪涩。
宾朋莫我弃，词赋当春立。更与韶物期，不孤东园集。

卷 882_11【和黄门舅十五夜作】

苏颋

闻君陌上来，歌管沸相催。孤月连明照，千灯合暗开。
宝装游骑出，香绕看车回。独有归闲意，春庭伴落梅。

· 全唐诗 ·

卷 882_12【登绵州富乐山别李道士策】

薛曜

珠阙昆山远，银宫涨海悬。送君从此路，城郭几千年。
云雾含丹景，桑麻覆细田。笙歌未尽曲，风驭独泠然。

卷 882_13【九城寻山水】

薛曜

菊浦桃源瞰九城，鸾歌凤啸忽将迎。千岩杂树云霞色，
百道流泉风雨声。上客由来轩盖重，幽人自觉薜萝轻。
疑是昔年栖息地，山中日暮有余情。

卷 882_14【邙山古意】

薛曜

昔掩佳城路，曾惊壑易迁。今接宜都里，翻疑海作田。
镂鼎名应大，生金字不传。风飙吹白日，罗绮拭黄泉。
象凤笙留国，成龙剑上天。长乐移新垄，咸阳失旧阡。
川流徒漫漫，神理竟绵绵。伫见飞来鹤，沈嗟不学仙。

· 全唐诗 ·

卷 882_15 【凤阁南厅槐树半生死虽遇阳和终呈枯朽...缘情率尔为咏】

李怀远

庭槐岁月深，半死尚抽心。叶少宁障日，枝疏不碍禽。
帷幄谅无取，栋梁非所任。愧在龙楼侧，羞处凤池阴。
未能辞雨露，犹得款衣簪。惜悲生意尽，空余古木吟。

卷 882_16 【和九月九日登慈恩寺浮图应制】

赵彦伯

出豫垂佳节，凭高陟梵宫。皇心满尘界，佛迹现虚空。
日月宜长寿，天人得大通。喜闻题宝偈，受记莫由同。

卷 882_17 【秋夜巫山】

乔备

巫峡裴回雨，阳台淡荡云。江山空窈窕，朝暮自纷氲。
萤色寒秋露，猿啼清夜闻。谁怜梦魂远，肠断思纷纷。

· 全唐诗 ·

卷 882_18【晦日与卢舍人同诣补阙城南林园】

孙逖

芳年正月晦，假日早朝回。欲尽三春赏，还钦二阮才。
柳迎郊骑入，花近 庭开。宛是人寰外，真情寓物来。

卷 882_19【赠刘蓝田（一作王维诗）】

卢象

篱中犬迎吠，出屋候柴扉。岁晏输井税，山村人暮归。
晚田始家食，余布成我衣。对此能无事，劳君问是非。

卷 882_20【清明日青龙寺上方（得多字）】

刘长卿

上方偏可适，季月况堪过。远近人都至，东西山色多。
夕阳留径草，新叶变庭柯。已度清明节，春愁如客何。

· 全唐诗 ·

卷 882_21 【羽山】

萧颖士

九山方荡潏，三考伫良材。夏祖何屯圯，迁殒此山隈。
空余下泉客，谁复辨黄能。

卷 882_22 【游马耳山】

萧颖士

兹山表东服，远近瞻其名。合沓尽溟涨，浑浑连太清。
我来疑初伏，幽路无炎精。流水出溪尽，覆萝摇风轻。
高深变气候，俯仰暮天晴。入谷烟雨润，登崖云日明。
乾坤正含养，种植总滋荣。草树皆秀色，雏麋乱新声。
攀岩挹桂髓，洞穴拾瑶英。此地隐微径，何人得长生。
宿心尚葛许，弥愿栖蓬瀛。太息宦名路，迟回忠孝情。
还丹昧远术，养素惭幽贞。安得从此去，悠然升玉京。

卷 882_23 【赵载同游焦湖夜归作】

萧颖士

将泽国，溯腾迎淮甸。东江输大江，别流从此县。

· 全唐诗 ·

仙尉俯胜境，轻桡恣游衍。自公暇有余，微尚得所愿。
拈引间翰墨，风流尽欢宴。稍移井邑闲，始悦登眺便。
遥岫逢应接，连塘乍回转。划然气象分，万顷行可见。
波中峰一点，云际帆千片。浩叹无端涯，孰知蕴虚变。
往游信不厌，毕景方未还。兰 烟霭里，延缘蒲稗间。
势随风潮远，心与 闲。回见出浦月，雄光射东关。
悠然蓬壶事， 衰颜。安得傲吏隐，弥年寓兹山。

卷 882_24【龙兴观金篆建醮（景龙二年）】

王翰

泰山岩岩兮凌紫氛，中有群仙兮乘白云，
陈金荐璧兮 。

卷 882_25【山中松】

张鼎

枝耸碧云端，根侵藓壁盘。几经良匠顾，犹作散材看。
雪积花开少，风多子落干。空存后凋色，岁晚出林峦。

· 全唐诗 ·

卷 882_26【庭前晚花开】

李白

西王母桃种我家，三千阳春始一花。
结实苦迟为人笑，攀折唧唧长咨嗟

卷 882_27【汉州王大录事宅作】

杜甫

南溪老病客，相见下肩舆。近发看乌帽，催莼煮白鱼。
宅中平岸水，身外满床书。忆尔才名叔，含凄意有余。

卷 882_28【田家作】

皇甫冉

卧见高原烧，闲寻空谷泉。土膏消腊后，麦陇发春前。
药验桐君录，心齐庄子篇。荒村三数处，衰柳百余年。
好就山僧去，时过野舍眠。汲流宁厌远，卜地本求偏。
向子谙樵路，陶家置黍田。雪峰明晚景，风雁急寒天。
且复冠名鹖，宁知冕戴蝉。问津夫子倦，荷蓑丈人贤。
顾物皆从尔，求心正恍然。稽康懒慢性，只自恋风烟。

· 全唐诗 ·

卷 882_29【寄刘方平】

皇甫冉

十年不出溪林中，一朝结束甘从戎。严子持竿心寂历，
寥落荒篱遮旧宅。终日碧湍声自喧，暮秋黄菊花谁摘。
每望南峰如对君，昨来不见多黄云。石径幽人何所在，
玉泉疏钟时独闻。与君从来同语默，岂是悠悠但相识。
天畔三秋空复情，袖中一字无由得。世人易合复易离，
故交弃置求新知。叹息青青长不改，岁寒霜雪贞松枝。

卷 882_30【和中丞奉使承恩，还终南旧居】

皇甫冉

轩车寻旧隐，宾从满郊园。萧散烟霞兴，殷勤故老言。
谢公山不改，陶令菊犹存。苔藓侵垂钓，松篁长闭门。
风霜清吏事，江海谕君恩。祇召趋宣室，沉冥在一论。

卷 882_31【送令狐明府】

皇甫冉

行当腊候晚，共惜岁阴残。闻道巴山远，如何蜀路难。

· 全唐诗 ·

荒林藏积雪，乱石起惊湍。君有亲人术，应令劳者安。

卷 882_32【同韩给事观毕给事画松石】

皇甫冉

海峤微茫那得到，楚关迢递心空忆。夕郎善画岩间松，
远意幽姿此何极。千条万叶纷异状，虎伏螭盘争劲力。
扶疏半映晚天青，凝澹全和曙云黑。烟笼月照安可道，
雨湿风吹未曾息。能将积雪辨晴光，每与连峰作寒色。
龙楼不竞繁花吐，骑省偏宜遥夜直。罗浮道士访移来，
少室山僧旧应识。掖垣深沈昼无事，终日亭亭在人侧。
古槐衰柳宁足论，还对罍罍列行植。

卷 882_33【送从侄栖闲律师】

皇甫冉

能知出世法，讵有在家心。南院开门送，东山策杖寻。
经年期故里，及夏到空林。念远长劳望，朝朝草色深。

卷 882_34【舟中送李观】

皇甫冉

江南近别亦依依，山晚川长客伴稀。

· 全唐诗 ·

独坐相思计行日，出门临水望君归。

卷 882_35【敕移橘栽】

张彪

南橘北为枳，古来岂虚言。徙植期不变，阴阳感君恩。
枝条皆宛然，本土封其根。及时望栽种，万里绕花园。
滋味岂圣心，实以忧黎元。暂劳致力重，永感贡献烦。
是嗟草木类，稟异于乾坤。愿为王母桃，千岁奉至尊。

· 全唐诗 ·

第八百八十三卷

卷 883_1【晚霁登王六东阁】

严维

试上江楼望，初逢山雨晴。连空青嶂合，向晚白云生。
俊美要殊观，萧条见远情。情来不可极，日暮水流清。

卷 883_2【曲龙山歌】

顾况

曲龙丈人冠藕花，其颜色映光明砂。玉绳金枝有通籍，
五岳三山如一家。遥指丛霄沓灵岛，岛中晡晡无凡草。
九仙傲倪折五芝，翠凤白麟回异道。石台石镜月长明，
石洞石桥连上清。人间妻子见不识，拍云挥手升天行。
摩天截汉何潇洒，四石五云更上下。下方小兆更拜焉，
愿得骑云作车马。

子欲居九夷，乘桴浮于海。圣人之意有所在，
曲龙何在在海中。石室玉堂宵玲珑，其下琛怪之所产，

· 全唐诗 ·

其上灵栖复无限。无风浪顶高屋脊，有风天晴翻海眼。
愿逐刚风骑吏旋，起居按摩参寥天。凤凰颊骨流珠佩，
孔雀尾毛张翠盖。下看人界等虫沙，夜宿层城阿母家。

卷 883_3【柳宜城鹊巢歌】

顾况

相公宅前杨柳树，野鹊飞来复飞去。东家斫树枝，
西家斫树枝。东家西家斫树枝，发遣野鹊巢何枝。
相君处分留野鹊，一月生得三个儿。相君长命复富贵，
口舌贫穷徒尔为。

卷 883_4【道该上人院石竹花歌】

顾况

道该房前石竹丛，深浅紫，深浅红。婵娟灼烁委清露，
小枝小叶飘香风。上人心中如镜中，永日垂帘观色空。

卷 883_5【九日】

耿漳

九日强游登藻井，发稀那敢插茱萸。横空过雨千峰出，

· 全唐诗 ·

大野新霜万壑铺。更望尊中菊花酒，殷勤能得几回沽。

卷 883_6【青阳馆望九子山】

窦叔向

苍翠岩峤上碧天，九峰遥落县门前。毫芒映日千重树，
涓滴垂空万丈泉。武帝南游曾驻跸，始皇东幸亦祈年。
云祠绝迹终难访，唯有猿声到客边。

卷 883_7【青出蓝】

王季友

芳蓝滋匹帛，人力半天经。浸润加新气，光辉胜本清。
还同冰出水，不共草为萤。翻覆衣襟上，偏知造化灵。

卷 883_8【皇帝移晦日为中和节】

王季友

皇心不向晦，改节号中和。淑气同风景，嘉名别咏歌。
湔裙移旧俗，赐尺下新科。历象千年正，醺醺四海多。
花随春令发，鸿度岁阳过。天地齐休庆，欢声欲荡波。

· 全唐诗 ·

卷 883_9【送刘南史往杭州拜舘别驾叔】

刘商

兄弟飘零自长年，见君眉白转相怜。清扬似玉须勤学，
富贵由人不在天。万里榛芜迷旧国，两河烽火复相连。
林中若使题书信，但问漳滨访客船。

卷 883_10【和汴州令狐相公白菊】

杨巨源

兔园春欲尽，别有一丛芳。直似穷阴雪，全轻向晓霜。
凝晖侵桂魄，晶彩夺萤光。素萼迎风舞，银房沍露香。
水晶帘不隔，云母扇韬钁。纨袖呈瑶瑟，冰容启玉堂。
今来碧油下，知自白云乡。留此非吾土，须移凤沼傍。

卷 883_11【赠陈判官求子花诗（魏府出此物）】

杨巨源

油地轻绡碧且红，须怜纤手是良工。能生丽思千花外，
善点秾姿五彩中。子细传看临霁景，殷勤持赠及春风。
若将江上迎桃叶，一帖何妨锦绣同。

· 全唐诗 ·

卷 883_12【同诸公过福先寺律院宣上人房】

欧阳詹

律座下朝讲，昼门犹掩关。叨同静者来，正值高云闲。
寂尔方丈内，莹然虚白间。千灯智慧心，片玉清羸颜。
松色落深井，竹阴寒小山。晤言流曦晚，惆怅归人寰。

卷 883_13【城西别元九】

白居易

城西三月三十日，别友辞春两恨多。
帝里却归犹寂寞，通州独去又如何。

卷 883_14【陈家紫藤花下赠周判官】

白居易

藤花无次第，万朵一时开。不是周从事，何人唤我来。

· 全唐诗 ·

卷 883_15【游小洞庭】

白居易

湖山上头别有湖，芰荷香气占仙都。夜含星斗分乾象，
晓映雷云作画图。风动绿蘋天上浪，鸟栖寒照月中乌。
若非神物多灵迹，争得长年冬不枯。

卷 883_16【伤蔡处士】

杨衡

筐中遗草是琅玕，对此令人洒泪看。三径尚疑行迹在，
数萤犹自映书残。晨光不借泉门晓，暝色空添陇树寒。
欲问皇天天更远，有才无命说应难。

卷 883_17【奉使过石门瀑布】

丘丹

溪上望悬泉，耿耿云中见。披榛上岩巘，绝壁正东面。
千仞泻联珠，一潭喷飞霰。嵯峨满山响，坐觉炎氛变。
照日类虹蜺，从风似绡练。灵奇既天造，惜处穷海甸。
吾祖昔登临，谢公亦游衍。王程惧淹泊，下磴空延眷。

· 全唐诗 ·

千里雷尚闻，峦回树葱蒨。奔波恭贱役，探讨愧前彦。
永欲洗尘缨，终当惬兹愿。

卷 883_18【秋夕宿石门馆】

丘丹

暝从石门宿，摇落四岩空。潭月漾山足，天河泻涧中。
杉松寒似雨，猿鸟夕惊风。独卧不成寐，苍然想谢公。

卷 883_19【庐山瀑布】

张碧

谁将织女机头练，贴出青山碧云面。造化工夫不等闲，
剪破澄江凝一片。怪来洞口流呜咽，怕见三冬昼飞雪。
石镜无光相对愁，漫漫顶上沉秋月。争得阳乌照山北，
放出青天豁胸臆。黛花新染插天风，暮吐中心烂银色。
五月六月暑云飞，阁门远看澄心机。参差碎碧落岩畔，
梅花乱摆当风散。

卷 883_20【林书记蔷薇】

张碧

东风折尽诸花卉，是个亭台冷如水。黄鹂舌滑跳柳阴，

· 全唐诗 ·

教看蔷薇吐金蕊。双成涌出琉璃宫，天香阔罩红熏笼。
西施晓下吴王殿，乱抛娇脸新匀浓。瑶姬学绣流苏幔，
绿夹殷红垂锦段。炎洲吹落满汀云，阮瑀庭前装一半。
醉且书怀还复吟，蜀笺影里霞光侵。秦娥晚凭栏干立，
柔枝坠落青罗襟。殷勤无波绿池水，为君作镜开妆蕊。

卷 883_21【答友人新栽松】

张碧

石门新长青龙髯，虬身宛转云光黏。闻君爱我幽崖前，
十株五株寒霜天。越溪老僧头削雪，曾云手植当庭月。
三十年来遮火云，凉风五月生空门。愿君栽于清涧泉，
贞姿莫迓夭桃妍。易开还易落，贞姿郁郁长依然。
山童懒上孤峰巅，当窗划破屏风烟。

卷 883_22【金钱花】

陈翥

裊露牵风夹瘦莎，一星星火遍窠窠。
闲门永巷新秋里，幸不伤廉莫怕多。

古藓寒芜让品流，小斋多谢伴清幽。
若教夷甫门前种，也是无多过一秋。

· 全唐诗 ·

卷 883_23【山居雨霁即事】

长孙佐辅

结茅苍岭下，自与喧卑隔。况值雷雨晴，郊原转岑寂。
出门看反照，绕屋残溜滴。古路绝人行，荒陂响蝼蝈。
篱崩瓜豆蔓，圃壤牛羊迹。断续古祠鸦，高低远村笛。
喜闻东皋润，欲往未通屐。杖策试危桥，攀萝瞰苔壁。
邻翁夜相访，缓酌聊跂石。新月出污尊，浮云在中舄。
常隳腐儒操，谬习经邦画。有待时未知，非关慕沮溺。

卷 883_24【秋日登山】

长孙佐辅

逐胜不怯寒，秋山闲独登。依稀小径通，深处逢来僧。
侧石拥寒溜，欹松悬古藤。明书问知友，兴咏将谁能。

卷 883_25【自京师将赴黔南】

窦巩

风雨荆州二月天，问人须雇峡中船。
西南一望云和水，犹道黔南有四千。

· 全唐诗 ·

卷 883_26【中秋夜洞庭圆月】

姚合

素月闲秋景，骚人泛洞庭。沧波正澄霁，凉叶未飘零。
练彩凝葭莼，霜容静杳冥。晓栖河畔鹤，宵映渚边萤。
圆彩含珠魄，微飈发桂馨。谁怜采蘋客，此夜宿孤汀。

卷 883_27【濉阳行】

李涉

黄昏日暮驱羸马，夜宿濉阳烽火下。此地新经杀戮来，
墟落无烟空碎瓦。层冰塞断隋朝水，一道银河贯千里。
愁心翻覆梦难成，病仆呻吟呼不起。泗水三千招义军，
本是征战邀殊勋。十年麾下蓄壮气，一朝此地为愁人。
昨日太阳回照烛，转见天心重含育。早晚东风的发生，
古堤春草年年绿。

卷 883_28【六叹（集已载三首）】

李涉

蓬莱岛边采珠客，西望人寰星汉隔。千重叠浪耸云高，

· 全唐诗 ·

万里平沙连月白。海中洞穴寻难极，水底蛟人半相识。
玄蚌初开影暂明，骊龙欲近威难逼。辛苦风涛白首期，
得珠却恨求珠时。隋侯殁世几千载，只今薄俗空嗤嗤。

燕王爱贤筑金台，四方豪俊承风来。秦王烧书杀儒客，
肘腋之中千里隔。去年八月幽并道，昭王陵边哭秋草。
今年二月游函关，秦家城外悲河山。河上山边车马路，
残日青烟五陵树。

关东病儒客梁城，五岁十回逢乱兵。烧人之家食人肉，
狼虎炽心都未足。城里愁云不开城，城头野草春还绿。
五十余年忠烈臣，临难守节羞谋身。堂上英髦沉白刃，
门前舆隶乘朱轮。千古伤心汴河水，阴天落日悲风起。

卷 883_29【却归巴陵途中走笔寄唐知言】

李涉

去年腊月来夏口，黑风白浪打头吼。橹声轧轧摇不前，
看他撩乱张帆走。逾月始到鹦鹉洲，呜呜暮角喧城头。
逡巡未得见官长，梦寝但觉生愁忧。军中贤倅李监察，
人马晓来兼手札。教令参谒礼数全，头头要处相称掣。
唐氏一门今五龙，声华殷殷皆如钟。就中十一最年少，
别有俊气横心胸。巧缀五言才刮骨，却怕柱天身硃硃。
后辈无劳续出头，坳塘不合窥溟渤。君家三兄旧山侣，
方寸久来常许与。不觉淹留两月余，风光烂漫生洲渚。

· 全唐诗 ·

宇文文学儒家子，竹绕书斋花映水。醉舞狂歌此地多，
有时酩酊扶还起。猥蒙方伯怜饥贫，假名许得陪诸宾。
酒家债负有填日，恣意颇敢排青缙。余瞿二家同爱客，
园蔬任遣奴人摘。野狐泉头银叶方，一别十年今再觐。
更有风流歙奴子，能将盘帕来欺尔。白马青袍豁眼明，
许他真是查郎髓。良会芳时难再来，隙光电影长相催。
扁舟惆怅人南去，目断江天凡几回。

卷 883_30【山中五无奈何（诗一首见本集，题止山中二字）】

李涉

无奈落叶何，纷纷满衰草。疾来无气力，拥户不能扫。
欲访云外人，都迷上山道。

无奈涧水何，喧喧夜鸣石。疏林透斜月，散乱金光滴。
欲访涧底人，路穷潭水碧。

无奈阿鼎何，娇啼索梨栗。柴门正风雨，千向千回出。
欲识老病心，赖渠将过日。

无奈梅花何，满岩光似雪。春风总未至，独自惊时节。
欲见惆怅心，又看花上月。

· 全唐诗 ·

卷 883_31 【江南杂题】

张祜

积潦池新涨，颓垣址旧高。怒蛙横饱腹，斗雀堕轻毛。
碧瘦三棱草，红鲜百叶桃。幽栖日无事，痛饮读离骚。

卷 883_32 【赋得福州白竹扇子（探得轻字）】

张祜

金泥小扇谩多情，未胜南工巧织成。藤缕雪光缠柄滑，
篾铺银薄露花轻。清风坐向罗衫起，明月看从玉手生。
犹赖早时君不弃，每怜初作合欢名。

卷 883_33 【润州杨别驾宅送蒋侍御收兵归扬州】

张祜

冷气清金虎，兵威壮铁冠。扬旌川色暗，吹角水风寒。
人对輜輶醉，花垂睥睨残。羡归丞相阁，空望旧门阑。

· 全唐诗 ·

卷 883_34【观泗州李常侍打球】

张祜

日出树烟红，开场画鼓雄。骤骑鞍上月，轻拨镫前风。
斗转时乘势，旁捎乍迸空。等来低背手，争得旋分骢。
远射门斜入，深排马迥通。遥知三殿下，长恨出征东。

卷 883_35【闲居】

张祜

僻巷新苔遍，空庭弱柳垂。井栏防稚子，盆水试鹅儿。
喜客加笾食，邀僧长路棋。未能抛世事，除此更何为。

· 全唐诗 ·

第八百八十四卷

卷 884_1【渡吴江】

杜牧

堠馆人稀夜更长，姑苏城远树苍苍。江湖潮落高楼迥，
河汉秋归广殿凉。月转碧梧移鹊影，露低红草湿萤光。
文园诗侣应多思，莫醉笙歌掩华堂。

卷 884_2【元日观朝】

厉玄

玉座临新岁，朝盈万国心。火连双阙晓，仗列五门春。
瑞雪销鸳瓦，祥光在日轮。天颜不敢视，称庆拜空频。

卷 884_3【六月】

赵璘

六月火云散，蝉声鸣树梢。秋风岂便借，客思已萧条。

· 全唐诗 ·

倾国三年别，烟霞一路遥。行人断消息，更上灞陵桥。

卷 884_4【樊川寒食】

喻鳅

新松 绿草，古柏翳黄沙。珮珂客惊鸟，绮罗人见花。
蹙尘南北马，碾石去来车。川晚悲风动，坟前碎纸斜。

卷 884_5【芍药】

潘咸

闲来竹亭赏，赏极蕊珠宫。叶已尽余翠，花才半展红。
媚欺桃李色，香夺绮罗风。每到春残日，芳华处处同。

卷 884_6【晚步】

刘得仁

野步晚悠悠，山光澹早秋。远空沦日脚，多稼没人头。
古木蝉齐噪，深塍水慢流。幽居回不近，秋策却堪愁。

· 全唐诗 ·

卷 884_7【村晚闲步】

刘得仁

缓步出居处，过原边雁行。夕阳投草木，远水映苍茫。
野寺同蟾宿，云溪劂药尝。萧条霜景暮，极目尽堪伤。

卷 884_8【冬日题兴善寺崔律师院孤松】

刘得仁

为此疏名路，频来访远公。孤标宜雪后，每见忆山中。
静影生幽藓，寒声入迥空。何年植兹地，晓夕动清风。

卷 884_9【题新栽小松】

刘得仁

满庭萧飒皆凡木，岂得飕飕似石溪。雪夜枝柯疑画出，
月中长短共人齐。未知何日干天及，恐到秋来被鹤栖。
却向旧山寻得处，白云根蔕觅应迷。

· 全唐诗 ·

卷 884_10【栽松】

刘得仁

翠色凜空庭，披衣独绕行。取从山顶嶮，栽得道心生。
未弱幽泉韵，焉论别木声。霜天残月在，转影入池清。

卷 884_11【十日菊】

薛莹

昨日尊前折，万人酣晓香。今朝篱下见，满地委残阳。
得失片时痛，荣枯一岁伤。未将同腐草，犹更有重霜。

卷 884_12【赴南巴留别苏台知己】

贾岛

人过梅岭上，岁岁北风寒。落日孤舟去，青山万里看。
猿声湘水静，草色洞庭宽。已料生涯事，只应持钓竿。

· 全唐诗 ·

卷 884_13【红蔷薇】

庄南杰

九天碎霞明泽国，造化工夫潜剪刻。翠叶长眉约细枝，
殷红短刺钩春色。明日当楼晚香歇，金带盘空已成结。
谢豹声催麦陇秋，熏风吹落猩猩血。

卷 884_14【晓歌】

庄南杰

鸂鶒哭树星河转，海上金乌翅如电。嫦娥敛发绾云头，
玉女舒霞织天面。九土厨烟满城邑，商洛陇头车马急。
魏宫钟动绣窗明，梦娥惊对残灯立。

卷 884_15【春草歌】

庄南杰

漠漠绵绵几多思，无言领得春风意。花裁小锦绣晴空，
叶抽碧簾铺平地。含芳吊影争芬敷，绕云恨起山蘼芜。
离人不忍到此处，泪娥滴尽双真珠。

· 全唐诗 ·

卷 884_16【古松歌】

庄南杰

山上山下松，森沈翠盖烟。龟鳞犀甲锁支体，
泉声雨脚洗春风。深碧麈尾扫冥濛，浅黄龙腹盘穹崇。
擎天攫地数千尺，恐作云雨归维嵩。维嵩成大厦，
莫遣邂逅逢樵者。

卷 884_17【蒲中霁后晚望】

薛能

河边霁色无人见，身带春风立岸头。
浊水茫茫有何意，日斜还向古蒲州。

卷 884_18【龙门八韵】

薛能

河浸华夷阔，山横宇宙雄。高波万丈泻，夏禹几年功。
川迸清明雨，林生旦暮风。人看翻进退，鸟性断西东。
气逐云归海，声驱石落空。近身毛乍竖，当面语难通。
沸沫归何处，盘涡傍此中。从来化髻者，攀去路应同。

· 全唐诗 ·

卷 884_19【新雪】

薛能

细落粗和忽复繁，顿清朝市不闻喧。天迷皓色风何乱，
地湿春泥土半翻。香暖会中怀岳寺，樵鸣村外想家园。
闲吟只爱煎茶澹，斡破平光向近轩。

卷 884_20【送判官赴京】

薛能

阙下情偏已绝稀，天涯身远复相依。庭花每对从容落，
夜烛多同笑语归。君子是行应柏署，鄙人何望即柴扉。
青云若遇交亲话，白壁无心待发挥。

卷 884_21【溪东岑望天都山】

朱景玄

目望浮山丘，梯云上东岑。群峰争入冥，巉巖生太阴。
昔贤此升仙，结构穷耸深。未晓日先照，当昼色半沉。
风泉雪霜飞，云树琼玉林。大道非闭隔，无路不可寻。
窥镜澄夙虑，望坛起敬心。一从呼子安，永绝金玉音。

· 全唐诗 ·

卷 884_22【夜行次东关（一作行次潼关驿）逢魏扶东归】

许浑

南北断蓬飘，长亭酒一瓢。残云归太华，疏雨过中条。
树色随关迥，河声入塞遥。劳歌此分首，风急马萧萧。

卷 884_23【南游湘汉寄友人】

李频

南去远三京，三湘五月行。巴江雪水下，楚泽火云生。
向野聊中饮，乘凉探暮程。离怀不可说，已近峡猿声。

卷 884_24【送刘山人归洞庭】

李频

却共孤云去，高眠最上峰。半湖乘早月，中路入疏钟。
秋尽虫声急，夜深山雨重。当时同隐者，分得几株松。

· 全唐诗 ·

卷 884_25【早发】

李郢

野店星河在，行人道路长。孤灯怜宿处，斜月厌新装。
草色多寒露，虫声似故乡。清秋无限恨，残菊过重阳。

卷 884_26【题惠山】

李郢

乳洞阴阴碧涧连，杉松六月冷无蝉。
黄昏飞尽白蝙蝠，茶火数星山寂然。

卷 884_27【雨中看山榴落花】

李郢

山榴逼砌栽，山火一团开。尽日风兼雨，春渠拥作堆。

· 全唐诗 ·

卷 884_28【寄友人乞菊栽】

李郢

药阑经雨正堪锄，白菊烦君乞数株。潘岳赋中芳思在，
陶潜篱下绿英无。移来稍及蝉鸣树，种罢长教酒满壶。
子成仙纵难学，九秋思看集鸠雏。

卷 884_29【江边柳】

李郢

东风晴色挂阑干，眉叶初晴畏晓寒。
江上别筵终日有，绿条春在长应难。

卷 884_30【鹅儿】

李郢

腊后闲行村舍边，黄鹅清水真可怜。何穷散乱随新草，
永日淹留在野田。无事群鸣遮水际，争来引颈逼人前。
风吹楚泽蒹葭暮，看下寒溪逐去船。

· 全唐诗 ·

卷 884_31【酬友人春暮寄枳花茶】

李郢

昨日东风吹枳花，酒醒春晚一瓯茶。如云正护幽人堑，
似雪才分野老家。金饼拍成和雨露，玉尘煎出照烟霞。
相如病渴今全校，不羨生台白颈鸦。

卷 884_32【郢自街西醉归马鞭坠失崔员外、起秘书...抒短章
仰酬珍锡】

李郢

蜀岩阴面冷冥冥，偃雪欺霜半露青。铍刃剪裁多鹤媚，
细鞘挥拂带龙腥。崖垂万仞知无影，藓渍千年合有灵。
兰省贵寮蓬阁吏，一时缄赠到云亭。

卷 884_33【即目】

李郢

自笑腾腾者，非憨又不狂。何为跬似鼠，而复怯于獐。
落拓无生计，伶俜恋酒乡。冥搜得诗窟，偶战出文场。
爱雪愁冬尽，怀人觉夜长。石楼多爽气，怪案有余香。

· 全唐诗 ·

运去非关拙，时来不在忙。平生两闲暇，孤趣满沧浪。

卷 884_34【罗敷东馆亭下流泉云至前山拥咽经岁移时掬弄惆怅成章】

李郢

看山亭下小鸣泉，呜咽难通亦可怜。
惆怅无人为疏凿，拥愁含恨过年年。

卷 884_35【白樱树】

于武陵

记得花开雪满枝，和蜂和蝶带花移。
如今花落游蜂去，空作主人惆怅诗。

卷 884_36【过南城县麻姑山】

崔櫓

似前如却玉堆堆，薄带轻烟翠好裁。斜倚兔钩孤影伴，
校低仙掌一头来。盘疑虎伏形难写，展认龙拏势未回。
惊讶昔人曾羽化，此中争不接瑶台。

· 全唐诗 ·

诗手难题画手惭，浅青浓碧叠东南。尘愁世界忙心在，
霞伴神仙稳梦酣。雨涕自悲看雪鬓，星冠无计整云簷。
家风负荷须名宦，可惜千峰绿似蓝。

差烟危碧半斜晖，何代仙人此羽飞。高袖镇长寒柏暗，
古祠时复彩云归。红尘鞭马颜将换，碧落骖鸾意有违。
声利系身家系念，今生辜负六铢衣。

卷 884_37【和友人题僧院蔷薇花三首】

崔櫓

何人移得在禅家，瑟瑟枝条簇簇霞。争那寂寥埋草暗，
不胜惆怅舞风斜。无缘影对金尊酒，可惜香和石鼎茶。
看取老僧齐物意，一般抛掷等凡花。

忍委芳心此地开，似霞颜色苦低回。风惊少女偷香去，
雨认巫娥觅伴来。今日独怜僧院种，旧山曾映钓矶栽。
三清上客知惆怅，劝我春醪一两杯。

露香如醉态如慵，斜压危阑草色中。试问更谁过野寺，
无憀徒自舞春风。兰缸尚惜连明在，锦帐先愁入夏空。
一日几回来又去，不能容易舍深红。

· 全唐诗 ·

卷 884_38【春晚泊船江村】

崔櫓

芳草青青古渡头，渔家住处暂维舟。残花半树悄无语，
细雨满天风似愁。家信不来春又晚，客程难尽水空流。
自怜爱失心期约，看取花时更远游。

卷 884_39【柳】

崔櫓

风慢日迟迟，拖烟拂水时。惹将千万恨，系在短长枝。
骨软张郎瘦，腰轻楚女饥。故园归未得，多少断肠思。

卷 884_40【莲花】

崔櫓

影欹晴浪势欹烟，恨态缄言日抵年。轻雾晓和香积饭，
片红时堕化人船。人间有笔应难画，雨后无尘更好怜。
何限断肠名不得，倚风娇怯醉腰偏。

· 全唐诗 ·

卷 884_41【残莲花（后首一作张林诗）】

崔櫓

倚风无力减香时，涵露如啼卧翠池。
金谷楼前马嵬下，世间殊色一般悲。

不耐高风怕冷烟，瘦红欹委倒青莲。
无人解把无尘袖，盛取残香尽日怜。

卷 884_42【惜莲花】

崔櫓

半塘前日染来红，瘦尽金方昨夜风。留样最嗟无巧笔，
护香谁为惜熏笼。缘停翠棹沈吟看，忍使良波积渐空。
魂断旧溪憔悴态，冷烟残粉楚台东。

卷 884_43【岳阳云梦亭看莲花】

崔櫓

似醉如慵一水心，斜阳欲暝彩云深。清明月照羞无语，
凉冷风吹势不禁。曾向楚台和雨看，只于吴苑弄船寻。

· 全唐诗 ·

当时为汝题诗遍，此地依前泥苦吟。

卷 884_44 【村路菊花】

崔櫓

裊风惊未定，溪影晚来寒。不得重阳节，虚将满把看。
神仙谁采掇，烟雨惜凋残。牧竖樵童看，应教爱尔难。

卷 884_45 【题山驿新桐花】

崔櫓

雨余烟膩暖香浮，影暗斜阳古驿楼。丹凤总巢阿阁去，
紫花空映楚云愁。堪怜翠盖奇于画，更惜芳庭冷似秋。
长日老春看落尽，野禽闲哢碧悠悠。

卷 884_46 【山路木芙蓉】

崔櫓

不向横塘泥里栽，两株晴笑碧岩隈。枉教绝世深红色，
只向深山僻处开。万里王孙应有恨，三年贾傅惜无才。
缘花更叹人间事，半日江边怅望回。

· 全唐诗 ·

卷 884_47【新柳】

崔櫓

无情柔态任春催，似不胜风倚古台。
多少去年今日恨，御沟颜色洞庭来。

卷 884_48【临川见新柳】

崔櫓

不见江头三四日，桥边杨柳老金丝。岸南岸北往来渡，
带雨带烟深浅枝。何处故乡牵梦想，两回他国见荣衰。
汀洲草色亦如此，愁杀远人人不知。

卷 884_49【南阳见柳】

崔櫓

夜来风入最高枝，胃断愁肠几尺丝。楚塞曾吟烟午处，
曲江长忆雪晴时。金衔细鞵萦回岸，戍笛牛歌远近陂。
还把旧年惆怅意，武安城下一吟诗。

· 全唐诗 ·

卷 884_50【别君山】

崔櫓

点空夸黛妒愁眉，何必浮来结梦思。
惭愧二年青翠色，惹窗粘枕伴吟诗。

卷 884_51【宿寿安山阴馆闻泉】

崔櫓

一支清急万山来，穿竹喧飞破石苔。梦在故乡临欲到，
声闻孤枕却惊回。多愁鬓发余甘老，有限年光尔莫催。
缘忆旧游相似处，月明山响子陵台。

卷 884_52【共佳人守岁】

刘绮庄

桂华穷北陆，荆艳作东邻。残妆欲送晓，薄衣已迎春。
举袖争流雪，分歌竞绕尘。不应将共醉，年去远催人。

· 全唐诗 ·

第八百八十五卷

卷 885_1【櫻桃花】

皮日休

婀娜枝香拂酒壶，向阳疑是不融酥。
晚来崑崙浑如醉，惟有春风独自扶。

卷 885_2【夜看櫻桃花】

皮日休

纤枝瑶月弄圆霜，半入邻家半入墙。
刘阮不知人独立，满衣清露到明香。

卷 885_3【咏白莲】

皮日休

膩于琼粉白于脂，京兆夫人未画眉。静婉舞偷将动处，

· 全唐诗 ·

西施嚬效半开时。通宵带露妆难洗，尽日凌波步不移。
愿作水仙无别意，年年图与此花期。

细嗅深看暗断肠，从今无意爱红芳。折来只合琼为客，
把种应须玉瓮塘。向日但疑酥滴水，含风浑讶雪生香。
吴王台下开多少，遥似西施上素妆。

卷 885_4【赤门堰白莲花】

皮日休

缟带与纶巾，轻舟漾赤门。千回紫萍岸，万顷白莲村。
荷露倾衣袖，松风入髻根。潇疏今若此，争不尽余尊。

卷 885_5【丙午岁旦】

司空图

鸡报已判春，中年抱疾身。晓催庭火暗，风带寺幡新。
多虑无成事，空休是吉人。梅花浮寿酒，莫笑又移巡。

卷 885_6【丁巳元日】

司空图

稟朔华夷会，开春气象生。日随行阙近，岳为寿觞晴。

· 全唐诗 ·

作睿由稽古，昭仁事措刑。上玄劳眷佑，高庙保忠贞。
星变当移幸，人心喜奉迎。传呼清御道，雪涕识臣诚。
鼎饪和方济，台阶润欲平。扶天咨协力，并日召延英。
金跃洪炉动，云驱众蛰惊。关中留王气，席上纵奇兵。
累降搜贤诏，兼持进善旌。短辕收骥步，直路发鹏程。
自乏匡时略，非沽矫俗名。鹤笼何足献，蜗舍别无营。
羸带漳滨病，吟哀越客声。移居荒药圃，耗志在棋枰。
醉忘身空老，书怜眼尚明。偶能甘蹇分，岂是薄浮荣。
虑戒防微浅，知近利轻。献陵三百里，寤寐祷时清。

卷 885_7【光启三年人日逢鹿】

司空图

浮世仍逢乱，安排赖佛书。劳生中寿少，抱疾上升疏。
日暖人逢鹿，园荒雪带锄。知非今又过，蘧瑗最怜渠。

卷 885_8【浙上重阳】

司空图

登高唯北望，菊助可 明。离恨初逢节，贫居只喜晴。
好文时可见，学稼老无成。莫叹关山阻，何当不阻兵。

· 全唐诗 ·

卷 885_9【乙巳岁愚春秋四十九辞疾拜章将免左掖重阳独登上方】

司空图

雪鬓不禁镊，知非又此年。退居还有旨，荣路免妨贤。
落落鸣蛩鸟，晴霞度雁天。自无佳节兴，依旧菊篱边。

卷 885_10【重阳山居】

司空图

此身逃难入乡关，八度重阳在旧山。篱菊乱来成烂熳，
家僮常得解登攀。年随历日三分尽，醉伴浮生一片闲。
满目秋光还似镜，殷勤为我照衰颜。

卷 885_11【旅中重阳】

司空图

乘时争路只危身，经乱登高有几人。今岁节唯南至在，
旧交坟向北邙新。当歌共惜初筵乐，且健无辞后会频。
莫道中冬犹有闰，蟾声才尽即青春。

· 全唐诗 ·

卷 885_12【南至日】

司空图

年年山 来频，莫强孤危竞要津。吉卦偶成开病眼，
暖檐还葺寄羸身。求仙自躁非无药，报国当材别有人。
鬓发堪伤白已遍，镜中更待白眉新。

卷 885_13【五月九日】

司空图

金石皆销铄，贤愚共网罗。达从诗似偈，狂觉哭胜歌。
高燕凌鸿鹄，枯槎压芰荷。此中无别境，此外是闲魔。

卷 885_14【庚子腊月五日】

司空图

复道朝廷火，严城夜涨尘。骅骝思故第，鸂鶒失佳人。
禁漏虚传点，妖星不振辰。何当回万乘，重睹玉京春。

· 全唐诗 ·

卷 885_15【中元夜看月】

罗隐

朦胧南溟月，汹涌出云涛。下射长鲸眼，遥分玉兔毫。
势来牛斗动，路越宵冥高。竟夕瞻光影，昂头把白醪。

卷 885_16【木兰】

唐彦谦

众花摇落正无憀，脉脉芳丛契后凋。舒卷绿苞临小槛，
剪裁檀的缀长条。独当春尽情何限，尚有秋期别未遥。
桃叶近来消息绝，见君长忆渡江饶。

卷 885_17【玉蕊】

唐彦谦

玉蕊两高树，相辉松桂旁。向来尘不杂，此夜月仍光。
秀掩丛兰色，艳吞秣李芳。世人嫌具美，何必更清香。

· 全唐诗 ·

卷 885_18【莲】

唐彦谦

新莲映多浦，迢递绿塘东。静影摇波日，寒香映水风。
金尘飘落蕊，玉露洗残红。看著余芳少，无人问的中。

卷 885_19【望岳时贼据华夏】

唐彦谦

长路风埃隔楚氛，忽惊神岳映朝曛。削成绝壁五千仞，
高揖泥金七十君。祝史秘辞今莫睹，从臣嘉颂久无闻。
幽人闲望封中地，好为吾皇起白云。

卷 885_20【片石】

唐彦谦

小斋庐阜石，寄自沃洲僧。山客劳携笈，幽人自得朋。
瘦云低作段，野浪冻成云。便可同清话，何须有物凭。

· 全唐诗 ·

卷 885_21【柳】

唐彦谦

春风向杨柳，能事尽风流。有意疑张绪，无情见莫愁。
依然金谷在，宁免武昌偷。前路难回首，何须苦映楼。

卷 885_22【垂柳】

唐彦谦

垂柳碧髯茸，楼昏带雨容。思量成昼梦，来去发春慵。
梳洗凭张敞，乘骑笑稚恭。碧虚从转笠，红烛近高舂。
怨脸明秋水，愁眉淡远峰。小园花尽蝶，静院酒醒蛩。
旧作琴台凤，今为药店龙。宝奁抛掷久，一任景阳钟。

卷 885_23【紫薇花】

唐彦谦

素秋寒露重，芳事固应稀。小槛临清沼，高丛见紫薇。
温磨终有思，暗淡岂无辉。见欲迷交甫，谁能状宓妃。
妆新犹倚镜，步缓不胜衣。恍似新相得，侔如久未归。
又疑神女过，犹佩七香帔。还似星娥织，初临五彩机。

· 全唐诗 ·

庆云今已集，威凤莫惊飞。绮笔题难尽，烦君白玉徽。

卷 885_24【望中条】

唐彦谦

虞乡县西郭，改观揖中条。第蓄终南小，交遥。
崦深应有寺，峰近恐通桥。为语前村叟，他时寄采樵。

卷 885_25【蒙穀山】

唐彦谦

蒙穀山低碧海枯，仲君闲坐说麻姑。遥天鹤语知虚实，
长夜神光竟有无。秘祝斋心开九转，侍臣回首听三呼。
交朋漫信文成术，短烛瑶坛漏满壶。

卷 885_26【菊】

唐彦谦

雪菊金英两断肠，蝶翎蜂鼻带清香。寒村宿雾临幽径，
废苑斜晖傍短墙。近取松筠为伴侣，远将桃李作参商。
年来病肺疏杯酒，每忆龙山似故乡。

· 全唐诗 ·

卷 885_27【山中】

方干

爱山却把图书卖，嗜酒空教僮仆贲。只向阶前便渔钓，
那知枕上有云霞。暗泉出石飞仍咽，小径通桥直复斜。
窗竹未抽今夏笋，庭梅曾试当年花。姓名未及陶弘景，
髭鬓白于姜子牙。松月水烟千古在，未知终久属谁家。

卷 885_28【次韵和卢先辈避难寺居看牡丹】

王驾

乱后寄僧居，看花恨有余。香宜闲静立，态似别离初。
朵密红相照，栏低画不如。狂风任吹却，最共野人疏。

卷 885_29【春宫怨】

杜荀鹤

早被婵娟误，欲妆临镜慵。承恩不在貌，教妾若为容。
风暖鸟声碎，日高花影重。年年越溪女，相忆采芙蓉。

· 全唐诗 ·

卷 885_30【晨兴】

翁承赞

鼓绝天街冷雾收，晓来风景已堪愁。槐无颜色因经雨，
菊有精神为傍秋。自爱鲜飙生户外，不教闲事住心头。
披襟徐步一萧洒，吟绕盆池想狎鸥。

卷 885_31【江上吟晓】

王贞白

一叶野人舟，长将载酒游。夜来吟思苦，江上月华秋。
晓露满红蓼，轻波飏白鸥。渔翁似有约，相伴钓中流。

卷 885_32【过商山】

王贞白

一宿白云根，时经采麝村。数峰虽似蜀，当昼不闻猿。
马立溪沙浅，人争阁道喧。明朝弃襦罢，步步入金门。

· 全唐诗 ·

卷 885_33【泛镜湖】

王贞白

我泛镜湖日，未生千里莼。时无贺宾客，谁识谪仙人。
吟对四时雪，忆游三岛春。恶闻亡越事，洗耳大江滨。

卷 885_34【太湖石】

王贞白

谁怜孤峭质，移在太湖心。出得风波外，任他池馆深。
不同花逞艳，多愧竹垂阴。一片至坚操，那忧岁月侵。

卷 885_35【依韵和幹公题庭中太湖石二首】

王贞白

山立只盈寻，高奇药圃阴。风涛打欲碎，岩穴蛰方深。
藓点晴偏绿，蛩藏晓竞吟。岁寒终不变，堪比古人心。

徒劳水府寻，宛在玉堂阴。兰圃安虽窄，盆池映转深。
山僧来尽爱，诗客见先吟。若是买花者，年年不计心。

· 全唐诗 ·

卷 885_36【书陶潜醉石】

王贞白

片石陶真性，非为曲蘖昏。争如累月醉，不笑独醒人。
积叠莓苔色，交加薜荔根。至今重九日，犹待白衣魂。

卷 885_37【看天王院牡丹】

王贞白

前年帝里探春时，寺寺名花我尽知。
今日长安已灰烬，忍随南国对芳枝。

卷 885_38【芍药】

王贞白

芍药承春宠，何曾羨牡丹。麦秋能几日，谷雨只微寒。
妒态风频起，娇妆露欲残。芙蓉浣纱伴，长恨隔波澜。

· 全唐诗 ·

卷 885_39【独芙蓉】

王贞白

方塘清晓镜，独照玉容秋。蠹芰不相采，敛蘋空自愁。
日斜还顾影，风起强垂头。芳意羨何物，双双鸂鶒游。

卷 885_40【冯氏书斋小松二首】

王贞白

孤根生远岳，移植翠枝添。自秉雪霜操，任他蜂蝶嫌。
微阴连迥竹，清韵入疏帘。耸势即空碧，时人看莫厌。

得地已经岁，清音昼夜闻。根涵旧山土，叶间近溪云。
野鹤望长远，庭花笑不群。须知摇落后，众木始能分。

卷 885_41【社日村居（一作张演诗）】

张蠙

鹅湖山下稻粱肥，豚阱鸡栖对掩扉。
桑柘影斜春社散，家家扶得醉人归。

· 全唐诗 ·

卷 885_42【八月十六夜月】

卢延让

十六胜三五，中天照大荒。只讹些子缘，应号没多光。
桂老犹全在，蟾深未煞忙。难期一年事，到晓泥诗章。

卷 885_43【冬除夜书情】

卢延让

兀兀坐无味，思量谁与邻。数星深夜火，一个远乡人。
雁翥天微雪，风号树欲春。愁章自难过，不觉苦吟频。

卷 885_44【观新岁朝贺】

卢延让

龙墀初立仗，鸳鹭列班行。元日燕脂色，朝天桦烛香。
表章堆玉案，缙帛满牙床。三百年如此，无因及我唐。

· 全唐诗 ·

第八百八十六卷

卷 886_1【中秋月】

曹松

九十日秋色，今秋已十分。孤光吞列宿，四面绝微云。
众木排疏影，寒流叠细纹。遥遥望丹桂，心绪更纷纷。

卷 886_2【寄方干】

曹松

桐庐江水闲，终日对柴关。因想别离处，不知多少山。
钓舟春岸阔，庭树晚烟还。莫便求栖隐，桂枝堪恨颜。

卷 886_3【宿山寺】

曹松

溪山尽日行，方听远钟声。入院逢僧定，登楼见月生。

· 全唐诗 ·

露垂群木润，泉落一岩清。此景关吾事，通宵寐不成。

卷 886_4【冬日登江楼】

曹松

高楼临古岸，野步晚来登。江水因寒落，山云为雪凝。
远村虽入望，危槛不堪凭。亲老未归去，乡愁徒自兴。

卷 886_5【寄李处士】

曹松

僧话磻溪叟，平生重赤松。夜堂悲蟋蟀，秋水老芙蓉。
吟坐倦垂钓，闲行多倚筇。闻名来已久，未得一相逢。
塔见移来影，钟闻过去声。一斋唯默坐，应笑我营营。

卷 886_6【客中立春】

曹松

玉烛传佳节，阳和应此辰。土牛呈岁稔，彩燕表年春。
腊尽星回次，寒余月建寅。梅花将柳色，偏思越乡人。

· 全唐诗 ·

卷 886_7【南塘暝兴】

曹松

水色昏犹白，霞光暗渐无。风荷摇破扇，波月动连珠。
蟋蟀啼相应，鸳鸯宿不孤。小僮频报夜，归步尚踟蹰。

卷 886_8【送郑谷归宜春】

曹松

无成归故国，上马亦高歌。况是飞鸣后，殊为喜庆多。
暑消嵩岳雨，凉吹洞庭波。莫使闲吟去，须期接盛科。

卷 886_9【送曾德迈归宁宜春】

曹松

湘东山川有清辉，袁水词人得意归。几府争驰毛义檄，
一乡看侍老莱衣。筵开灞岸临清浅，路去蓝关入翠微。
想到宜阳更无事，并将欢庆奉庭闱。

· 全唐诗 ·

卷 886_10【山泉】

李洞

半空飞下水，势去响如雷。静彻啼猿寺，高凌坐客台。
耳同经剑阁，身若到天台。溅树吹成冻，凌祠触作灰。
深中试椰栗，浅处落莓苔。半夜重城闭，潺湲枕上来。

卷 886_11【松】

卢士衡

云外千寻好性灵，伴杉陪柏事孤贞。招呼暑气终无分，
应和凉风别有声。细雨洒时花旋落，道人食处叶重生。
如逢郢匠垂搜采，为栋为梁力不轻。

卷 886_12【再游紫阳洞重题小松】

卢士衡

仙家种此充朝食，叶叶枝枝造化力。去年见时似鹤高，
今年萧骚八九尺。不同矮桧终委地，定向晴空倚天碧。
好期逸士统贞根，昂枝点破秋苔色。寻思凡眼重花开，
宁知此木超尘埃。只是十年五年间，堪作大厦之宏材。

· 全唐诗 ·

卷 886_13【湘江晓望】

熊皎

笙歌欢罢散离筵，水色朦胧蘸宿烟。山响疏钟何处寺，
火光收钓下滩船。微云过岛侵微月，古岸平江浸远天。
归梦已阑风色动，孤帆仍要住无缘。

卷 886_14【早行】

熊皎

结束何妨早，将行四顾频。山前犹见月，陌上未逢人。
远树动宿鸟，危桥怯病身。渐明恒自慰，应免复迷津。

卷 886_15【游嵩山】

熊皎

独背焦桐访洞天，暂攀灵迹弃尘缘。深逢野草皆疑药，
靓见樵人恐是仙。翠木入云空自老，古碑横水莫知年。
可怜幽景堪长往，一任人间岁月迁。

· 全唐诗 ·

卷 886_16【九华望庐山】

熊皎

九江山势尽峥嵘，惟有匡庐最得名。万叠影遮残雪在，
数峰岚带夕阳明。冷侵醉榻铺秋色，高亚吟龙送水声。
只待丹青酬志了，白云深处是归程。

卷 886_17【道傍松】

熊皎

偃盖当衢莫记年，独含苍翠鹤应怜。垂阴独向笙歌地，
有韵自成风雨天。尘 路岐分夜月，烧侵根脚起残烟。
论功只合行人赏，销得烦蒸古道边。

卷 886_18【月中桂】

熊皎

断破重轮种者谁，银蟾何事便相随。莫言望夜无攀处，
却是吟人有得时。孤影不凋清露滴，异香常在好风吹。
几回目断云霄外，未必姮娥惜一枝。

· 全唐诗 ·

卷 886_19【湖上望庐山】

孙鲂

辍棹南湖首重回，笑青吟翠向崔嵬。
天应不许人全见，长把云藏一半来。

卷 886_20【题梅岭泉】

孙鲂

梅岭旧闻传，林亭势崦然。登临真不易，幽胜恐无先。
楚野平千里，吴江曲一边。标形都大别，洞府岂知焉。
飞阁横空去，征帆落面前。南雄雉堞峻，北壮凤台连。
烂熳三春媚，参差百卉妍。风桃诸处锦，洛竹半溪烟。
燕入晴梁语，莺从暖谷迁。石根朝霭碧，帘际晚霞鲜。
径柳行难约，庭莎醉好眠。清明时更异，造化意疑偏。
不独宜韶景，尤须看暑天。药苗繁似结，萝蔓猛如编。
珠亚垂枝果，冰澄汲井泉。粉墙蛴蛴落，丹槛雀雏颠。
炎气微茫觉，清飙左右穿。云峰从勃起，葵叶岂劳扇。
又见秋天丽，浑将夏日悬。红黥著霜树，香老卧池边。
菱芡谁铺绣，莓苔自学钱。暗虫依砌响，明月逗帘圆。
小砌滋新菊，高轩噪暮蝉。雨声寒飒飒，雁影晓联联。
释此何堪玩，深冬更可怜。窗中看短景，树里见重川。
冈阜分明出，杉松气概全。讴成白雪曲，吟是早梅篇。

· 全唐诗 ·

创制谁人解，根基太守贤。或时留皂盖，尽日簇华筵。
谁咏忧黎庶，狂游泥管弦。交加丰玉食，来去进金船。
侍从非常客，俳谐像列仙。画旗张赫奕，妖妓舞婵娟。
罢宴心犹恋，将归兴尚牵。只应愁逼夜，宁厌赏经年。
孤贱今何幸，跻攀奈有缘。展眉惊豁达，徐步喜周旋。
讽咏虽知苦，推功靡极玄。聊书四十韵，甘玠未精专。

卷 886_21【庐山瀑布】

孙鲂

有山来便有，万丈落云端。雾喷千岩湿，雷倾九夏寒。
图中僧写去，湖上客回看。却羡为猿鹤，飞鸣近碧湍。

卷 886_22【牡丹】

孙鲂

意态天生异，转看看转新。百花休放艳，三月始为春。
蝶死难离槛，莺狂不避人。其如豪贵地，清醒复何因。

卷 886_23【主人司空后亭牡丹】

孙鲂

佳卉挺芳辰，夭容乃绝伦。望开从隔岁，愁过即无春。

· 全唐诗 ·

体物真英气，余花似庶人。蜂攒知眷恋，鸟语亦殷勤。
况在豪华地，宁同里巷尘。酷怜应丧德，多赏奈怡神。
忌秽栽时土，尝甜折处津。绕行那识倦，围坐岂辞频。
入梦殊巫峡，临池胜洛滨。乐喧丝杂竹，露渍卯连寅。
饮兴尤思满，吟情自合新。怕风惟怯夜，忧雨不经旬。
栏槛为良援，亭台是四邻。虽非能伐性，争免碍还淳。
斗艳何惭蜀，矜繁未让秦。私心期一日，许近看逡巡。

卷 886_24【看牡丹二首】

孙鲂

莫将红粉比秣华，红粉那堪比此花。隔院闻香谁不惜，
出栏呈艳自应夸。北方有态须倾国，西子能言亦丧家。
输我一枝和晓露，真珠帘外向人斜。

看花长到牡丹月，万事全忘自不知。风促乍开方可惜，
雨淋将谢可堪悲。闲年对坐浑成偶，醉后抛眠恐负伊。
也拟便休还改过，迢迢争奈一年期。

卷 886_25【题未开牡丹】

孙鲂

青苞虽小叶虽疏，贵气高情便有余。浑未盛时犹若此，

· 全唐诗 ·

算应开日合何如。寻芳蝶已栖丹槛，衬落苔先染石渠。
无限风光言不得，一心留在暮春初。

卷 886_26【主人司空见和未开牡丹，辄却奉和】

孙鲂

把笔临芳不自怡，首征章句促妖期。已惊常调言多鄙，
遽捧高吟愧可知。绝代贞名应愈重，千金方笑更难移。
狂歌狂醉犹堪羨，大拙当时是老时。

卷 886_27【又题牡丹上主人司空】

孙鲂

一年芳胜一年芳，爱重贤侯意异常。手辟红房看阔狭，
自张青幄盖馨香。白疑美玉无多润，紫觉灵芝不是祥。
只恐梦征他日去，又须疑向凤池傍。

卷 886_28【牡丹落后有作】

孙鲂

未发先愁有一朝，如今零落更魂销。青丛别后无多色，

· 全唐诗 ·

红线穿来已半焦。蓄恨绮罗犹眷眷，薄情蜂蝶去飘飘。
明年虽道还期在，争奈凭栏乍寂寥。

卷 886_29【柳絮咏】

孙鲂

年年三月里，随处自悠扬。雨过浑疑尽，风来特地狂。
入花蜂有碍，遮水燕无妨。苦是添离思，青门道路长。

卷 886_30【甘露寺紫薇花】

孙鲂

蜀葵鄙下兼全落，菡萏清高且未开。赫日迸光飞蝶去，
紫薇擎艳出林来。闻香不称从僧舍，见影尤思在酒杯。
谁笑晚芳为贱劣，便饶春丽已尘埃。牵吟过夏惟忧尽，
立看移时亦忘回。惆怅寓居无好地，懒能分取一枝栽。

卷 886_31【芳草】

孙鲂

何处不相见，烟苗捧露心。萋萋绿远水，苒苒在空林。

· 全唐诗 ·

野吹闲摇阔，游人醉卧深。南朝古城里，碑石又应沈。

卷 886_32【春苔】

孙鲂

底物最牵吟，秋苔独自寻。何时连夜雨，叠翠满松阴。
湘岸荒祠静，吴宫古砌深。侯门还可惜，长被马蹄侵。

卷 886_33【老松】

孙鲂

郁郁复苍苍，秋风韵更长。空心应有 ，老叶不知霜。
子落生深涧，阴清背夕阳。如逢东岱雨，犹得覆秦王。

卷 886_34【柳（十一首）】

孙鲂

茏葱二月初，青软自相纡。意态花犹少，风流木更无。
影繁晴陌上，烟重古城隅。炀帝河声里，几番荣又枯。

数树新栽在画桥，春来犹自长长条。

· 全唐诗 ·

东风多事刚牵引，已解纤纤学舞腰。

金堤堤上一林烟，况近清明二月天。
别有数枝遥望见，画桥南面拂秋千。

春物牵情不奈何，就中杨柳态难过。
也知是处无花去，争奈看时未觉多。

小眉初展绿条稠，露压烟濛不自由。
莫是折来偏属意，依稀相似是风流。

九衢春霁湿云凝，着地毵毵碍马行。
拟折无端抛又恋，乱穿来去羡黄莺。

千树阴阴盖御沟，雪花金穗思悠悠。
先朝事后应无也，惟是荒根逐碧流。

摇荡和风恃赖春，蘸流遮路逐年新。
颠狂絮落还堪恨，分外欺凌寂寞人。

暖催春促吐芳芽，伴雨从风处处斜。
莫道玄功无定配，不然争得见桃花。

小池前后碧江滨，翠宰抛青烂熳春。
不是和风为抬举，可能开眼向行人。

深绿依依配浅黄，两般颜色一般香。

· 全唐诗 ·

到头袅娜成何事，只解年年断客肠。

卷 886_35【看桑】

孙鲂

簇簇互相遮，闲看实可嗟。藉多虽是叶，栽盛不如花。
春绿暗连麦，秋干暮立鸦。旧乡曾种得，经乱属谁家。

卷 886_36【仙都山留题】

刘昭禹

林下事无非，尘中竟不知。白云深拥我，青石合眠谁。
山静捣灵药，夜闲论古诗。此来亲羽客，何日变枯髭。

卷 886_37【晚霁望岳麓】

刘昭禹

湘西斜日边，峭入几寻天。翠落重城内，屏开万户前。
崖峻危溅瀑，林罅静通仙。谁肯功成后，相携扫石眠。

· 全唐诗 ·

卷 886_38【石笋】

刘昭禹

千古海门石，移归吟叟居。窃腥蛟出后，形瘦浪冲余。
工语宁无玉，僧知忽有书。好期仙者叱，变化向庭隅。

卷 886_39【伤雨后牡丹】

刘昭禹

废功看不已，醉起又持杯。数日帘常卷，中宵雨忽来。
凄凉无戏蝶，零落在苍苔。造化根难问，令人首可回。

卷 886_40【送人红花栽】

刘昭禹

世上红蕉异，因移万里根。艰难离瘴土，潇洒入朱门。
叶战青云韵，花零宿露痕。长安多未识，谁想动吟魂。

· 全唐诗 ·

卷 886_41【晓望】

刘乙

地祇逃秀境，神化或殷雷。裂汉娲补合，高峰剑跃开。
即今新定业，何世不遗才。若是浮名道，须言有祸胎。

卷 886_42【山中早起】

刘乙

鸡调扶桑枝，秋空隐少微。阔云霞并曜，高日月争辉。
若厥开天道，同初发帝机。以言当代事，闲辟紫宸扉。

卷 886_43【晚步】

姚揆

陋巷贫疑本姓颜，晚来闲步出林间。数声长笛吹沈日，
一片残云点破山。岛寺渐疏敲石磬，渔家方半掩柴关。
迟回从此搜吟久，待得溪头月上还。

· 全唐诗 ·

卷 886_44【秋日江东晚行】

姚揆

迢迢驱马过江东，此际令人恨莫穷。一撮秋烟堤上白，
半轮残日岭头红。路岐滋味犹如旧，乡曲声音渐不同。
含思看看到梁苑，画楼丝竹彻遥空。

卷 886_45【题陶渊明醉石】

陈光

片石露寒色，先生遗素风。醉眠芳草合，吟起白云空。
道出乾坤外，声齐日月中。我知彭泽后，千载与谁同。

卷 886_46【长安新柳】

陈光

九陌云初霁，皇衢柳已新。不同天苑景，先得日边春。
色浅微含露，丝轻未惹尘。一枝方欲折，归去及兹晨。

· 全唐诗 ·

卷 886_47【雪晴】

杨凝式

春来冰未泮，冬至雪初晴。为报方袍客，丰年瑞已成。

· 全唐诗 ·

第八百八十七卷

卷 887_1 【上安祿山（祿山入洛陽，大雪盈尺，言上詩）】

盧言

象曰云雷屯，大君理經綸。馬上取天下，雪中朝海神。

卷 887_2 【儲潭廟（大曆三年戊申歲）】

裴諝

江水上源急如箭，潭北轉急令目眩。中間十里澄漫漫，
龍蛇若見若不見。老農老圃望天語，儲潭之神可致雨。
質明齋服躬往奠，牢醴豐潔精誠舉。女巫紛紛堂下儼，
色似授兮意似與。云在山兮風在林，風云忽起潭更深。
氣霾祠宇連江陰，朝日不復照翠岑。回溪口兮棹清流，
好風帶雨送到州。吏人雨立喜再拜，神兮靈兮如獻酬。
城上樓兮危架空，登四望兮暗濛濛。不知兮千萬里，
惠澤愿兮與之同。我有言兮報匪徐，車騎復往禮如初。
高垣墉兮大其門，洒掃丹雘壯神居。使過廟者之加敬，
酒食貨財而有余。神兮靈，神兮靈。匪享慢，享克誠。

· 全唐诗 ·

卷 887_3 【腊月中与韦户曹游发生洞裴回之际见双白蝙蝠...口号】

任要

山翠霁灵洞，洞深玄想微。一双白蝙蝠，三度向明飞。
虽然有两翅，了自无毛衣。若非饱石髓，那得凌_空飞。
偶见归堪说，殊胜不见归。

卷 887_4 【腊月中游发生洞裴回之际见双白蝙蝠三飞洞门...口号】

韦洪

欲验发生洞，先开冰雪行。窥临见二翼，色素飞无声。
状类白蝙蝠，幽感腾化精。应知五马来，启蛰迎春荣。
露冕_之久，鸣驺还慰情。

卷 887_5 【蜀中经蛮后寄陶雍】

马义

酋马渡泸水，北来如鸟轻。几年期凤阙，一日破龟城。
此地有征战，谁家无死生。人悲还旧里，鸟喜下空营。

· 全唐诗 ·

弟侄意初定，交朋心尚惊。自从经难后，吟苦似猿声。

卷 887_6【冲佑观】

张绍

大始未形，混沌无际。上下开运，乾坤定位。日月丽天，山川镇地。万汇犹屯，三才始备。肇有神化，初生蒸民。上惟立德，下无疏亲。皇风荡荡，黔首淳淳。天下有道，谁非圣人。开源嗜欲，浇漓俗盛。贤者避世，真人华命。八极神乡，十州异境。翠阜丹丘，潜伏灵圣。惟彼武夷，实曰洞天。峰峦黛染，岩岫霞鲜。金房玉室，羽盖云輶。葬日风雨，会有神仙。国步多艰，皇纲中绝。四海九州，瓜分幅裂。稔祸隄隅，阻兵瓯越。寂寞玄风，荒凉绛阙。赫赫烈祖，再造丕基。拱揖高让，神人乐推。明明我后，允协昌基。功崇下武，德茂重熙。睿哲英断，雄略神智。拓土开疆，经天纬地。五岭来庭，三湘清彻。四海震威，群生怀惠。犹劳宵旰，犹混马车。贪狼俟静，害焉方除。淹留骏驭，想像鹑居。心悬真洞，梦到华胥。乃眷名山，追惟圣迹。内库颁金，元侯奉职。三境求规，五灵取则。跨谷弥冈，张霄架极。珠宫宝殿，璇台玉堂。凤翔高甍，龙转回廊。错落金碧，玲珑璧珫。云生林楚，雷绕藩墙。七圣斯严，三君如在。八景灵舆，九华神盖。清霄莫胥，明霜匪对。仿佛壶中，依稀物外。众真之宇，拟之无伦。会仙之类，名之惟新。高峰为壑，区谷成垠。皇献颂声，永绝淄磷。

· 全唐诗 ·

卷 887_7 【彻云涧】

郑露

延绵不可穷，寒光彻云际。落石早雷鸣，溅空春雨细。

卷 887_8 【秋气尚高凉】

林披

秋气尚高凉，寒笛吹万木。故人入我庭，相照不出屋。
山川虽远观，高怀不能掬。

卷 887_9 【五言赠诸法师】

公孙杲

驾鹤排朱雾，乘鸾入紫烟。凌晨味潭菊，薄暮玩峰莲。
玉叶低梁下，金飏引窗前。啸傲云霞际，留情鳞羽年。

卷 887_10 【恒岳晨望有怀】

李夔

二仪均四序，五岳分九州。灵造良难测，神功匪易酬。

· 全唐诗 ·

恒山北临岱，秀嶠东跨幽。潏洞镇河朔，嵯峨冠嵩丘。
裡祠彰旧典，坛庙列平畴。古树侵云密，飞泉界道流。
从官叨佐理，衔命奉珍羞。荐玉申诚效，锵金谅有由。
郊原照初日，林薄委徂秋。塞近风声厉，川长雾气收。
他乡饶感激，归望切祈求。景福如光愿，私门当复侯。

卷 887_11【偶宴西蜀摩诃池】

畅甫

珍木郁清池，风荷左右披。浅觴宁及醉，慢舸不知移。
荫林簟光冷，照流簪影欹。胡为独羁者，雪涕向涟漪。

卷 887_12【饮后献时相】

吴士矩

一夕心期一种欢，那知疏散负杯盘。
尊前数片朝云在，不许冯公细看。

卷 887_13【失题】

吴黔

故国海云端，归宁便整鞍。里荣身上襜，省罢手中兰。

· 全唐诗 ·

烧急平芜广，风悲古木寒。谢公山色在，朝夕共谁观。

卷 887_14【题惠聚寺】

崔融乾

人莫嫌山小，僧还爱寺灵。殿高神气力，龙活客丹青。

卷 887_15【平望赠蚊】

钱信

安得神仙术，试为施康济。使此平望村，如吾江子汇。

卷 887_16【武康碧落观】

胡传美

仙宫碧落太微书，遗迹依然掩故居。幢节不归天杳邈，
烟霞空锁日幽虚。不逢金简扳云洞，可惜瑶台叠藓除。
欲脱儒衣陪羽客，伤心齿发已凋疏。

· 全唐诗 ·

卷 887_17【白云寺】

许宏

踏破苔痕一径斑，白云飞处见青山。
不知浮世尘中客，几个能知物外闲。

卷 887_18【罗浮山】

文丙

罗浮多胜境，梦到固无因。知有长生药，谁为不死人。
根虽盘地脉，势自倚天津。未便甘休去，须栖老此身。

卷 887_19【牡丹】

文丙

万物承春各斗奇，百花分贵近亭池。开时若也姮娥见，
落日那堪公子知。诗客筵中金盏满，美人头上玉钗垂。
不同寒菊舒重九，只拟清香泛酒卮。

· 全唐诗 ·

卷 887_20【蘚花】

文丙

寂寞人偏重，无心愧牡丹。秋风凋不得，流水泛应难。
怪石纵教遍，幽庭一任盘。若逢公子顾，重叠是朱栏。

卷 887_21【新栽松】

文丙

可怜同百草，况负雪霜姿。歌舞地不尚，岁寒人自移。
阶除添冷淡，毫末入思惟。尽道生云洞，谁知路嶮巇。

卷 887_22【柳】

文丙

何事动吟哦，长 翠色和。垂阴千树少，送别一枝多。
带雾笼彭泽，摇风舞汴河。只因隋帝植，民力几销磨。

· 全唐诗 ·

卷 887_23【仙岩四瀑布即事寄上秘书包监侍郎七兄吏部李侍
...十四韵】

路应

绝境久蒙蔽，芟萝方迨兹。樵苏尚未及，冠冕谁能知。
缘崖开径小，架木度空危。水激千雷发，珠联万贯垂。
阴晴状非一，昏旦势多奇。并识轩辕迹，坛余汉武基。
猿声响深洞，岩影倒澄池。想像虬龙去，依稀羽客随。
玩奇目岂倦，寻异神忘疲。干云松作盖，积翠薜成帷。
含意攀丹桂，凝情顾紫芝。芸香蔼芳气，冰镜彻圆规。
胥念沧波远，徒怀魏阙期。征黄应计日，莫鄙北山移。

卷 887_24【奉和郎中游仙岩四瀑布寄包秘监李吏部赵婺州中
...十四韵】

李缙

符守分珪组，放情在丘峦。悠然造云族，忽尔登天坛。
求古理方赜，玩奇物不殫。晴光散崖壁，瑞气生芝兰。
中有四瀑水，奔流状千般。风云隐岩底，雨雪霏林端。
晶晶含古色，飏飏引晨寒。澄潭见猿饮，潜穴知龙盘。
坐憩苔石遍，仰窥杉桂攒。幽溪创高躅，灵药余仙餐。
携赏喜康乐，示文惊建安。缣緌炳珠宝，中外贻同官。
未调亦何为，辄陪高唱难。惭非御徒者，还得依门栏。

· 全唐诗 ·

卷 887_25【奉和郎中游仙山四瀑泉兼寄李吏部包秘监赵婺州齐处州】

戴公怀

今日永嘉守，复追山水游。因寻莽苍野，遂得轩辕丘。
访古事难究，览新情屡周。溪垂绿筱暗，岩度白云幽。
过石奇不尽，出林香更浮。凭高拥虎节，搏险窥龙湫。
淙溷泻三四，奔腾千万秋。寒惊殷雷动，暑骇繁霜流。
沫溅群鸟外，光摇数峰头。丛崖散滴沥，近谷藏飕飕。
况此特形胜，自余非等俦。灵光掩五岳，仙气均十洲。
书以谢群彦，永将叙徽猷。当思共攀陟，东南看斗牛。

卷 887_26【奉和郎中游仙山四瀑布兼寄李吏部、包秘监判官】

孟翔

昔人恣探讨，飞流称石门。安知郡城侧，别有神泉源。
疏凿意大禹，勤求闻轩辕。悠悠几千岁，翳荟群木繁。
奇状出蔽蔓，胜概毕讨论。沿崖百丈落，奔注当空翻。
下如散雨足，上拟屯云根。变态凡几处，静神竟朝昏。
渴贤寄珠玉，受馥寻兰荪。萝茑冒紫绶，岩隈驻朱轡。
方思谢康乐，好事名空存。

· 全唐诗 ·

卷 887_27【晚眺】

崔耿

江溶流落景，山色凝暮烟。衰发照秋日，壮心减昔年。
愁吟长抱膝，孰诉高高天。

卷 887_28【山下泉】

宇文鼎

可致清川广，难量利物功。涓流此山下，谁识去无穷。

卷 887_29【永嘉经谢公石门山作】

郭密之

绵境经耳目，未尝旷跻登。一窥石门险，再涤心神懵。
洞壑閟金涧，欹崖盘石楞。阴潭下幂幂，秀岭上层层。
千丈瀑流蹇，半溪风雨纒。兴余志每惬，心远道自弘。
乘轺广储峙，祇命愧才能。辍棹周气象，扪条历蹇崩。
忽如生羽翼，恍若将起腾。谢客今已矣，我来谁与朋。

· 全唐诗 ·

卷 887_30【芳草】

扈载

幽芳无处无，幽处恨何如。倦客伤归思，春风满旧居。
晚烟迷杳霭，朝露健扶疏。省傍灵光看，残阳少皞区。

卷 887_31【任阆中下乡检田，登艾萧山北望】

薛光谦

观农巡井邑，长望历山川。拥润开新耨，缘崖指火田。
荒村无径陌，古戍有风烟。瓠叶萦篱长，藤花绕架悬。
岸高攒树石，水净写云天。回首乡关路，行歌犹喟然。

卷 887_32【府尹王侍郎准制拜岳，因状嵩高灵胜，寄呈三十韵】

尉迟汾

雄雄天之中，峻极闻维嵩。作镇盛标格，出云为雨风。
瑞时物不疠，顺泽年多丰。加高冠四方，视秩居三公。
明朝虔昭报，颁祀岁严恭。署祝纡御札，诏贤导宸衷。
皇皇三川守，髻德清明躬。肃徒奉兰沐，竟夕玉华东。

· 全唐诗 ·

星汉耿斋户，松泉寒寿宫。具修谅蠲吉，曙色犹葱曨。
端仪大圭立，兴俛声玲珑。挹瓚椒桂馥，奏金岩壑空。
灵歆若有答，仿佛传祝工。卒事不遑偃，胜奇纷四丛。
朝霞破灵嶂，错落间苍红。动息形似蚁，玄黄气如笼。
奔倾千万状，群岳安比崇。日月襟袖捧，人天道路通。
冥搜必殫竭，跻览忘崎穹。踏翠遍诸刹，趣绵步难终。
浮丘仙袂接，谢公屐齿穷。龙潭应下瞰，九曲当骇容。
龙门计东豁，三台有何踪。金象语奚应，玉人光想融。
瑶浆与石髓，清骨宜遭逢。况是降神处，迹惟申甫同。
周翰已洽论，伊衡亦期功。诚富东山兴，须陟中台庸。
勉促旋駉轸，未可恋云松。散材事即异，期为卜一峰。

卷 887_33【早春陪敕使麻先生祭岳】

马令

我皇盛文物，道化天地先。鞭挞走神鬼，玉帛礼山川。
忽下袁州使，来游紫洞前。青羊得处所，白鹤 时年。
虔恳飞龙记，昭彰化鸟篇。 风半山水， 气总云烟。
光抱升中日，霞明五色天。山横翠微外，室在绿潭边。
缙幕灰初廋，焚林火欲然。年光著草树，春色换山泉。
伊水来何日，嵩岩去几千。山疑小天下，人是会神仙。
叶令乘凫入，浮丘驾鹤旋。麻姑几年岁，三见海成田。

· 全唐诗 ·

第八百八十八卷

卷 888_1 【奉和郎中题仙岩瀑布十四韵】

灵澈

致闲在一郡，民安已三年。每怀贞士心，孙许犹差肩。
采异百代后，得之古人前。扪险路块圯，临深闻潺湲。
上有千岁树，下飞百丈泉。清谷长雷雨，丹青凝霜烟。
遥将大壑近，暗与方壶连。白石颜色寒，老藤花叶鲜。
轩皇自兹去，乔木空依然。碧山东极海，明月高升天。
平野生竹柏，虽远地不偏。永愿酬国恩，自将布金田。
穆穆早朝人，英英丹陛贤。谁思沧洲意，方欲涉巨川。

卷 888_2 【过商山】

贯休

吟缘横翠忆天台，啸狖啼猿见尽猜。四个老人何处去，
一声仙鹤过溪来。皇城宫阙回头尽，紫阁烟霞为我开。
天际峰峰尽堪住，红尘中去大悠哉。

· 全唐诗 ·

卷 888_3【过西塞山】

齐己

空江平野流，风岛苇飕飕。残日衔西塞，孤帆向北洲。
边鸿渡汉口，楚树出吴头。终日高云里，身依片石休。

卷 888_4【中秋月】

可朋

登楼仍喜此宵晴，圆魄才观思便清。海面乍浮犹隐映，
天心高挂最分明。片云想有神仙出，回野应无鬼魅形。
曾向洞庭湖上看，君山半雾水初平。

卷 888_5【僧院泉】

修睦

澄澈照人胆，深山只一般。来难穷处所，心去助波澜。
砌曲夜声苦，窗虚客梦阑。无心谁肯爱，时有老僧看。

· 全唐诗 ·

卷 888_6【题僧院泉】

修睦

何处云根新布得，归仍半日在烟萝。莫轻竹引经窗小，
须信更深入耳多。绕砌虽然清自别，出门长恐浊相和。
从此无心恋沧海，沧海无风亦起波。

卷 888_7【岳上作】

修睦

始好步青苔，蝉声且莫催。辛勤来到此，容易便言回。
远水月未上，四方云正开。更堪逢道侣，特地话天台。

卷 888_8【望西山】

修睦

积翠异诸岳，令人看莫休。有时经暮雨，独得倚高楼。
云外僧应老，林间水正秋。到头归隐处，岂在问嵩丘。

· 全唐诗 ·

卷 888_9【题虎掇泉】

修睦

一自虎掇得，清声四远流。众人怜尔处，长夜洗心头。
出谷花随去，背岩猿下偷。林边落江徼，风起雨飕飕。

卷 888_10【松】

修睦

细韵飕飕入骨凉，影兼巢鹤过高墙。
盘根一种依平地，自是梧桐不久长。

卷 888_11【岳阳对柳】

修睦

谁此种秋色，令人看莫穷。正垂云梦雨，不奈洞庭风。
昔出长安道，独游隋苑东。当时今日思，须信苦相同。

· 全唐诗 ·

卷 888_12【归山吟】

清豁

聚如浮沫散如云，聚不相将散不分。
入郭当时君是我，归山今日我非君。

卷 888_13【游倚帝山二首】

吴筠

山间非吾心，物表翼所托。振衣超烦滓，策杖追岑壑。
绝地穷崕岬，造天究磐礴。迥临烟霞积，逖睨宇宙廓。
俯惊白云涌，仰骇飞泉落。苔浓鲜翠屏，松古丽丹嶂。
目冀睹乔羨，心希驭龙鹤。乃知巢由情，岂伊猿鸟乐。

兹山何独秀，万仞倚昊苍。晨跻烟霞趾，夕憩灵仙场。
俯观海上月，坐弄浮云翔。松风振雅音，桂露含晴光。
不出六合外，超然万累忘。信彼古来士，岩栖道弥彰。

卷 888_14【翰林院望终南山】

吴筠

窃慕隐沦道，所欢岩穴居。谁言忝休命，遂入承明庐。

· 全唐诗 ·

物情不可易，幽中未尝攄。幸见终南山，峩峩凌太虚。

青霭长不灭，白云闲卷舒。悠然相探讨，延望空踟蹰。
迹系心无极，神超兴有余。何当解维縶，永托逍遥墟。

卷 888_15【秋日彭蠡湖中观庐山】

吴筠

泛舟太湖上，回瞰兹山隈。万顷沧波中，千峰郁崔嵬。
凉烟发炉峤，秋日明帝台。绝巔凌大漠，悬流泻昭回。
穹崇石梁引，岌豁天门开。飞鸟屡隐见，白云时往来。
超然契清赏，目醉心悠哉。董氏出六合，王君升九垓。
谁言旷遐祀，庶可相追陪。从此永栖托，拂衣谢浮埃。

卷 888_16【秋日望倚帝山】

吴筠

楚服多奇山，灵表先倚帝。孤秀白云里，青冥何崇丽。
秋天已晴朗，晚日更澄霁。远峰列在目，杳与神襟契。
倏忽遗世间，宛如再登诣。伊予抱斯志，代处人烟闭。
何事牵俗网，悠然负芝桂。謁来从隐沦，式保羨门计。

· 全唐诗 ·

卷 888_17【蔷薇花】

李冶

翠融红绽浑无力，斜倚栏干似谗人。深处最宜香惹蝶，
摘时兼恐焰烧春。当空巧结玲珑帐，著地能铺锦绣裀。
最好凌晨和露看，碧纱窗外一枝新。

卷 888_18【柳】

李冶

最爱纤纤曲水滨，夕阳移影过青蘋。东风又染一年绿，
楚客更伤千里春。低叶已藏依岸棹，高枝应闭上楼人。
舞腰浙重烟光老，散作飞绵惹翠。

· 全唐诗 ·

第八百八十九卷

卷 889_1【好时光】

李隆基

宝髻偏宜宫样，莲脸嫩，体红香。眉黛不须张敞画，
天教入鬓长。
莫倚倾国貌，嫁取个，有情郎。彼此当年少，
莫负好时光。

卷 889_2【巫山一段云】

李晔

缥缈云间质，盈盈波上身。袖罗斜举动埃尘，明艳不胜
春。
翠鬟晚妆烟重，寂寂阳台一梦。冰眸莲脸见长新，
巫峡更何人。

蝶舞梨园雪，莺啼柳带烟。小池残日艳阳天，苕萝山又
山。

· 全唐诗 ·

青鸟不来愁绝，忍看鸳鸯双结。春风一等少年心，
闲情恨不禁。

卷 889_3【菩萨蛮（又名子夜歌、巫山一片云、重叠金）】

李晔

登楼遥望秦宫殿，茫茫只见双飞燕。渭水一条流，
千山与万丘。
远烟笼碧树，陌上行人去。安得有英雄，迎归大内中。

飘飘且在三峰下，秋风往往堪沾洒。肠断忆仙宫，
朦胧烟雾中。
思梦时时睡，不语长如醉。早晚是归期，苍穹知不知。

卷 889_4【一叶落】

李存勖

一叶落，褰朱箔，此时景物正萧索。画楼月影寒，
西风吹罗幕。吹罗幕，往事思量著。

· 全唐诗 ·

卷 889_5【如梦令（一名忆仙姿、宴桃源、比梅）】

李存勖

曾宴桃源深洞，一曲清歌舞凤。长记别伊时，
和泪出门相送。如梦，如梦，残月落花烟重。

卷 889_6【阳台梦】

李存勖

薄罗衫子金泥缝，困纤腰怯铢衣重。笑迎移步小兰丛，
弹金翘玉凤。
娇多情脉脉，羞把同心拈弄。楚天云雨却相和，
又入阳台梦。

卷 889_7【歌头】

李存勖

赏芳春，暖风飘箔。莺啼绿树，轻烟笼晚阁。杏桃红，
开繁萼。灵和殿，禁柳千行斜，金丝络。夏云多，
奇峰如削。纨扇动微凉，轻绡薄，梅雨霁，火云烁。
临水槛，永日逃繁暑，泛觥酌。

· 全唐诗 ·

露华浓，冷高梧，凋万叶。一霎晚风，蝉声新雨歇。
惜惜此光阴，如流水。东篱菊残时，叹萧索。繁阴积，
岁时暮，景难留。不觉朱颜失却，好容光。且且须呼宾
友，
西园长宵。宴云谣，歌皓齿，且行乐。

卷 889_8【浣溪纱（一作浣纱溪、小庭花）】

李璟

风压轻云贴水飞，乍晴池馆燕争泥，沈郎多病不胜衣。
沙上未闻鸿雁信，竹间时听鹧鸪啼，此情惟有落花知。

卷 889_9【摊破浣溪沙（一名山花子）】

李璟

菡萏香销翠叶残，西风愁起绿波间。还与韶光共憔悴，
不堪看。
细雨梦回鸡塞远，小楼吹彻玉笙寒。多少泪珠何限恨，
倚阑干。

手卷真珠上玉钩，依前春恨锁重楼。风里落花谁是主，
思悠悠。
青鸟不传云外信，丁香空结雨中愁。回首绿波三峡暮，

· 全唐诗 ·

接天流。

卷 889_10【渔父（一名渔歌子）】

李煜

浪花有意千里雪，桃花无言一队春。一壶酒，一竿身，
快活如侬有几人。

一棹春风一叶舟，一纶茧缕一轻钩。花满渚，酒满瓯，
万顷波中得自由。

卷 889_11【忆江南】

李煜

（一名望江南、梦江南、江南好、梦江口、望江梅、
归塞北、谢秋娘、春去也）

多少恨，昨夜梦魂中。还似旧时游上苑，
车如流水马如龙。花月正春风。

多少泪，沾袖复横颐。心事莫将和泪滴，
凤笙休向月明吹。肠断更无疑。

闲梦远，南国正芳春。船上管弦江面绿，
满城飞絮混轻尘。愁杀看花人。

· 全唐诗 ·

闲梦远，南国正清秋。千里江山寒色暮，
芦花深处泊孤舟。笛在月明楼。

卷 889_12【捣练子（一名深院月）】

李煜

深院静，小庭空，断续寒砧断续风。无奈夜长人不寐，
数声和月到帘栊。

云鬓乱，晚妆残，带恨眉儿远岫攒。斜托香腮春笋懒，
为谁和泪倚阑干。

卷 889_13【相见欢（一名乌夜啼）】

李煜

（又名上西楼、西楼子、月上瓜洲、秋夜月、忆真妃）
林花谢了春红，太匆匆。无奈朝来寒雨，晚来风。
胭脂泪，相留醉，几时重。自是人生长恨，水长东。

无言独上西楼，月如钩。寂寞梧桐深院，锁清秋。
剪不断，理还乱，是离愁。别是一般滋味，在心头。

· 全唐诗 ·

卷 889_14【长相思（一名双红豆、山渐青、忆多娇）】

李煜

一重山，两重山。山远天高烟水寒，相思枫叶丹。
菊花开，菊花残。塞雁高飞人未还，一帘风月闲。

云一涡，玉一梭。澹澹衫儿薄薄罗，轻颦双黛螺。
秋风多，雨如和。帘外芭蕉三两窠，夜长人奈何。

卷 889_15【浣溪沙】

李煜

红日已高三丈透，金炉次第添香兽，红锦地衣随步皱。
佳人舞点金钗溜，酒恶时拈花蕊嗅，别殿遥闻箫鼓奏。

转烛飘蓬一梦归，欲寻陈迹怅人非，天教心愿与身违。
待月池台空逝水，荫花楼阁漫斜晖，登临不惜更沾衣。

卷 889_16【采桑子（一名丑奴儿、罗敷媚、罗敷艳歌）】

李煜

辘轳金井梧桐晚，几树惊秋。昼雨如愁，百尺虾须上玉

· 全唐诗 ·

钩。

琼窗春断双蛾皱，回首边头。欲寄鳞游，九曲寒波不溯流。

亭前春逐红英尽，舞态徘徊。细雨霏微，不放双眉时暂开。

绿窗冷静芳音断，香印成灰。可奈情怀，欲睡朦胧入梦来。

卷 889_17【菩萨蛮】

李煜

花明月暗笼轻雾，今宵好向郎边去。划袜步香阶，
手提金缕鞋。
画堂南畔见，一晌偎人颤。好为出来难，教君恣意怜。

蓬莱院闭天台女，画堂昼寝无人语。抛枕翠云光，
绣衣闻异香。
潜来珠锁动，惊觉鸳鸯梦。慢脸笑盈盈，相看无限情。

铜簧韵脆锵寒竹，新声慢奏移纤玉。眼色暗相钩，
秋波横欲流。
雨云深绣户，来便谐衷素。宴罢又成空，梦迷春睡中。

人生愁恨何能免，销魂独我情何限。故国梦重归，

· 全唐诗 ·

觉来双泪垂。
高楼谁与上，长记秋晴望。往事已成空，还如一梦中。

卷 889_18【清平乐（一名忆萝月）】

李煜

别来春半，触目愁肠断。砌下落梅如雪乱，拂了一身还满。
雁来音信无凭，路遥归梦难成。离恨却如春草，
更行更远还生。

卷 889_19【喜迁莺（一名鹤冲天、燕归来）】

李煜

晓月坠，宿云微，无语枕频欹。梦回芳草思依依，
天远雁声稀。
啼莺散，余花乱，寂寞画堂深院。片红休扫尽从伊，
留待舞人归。

卷 889_20【阮郎归（一名醉桃源、碧桃春）】

李煜

东风吹水日衔山，春来长是闲。落花狼藉酒阑珊，

· 全唐诗 ·

笙歌醉梦间。
春睡觉，晚妆残，无人整翠鬟。留连光景惜朱颜，
黄昏独倚阑。

卷 889_21【锦堂春（一名乌夜啼）】

李煜

昨夜风兼雨，帘帟飒飒秋声。烛残漏滴频欹枕，
起坐不能平。
世事漫随流水，算来一梦浮生。醉乡路稳宜频到，
此外不堪行。

卷 889_22【应天长】

李煜

一钩初月临妆镜，蝉鬓凤钗慵不整。重帘静，层楼迥，
惆怅落花风不定。
柳堤芳草径，梦断辘轳金井。昨夜更阑酒醒，春愁过却
病。

· 全唐诗 ·

卷 889_23【望远行】

李煜

碧砌花光照眼明，朱扉长日镇长扃。余寒欲去梦难成，
炉香烟冷自亭亭。
辽阳月，秣陵砧，不传消息但传情。黄金台下忽然惊，
征人归日二毛生。

卷 889_24【浪淘沙（一名卖花声）】

李煜

帘外雨潺潺，春意阑珊。罗衾不耐五更寒。
梦里不知身是客，一晌贪欢。
独自暮凭阑，无限江山。别时容易见时难。
流水落花春去也，天上人间。

往事只堪哀，对景难排。秋风庭院藓侵阶。
一桁珠帘闲不卷，终日谁来。
金剑已沈埋，壮气蒿莱。晚凉天净月华开。
想得玉楼瑶殿影，空照秦淮。

· 全唐诗 ·

卷 889_25【木兰花（一名玉楼春、春晓曲、惜春容）】

李煜

晓妆初了明肌雪，春殿嫔娥鱼贯列。凤箫声断水云闲，
重按霓裳歌遍彻。
临风谁更飘香屑，醉拍阑干情未切。归时休放烛花红，
待蹋马蹄清夜月。

卷 889_26【虞美人】

李煜

风回小院庭芜绿，柳眼春相续。凭阑半日独无言，
依旧竹声新月，似当年。
笙歌未散尊罍在，池面冰初解。烛明香暗画楼深，
满鬓清霜残雪思难禁。

春花秋月何时了，往事知多少。小楼昨夜又东风，
故国不堪回首月明中。
雕阑玉砌应犹在，只是朱颜改。问君能有几多愁，
恰似一江春水向东流。

· 全唐诗 ·

卷 889_27【一斛珠（一名醉落魄）】

李煜

晚妆初过，沈檀轻注些儿个。向人微露丁香颗。
一曲清歌，暂引樱桃破。
罗袖裛残殷色可，杯深旋被香醪涴。
绣床斜凭娇无那。烂嚼红茸，笑向檀郎唾。

卷 889_28【临江仙】

李煜

樱桃落尽春归去，蝶翻轻粉双飞。子规啼月小楼西。
玉钩罗幕，惆怅暮烟垂。
别巷寂寥人散后，望残烟草低迷。炉香闲袅凤凰儿。
空持罗带，回首恨依依。

卷 889_29【蝶恋花】

李煜

（一名一箩金、黄金缕、明月生南浦、凤栖梧、
鹊踏枝、卷珠帘、鱼水同欢）

· 全唐诗 ·

遥夜亭皋闲信步。才过清明，渐觉伤春暮。
数点雨声风约住，朦胧澹月云来去。
桃李依依香暗度。谁在秋千，笑里轻轻语。
一片芳心千万绪，人间没个安排处。

卷 889_30【破阵子（一名十拍子）】

李煜

四十年来家国，三千里地山河。凤阙龙楼连霄汉，
玉树琼枝作烟萝，几曾识干戈。
一旦归为臣虏，沈腰潘鬓销磨。最是苍黄辞庙日，
教坊独奏别离歌，垂泪对宫娥。

卷 889_31【醉妆词】

王衍

者边走，那边走，只是寻花柳。那边走，者边走，
莫厌金杯酒。

卷 889_32【甘州曲】

王衍

画罗裙，能解束，称腰身。柳眉桃脸不胜春。

· 全唐诗 ·

薄媚足精神，可惜沦落在风尘。

卷 889_33【木兰花】

孟昶

冰肌玉骨清无汗，水殿风来暗香满。绣帘一点月窥人，
欹枕钗横云鬓乱。

起来琼户启无声，时见疏星渡河汉。屈指西风几时来，
只恐流年暗中换。

· 全唐诗 ·

第八百九十卷

卷 890_1【回波乐】

李景伯

回波尔时酒后，微臣职在箴规。侍宴既过三爵，
喧哗窃恐非仪。

卷 890_2【回波乐】

沈佺期

回波尔时佺期，流向岭外生归。身名已蒙齿录，
袍笏未复牙绯。

卷 890_3【回波乐】

裴谈

回波尔时栲栳，怕妇也是大好。外边只有裴谈，

· 全唐诗 ·

内里无过李老。

卷 890_4【舞马词】

张说

万玉朝宗凤宸，千金率领龙媒。眄鼓凝骄蹀躞，
听歌弄影徘徊。

天鹿遥征卫叔，日龙上借羲和。将共两骖争舞，
来随八骏齐歌。

彩旄八佾成行，时龙五色因方。屈膝衔杯赴节，
倾心献寿无疆。

帝皂龙驹沛艾，星阑骥子权奇。腾倚骧洋应节，
繁骄接迹不移。

二圣先天合德，群灵率土可封。击石骖驔紫燕，
攬金顾步苍龙。

圣君出震应箴，神马浮河献图。足蹋天庭鼓舞，
心将帝乐踟蹰。

· 全唐诗 ·

卷 890_5【蹋歌词】

崔液

彩女迎金屋，仙姬出画堂。鸳鸯裁锦袖，翡翠贴花黄。
歌响舞分行，艳色动流光。

庭际花微落，楼前汉已横。金壶催夜尽，罗袖舞寒轻。
乐笑畅欢情，未半著天明。

卷 890_6【桂殿秋】

李白

仙女下，董双成，汉殿夜凉吹玉笙。曲终却从仙官去，
万户千门惟月明。

河汉女，玉炼颜，云輶往往在人间。九霄有路去无迹，
袅袅香风生佩环。

卷 890_7【清平调】

李白

云想衣裳花想容，春风拂槛露华浓。若非群玉山头见，

· 全唐诗 ·

会向瑶台月下逢。

一枝红艳露凝香，云雨巫山枉断肠。借问汉宫谁得似，
可怜飞燕倚新妆。

名花倾国两相欢，常得君王带笑看。解得春风无限恨，
沉香亭北倚阑干。

卷 890_8【连理枝】

李白

雪盖宫楼闭，罗幕昏金翠。斗压阑干，香心澹薄，
梅梢轻倚。喷宝猊香烬、麝烟浓，馥红绡翠被。

浅画云垂帔，点滴昭阳泪。咫尺宸居，君恩断绝，
似遥千里。望水晶帘外、竹枝寒，守羊车未至。

卷 890_9【菩萨蛮】

李白

平林漠漠烟如织，寒山一带伤心碧。暝色入高楼，
有人楼上愁。
玉阶空伫立，宿鸟归飞急。何处是归程，长亭更短亭。

· 全唐诗 ·

卷 890_10【忆秦娥（一名秦楼月、碧云深、双荷叶）】

李白

箫声咽，秦娥梦断秦楼月。秦楼月，年年柳色，灞陵伤别。

乐游原上清秋节，咸阳古道音尘绝。音尘绝，
西风残照，汉家陵阙。

卷 890_11【清平乐（一名忆萝月）】

李白

禁庭春昼，莺羽披新绣。百草巧求花下斗，只赌珠玑满斗。

日晚却理残妆，御前闲舞霓裳。谁道腰肢窈窕，
折旋笑得君王。

禁闱秋夜，月探金窗罅。玉帐鸳鸯喷兰麝，
时落银灯香炷。女伴莫话孤眠，六宫罗绮三千。
一笑皆生百媚，宸衷教在谁边。

烟深水阔，音信无由达。惟有碧天云外月，
偏照悬悬离别。尽日感事伤怀，愁眉似锁难开。
夜夜长留半被，待君魂梦归来。

· 全唐诗 ·

鸾衾凤褥，夜夜常孤宿。更被银台红蜡烛，
学妾泪珠相续。花貌些子时光，抛人远泛潇湘。
欹枕悔听寒漏，声声滴断愁肠。

画堂晨起，来报雪花坠。高卷帘栊看佳瑞，
皓色远迷庭砌。盛气光引炉烟，素草寒生玉佩。
应是天仙狂醉，乱把白云揉碎。

卷 890_12【欵乃曲】

元结

偶存名迹在人间，顺俗与时未安闲。来谒大官兼问政，
扁舟却入九疑山。

湘江二月春水平，满月和风宜夜行。唱桡欲过平阳戍，
守吏相呼问姓名。

千里枫林烟雨深，无朝无暮有猿吟。倚桡静听曲中意，
好似云山韶濩音。

零陵郡北湘水东，浯溪形胜满湘中。溪口石颠堪自逸，
谁能相伴作渔翁。

下泷船似入深渊，上泷船似欲升天。泷南始到九疑郡，

· 全唐诗 ·

应绝高人乘兴船。

卷 890_13【渔父】

张志和

西塞山前白鹭飞，桃花流水鳜鱼肥。青箬笠，绿蓑衣，
斜风细雨不须归。

钓台渔父褐为裘，两两三三舴艋舟。能纵棹，惯乘流，
长江白浪不曾忧。

霅溪湾里钓鱼翁，舴艋为家西复东。江上雪，浦边风，
笑著荷衣不叹穷。

松江蟹舍主人欢，菰饭莼羹亦共餐。枫叶落，荻花干，
醉宿渔舟不觉寒。

青草湖中月正圆，巴陵渔父棹歌连。钓车子，橛头船，
乐在风波不用仙。

卷 890_14【渔父】

张松龄

乐是风波钓是闲，草堂松桧已胜攀。太湖水，洞庭山，

· 全唐诗 ·

狂风浪起且须还。

卷 890_15【章台柳（寄柳氏）】

韩翃

章台柳，章台柳，往日依依今在否？纵使长条似旧垂，
也应攀折他人手。

卷 890_16【三台（或加令字，一名翠华引、开元乐）】

韦应物

一年一年老去，明日后日花开。未报长安平定，
万国岂得衔杯。

冰泮寒塘水绿，雨余百草皆生。朝来衡门无事，
晚下高斋有情。

卷 890_17【调笑令（一名宫中调笑、转应曲、三台令）】

韦应物

胡马，胡马，远放燕支山下。跑沙跑雪独嘶，

· 全唐诗 ·

东望西望路迷。迷路，迷路，边草无穷日暮。

河汉，河汉，晓挂秋城漫漫。愁人起望相思，
塞北江南别离。离别，离别，河汉虽同路绝。

卷 890_18【三台（宫中二首，江南四首）】

王建

鱼藻池边射鸭，芙蓉苑里看花。日色柘袍相似，
不著红鸾扇遮。

池北池南草绿，殿前殿后花红。天子千秋万岁，
未央明月清风。

扬州桥边小妇，长干市里商人。三年不得消息，
各自拜鬼求神。

青草湖边草色，飞猿岭上猿声。万里三湘客到，
有风有雨人行。

树头花落花开，道上人去人来。朝愁暮愁即老，
百年几度三台。

斗身强健且为，头白齿落难追。准拟百年千岁，
能得几许多时。

· 全唐诗 ·

卷 890_19【调笑令（即宫中调笑）】

王建

团扇，团扇，美人并来遮面。玉颜憔悴三年，
谁复商量管弦。弦管，弦管，春草昭阳路断。

胡蝶，胡蝶，飞上金枝玉叶。君前对舞春风，
百叶桃花树红。红树，红树，燕语莺啼日暮。

罗袖，罗袖，暗舞春风依旧。遥看歌舞玉楼，
好日新妆坐愁。愁坐，愁坐，一世虚生虚过。

杨柳，杨柳，日暮白沙渡口。船头江水茫茫，
商人少妇断肠。肠断，肠断，鹧鸪夜飞失伴。

卷 890_20【调笑令（即转应曲）】

戴叔伦

边草，边草，边草尽来兵老。山南山北雪晴，
千里万里月明。明月，明月，胡笳一声愁绝。

· 全唐诗 ·

卷 890_21【纥那曲（二首）】

刘禹锡

杨柳郁青青，竹枝无限情。同郎一回顾，听唱纥那声。

蹋曲兴无穷，调同辞不同。愿郎千万寿，长作主人翁。

卷 890_22【忆江南（即春去也）】

刘禹锡

春去也，多谢洛城人。弱柳从风疑举袂，
丛兰裊露似沾巾。独坐亦含嚬。

春去也。共惜艳阳年。犹有桃花流水上，
无辞竹叶醉尊前。惟待见青天。

卷 890_23【潇湘神】

刘禹锡

湘水流，湘水流，九疑云物至今愁。若问二妃何处所，
零陵芳草露中秋。

· 全唐诗 ·

斑竹枝，斑竹枝，泪痕点点寄相思。楚客欲听瑶瑟怨，
潇湘深夜月明时。

卷 890_24【抛球乐】

刘禹锡

五色绣团圆，登君玳瑁筵。最宜红烛下，偏称落花前。
上客如先起，应须赠一船。

春早见花枝，朝朝恨发迟。及看花落后，却忆未开时。
幸有抛球乐，一杯君莫辞。

卷 890_25【花非花】

白居易

花非花，雾非雾。夜半来，天明去。来如春梦不多时，
去似朝云无觅处。

卷 890_26【忆江南】

白居易

江南好，风景旧曾谙。日出江花红胜火，

· 全唐诗 ·

春来江水绿如蓝。能不忆江南。

江南忆，最忆是杭州。山寺月中寻桂子，
郡亭枕上看潮头。何日更重游。

江南忆，其次忆吴宫。吴酒一杯春竹叶，
吴娃双舞醉芙蓉。早晚得相逢。

卷 890_27【如梦令】

白居易

前度小花静院，不比寻常时见。见了又还休，
愁却等闲分散。肠断，肠断，记取钗横鬓乱。

落月西窗惊起，好个匆匆些子。鬢鬢弹轻松，
凝了一双秋水。告你，告你，休向人间整理。

频日雅欢幽会，打得来来越日煞。说著暂分飞，
蹙损一双眉黛。无奈，无奈，两个心儿总待。

卷 890_28【长相思】

白居易

汴水流，泗水流。流到瓜洲古渡头，吴山点点愁。

· 全唐诗 ·

思悠悠，恨悠悠。恨到归时方始休，月明人倚楼。

深画眉，浅画眉。蝉鬓鬋髻云满衣，阳台行雨回。
巫山高，巫山低。暮雨潇潇郎不归，空房独守时。

卷 890_29【谪仙怨（集作律诗，题云苕溪酬梁耿别后见寄）】

刘长卿

晴川落日初低，惆怅孤舟解携。鸟向平芜远近，
人随流水东西。
白云千里万里，明月前溪后溪。独恨长沙谪去，
江潭春草萋萋。

卷 890_30【广谪仙怨】

窦弘余

胡尘犯阙冲关，金辂提携玉颜。云雨此时萧散，
君王何日归还？
伤心朝恨暮恨，回首千山万山。独望天边初月，
蛾眉独自弯弯。

· 全唐诗 ·

卷 890_31 【广谪仙怨】

康骈

晴山碍目横天，绿叠君王马前。銮辂西巡蜀国，
龙颜东望秦川。
曲江魂断芳草，妃子愁凝暮烟。长笛此时吹罢，
何言独为婵娟。

· 全唐诗 ·

第八百九十一卷

卷 891_1【八六子】

杜牧

洞房深，画屏灯照，山色凝翠沈沈。听夜雨，冷滴芭蕉，
惊断红窗好梦。龙烟细飘绣衾，辞恩久归长信。
凤帐萧疏，椒殿闲局。
辇路苔侵，绣帘垂，迟迟漏传丹禁。舜华偷悴，
翠鬟羞整。愁坐望处，金舆渐远，何时彩仗重临。
正消魂，梧桐又移翠阴。

卷 891_2【忆江南】

崔怀宝

平生愿，愿作乐中筝。得近玉人纤手子，
研罗裙上放娇声。便死也为荣。

· 全唐诗 ·

卷 891_3【闲中好】

郑符

闲中好，尽日松为侣。此趣人不知，轻风度僧语。

卷 891_4【闲中好】

段成式

闲中好，尘务不萦心。坐对当窗木，看移三面阴。

卷 891_5【闲中好】

张希复

闲中好，幽磬度声迟。卷上论题肇，画中僧姓支。

卷 891_6【南歌子（歌或作柯，一名春宵曲）】

温庭筠

手里金鹦鹉，胸前绣凤凰。偷眼暗形相，不如从嫁与，

· 全唐诗 ·

作鸳鸯。

似带如丝柳，团酥握雪花。帘卷玉钩斜，九衢尘欲暮，
逐香车。

倭堕低梳髻，连娟细扫眉。终日两相思，为君憔悴尽，
百花时。

脸上金霞细，眉间翠钿深。欹枕覆鸳衾，隔帘莺百转，
感君心。

扑蕊添黄子，呵花满翠鬟。鸳枕映屏山，月明三五夜，
对芳颜。

转盼如波眼，娉婷似柳腰。花里暗相招，忆君肠欲断，
恨春宵。

懒拂鸳鸯枕，休缝翡翠裙。罗帐罢炉熏，近来心更切，
为思君。

卷 891_7【荷叶杯】

温庭筠

一点露珠凝冷，波影，满池塘。绿茎红艳两相乱，肠断，
水风凉。

· 全唐诗 ·

镜水夜来秋月，如雪，采莲时。小娘红粉对寒浪，惆怅，正思惟。

楚女欲归南浦，朝雨，湿愁红。小船摇漾入花里，波起，隔西风。

卷 891_8【忆江南】

温庭筠

千万恨，恨极在天涯。山月不知心里事，
水风空落眼前花。摇曳碧云斜。

梳洗罢，独倚望江楼。过尽千帆皆不是，
斜晖脉脉水悠悠。肠断白蘋洲。

卷 891_9【蕃女怨】

温庭筠

万枝香雪开已遍，细雨双燕。钿蝉筝，金雀扇，
画梁相见。雁门消息不归来，又飞回。

碛南沙上惊雁起，飞雪千里。玉连环，金镞箭，
年年征战。画楼离恨锦屏空，杏花红。

· 全唐诗 ·

卷 891_10【遐方怨】

温庭筠

凭绣槛，解罗帏。未得君书，断肠潇湘春雁飞，
不知征马几时归，海棠花谢也，雨霏霏。

花半拆，雨初晴。未卷珠帘，梦残惆怅闻晓莺，
宿妆眉浅粉山横，约鬟鸾镜里，绣罗轻。

卷 891_11【诉衷情（一名一丝风）】

温庭筠

莺语，花舞，春昼午，雨霏微。金带枕，宫锦，凤凰帷。
柳弱燕交飞，依依。辽阳音信稀，梦中归。

卷 891_12【定西番】

温庭筠

汉使昔年离别，攀弱柳，折寒梅，上高台。
千里玉关春雪，雁来人不来。羌笛一声愁绝，月裴回。

· 全唐诗 ·

海燕欲飞调羽，萱草绿，杏花红，隔帘栊。
双鬓翠霞金缕，一枝春艳浓。楼上月明三五，琐窗中。

细雨晓莺春晚，人似玉，柳如眉，正相思。
罗幕翠帘初卷，镜中花一枝。肠断塞门消息，雁来稀。

卷 891_13【思帝乡】

温庭筠

花花，满枝红似霞。罗袖画帘肠断，卓香车。
回面共人闲语，战篋金凤斜。惟有阮郎春尽，不归家。

卷 891_14【酒泉子】

温庭筠

花映柳条，闲向绿萍池上。凭栏干，窥细浪，雨萧萧。
近来音信两疏索，洞房空寂寞。掩银屏，垂翠箔，度春宵。

日映纱窗，金鸭小屏山碧。故乡春，烟霭隔，背兰釭。
宿妆惆怅倚高阁，千里云影薄。草初齐，花又落，燕双飞。

· 全唐诗 ·

楚女不归，楼枕小河春水。月孤明，风又起，杏花稀。
玉钗斜簪云鬓重，裙上金缕凤。八行书，千里梦，雁南
飞。

罗带惹香，犹系别时红豆。泪痕新，金缕旧，断离肠。
一双娇燕语雕梁，还是去年时节。绿杨浓，芳草歇，
柳花狂。

卷 891_15【玉蝴蝶】

温庭筠

秋风凄切伤离，行客未归时。塞外草先衰，江南雁到迟。
芙蓉凋嫩脸，杨柳堕新眉。摇落使人悲，断肠谁得知。

卷 891_16【女冠子】

温庭筠

含娇含笑，宿翠残红窈窕。鬓如蝉，寒玉簪秋水，
轻纱卷碧烟。
雪胸鸾镜里，琪树凤楼前。寄语青娥伴，早求仙。

霞帔云发，钿镜仙容似雪。画愁眉，遮语回轻扇，
含羞下绣帏。

· 全唐诗 ·

玉楼相望久，花洞恨来迟。早晚乘鸾去，莫相遗。

卷 891_17【归国遥（国一作自，遥一作谣）】

温庭筠

香玉，翠凤宝钗垂^翠。钿筐交胜金粟，越罗春水绿。
画堂照帘残烛，梦余更漏促。谢娘无限心曲，晓屏山断
续。

双脸，小凤战篋金贴艳。舞衣无力风敛，藕丝秋色染。
锦帐绣帏斜掩，露珠清晓簟。粉心黄蕊花靥，黛眉山两
点。

卷 891_19【菩萨蛮】

温庭筠

小山重叠金明灭，鬓云欲度香腮雪。懒起画蛾眉，
弄妆梳洗迟
照花前后镜，花面交相映。新帖绣罗襦，双双金鹧鸪。

水精帘里颇黎枕，暖香惹梦鸳鸯锦。江上柳如烟，
雁飞残月天。

· 全唐诗 ·

藕丝秋色浅，人胜参差剪。双鬓隔香红，玉钗头上风。

蕊黄无限当山额，宿妆隐笑纱窗隔。相见牡丹时，
暂来还别离。
翠钗金作股，钗上蝶双舞。心事竟谁知，月明花满枝。

翠翘金缕双鸂鶒，水文细起春池碧。池上海棠梨，
雨晴红满枝。
绣衫遮笑靥，烟草粘飞蝶。青琐对芳菲，玉关音信稀。

杏花含露团香雪，绿杨陌上多离别。灯在月胧明，
觉来闻晓莺。
玉钩褰翠幕，妆浅旧眉薄。春梦正关情，镜中蝉鬓轻。

玉楼明月长相忆，柳丝袅娜春无力。门外草萋萋，
送君闻马嘶。
画罗金翡翠，香烛销成泪。花落子规啼，绿窗残梦迷。

凤凰相对盘金缕，牡丹一夜经微雨。明镜照新妆，
鬓轻双脸长。
画楼相望久，阑外垂丝柳。音信不归来，社前双燕回。

牡丹花谢莺声歇，绿杨满院中庭月。相忆梦难成，
背窗灯半明。
翠钿金压脸，寂寞香闺掩。人远泪阑干，燕飞春又残。

满宫明月梨花白，故人万里关山隔。金雁一双飞，

· 全唐诗 ·

泪痕沾绣衣。
小园芳草绿，家住越溪曲。杨柳色依依，燕归君不归。

宝函钿雀金鸂鶒，沈香阁上吴山碧。杨柳又如丝，
驿桥春雨时。
画楼音信断，芳草江南岸。鸾镜与花枝，此情谁得知。

南园满地堆轻絮，愁闻一霎清明雨。雨后却斜阳，
杏花零落香。
无言匀睡脸，枕上屏山掩。时节欲黄昏，无憀独倚门。

夜来皓月才当午，重帘悄悄无人语。深处麝烟长，
卧时留薄妆
当年还自惜，往事那堪忆。花露月明残，锦衾知晓寒。

雨晴夜合玲珑日，万枝香袅红丝拂。闲梦忆金堂，
满庭萱草长。
绣帘垂^翠，眉黛远山绿。春水渡溪桥，凭阑魂欲消。

竹风轻动庭除冷，珠帘月上玲珑影。山枕隐浓妆，
绿檀金凤凰。
两蛾愁黛浅，故国吴宫远。春恨正关情，画楼残点声。

玉纤弹处真珠落，流多暗湿铅华薄。春露浥朝花，
秋波浸晚霞。
风流心上物，本为风流出。看取薄情人，罗衣无此痕。

· 全唐诗 ·

卷 891_20【清平乐】

温庭筠

上阳春晚，宫女愁蛾浅。新岁清平思同辇，争奈长安路远。

凤帐鸳被徒熏，寂寞花锁千门。竟把黄金买赋，
为妾将上明君。

洛阳愁绝，杨柳花飘雪。终日行人争攀折，桥下水流呜咽。

上马争劝离觞，南浦莺声断肠。愁杀平原年少，
回首挥泪千行。

卷 891_21【更漏子】

温庭筠

柳丝长，春雨细，花外漏声迢递。惊塞雁，起城乌，
画屏金鹧鸪。

香雾薄，透帘幕，惆怅谢家池阁。红烛背，绣帘垂，
梦长君不知。

星斗稀，钟鼓歇，帘外晓莺残月。兰露重，柳风斜，
满庭堆落花。

· 全唐诗 ·

虚阁上，倚阑望，还似去年惆怅。春欲暮，思无穷，
旧欢如梦中。

金雀钗，红粉面，花里暂时相见。知我意，感君怜，
此情须问天。
香作穗，蜡成泪，还似两人心意。山枕腻，锦衾寒，
觉来更漏残。

相见稀，相忆久，眉浅淡烟如柳。垂翠幕，结同心，
待郎熏绣衾。
城上月，白如雪，蝉鬓美人愁绝。宫树暗，鹊桥横，
玉签初报明。
背江楼，临海月，城上角声呜咽。堤柳动，岛烟昏，
两行征雁分。
京口路，归帆渡，正是芳菲欲度。银烛尽，玉绳低，
一声村落鸡。

玉炉香，红蜡泪，偏照画堂秋思。眉翠薄，鬓云残，
夜长衾枕寒。
梧桐树，三更雨，不道离情正苦。一叶叶，一声声，
空阶滴到明。

卷 891_22【河渎神】

温庭筠

河上望丛祠，庙前春雨来时。楚山无限鸟飞迟，

· 全唐诗 ·

兰棹空伤别离。
何处杜鹃啼不歇，艳红开尽如血。蝉鬓美人愁绝，
百花芳草佳节。

孤庙对寒潮，西陵风雨潇潇。谢娘惆怅倚兰桡，
泪流玉箸千条。
暮天愁听思归乐，早梅香满山郭。回首两情萧索，
离魂何处飘泊。

铜鼓赛神来，满庭幡盖裴回。水村江浦过风雷，
楚山如画烟开。
离别棹声空萧索，玉容惆怅妆薄。青麦燕飞落落，
卷帘愁对珠阁。

卷 891_23【河传】

温庭筠

江畔，相唤。晓妆鲜，仙景个女采莲。请君莫向那岸边。
少年，好花新满船。
红袖摇曳逐风软，垂玉腕。肠向柳丝断。浦南归，
浦北归。莫知，晚来人已稀。

湖上，闲望。雨萧萧，烟浦花桥路遥。谢娘翠蛾愁不销。
终朝，梦魂迷晚潮。
荡子天涯归棹远，春已晚。莺语空肠断。若耶溪，

· 全唐诗 ·

溪水西。柳堤，不闻郎马嘶。

同伴，相唤。杏花稀，梦里每愁依违。仙客一去燕已飞。
不归，泪痕空满衣。

天际云鸟引情远，春已晚。烟霭渡南苑。雪梅香，
柳带长。小娘，转令人意伤。

卷 891_24【木兰花（即春晓曲）】

温庭筠

家临长信往来道，乳燕双双拂烟草。油壁车轻金犊肥，
流苏帐晓春鸡早。

笼中娇鸟暖犹睡，帘外落花闲不扫。衰桃一树近前池，
似惜容颜镜中老。

卷 891_25【竹枝（一名巴渝辞）】

皇甫松

槟榔花发鹧鸪啼，雄飞烟瘴雌亦飞。

木棉花尽荔支垂，千花万花待郎归。

芙蓉并蒂一心连，花侵槁子眼应穿。

· 全唐诗 ·

筵中蜡烛泪珠红，合欢桃核两人同。

斜江风起动横波，劈开莲子苦心多。

山头桃花谷底杏，两花窈窕遥相映。

卷 891_26【摘得新】

皇甫松

酌一卮，须教玉笛吹。锦筵红蜡烛，莫来迟。
繁红一夜经风雨，是空枝。

摘得新，枝枝叶叶春。管弦兼美酒，最关人。
平生都得几十度，展香茵。

卷 891_27【采莲子】

皇甫松

菡萏香连十顷陂（举棹），小姑贪戏采莲迟（年少）。

晚来弄水船头湿（举棹），更脱红裙裹鸭儿（年少）。

船取动湖光滟滟秋（举棹），贪看年少信船流（年少）。

· 全唐诗 ·

无端隔水抛莲子（举棹），遥被人知半日羞（年少）。

卷 891_28【抛球乐】

皇甫松

红拨一声飘，轻裘坠越绡。带翻金孔雀，香满绣蜂腰。
少少抛分数，花枝正索饶。

金蹙花球小，真珠绣带垂。几回冲蜡烛，千度入香怀。
上客终须醉，觥盂且乱排。

卷 891_29【忆江南】

皇甫松

兰烬落，屏上暗红蕉。闲梦江南梅熟日，
夜船吹笛雨潇潇。人语驿边桥。

楼上寝，残月下帘旌。梦见秣陵惆怅事，
桃花柳絮满江城。双髻坐吹笙。

· 全唐诗 ·

卷 891_30【天仙子】

皇甫松

晴野鹭鸶飞一只，水荇花发秋江碧。刘郎此日别天仙，
登绮席，泪珠滴，十二晚峰青历历。

踟躅花开红照水，鹧鸪飞绕青山觜。行人经岁始归来，
千万里，错相倚，懊恼天仙应有以。

卷 891_31【怨回纥】

皇甫松

白首南朝女，愁听异域歌。收兵颍利国，饮马胡卢河。

毳布腥膻久，穹庐岁月多。雕窠城上宿，吹笛泪滂沱。

祖席驻征棹，开帆候信潮。隔筵桃叶泣，吹管杏花飘。
船去鸥飞阁，人归尘上桥。别离惆怅泪，江路湿红蕉。

· 全唐诗 ·

卷 891_32【酒泉子】

司空图

买得杏花，十载归来方始坼。假山西畔药阑东，满枝红。
旋开旋落旋成空，白发多情人更惜。黄昏把酒祝东风，
且从容。

卷 891_33【生查子】

韩偓

侍女动妆奁，故故惊人睡。那知本未眠，背面偷垂泪。
懒卸凤凰钗，羞入鸳鸯被。时复见残灯，和烟坠金穗。

卷 891_34【浣溪沙】

韩偓

拢鬓新收玉步摇，背灯初解绣裙腰，枕寒衾冷异香焦。
深院不关春寂寂，落花和雨夜迢迢，恨情残醉却无聊。

宿醉离愁慢髻鬟，六铢衣薄惹轻寒，慵红闷翠掩青鸾。
罗袜况兼金菡萏，雪肌仍是玉琅玕，骨香腰细更沉檀。

· 全唐诗 ·

卷 891_35【浣溪沙】

张曙

枕障熏炉隔绣帷，二年终日苦相思，杏花明月始应知。
天上人间何处去，旧欢新梦觉来时，黄昏微雨画帘垂。

卷 891_36【卜算子慢】

钟辐

桃花院落，烟重露寒，寂寞禁烟晴昼。风拂珠帘，
还记去年时候。惜春心，不喜闲窗绣。倚屏山，
和衣睡觉。醺醺暗消残酒。
独倚危阑久。把玉笋偷弹，黛蛾轻斗。一点相思，
万般自家甘受。抽金钗，欲买丹青手。
写别来，容颜寄与，使知人清瘦。

· 全唐诗 ·

第八百九十二卷

卷 892_1【诉衷情】

韦庄

烛烬香残帘半卷，梦初惊。花欲谢，深夜，月笼明。
何处按歌声，轻轻。舞衣尘暗生，负春情。

碧沼红芳烟雨静，倚兰桡。垂玉佩，交带，袅纤腰。
鸳梦隔星桥，迢迢。越罗香暗销，坠花翘。

卷 892_2【天仙子】

韦庄

怅望前回梦里期，看花不语苦寻思。露桃宫里小腰枝，
眉眼细，鬓云垂，惟有多情宋玉知。

深夜归来长酩酊，扶入流苏犹未醒。醺醺酒气麝兰和，
惊睡觉，笑呵呵，长笑人生能几何。

· 全唐诗 ·

蟾彩霜华夜不分，天外鸿声枕上闻。绣衾香冷懒重熏，
人寂寂，叶纷纷，才睡依前梦见君。

梦觉云屏依旧空，杜鹃声咽隔帘栊。玉郎薄幸去无踪，
一日日，恨重重，泪界莲腮两线红。

金似衣裳玉似身，眼如秋水鬓如云。霞裙月帔一群群，
来洞口，望烟分，刘阮不归春日曛。

卷 892_3【江城子（一名水晶帘）】

韦庄

恩重娇多情易伤，漏更长，解鸳鸯。朱唇未动，
先觉口脂香。缓揭绣衾抽皓腕，移凤枕，枕檀郎。

髻鬟狼藉黛眉长，出兰房，别檀郎。角声呜咽，
星斗渐微茫。露冷月残人未起，留不住，泪千行。

卷 892_4【定西番】

韦庄

挑尽金灯红烬，人灼灼，漏迟迟，未眠时。
斜倚银屏无语，闲愁上翠眉。闷杀梧桐残雨，滴相思。

· 全唐诗 ·

芳草丛生缕结，花艳艳，雨濛濛，晓庭中。
塞远久无音问，愁销镜里红。紫燕黄鹂犹至，恨何穷。

卷 892_5【思帝乡】

韦庄

云髻坠，凤钗垂。髻坠钗垂无力，枕函欹。
翡翠屏深月落，漏依依。说尽人间天上，两心知。

春日游，杏花吹满头。陌上谁家年少，足风流。
妾拟将身嫁与，一生休。纵被无情弃，不能羞。

卷 892_6【上行杯】

韦庄

芳草灞陵春岸，柳烟深，满楼弦管。一曲离声肠寸断。
今日送君千万，红缕玉盘金镂盏。须劝！珍重意，莫辞
满。

白马玉鞭金镫，少年郎，离别容易。迢递去程千万里。
惆怅异乡云水，满酌一杯劝和泪。须愧！珍重意，莫辞
醉。

· 全唐诗 ·

卷 892_7【酒泉子】

韦庄

月落星沉，楼上美人春睡。绿云欹，金枕腻，画屏深。
子规啼破相思梦，曙色东方才动。柳烟轻，花露重，
思难任。

卷 892_8【女冠子】

韦庄

四月十七，正是去年今日。别君时，忍泪佯低面，
含羞半敛眉。
不知魂已断，空有梦相随。除却天边月，没人知。

昨夜夜半，枕上分明梦见。语多时，依旧桃花面，
频低柳叶眉。
半羞还半喜，欲去又依依。觉来知是梦，不胜悲。

卷 892_9【浣溪沙】

韦庄

清晓妆成寒食天，柳球斜袅间花钿，卷帘直出画堂前。

· 全唐诗 ·

指点牡丹初绽朵，日高犹自凭朱阑，含嚬不语恨春残。

欲上秋千四体慵，拟交人送又心忪，画堂帘幕月明风。
此夜有情谁不极，隔墙梨雪又玲珑，玉容憔悴惹微红。

惆怅梦余山月斜，孤灯照壁背红纱，小楼高阁谢娘家。
暗想玉容何所似，一枝春雪冻梅花，满身香雾簇朝霞。

绿树藏莺莺正啼，柳丝斜拂白铜鞮，弄珠江上草萋萋。
日暮饮归何处客，绣鞍骢马一声嘶，满身兰麝醉如泥。

夜夜相思更漏残，伤心明月凭阑干，想君思我锦衾寒。
咫尺画堂深似海，忆来惟把旧书看，几时携手入长安。

卷 892_10【归国遥】

韦庄

春欲暮，满地落花红带雨。惆怅玉笼鹦鹉，单栖无伴侣。
南望去程何许，问花花不语。早晚得同归去，恨无双翠
羽。

金翡翠，为我南飞传我意。罨画桥边春水，几年花下醉。
别后只知相愧，泪珠难远寄。罗幕绣帏鸳被，旧欢如梦
里。

· 全唐诗 ·

春欲晚，戏蝶游蜂花烂熳。日落谢家池馆，柳丝金缕断。
睡觉绿鬟风乱，画屏云雨散。闲倚博山长叹，泪流沾皓腕。

卷 892_11【菩萨蛮】

韦庄

红楼别夜堪惆怅，香灯半卷流苏帐。残月出门时，
美人和泪辞。
琵琶金翠羽，弦上黄莺语。劝我早归家，绿窗人似花。

人人尽说江南好，游人只合江南老。春水碧于天，
画船听雨眠。
垆边人似月，皓腕凝双雪。未老莫还乡，还乡须断肠。

如今却忆江南乐，当时年少春衫薄。骑马倚斜桥，
满楼红袖招。
翠屏金屈曲，醉入花丛宿。此度见花枝，白头誓不归。

劝君今夜须沈醉，尊前莫话明朝事。珍重主人心，
酒深情亦深。
须愁春漏短，莫诉金杯满。遇酒且呵呵，人生能几何。

洛阳城里春光好，洛阳才子他乡老。柳暗魏王堤，
此时心转迷。

· 全唐诗 ·

桃花春水绿，水上鸳鸯浴。凝恨对残晖，忆君君不知。

卷 892_12【更漏子】

韦庄

钟鼓寒，楼阁暝，月照古桐金井。深院闭，小庭空，
落花香露红。

烟柳重，春雾薄，灯背水窗高阁。闲倚户，暗沾衣，
待郎郎不归。

卷 892_13【谒金门（一名花自落、垂杨碧、出塞）】

韦庄

春雨足，染就一溪新绿。柳外飞来双羽玉，弄晴相对浴。
楼外翠帘高轴，倚遍阑干几曲。云淡水平烟树簇，
寸心千里目。

春漏促，金烬暗挑残烛。一夜帘前风撼竹，梦魂相断续。
有个娇饶如玉，夜夜绣屏孤宿。闲抱琵琶寻旧曲，
远山眉黛绿。

空相忆，无计得传消息。天上嫦娥人不识，寄书何处觅。
新睡觉来无力，不忍把君书迹。满院落花春寂寂，

· 全唐诗 ·

断肠芳草碧。

卷 892_14【清平乐】

韦庄

春愁南陌，故国音书隔。细雨霏霏梨花白，燕拂画帘金
额。

尽日相望王孙，尘满衣上泪痕。谁向桥边吹笛，
驻马西望销魂。

野花芳草，寂寞关山道。柳吐金丝莺语早，惆怅香闺暗
老。

罗带悔结同心，独凭朱阑思深。梦觉半床斜月，
小窗风触鸣琴。

何处游女，蜀国多云雨。云解有情花解语，空地绣罗金
缕。

妆成不整金钿，含羞待月秋千。住在绿槐阴里，
门临春水桥边。

莺啼残月，绣阁香灯灭。门外马嘶郎欲别，正是落花时
节。

妆成不画蛾眉，含愁独倚金扉。去路香尘莫扫，
扫即郎去归迟。

· 全唐诗 ·

琐窗春暮，满地梨花雨。君不归来情又去，红泪散沾金缕。

梦魂飞断烟波，伤心不奈春何。空把金针独坐，鸳鸯愁绣双窠。

绿杨春雨，金线飘千缕。花拆香枝黄鹂语，玉勒雕鞍何处。

碧窗望断燕鸿，翠帘睡眼溟濛。宝瑟谁家弹罢，含悲斜倚屏风。

卷 892_15【喜迁莺（即鹤冲天）】

韦庄

人汹汹，鼓冬冬，襟袖五更风。大罗天上月朦胧，骑马上虚空。
香满衣，云满路，鸾凤绕身飞舞。霓旌绛节一群群，引见玉华君。

街鼓动，禁城开，天上探人回。凤衔金榜出云来，平地一声雷。
莺已迁，龙已化，一夜满城车马。家家楼上簇神仙，争看鹤冲天。

· 全唐诗 ·

卷 892_16【应天长】

韦庄

绿槐阴里黄莺语，深院无人春昼午。画帘垂，金凤舞，
寂寞绣屏香一炷。
碧天云，无定处，空有梦魂来去。夜夜绿窗风雨，
断肠君信否。

别来半岁音书绝，一寸离肠千万结。难相见，易相别，
又是玉楼花似雪。
暗相思，无处说，惆怅夜来烟月。想得此时情切，
泪沾红袖黦。

卷 892_17【荷叶杯】

韦庄

绝代佳人难得，倾国，花下见无期。一双愁黛远山眉，
不忍更思惟。
闲掩翠屏金凤，残梦，罗幕画堂空。碧天无路信难通，
惆怅旧房栊。

记得那年花下，深夜，初识谢娘时。水堂西面画帘垂，
携手暗相期。

· 全唐诗 ·

惆怅晓莺残月，相别，从此隔音尘。如今俱是异乡人，
相见更无因。

卷 892_18【河传】

韦庄

何处，烟雨，隋堤春暮。柳色葱茏，画桡金缕，
翠旗高飏香风，水光融。
青娥殿脚春妆媚，轻云里，绰约司花妓。江都宫阙，
清淮月映迷楼，古今愁。

春晚，风暖，锦城花满。狂杀游人，玉鞭金勒寻胜，
驰骤轻尘，惜良辰。
翠蛾争劝临邛酒，纤纤手，拂面垂丝柳。
归时烟里钟鼓，正是黄昏，暗销魂。

锦浦，春女，绣衣金缕。雾薄云轻，花深柳暗，
时节正是清明，雨初晴。
玉鞭魂断烟霞路，莺莺语，一望巫山雨。香尘隐映，
遥望翠槛红楼，黛眉愁。

卷 892_19【怨王孙（与河传、月照梨花二词同调）】

韦庄

锦里，蚕市，满街珠翠。千万红妆，玉蝉金雀，

· 全唐诗 ·

宝髻花簇鸣珰，绣衣长。
日斜归去人难见，青楼远，队队行云散。不知今夜，
何处深锁兰房，隔仙乡。

卷 892_20【木兰花】

韦庄

独上小楼春欲暮，愁望玉关芳草路。消息断，不逢人，
却敛细眉归绣户。
坐看落花空叹息，罗袂湿班红泪滴。千山万水不曾行，
魂梦欲教何处觅。

卷 892_21【小重山】

韦庄

一闭昭阳春又春。夜寒宫漏永，梦君恩。
卧思陈事暗消魂。罗衣湿，红袂有啼痕。
歌吹隔重阁。绕庭芳草绿，倚长门。万般惆怅向谁论？
凝情立，宫殿欲黄昏。

· 全唐诗 ·

卷 892_22【望远行】

韦庄

欲别无言倚画屏，含恨暗伤情。谢家庭树锦鸡鸣，
残月落边城。
人欲别，马频嘶，绿槐千里长堤。出门芳草路萋萋，
云雨别来易东西。不忍别君后，却入旧香闺。

卷 892_23【忆江南】

牛峤

衔泥燕，飞到画堂前。占得杏梁安稳处，体轻惟有主人
怜。
堪羨好因缘。
红绣被，两两间鸳鸯。不是鸟中偏爱尔，为缘交颈睡南
塘。
全胜薄情郎。

卷 892_24【西溪子】

牛峤

捍拨双盘金凤，蝉鬓玉钗摇动。画堂前，人不语，弦解

· 全唐诗 ·

语。

弹到昭君怨处。翠蛾愁，不抬头。

卷 892_25【江城子】

牛峤

鸂鶒飞起郡城东，碧江空，半滩风。越王宫殿，
蘋叶藕花中。帘卷水楼鱼浪起，千片雪，雨濛濛。

极浦烟消水鸟飞，离筵分手时，送金卮。渡口杨花，
狂雪任风吹。日暮空江波浪急，芳草岸，柳如丝。

卷 892_26【定西番】

牛峤

紫塞月明千里，金甲冷，戍楼寒，梦长安。
乡思望中天阔，漏残星亦残。画角数声呜咽，雪漫漫。

卷 892_27【望江怨】

牛峤

东风急，惜别花时手频执，罗帏愁独入。马嘶残雨春芜

· 全唐诗 ·

湿。

倚门立，寄语薄情郎，粉香和泪泣。

卷 892_28【女冠子】

牛峤

绿云高髻，点翠匀红时世。月如眉，浅笑含双靥，
低声唱小词。

眼看惟恐化，魂荡欲相随。玉趾回娇步，约佳期。

锦江烟水，卓女烧春浓美。小檀霞，绣带芙蓉帐，
金钗芍药花。

额黄侵腻发，臂钏透红纱。柳暗莺啼处，认郎家。

星冠霞帔，住在蕊珠宫里。佩丁当，明翠摇蝉翼，
纤珪理宿妆。

醺坛春草昼绿，药院杏花香。青鸟传心事，寄刘郎。

双飞双舞，春昼后园莺语。卷罗帏，锦字书封了，
银河雁过迟。

鸳鸯排宝帐，豆蔻绣连枝。不语匀珠泪，落花时。

· 全唐诗 ·

卷 892_29【酒泉子】

牛峤

记得去年，烟暖杏园花正发，雪飘香。江草绿，柳丝长。
钿车纤手卷帘望，眉学春山样。凤钗低袅翠鬟上，落梅
妆。

卷 892_30【菩萨蛮】

牛峤

舞裙香暖金泥凤，画梁语燕惊残梦。门外柳花飞，
玉郎犹未归。
愁匀红粉泪，眉剪春山翠。何处是辽阳，锦屏春昼长。

柳花飞处莺声急，晴街春色香车立。金凤小帘开，
脸波和恨来。
今宵求梦想，难到青楼上。赢得一场愁，鸳衾谁并头。

玉钗风动春幡急，交枝红杏笼烟泣。楼上望卿卿，
窗寒新雨晴。
熏炉蒙翠被，绣帐鸳鸯睡。何处有相知，羞他初画眉。

画屏重叠巫阳翠，楚神尚有行云意。朝暮几般心，

· 全唐诗 ·

向他情谩深。
风流今古隔，虚作瞿塘客。山月照山花，梦回灯影斜。

风帘燕舞莺啼柳，妆台约鬓低纤手。钗重髻盘珊，
一枝红牡丹。
门前行乐客，白马嘶春色。故故坠金鞭，回头应眼穿。

绿云鬓上飞金雀，愁眉敛翠春烟薄。香阁掩芙蓉，
画屏山几重。
窗寒天欲曙，犹结同心苣。啼粉浣罗衣，问郎何日归。

玉炉冰簟鸳鸯锦，粉融香汗流山枕。帘外辘轳声，
敛眉含笑惊。
柳阴烟漠漠，低鬓蝉钗落。须作一生拌，尽君今日欢。

卷 892_31【更漏子】

牛峤

星渐稀，漏频转，何处轮台声怨。香阁掩，杏花红，
月明杨柳风。
挑锦字，记情事，惟愿两心相似。收泪语，背灯眠，
玉钗横枕边。

春夜阑，更漏促，金烬暗挑残烛。惊梦断，锦屏深，
两乡明月心。

· 全唐诗 ·

闺草碧，望归客，还是不知消息。孤负我，悔怜君，
告天天不闻。

南浦情，红粉泪，争奈两人深意。低翠黛，卷征衣，
马嘶霜叶飞。
招手别，寸肠结，还是去年时节。书托雁，梦归家，
觉来江月斜。

卷 892_32【感恩多】

牛峤

两条红粉泪，多少香闺意。强攀桃李枝，敛愁眉。
陌上莺啼蝶舞，柳花飞。柳花飞，愿得郎心，
忆家还早归。

自从南浦别，愁见丁香结。近来情转深，忆鸳衾。
几度将书托烟雁，泪盈襟。泪盈襟，礼月求天，
愿君知我心。

卷 892_33【应天长】

牛峤

玉楼春望晴烟灭，舞衫斜卷金条脱。黄鹂娇转声初歇，

· 全唐诗 ·

杏花飘尽龙山雪。
凤钗低赴节，筵上王孙愁绝。鸳鸯对衔罗结，
两情深夜月。

双眉澹薄藏心事，清夜背灯娇又醉。玉钗横，山枕腻，
宝帐鸳鸯春睡美。
别经时，无限意，虚道相思憔悴。莫信彩笺书里，
赚人肠断字。

卷 892_34【木兰花】

牛峤

春入横塘摇浅浪，花落小园空惆怅。此情谁信为狂夫，
恨翠愁红流枕上。
小玉窗前欸燕语，红泪滴穿金线缕。雁归不见报郎归，
织成锦字封过与。

· 全唐诗 ·

第八百九十三卷

卷 893_1【西溪子】

毛文锡

昨夜西溪游赏，芳树奇花千样。锁春光，金尊满，
听弦管。娇妓舞衫香暖。不觉到斜晖，马驮归。

卷 893_2【何满子】

毛文锡

红粉楼前月照，碧纱窗外莺啼。梦断辽阳音信，
那堪独守空闺。恨对百花时节，王孙绿草萋萋。

卷 893_3【诉衷情（一名桃花水）】

毛文锡

桃花流水漾纵横，春昼彩霞明。刘郎去，阮郎行，

· 全唐诗 ·

惆怅恨难平。
愁坐对云屏，算归程。何时携手洞边迎，诉衷情。

鸳鸯交颈绣衣轻，碧沼藕花馨。偎藻荇，映兰汀，
和雨浴浮萍。
思妇对心惊，想边庭。何时解佩掩云屏，诉衷情。

卷 893_4【中兴乐】

毛文锡

豆蔻花繁烟艳深，丁香软结同心。翠鬟女，相与，共淘金。
红蕉叶里猩猩语。鸳鸯浦，镜中鸾舞。丝雨，隔荔枝阴。

卷 893_5【醉花间】

毛文锡

休相问，怕相问，相问还添恨。春水满塘生，鸂鶒还相趁。
昨夜雨霏霏，临明寒一阵。偏忆戍楼人，久绝边庭信。
深相忆，莫相忆，相忆情难极。银汉是红墙，一带遥相隔。

· 全唐诗 ·

金盘珠露滴，两岸榆花白。风摇玉佩清，今夕为何夕。

卷 893_6【酒泉子】

毛文锡

绿树春深，燕语莺啼声断续，惠风飘荡入芳丛，惹残红。
柳丝无力袅烟空。金盏不辞须满酌，海棠花下思朦胧，
醉春风。

卷 893_7【纱窗恨】

毛文锡

新春燕子还来至，一双飞。垒巢泥湿时时坠，涴人衣。
后园里、看百花发，香风拂、绣户金扉。月照纱窗，
恨依依。

双双蝶翅涂铅粉，哂花心。绮窗绣户飞来稳，画堂阴。
二三月、爱随风絮，伴落花、来拂衣襟。更剪轻罗片，
傅黄金。

· 全唐诗 ·

卷 893_8【恋情深】

毛文锡

滴滴铜壶寒漏咽，醉红楼月。宴余香殿会鸳衾，荡春心。
真珠帘下晓光侵，莺语隔琼林。宝帐欲开慵起，恋情深。

玉殿春浓花烂漫，簇神仙伴。罗裙窄地缕黄金，奏清音。
酒阑歌罢两沉沉，一笑动君心。永愿作鸳鸯伴，恋情深。

卷 893_9【浣溪沙】

毛文锡

七夕年年信不违，银河清浅白云微，蟾光鹊影伯劳飞。
每恨蟪蛄怜婺女，几回娇妒下鸳机，今宵嘉会两依依。

卷 893_10【摊破浣溪沙】

毛文锡

春水轻波浸绿苔，枇杷洲上紫檀开。晴日眠沙鹭鸶稳，
暖相偎。
罗袜生尘游女过，有人逢著弄珠回。兰麝飘香初解佩，

· 全唐诗 ·

忘归来。

卷 893_11【赞浦子】

毛文锡

锦帐添香睡，金炉换夕薰。懒结芙蓉带，慵拖翡翠裙。
正是柳天桃媚，那堪暮雨朝云。宋玉高唐意，裁琼欲赠
君。

卷 893_12【巫山一段云】

毛文锡

雨霁巫山上，云轻映碧天。远风吹散又相连，十二晚峰
前。
暗湿啼猿树，高笼过客船。朝朝暮暮楚江边，几度降神
仙。

貌掩巫山色，才过濯锦波。阿谁提笔上银河，月里写嫦
娥。
薄薄施铅粉，盈盈挂绮罗。菖蒲花役梦魂多，年代属元
和。

· 全唐诗 ·

卷 893_13【柳含烟】

毛文锡

隋堤柳，汴河旁。夹岸绿阴千里，龙舟凤舸木兰香。
锦帆张。
因梦江南春景好，一路流苏羽葆。笙歌未尽起横流，
锁春愁。

河桥柳，占芳春。映水含烟拂路，几回攀折赠行人，
暗伤神。
乐府吹为横笛曲，能使离肠断续。不如移植在金门，
近天恩。

章台柳，近垂旒。低拂往来冠盖，朦胧春色满皇州，
瑞烟浮。
直与路边江畔别，免被离人攀折。最怜京兆画蛾眉，
叶纤时。

御沟柳，占春多。半出宫墙婀娜，有时倒景醺轻罗，
曲尘波。
昨日金銮巡上苑，风亚舞腰纤软。栽培得地近皇宫，
瑞烟浓。

· 全唐诗 ·

卷 893_14【更漏子】

毛文锡

春夜阑，春恨切，花外子规啼月。人不见，梦难凭，
红纱一点灯。
偏怨别，是芳节，庭下丁香千结。宵雾散，晓霞晖，
梁间双燕飞。

卷 893_15【喜迁莺】

毛文锡

芳春景，暖晴烟，乔木见莺迁。传枝偎叶语关关，
飞过绮丛间
锦翼鲜，金毳软，百转千娇相唤。碧纱窗晓怕闻声，
惊破鸳鸯暖。

卷 893_16【应天长】

毛文锡

平江波暖鸳鸯语，两两钓船归极浦。芦洲一夜风和雨，
飞起浅沙翘雪鹭。

· 全唐诗 ·

渔灯明远渚，兰棹今宵何处。罗袂从风轻举，愁杀采莲女。

卷 893_17【月宫春】

毛文锡

水晶宫里桂花开，神仙探几回。红芳金蕊绣重台，
低倾玛瑙杯。
玉兔银蟾争守护，姮娥姹女戏相偎。遥听钧天九奏，
玉皇亲看来。

卷 893_18【虞美人】

毛文锡

鸳鸯对浴银塘暖，水面蒲梢短。垂杨低拂曲尘波，
蛛丝结网露珠多，滴圆荷。
遥思桃叶吴江碧，便是天河隔。锦鳞红鬣影沉沉，
相思空有梦相寻，意难任。

宝檀金缕鸳鸯枕，绶带盘宫锦。夕阳低映小窗明，
南园绿树语莺莺，梦难成。
玉炉香暖频添炷，满地飘轻絮。珠帘不卷度沈烟，
庭前闲立画秋千，艳阳天。

· 全唐诗 ·

卷 893_19【临江仙】

毛文锡

暮蝉声尽落斜阳，银蟾影挂潇湘。黄陵庙侧水茫茫。
楚山红树，烟雨隔高唐。
岸泊渔灯风飐碎，白蘋远散浓香。灵娥鼓瑟韵清商。
朱弦凄切，云散碧天长。

卷 893_20【接贤宾】

毛文锡

香鞯镂檐五色骢，值春景初融。流珠喷沫躩蹀，汗血流
红。
少年公子能乘驭，金镳玉辔珑璁。为惜珊瑚鞭不下，
骄生百步千踪。信穿花，从拂柳，向九陌追风。

卷 893_21【赞成功】

毛文锡

海棠未坼，万点深红，香包绒结一重重。似含羞态，
邀勒春风。蜂来蝶去，任绕芳丛。

· 全唐诗 ·

昨夜微雨，飘洒庭中，忽闻声滴井边桐。美人惊起，
坐听晨钟。快教折取，戴玉珑璁。

卷 893_22【甘州遍】

毛文锡

春光好，公子爱闲游。足风流。金鞍白马，雕弓宝剑，
红缨锦襜出长楸。
花蔽膝，玉衔头。寻芳逐胜欢宴，丝竹不曾休。美人唱、
揭调是甘州，醉红楼。尧年舜日，乐圣永无忧。

秋风紧，平碛雁行低。阵云齐。萧萧飒飒，边声四起，
愁闻戍角与征鼙。
青冢北，黑山西。沙飞聚散无定，往往路人迷。铁衣冷、
战马血沾蹄，破蕃奚。凤凰诏下，步步蹀丹梯。

卷 893_23【渔父】

和凝

白芷汀寒立鹭鸶，蘋风轻剪浪花时。烟幂幂，日迟迟，
香引芙蓉惹钓丝。

· 全唐诗 ·

卷 893_24【天仙子】

和凝

柳色披衫金缕凤，纤手轻拈红豆弄。翠蛾双敛正含情，
桃花洞，瑶台梦，一片春愁谁与共。

洞口春红飞蔌蔌，仙子含愁眉黛绿。阮郎何事不归来？
懒烧金，慵篆玉，流水桃花空断续。

卷 893_25【江城子】

和凝

初夜含娇入洞房，理残妆，柳眉长。翡翠屏中，
亲爇玉炉香。整顿金钿呼小玉，排红烛，待潘郎。

竹里风生月上门，理秦筝，对云屏。轻拨朱弦，
恐乱马嘶声。含恨含娇独自语，今夜约，太迟生。

斗转星移玉漏频，已三更，对西莺。历历花间，
似有马蹄声。含笑整衣开绣户，斜敛手，下阶迎。

迎得郎来入绣闱，语相思，连理枝。鬟乱钗垂，
梳堕印山眉。娅姺含情娇不语，纤玉手，抚郎衣。

· 全唐诗 ·

帐里鸳鸯交颈情，恨鸡声，天已明。愁见街前，
还是说归程。临上马时期后会，待梅绽，月初生。

卷 893_26【何满子】

和凝

正是破瓜年几，含情惯得人饶。桃李精神鹦鹉舌，
可堪虚度良宵。却爱蓝罗裙子，羞他长束纤腰。

写得鱼笺无限，其如花锁春晖。目断巫山云雨，
空教残梦依依。却爱熏香小鸭，羞他长在屏帏。

卷 893_27【望梅花】

和凝

春草全无消息，腊雪犹余踪迹。越岭寒枝香自折，
冷艳奇芳堪惜。何事寿阳无处觅，吹入谁家横笛。

卷 893_28【薄命女（一名长命女）】

和凝

天欲晓，宫漏穿花声缭绕，窗里星光少。

· 全唐诗 ·

冷露寒侵帐额，残月光沈树杪。梦断锦帟空悄悄，
强起愁眉小。

卷 893_29【春光好（一名愁倚栏令）】

和凝

纱窗暖，画屏闲，殢云鬟。睡起四肢无力，半春间。
玉指剪裁罗胜，金盘点缀酥山。窥宋深心无限事，小眉
弯。

蘋叶软，杏花明，画船轻。双浴鸳鸯出绿汀，棹歌声。
春水无风无浪，春天半雨半晴。红粉相随南浦晚，几含
情。

卷 893_30【采桑子】

和凝

蛴蛱领上诃梨子，绣带双垂。椒户闲时，竞学撚蒲赌荔
支。
丛头鞋子红编细，裙窄金丝。无事嚬眉，春思翻教阿母
疑。

· 全唐诗 ·

卷 893_31【菩萨蛮】

和凝

越梅半拆轻寒里，冰清澹薄笼蓝水。暖觉杏梢红，
游丝狂惹风。
闲阶莎径碧，远梦犹堪惜。离恨又迎春，相思难重陈。

卷 893_32【喜迁莺】

和凝

晓月坠，宿云披，银烛锦屏帷。建章钟动玉绳低，
宫漏出花迟。
春态浅，来双燕，红日渐长一线。严妆欲罢转黄鹂，
飞上万年枝。

卷 893_33【山花子】

和凝

莺锦蝉毂馥麝脐，轻裾花草晓烟迷。鸂鶒战金红掌坠，
翠云低。
星靥笑偎霞脸畔，蹙金开襦衬银泥。春思半和芳草嫩，

· 全唐诗 ·

碧萋萋。

银字笙寒调正长，水文簟冷画屏凉。玉腕重，金扼臂，
淡梳妆。

几度试香纤手暖，一回尝酒绛唇光。佯弄红丝绳拂子，
打檀郎。

卷 893_34【临江仙】

和凝

海棠香老春江晚，小楼雾縠空濛。翠鬟初出绣帘中，
麝烟鸾佩惹蘋风。

碾玉钗摇鸂鶒战，雪肌云鬓将融。含情遥指碧波东，
越王台殿蓼花红。

披袍窈窕红宫锦，莺语时转轻音。碧罗冠子稳犀簪，
凤凰双颔步摇金。

肌骨细匀红玉软，脸波微送春心。娇羞不肯入鸳衾，
兰膏光里两情深。

卷 893_35【小重山】

和凝

春入神京万木芳，禁林莺语滑、蝶飞狂。

· 全唐诗 ·

晓花擎露妨啼妆，红日永、风和百花香。
烟锁柳丝长，御沟澄碧水、转池塘。时时微雨洗风光，
天衢远、到处引笙簧。

正是神京烂熳时，群仙初折得、郄诜枝。
乌犀白纈最相宜，精神出、御陌袖鞭垂
柳色展愁眉，管弦分响亮、探花期。光阴占断曲江池，
新榜上、名姓彻丹墀。

卷 893_36【麦秀两岐】

和凝

凉簟铺斑竹，鸳枕并红玉。脸莲红，眉柳绿，
胸雪宜新浴。淡黄衫子裁春縠，异香芬馥。
羞道交回烛，未惯双双宿。树连枝，鱼比目，
掌上腰如束。娇饶不争人拳跼，黛眉微蹙。

卷 893_37【生查子】

牛希济

春山烟欲收，天澹星稀小。残月脸边明，别泪临清晓。
语已多，情未了，回首犹重道。记得绿罗裙，处处怜芳草。

· 全唐诗 ·

新月曲如眉，未有团圞意。红豆不堪看，满眼相思泪。
终日劈桃穰，人在心儿里。两朵隔墙花，早晚成连理。

卷 893_38【中兴乐（即湿罗衣）】

牛希济

池塘暖碧浸晴晖，濛濛柳絮轻飞。红蕊凋来，醉梦还稀。
春云空有雁归，珠帘垂。东风寂寞，恨郎抛掷，泪湿罗衣。

卷 893_39【酒泉子】

牛希济

枕转簟凉，清晓远钟残梦。月光斜，帘影动，旧炉香。
梦中说尽相思事，纤手匀双泪。去年书，今日意，断人肠。

卷 893_40【谒金门】

牛希济

秋已暮，重叠关山岐路。嘶马摇鞭何处去，晓禽霜满树。

· 全唐诗 ·

梦断禁城钟鼓，泪滴枕檀无数。一点凝红和薄雾，
翠蛾愁不语。

卷 893_41【临江仙】

牛希济

峭碧参差十二峰，冷烟寒树重重。瑶姬宫殿是仙踪。
金炉珠帐，香霏昼偏浓。
一自楚王惊梦断，人间无路相逢。至今云雨带愁容。
月斜江上，征棹动晨钟。

谢家仙观寄云岑，岩萝拂地成阴。洞房不闭白云深。
当时丹灶，一粒化黄金。
石壁霞衣犹半挂，松风长似鸣琴。时闻唳鹤起前林。
十洲高会，何处许相寻。

渭阙宫城秦树凋，玉楼独上无憀。含情不语自吹箫。
调清和恨，天路逐风飘。
何事乘龙人忽降，似知深意相招。三清携手路非遥。
世间屏障，彩笔画娇饶。

江绕黄陵春庙闲，娇莺独语关关。满庭重叠绿苔斑。
阴云无事，四散自归山。
箫鼓声稀香烬冷，月娥敛尽弯环。风流皆道胜人间，
须知狂客，判死为红颜。

· 全唐诗 ·

素洛春光潋滟平，千重媚脸初生。凌波罗袜势轻轻。
烟笼日照，珠翠半分明。
风引宝衣疑欲舞，鸾回凤翥堪惊。也知心许恐无成。
陈王辞赋，千载有声名。

柳带摇风汉水滨，平芜两岸争匀。鸳鸯对浴浪痕新。
弄珠游女，微笑自含春。
轻步暗移蝉鬓动，罗裙风惹轻尘。水精宫殿岂无因。
空劳纤手，解佩赠情人。

洞庭波浪飏晴天，君山一点凝烟。此中真境属神仙。
玉楼珠殿，相映月轮边。
万里平湖秋色冷，星辰垂影参然。橘林霜重更红鲜。
罗浮山下，有路暗相连

· 全唐诗 ·

第八百九十四卷

卷 894_1【相见欢】

薛昭蕴

罗襦绣袂香红，画堂中。细草平沙蕃马、小屏风。
卷罗幕，凭妆阁，思无穷。暮雨轻烟魂断、隔帘栊。

卷 894_2【醉公子（一名四换头）】

薛昭蕴

慢绾青丝发，光研吴绫袜。床上小熏笼，韶州新退红。
叵耐无端处，捻得从头污。恼得眼慵开，问人闲事来。

卷 894_3【女冠子】

薛昭蕴

求仙去也，翠钿金篦尽舍。入岩峦，雾卷黄罗帔，

· 全唐诗 ·

云雕白玉冠。
野烟溪洞冷，林月石桥寒。静夜松风下，礼天坛。

云罗雾縠，新授明威法篆。降真函，髻绾青丝发，
冠抽碧玉簪。
往来云过五，去住岛经三。正遇刘郎使，启瑶缄。

卷 894_4【浣溪沙】

薛昭蕴

红蓼渡头秋正雨，印沙鸥迹自成行，整鬟飘袖野风香
不语含嚬深浦里，几回愁煞棹船郎，燕归帆尽水茫茫。

钿匣菱花锦带垂，静临兰槛卸头时，约鬟低珥算归期。
花茂草青湘渚阔，梦余空有漏依依，二年终日损芳菲。

粉上依稀有泪痕，郡庭花落欲黄昏，远情深恨与谁论。
记得去年寒食日，延秋门外卓金轮，日斜人散暗销魂。

握手河桥柳似金，蜂须轻惹百花心，蕙风兰思寄清琴。
意满便同春水满，情深还似酒杯深，楚烟湘月两沉沉。

帘外三间出寺墙，满街垂柳绿阴长，嫩红轻翠间浓妆。
瞥地见时犹可可，却来闲处暗思量，如今情事隔仙乡。

· 全唐诗 ·

江馆清秋缆客船，故人相送夜开筵，麝烟兰焰簇花钿。
正是断魂迷楚雨，不堪离恨咽湘弦，月高霜白水连天。

倾国倾城恨有余，几多红泪泣姑苏，倚风凝睇雪肌肤。
吴主山河空落日，越王宫殿半平芜，藕花菱蔓满平湖。

越女淘金春水上，步摇云鬓佩鸣珰，渚风江草又清香。
不为远山凝翠黛，只应含恨向斜阳，碧桃花谢忆刘郎。

卷 894_5【谒金门】

薛昭蕴

春满院，叠损罗衣金线。睡觉水精帘未卷，帘前双语燕。
斜掩金铺一扇，满地落花千片。早是相思肠欲断，
忍教频梦见。

卷 894_6【喜迁莺】

薛昭蕴

残蟾落，晓钟鸣，羽化觉身轻。乍无春睡有余醒，
杏苑雪初晴。
紫陌长，襟袖冷，不是人间风景。回看尘土似前生，
休羡谷中莺。

· 全唐诗 ·

金门晓，玉京春，骏马骤轻尘。桦烟深处白衫新，
认得化龙身。
九陌喧，千户启，满袖桂香风细。杏园欢宴曲江滨，
自此占芳辰。

清明节，雨晴天，得意正当年。马骄泥软锦连乾，
香袖半笼鞭。
花色融，人竞赏，尽是绣鞍朱鞅。日斜无计更留连，
归路草和烟。

卷 894_7【小重山】

薛昭蕴

春到长门春草青，玉阶华露滴、月胧明。
东风吹断紫箫声，宫漏促、帘外晓啼莺。
愁极梦难成，红妆流宿泪、不胜情。手挪裙带绕花行，
思君切、罗幌暗尘生。

秋到长门秋草黄，画梁双燕去、出宫墙。
玉箫无复理霓裳，金蝉坠、鸾镜掩休妆。
忆昔在昭阳，舞衣红绶带、绣鸳鸯。至今犹惹御炉香，
魂梦断、愁听漏更长。

· 全唐诗 ·

卷 894_8 【离别难】

薛昭蕴

宝马晓鞴雕鞍，罗帏乍别情难。那堪春景媚，送君千万里。

半妆珠翠落，露华寒。红蜡烛，青丝曲，偏能钩引泪阑干。

良夜促，香尘绿，魂欲迷，檀眉半敛愁低。未别心先咽，
欲语情难说。出芳草，路东西，摇袖立。春风急，
樱花杨柳雨凄凄。

卷 894_9 【荷叶杯】

顾夔

春尽小庭花落，寂寞，凭槛敛双眉。忍教成病忆佳期，
知摩知，知摩知。

歌发谁家筵上，寥亮，别恨正悠悠。兰缸背帐月当楼，
愁摩愁，愁摩愁。

弱柳好花尽拆，晴陌，陌上少年郎。满身兰麝扑人香，
狂摩狂，狂摩狂。

· 全唐诗 ·

记得那时相见，胆战，鬓乱四肢柔。泥人无语不抬头，
羞摩羞，羞摩羞。

夜久歌声怨咽，残月，菊冷露微微。看看湿透缕金衣，
归摩归，归摩归。

我忆君诗最苦，知否，字字尽关心。红笺写寄表情深，
吟摩吟，吟摩吟。

金鸭香浓鸳被，枕腻，小髻簇花钿。腰如细柳脸如莲，
怜摩怜，怜摩怜。

曲砌蝶飞烟暖，春半，花发柳垂条。花如双脸柳如腰，
娇摩娇，娇摩娇。

一去又乖期信，春尽，满院长莓苔。手挪裙带独裴回，
来摩来，来摩来。

卷 894_10【甘州子】

顾夔

一炉龙麝锦帷傍，屏掩映，烛荧煌。禁楼刁斗喜初长，
罗荐绣鸳鸯。山枕上，私语口脂香。

每逢清夜与良晨，多怅望，足伤神。云迷水隔意中人，

· 全唐诗 ·

寂寞绣罗茵。山枕上，几点泪痕新。

曾如刘阮访仙踪，深洞客，此时逢。绮筵散后绣衾同。
款曲见韶容。山枕上，长是怯晨钟。

露桃花里小楼深，持玉盏，听瑶琴。醉归青琐入鸳衾，
月色照衣襟。山枕上，翠钿镇眉心。

红炉深夜醉调笙，敲拍处，玉纤轻。小屏古画岸低平，
烟月满闲庭。山枕上，灯背脸波横。

卷 894_11【遐方怨】

顾夐

帘影细，簾文平。象纱笼玉指，缕金罗扇轻。
嫩红双脸似花明，两条眉黛远山横。
凤箫歇，镜尘生。辽塞音书绝，梦魂长暗惊。
玉郎经岁负娉婷，教人争不恨无情。

卷 894_12【诉衷情】

顾夐

香灭帘垂春漏永，整鸳衾。罗带重，双凤，缕黄金。

· 全唐诗 ·

窗外月光临，沉沉。断肠无处寻，负春心。

永夜抛人何处去，绝来音。香阁掩，眉敛，月将沈。
争忍不相寻，怨孤衾。换我心，为你心，始知相忆深。

卷 894_13【杨柳枝（即柳枝）】

顾夔

秋夜香闺思寂寥，漏迢迢。鸳帏罗幌麝烟销，烛光摇。
正忆玉郎游荡去，无寻处。更闻帘外雨潇潇，滴芭蕉。

卷 894_14【醉公子】

顾夔

漠漠秋云澹，红藕香侵槛。枕倚小山屏，金铺向晚扃。
睡起横波慢，独望情何限。衰柳数声蝉，魂销似去年。

岸柳垂金线，雨晴莺百转。家住绿杨边，往来多少年。
马嘶芳草远，高楼帘半卷。敛袖翠蛾攒，相逢尔许难。

· 全唐诗 ·

卷 894_15【酒泉子】

顾夔

杨柳无风，轻惹春烟残雨。杏花愁，莺正语，画楼东。
锦屏寂寞思无穷，还是不知消息。镜尘生，珠泪滴，
损仪容。

罗带缕金，兰麝烟凝魂断。画屏欹，云鬓乱，恨难任。
几回垂泪滴鸳衾，薄情何处去？月临窗，花满树，
信沉沉。

小槛日斜，风度绿窗人悄悄。翠帏闲掩舞双鸾，旧香寒。
别来情绪转难判，韶颜看却老。依稀粉上有啼痕，暗销
魂。

黛薄红深，约掠绿鬟云腻。小鸳鸯，金翡翠，称人心。
锦鳞无处传幽意，海燕兰堂春又去。隔年书，千点泪，
恨难任。

掩却菱花，收拾翠钿休上面。金虫玉燕锁香奁，恨厌厌。
云鬟半坠懒重簪，泪侵山枕湿。银灯背帐梦方酣，
雁飞南。

水碧风清，入槛细香红藕腻。谢娘敛翠恨无涯，小屏斜。
堪憎荡子不还家，谩留罗带结。帐深枕腻炷沉烟，

· 全唐诗 ·

负当年。

黛怨红羞，掩映画堂春欲暮。残花微雨隔青楼，思悠悠。
芳菲时节看将度，寂寞无人还独语。画罗襦，香粉污，
不胜愁。

卷 894_16【浣溪沙】

顾夔

春色迷人恨正赊，可堪荡子不还家，细风轻露著梨花。
帘外有情双燕扬，槛前无力绿杨斜，小屏狂梦极天涯。

红藕香寒翠渚平，月笼虚阁夜蛩清，塞鸿惊梦两牵情。
宝帐玉炉残麝冷，罗衣金缕暗尘生，小窗孤烛泪纵横。

荷芰风轻帘幕香，绣衣鸂鶒泳回塘，小屏闲掩旧潇湘。
恨入空帏鸾影独，泪凝双脸渚莲光，薄情年少悔思量。

惆怅经年别谢娘，月窗花院好风光，此时相望最情伤。
青鸟不来传锦字，瑶姬何处锁兰房，忍教魂梦两茫茫。

庭菊飘黄玉露浓，冷莎偎砌隐鸣蛩，何期良夜得相逢。
背帐风摇红蜡滴，惹香暖梦绣衾重，觉来枕上怯晨钟。

云澹风高叶乱飞，小庭寒雨绿苔微，深闺人静掩屏帷。

· 全唐诗 ·

粉黛暗愁金带枕，鸳鸯空绕画罗衣，那堪孤负不思归。

雁响遥天玉漏清，小纱窗外月胧明，翠帏金鸭炷香平。
何处不归音信断，良宵空使梦魂惊，簟凉枕冷不胜情。

露白蟾明又到秋，佳期幽会两悠悠，梦牵情役几时休。
记得泥人微敛黛，无言斜倚小书楼。暗思前事不胜愁。

卷 894_17【更漏子】

顾夔

旧欢娱，新怅望，拥鼻含嚔楼上。浓柳翠，晚霞微，
江鸥接翼飞。
帘半卷，屏斜掩，远岫参差迷眼。歌满耳，酒盈尊，
前非不要论。

卷 894_18【应天长】

顾夔

瑟瑟罗裙金线缕，轻透鹅黄香画袴。垂交带，盘鸂鶒，
裊裊翠翘移玉步。
背人匀檀注，慢转娇波偷觑。敛黛春情暗许，倚屏慵不
语。

· 全唐诗 ·

卷 894_19【渔歌子】

顾夔

晓风清，幽沼绿，倚阑凝望珍禽浴。画帘垂，翠屏曲，
满袖荷香馥郁。
好攄怀，堪寓目，身闲心静平生足。酒杯深，光影促，
名利无心较逐。

卷 894_20【河传】

顾夔

燕扬晴景。小窗屏暖，鸳鸯交颈。菱花掩却翠鬟欹，
慵整，海棠帘外影。
绣帟香断金鸂鶒。无消息，心事空相忆。倚东风，
春正浓，愁红，泪痕衣上重。

曲槛，春晚。碧流纹细，绿杨丝软。露华鲜，杏枝繁。
莺转，野芜平似剪。
直是人间到天上，堪游赏，醉眼疑屏障。对池塘，
惜韶光，断肠，为花须尽狂。

棹举，舟去。波光渺渺，不知何处。岸花汀草共依依，
雨微，鹧鸪相逐飞。

· 全唐诗 ·

天涯离恨江声咽，啼猿切，此意向谁说？倚兰桡，
独无憀，魂销，小炉香欲焦。

卷 894_21【木兰花（即玉楼春）】

顾夔

月照玉楼春漏促，飒飒风摇庭砌竹。梦惊鸳被觉来时，
何处管弦声断续。
惆怅少年游冶去，枕上两蛾攒细绿。晓莺帘外语花枝，
背帐犹残红蜡烛。

柳映玉楼春日晚，雨细风轻烟草软。画堂鹦鹉语雕笼，
金粉小屏犹半掩。
香灭绣帏人寂寂，倚槛无言愁思远。恨郎何处纵疏狂，
长使含啼眉不展。

月皎露华窗影细，风送菊香黏绣袂。博山炉冷水沉微，
惆怅金闺终日闭。
懒展罗衾垂玉箸，羞对菱花簪宝髻。良宵好事枉教休，
无计那他狂耍婿。

拂水双飞来去燕，曲槛小屏山六扇。春愁凝思结眉心，
绿绮懒调红锦荐。
话别情多声欲战，玉箸痕留红粉面。镇长独立到黄昏，
却怕良宵频梦见。

· 全唐诗 ·

卷 894_22【虞美人】

顾夔

晓莺啼破相思梦，帘卷金泥凤。宿妆犹在酒初醒，
翠翘慵整倚云屏，转娉婷。
香檀细画侵桃脸，罗袂轻轻敛。佳期堪恨再难寻，
绿芜满院柳成阴，负春心。

触帘风送景阳钟，鸳被绣花重。晓帏初卷冷烟浓，
翠匀粉黛好仪容，思娇慵。
起来无语理朝妆，宝匣镜凝光。绿荷相倚满池塘，
露清枕簟藕花香，恨悠扬。

翠屏闲掩垂珠箔，丝雨笼池阁。露粘红藕咽清香，
谢娘娇极不成狂，罢朝妆。
小金鸂鶒沈烟细，腻枕堆云髻。浅眉微敛注檀轻，
旧欢时有梦魂惊，悔多情。

碧梧桐映纱窗晚，花谢莺声懒。小屏屈曲掩青山，
翠帏香粉玉炉寒，两蛾攒。
颠狂年少轻离别，孤负春时节。画罗红袂有啼痕，
魂销无语倚闺门，欲黄昏。

深闺春色芳思想，恨共春芜长。黄鹂娇转泥芳妍，
杏枝如画倚轻烟，锁窗前。

· 全唐诗 ·

凭阑愁立双蛾细，柳影斜摇砌。玉郎还是不还家，
教人魂梦逐杨花，绕天涯。

少年艳质胜琼英，早晚别三清。莲冠稳簪钿篸横，
飘飘罗袖碧云轻，画难成。
迟迟少转腰身袅，翠靥眉心小。醺坛风急杏枝香，
此时恨不驾鸾皇，访刘郎。

卷 894_23【临江仙】

顾夔

碧染长空池似镜，倚楼闲望凝情。满衣红藕细香清。
象床珍簟，山障掩，玉琴横。
暗想昔时欢笑事，如今赢得愁生。博山炉暖澹烟轻。
蝉吟人静，残日傍，小窗明。

幽闺小槛春光晚，柳浓花澹莺稀。旧欢思想尚依依。
翠嚬红敛，终日损芳菲。
何事狂夫音信断，不如梁燕犹归。画堂深处麝烟微。
屏虚枕冷，风细雨霏霏。

月色穿帘风入竹，倚屏双黛愁时。砌花含露两三枝。
如啼恨脸，魂断损容仪。
香烬暗销金鸭冷，可堪孤负前期。绣襦不整鬓鬟欹。
几多惆怅，情绪在天涯。

· 全唐诗 ·

卷 894_24【献衷心】

顾夔

绣鸳鸯帐暖，画孔雀屏欹。人悄悄，月明时。
想昔年欢笑，恨今日分离。银缸背，铜漏永，阻佳期。
小炉烟细，虚阁帘垂。几多心事，暗地思惟。被娇娥牵
役，
魂梦如痴。金闺里，山枕上，始应知。

卷 894_25【女冠子】

鹿虔扈

凤楼琪树，惆怅刘郎一去。正春深，洞里愁空结，
人间信莫寻。
竹疏斋殿迥，松密醮坛阴。倚云低首望，可知心。

步虚坛上，绛节霓旌相向。引真仙，玉佩摇蟾影，
金炉袅麝烟。
露浓霜简湿，风紧羽衣偏。欲留难得住，却归天。

· 全唐诗 ·

卷 894_26【思越人】

鹿虔扆

翠屏欹，银烛背，漏残清夜迢迢。双带绣窠盘锦荐，
泪侵花暗香销。
珊瑚枕腻鸦鬟乱，玉纤慵整云散。苦是适来新梦见，
离肠争不千断。

卷 894_27【虞美人】

鹿虔扆

卷荷香澹浮烟渚，绿嫩擎新雨。琐窗疏透晓风清，
象床珍簟冷光轻，水文平。
九疑黛色屏斜掩，枕上眉心敛。不堪相望病将成，
钿昏檀粉泪纵横，不胜情。

卷 894_28【临江仙】

鹿虔扆

金锁重门荒苑静，绮窗愁对秋空。翠华一去寂无踪。
玉楼歌吹，声断已随风。

· 全唐诗 ·

烟月不知人事改，夜阑还照深宫。藕花相向野塘中。
暗伤亡国，清露泣香红。

无赖晓莺惊梦断，起来残酒初醒。映窗丝柳袅烟青。
翠帘慵卷，约砌杏花零。
一自玉郎游冶去，莲凋月惨仪形。暮天微雨洒闲庭。
手挪裙带，无语倚云屏。

· 全唐诗 ·

第八百九十五卷

卷 895_1 【诉衷情】

魏承班

高歌宴罢月初盈，诗情引恨情。烟露冷，水流轻，
思想梦难成。
罗帐袅香平，恨频生。思君无计睡还醒，隔层城。

春深花簇小楼台，风飘锦绣开。新睡觉，步香阶，
山枕印红腮。
乱坠金钗，语檀偎。临行执手重重属，几千回。

银汉云情玉漏长，蛩声悄画堂。筠簟冷，碧窗凉，
红蜡泪飘香。
皓月泻寒光，割人肠。那堪独自步池塘，对鸳鸯。

金风轻透碧窗纱，银釭焰影斜。欹枕卧，恨何赊，
山掩小屏霞。
云雨别吴娃，想容华。梦成几度绕天涯，到君家。

春情满眼脸红消，娇妒索人饶。星靥小，玉珰摇，

· 全唐诗 ·

几共醉春朝。
别后忆纤腰，梦魂劳。如今风叶又萧萧，恨迢迢。

卷 895_2【生查子】

魏承班

烟雨晚晴天，零落花无语。难话此时心，梁燕双来去。
琴韵对薰风，有恨和情抚。肠断断弦频，泪滴黄金缕。

寂寞画堂空，深夜垂罗幕。灯暗锦屏欹，月冷珠帘薄。
愁恨梦难成，何处贪欢乐。看看又春来，还是长萧索。

离别又经年，独对芳菲景。嫁得薄情夫，长抱相思病。
花红柳绿间晴空，蝶舞双双影。羞看绣罗衣，为有金鸾并。

卷 895_3【菩萨蛮】

魏承班

罗裾薄薄秋波染，眉间画得山两点。相见绮筵时，
深情暗共知。
翠翘云鬓动，敛态弹金凤。宴罢入兰房，邀人解佩珰。

· 全唐诗 ·

罗衣隐约金泥画，玳筵一曲当秋夜。声颤飏人娇，
云鬟袅翠翘。
酒醺红玉软，眉翠秋山远。绣幌麝烟沈，谁人知两心。

玉容光照菱花影，沉沉脸上秋波冷。白雪一声新，
雕梁起暗尘。
宝钗摇翡翠，香惹芙蓉醉。携手入鸳衾，谁人知此心。

卷 895_4【渔歌子】

魏承班

柳如眉，云似发，鲛绡雾縠笼香雪。梦魂惊，钟漏歇，
窗外晓莺残月。
几多情，无处说，落花飞絮清明节。少年郎，容易别，
一去音书断绝。

卷 895_5【满宫花】

魏承班

雪霏霏，风凛凛，玉郎何处狂饮？醉时想得纵风流，
罗帐香帏鸳寝。
春朝秋夜思君甚，愁见绣屏孤枕。少年何事负初心，
泪滴缕金双衽。

· 全唐诗 ·

寒夜长，更漏永，愁见透帘月影。王孙何处不归来，
应在倡楼酩酊。
金鸭无香罗帐冷，羞更双鸾交颈。梦中几度见儿夫，
不忍骂伊薄幸。

卷 895_6【谒金门】

魏承班

烟水阔，人值清明时节，雨细花零莺语切，愁肠千万结。
雁去音徽断绝，有恨欲凭谁说？无事伤心犹不彻，
春时容易别。

春欲半，堆砌落花千片。早是潘郎长不见，忍听双语燕。
飞絮晴空飏远，风送谁家弦管？愁倚画屏凡事懒，
泪沾金缕线。

长思忆，思忆佳辰轻掷。霜月透帘澄夜色，小屏山凝碧。
恨恨君何太极，记得娇娆无力。独坐思量愁似织，
断肠烟水隔，

卷 895_7【木兰花】

魏承班

小芙蓉，香旖旎，碧玉堂深清似水。闭宝匣，掩金铺，

· 全唐诗 ·

倚屏拖袖愁如醉。
迟迟好景烟花媚，曲渚鸳鸯眠锦翅。凝然愁望静相思，
一双笑靥嚬香蕊。

卷 895_8【玉楼春】

魏承班

寂寂画堂梁上燕，高卷翠帘横数扇。一庭春色恼人来，
满地落花红几片。
愁倚锦屏低雪面，泪滴绣罗金缕线。好天凉月尽伤心，
为是玉郎长不见。

轻敛翠蛾呈皓齿，莺转一枝花影里。声声清迥遏行云，
寂寂画梁尘暗起。
玉笋满斟情未已，促坐王孙公子醉。春风筵上贯珠匀，
艳色韶颜娇旖旎。

卷 895_9【黄钟乐】

魏承班

池塘烟暖草萋萋，惆怅闲宵含恨，愁坐思堪迷。
遥想玉人情事远，音容浑似隔桃溪。
偏记同欢秋月低，帘外论心花畔，和醉暗相携。

· 全唐诗 ·

何事春来君不见，梦魂长在锦江西。

卷 895_10【江城子】

尹鹖

裙拖碧，步飘香，织腰束素长。鬓云光，拂面珑璁，
腻玉碎凝妆。宝柱秦筝弹向晚，弦促雁，更思量。

卷 895_11【何满子】

尹鹖

云雨常陪胜会，笙歌惯逐闲游。锦里风光应占，
玉鞭金勒骅骝。戴月潜穿深曲，和香醉脱轻裘。
方喜正同鸳帐，又言将往皇州。每忆良宵公子伴，
梦魂长挂红楼。欲表伤离情味，丁香结在心头。

卷 895_12【醉公子】

尹鹖

暮烟笼藓砌，戟门犹未闭。尽日醉寻春，归来月满身。
离鞍偎绣袂，坠巾花乱缀。何处恼佳人，檀痕衣上新。

· 全唐诗 ·

卷 895_13【女冠子】

尹鹖

双成伴侣，去去不知何处。有佳期，霞帔金丝薄，
花冠玉叶危。
懒乘丹凤子，学跨小龙儿。叵耐天风紧，挫腰肢。

卷 895_14【菩萨蛮】

尹鹖

陇云暗合秋天白，俯窗独坐窥烟陌。楼际角重吹，
黄昏方醉归。
荒唐难共语，明日还应去。上马出门时，金鞭莫与伊。

鸣鸣晓角调如语，画楼三会喧雷鼓。枕上梦方残，
月光铺水寒。
蛾眉应敛翠，咫尺同千里。宿酒未全消，满怀离恨饶。

锦茵闲衬丁香枕，银釭烬落犹慵寝。颺坐遍红炉，
谁知情绪孤。
少年狂荡惯，花曲长牵绊。去便不归来，空教骏马回。

· 全唐诗 ·

卷 895_15【杏园芳】

尹鹖

严妆嫩脸花明，教人见了关情。含羞举步越罗轻，称娉婷。

终朝咫尺窥香阁，迢遥似隔层城。何时休遣梦相萦，入云屏。

卷 895_16【清平乐】

尹鹖

偎红敛翠，尽日思闲事。髻滑凤凰钗欲坠，雨打梨花满地。

绣衣独倚阑干，玉容似怯春寒。应待少年公子，鸳帏深处同欢。

芳年妙妓，淡拂铅华翠。轻笑自然生百媚，争那尊前人意。

酒倾琥珀杯时，更堪能唱新词。赚得王孙狂处，断肠一搦腰肢。

· 全唐诗 ·

卷 895_17【满宫花】

尹鹖

月沉沉，人悄悄，一炷后庭香袅。风流帝子不归来，
满地禁花慵扫。
离恨多，相见少，何处醉迷三岛？漏清宫树子规啼，
愁锁碧窗春晓。

卷 895_18【临江仙】

尹鹖

一番荷芰生池沼，槛前风送馨香。昔年于此伴萧娘。
相偎伫立，牵惹叙衷肠。
时逞笑容无限态，还如菡萏争芳。别来虚遣思悠飏。
慵窥往事，金锁小兰房。

深秋寒夜银河静，月明深院中庭。西窗幽梦等闲成。
逡巡觉后，特地恨难平。
红烛半条残焰短，依稀暗背银屏。枕前何事最伤情？
梧桐叶上，点点露珠零。

· 全唐诗 ·

卷 895_19【拨棹子】

尹鹖

风切切，深秋月，十朵芙蓉繁艳歇。小槛细腰无力，
空赢得，目断魂飞何处说。
寸心恰似丁香结，看看瘦尽胸前雪。偏挂恨，少年抛掷。
羞睹见，绣被堆红闲不彻。

丹脸腻，双靥媚，冠子缕金装翡翠。将一朵，琼花堪比。
窠窠绣，鸾凤衣裳香翠地。
银台蜡烛滴红泪，醪酒劝人教半醉。帘幕外，月华如水。
特地向，宝帐颠狂不肯睡。

卷 895_20【秋夜月】

尹鹖

三秋佳节，罇晴空，凝碎露，茱萸千结。菊蕊和烟轻拈，
酒浮金屑。征云雨，调丝竹，此时难辍。欢极、
一片艳歌声揭。
黄昏慵别，炷沉烟，熏绣被，翠帷同歇。醉并鸳鸯双枕，
暖偎春雪。语丁宁，情委曲，论心正切。夜深、
窗透数条斜月。

· 全唐诗 ·

卷 895_21【金浮图】

尹鹗

繁华地，王孙富贵。玳瑁筵开，下朝无事。压红茵、
凤舞黄金翅。玉立纤腰，一片揭天歌吹。满目绮罗珠翠。
和风淡荡，偷散沉檀气。
堪判醉，韶光正媚。折尽牡丹，艳迷人意，
金张许史应难比。贪恋欢娱，不觉金乌坠。
还惜会难别易，金船更劝，勒住花骢辔。

卷 895_22【定西番】

毛熙震

苍翠浓阴满院，莺对语，蝶交飞，戏蔷薇。
斜日倚阑风好，余香出绣衣。未得玉郎消息，几时归。

卷 895_23【何满子】

毛熙震

寂寞芳菲暗度，岁华如箭堪惊。缅想旧欢多少事，
转添春思难平。曲槛丝垂金柳，小窗弦断银筝。

· 全唐诗 ·

深院空闻燕语，满园闲落花轻。一片相思休不得，
忍教长日愁生。谁见夕阳孤梦，觉来无限伤情。

无语残妆澹薄，含羞弹袂轻盈。几度香闺眠过晓，
绮窗疏日微明。云母帐中偷惜，水精枕上初惊。
笑靥嫩疑花拆，愁眉翠敛山横。相望只教添怅恨，
整鬟时见纤琼。独倚朱扉闲立，谁知别有深情。

卷 895_24【女冠子】

毛熙震

碧桃红杏，迟日媚笼光影。彩霞深，香暖熏莺语，
风清引鹤音。
翠鬟冠玉叶，霓袖捧瑶琴。应共吹箫侣，暗相寻。

修蛾慢脸，不语檀心一点。小山妆，蝉鬓低含绿，
罗衣澹拂黄。
闲来深院里，闲步落花傍。纤手轻轻整，玉炉香。

卷 895_25【酒泉子】

毛熙震

闲卧绣帏，慵想万般情宠。锦檀偏，翘股重，翠云欹。

· 全唐诗 ·

暮天屏上春山碧，映香烟雾隔。蕙兰心，魂梦役，敛蛾眉。

钿匣舞鸾，隐映艳红修碧。月梳斜，云鬓腻，粉香寒。
晓花微敛轻呵展，袅钗金燕软。日初升，帘半卷，对妆残。

卷 895_26【浣溪沙】

毛熙震

春暮黄莺下砌前，水精帘影露珠悬，绮霞低映晚晴天。
弱柳万条垂翠带，残红满地碎香钿，蕙风飘荡散轻烟。

花榭香红烟景迷，满庭芳草绿萋萋，金铺闲掩绣帘低。
紫燕一双娇语碎，翠屏十二晚峰齐，梦魂消散醉空闺。

晚起红房醉欲消，绿鬟云散袅金翘，雪香花语不胜娇。
好是向人柔弱处，玉纤时急绣裙腰，春心牵惹转无憀。

一只横钗坠髻丛，静眠珍簟起来慵，绣罗红嫩抹苏胸。
羞敛细蛾魂暗断，困迷无语思犹浓，小屏香霭碧山重。

云薄罗裙绶带长，满身新裊瑞龙香，翠钿斜映艳梅妆。
佯不觑人空婉约，笑和娇语太猖狂，忍教牵恨暗形相。

· 全唐诗 ·

碧玉冠轻袅燕钗，捧心无语步香阶，缓移弓底绣罗鞋。
暗想欢娱何计好，岂堪期约有时乖，日高深院正忘怀。

半醉凝情卧绣茵，睡容无力卸罗裙，玉笼鹦鹉厌听闻。
慵整落钗金翡翠，象梳欹鬓月生云，锦屏绡幌麝烟薰。

卷 895_27【后庭花（或加玉树二字）】

毛熙震

莺啼燕语芳菲节，瑞庭花发。昔时欢宴歌声揭，管弦清
越。

自从陵谷追游歇，画梁尘黦。伤心一片如珪月，闲锁宫
阙。

轻盈舞伎含芳艳，竞妆新脸。步摇珠翠修蛾敛，腻鬟云
染。

歌声慢发开檀点，绣衫斜掩。时将纤手匀红脸，笑拈金
靫。

越罗小袖新香茜，薄笼金钏。倚阑无语摇轻扇，半遮匀
面。

春残日暖莺娇懒，满庭花片。争不教人长相见，画堂深
院。

· 全唐诗 ·

卷 895_28【菩萨蛮】

毛熙震

梨花满院飘香雪，高楼夜静风筝咽。斜月照帘帷，
忆君和梦稀。
小窗灯影背，燕语惊愁态。屏掩断香飞，行云山外归。

绣帘高轴临塘看，雨翻荷芰真珠散。残暑晚初凉，
轻风渡水香。
无憀悲往事，争那牵情思。光影暗相催，等闲秋又来。

天含残碧融春色，五陵薄幸无消息。尽日掩朱门，
离愁暗断魂。
莺啼芳树暖，燕拂回塘满。寂寞对屏山，相思醉梦间。

卷 895_29【清平乐】

毛熙震

春光欲暮，寂寞闲庭户。粉蝶双双穿槛舞，帘卷晚天疏
雨。

含愁独倚闺帏，玉炉烟断香微。正是销魂时节，
东风满院花飞。

· 全唐诗 ·

卷 895_30【更漏子】

毛熙震

秋色清，河影淡，深户烛寒光暗。绡幌碧，锦衾红，
博山香炷融。
更漏咽，蛩鸣切，满院霜华如雪。新月上，薄云收，
映帘悬玉钩。

烟月寒，秋夜静，漏转金壶初永。罗幕下，绣屏空，
灯花结碎红。
人悄悄，愁无了，思梦不成难晓。长忆得，与郎期，
窃香私语时。

卷 895_31【南歌子（一名望秦川，一名风蝶令）】

毛熙震

远山愁黛碧，横波慢脸明。腻香红玉茜罗轻，
深院晚堂人静，理银筝。
鬓动行云影，裙遮点屐声。娇羞爱问曲中名，
杨柳杏花时节，几多情。

惹恨还添恨，牵肠即断肠。凝情不语一枝芳，
独映画帘闲立，绣衣香。

· 全唐诗 ·

暗想为云女，应怜傅粉郎。晚来轻步出闺房，
髻慢钗横无力，纵猖狂。

卷 895_32【木兰花】

毛熙震

掩朱扉，钩翠箔，满院莺声春寂寞。匀粉泪，恨檀郎，
一去不归花又落。
对斜晖，临小阁，前事岂堪重想著。金带冷，画屏幽，
宝帐慵熏兰麝薄。

卷 895_33【小重山】

毛熙震

梁燕双飞画阁前，寂寥多少恨、懒孤眠。
晓来闲处想君怜，红罗帐、金鸭冷沉烟。
谁信损婵娟，倚屏啼玉箸、湿香钿。
四支无力上秋千，群花谢、愁对艳阳天。

卷 895_34【临江仙】

毛熙震

南齐天子宠婵娟，六宫罗绮三千。潘妃娇艳独芳妍。

· 全唐诗 ·

椒房兰洞，云雨降神仙。
纵态迷欢心不足，风流可惜当年。纤腰婉约步金莲。
妖君倾国，犹自至今传。

幽闺欲曙闻莺转，红窗月影微明。好风频谢落花声。
隔帟残烛，犹照绮屏筝。
绣被锦茵眠玉暖，炷香斜袅烟轻。淡蛾羞敛不胜情。
暗思闲梦，何处逐行云。

· 全唐诗 ·

第八百九十六卷

卷 896_1 【渔父】

李珣

水接衡门十里余，信船归去卧看书。轻爵禄，慕玄虚，
莫道渔人只为鱼。

避世垂纶不记年，官高争得似君闲。倾白酒，对青山，
笑指柴门待月还。

棹警鸥飞水溅袍，影随潭面柳垂绦。终日醉，绝尘劳，
曾见钱塘八月涛。

卷 896_2 【南乡子】

李珣

烟漠漠，雨凄凄，岸花零落鹧鸪啼。远客扁舟临野渡，
思乡处，潮退水平春色暮。

· 全唐诗 ·

兰桡举，水文开，竞携藤笼采莲来。回塘深处遥相见，
邀同宴，绿酒一卮红上面。

归路近，扣舷歌，采真珠处水风多。曲岸小桥山月过，
烟深锁，豆蔻花垂千万朵。

乘彩舫，过莲塘，棹歌惊起睡鸳鸯。带香游女偎伴笑，
争窈窕，竞折团荷遮晚照。

倾绿蚁，泛红螺，闲邀女伴簇笙歌。避暑信船轻浪里，
闲游戏，夹岸荔枝红蘸水。

云带雨，浪迎风，钓翁回棹碧湾中。春酒香熟鲈鱼美，
谁同醉？缆却扁舟篷底睡。

沙月静，水烟轻，芰荷香里夜船行。绿鬟红脸谁家女，
遥相顾，缓唱棹歌极浦去。

渔市散，渡船稀，越南云树望中微。行客待潮天欲暮，
送春浦，愁听猩猩啼瘴雨。

拢云髻，背犀梳，焦红衫映绿罗裾。越王台下春风暖，
花盈岸，游赏每邀邻女伴。

相见处，晚晴天，刺桐花下越台前。暗里回眸深属意，
遗双翠，骑象背人先过水。

· 全唐诗 ·

携笼去，采菱归，碧波风起雨霏霏。趁岸小船齐棹急，
罗衣湿，出向桃榔树下立。

云髻重，葛衣轻，见人微笑亦多情。拾翠采珠能几许，
来还去，争及村居织机女。

登画舸，泛清波，采莲时唱采莲歌。拦棹声齐罗袖敛，
池光飏，惊起沙鸥八九点。

双髻坠，小眉弯，笑随女伴下春山。玉纤遥指花深处，
争回顾，孔雀双双迎日舞。

红豆蔻，紫玫瑰，谢娘家接越王台。一曲乡歌齐抚掌，
堪游赏，酒酌螺杯流水上。

山果熟，水花香，家家风景有池塘。木兰舟上珠帘卷，
歌声远，椰子酒倾鹦鹉盏。

新月上，远烟开，惯随潮水采珠来。棹穿花过归溪口，
酤春酒，小艇缆牵垂岸柳。

卷 896_3【西溪子】

李珣

金缕翠钿浮动，妆罢小窗圆梦。日高时，春已老，

· 全唐诗 ·

人来到。满地落花慵扫。无语倚屏风，泣残红。

马上见时如梦，认得脸波相送。柳堤长，无限意，
夕阳里。醉把金鞭欲坠。归去想娇娆，暗魂销。

卷 896_4【女冠子】

李珣

星高月午，丹桂青松深处。醺坛开，金磬敲清露，
珠幢立翠苔。

步虚声缥缈，想像思徘徊。晓天归去路，指蓬莱。

春山夜静，愁闻洞天疏磬。玉堂虚，细雾垂珠佩，
轻烟曳翠裾。

对花情脉脉，望月步徐徐。刘阮今何处，绝来书。

卷 896_5【中兴乐】

李珣

后庭寂寂日初长，翩翩蝶舞红芳。绣帘垂地，金鸭无香。
谁知春思如狂，忆萧郎。等闲一去，程遥信断，五岭三

湘

休开鸾镜学宫妆，可能更理笙簧。倚屏凝睇，泪落成行。

· 全唐诗 ·

手寻裙带鸳鸯，暗思量。忍孤前约，教人花貌，虚老风光。

卷 896_6【酒泉子】

李珣

寂寞青楼，风触绣帘珠碎撼。月朦胧，花暗澹，锁春愁。

寻思往事依稀梦，泪脸露桃红色重。鬓欹蝉，钗坠凤，思悠悠。

雨渍花零，红散香凋池两岸。别情遥，春歌断，掩银屏。
孤帆早晚离三楚，闲理钿筝愁几许。曲中情，弦上语，不堪听。

秋雨连绵，声散败荷丛里，那堪深夜枕前听，酒初醒。
牵愁惹思更无停，烛暗香凝天欲曙。细和烟，冷和雨，透帘旌。

秋月婵娟，皎洁碧纱窗外，照花穿竹冷沉沉，印池心。
凝露滴，砌蛩吟。惊觉谢娘残梦，夜深斜傍枕前来，影徘徊。

· 全唐诗 ·

卷 896_7【浣溪沙】

李珣

入夏偏宜澹薄妆，越罗衣褪郁金黄，翠钿檀注助容光。
相见无言还有恨，几回判却又思量，月窗香径梦悠飏。

晚出闲庭看海棠，风流学得内家妆，小钗横戴一枝芳。
镂玉梳斜云鬓腻，缕金衣透雪肌香，暗思何事立残阳。

访旧伤离欲断魂，无因重见玉楼人，六街微雨镂香尘。
早为不逢巫峡梦，那堪虚度锦江春，遇花倾酒莫辞频。

红藕花香到槛频，可堪闲忆似花人，旧欢如梦绝音尘。
翠叠画屏山隐隐，冷铺文簟水潸潸，断魂何处一蝉新。

卷 896_8【巫山一段云】

李珣

有客经巫峡，停桡向水湄。楚王曾此梦瑶姬，一梦杳无期。

尘暗珠帘卷，香销翠幄垂。西风回首不胜悲，暮雨洒空祠。

· 全唐诗 ·

古庙依青嶂，行宫枕碧流。水声山色锁妆楼，往事思悠悠。

云雨朝还暮，烟花春复秋。啼猿何必近孤舟，行客自多愁。

卷 896_9【菩萨蛮】

李珣

回塘风起波纹细，刺桐花里门斜闭。残日照平芜，
双双飞鹧鸪。
征帆何处客，相见还相隔。不语欲魂销，望中烟水遥。

等闲将度三春景，帘垂碧砌参差影。曲槛日初斜，
杜鹃啼落花。
恨君容易处，又话潇湘去。凝思倚屏山，泪流红脸斑。

隔帘微雨双飞燕，砌花零落红深浅。捻得宝箏调，
心随征棹遥。
楚天云外路，动便经年去。香断画屏深，旧欢何处寻。

卷 896_10【渔歌子】

李珣

楚山青，湘水绿，春风澹荡看不足。草芊芊，花簇簇，

· 全唐诗 ·

渔艇棹歌相续。
信浮沉，无管束，钓回乘月归湾曲。酒盈尊，云满屋，
不见人间荣辱。

荻花秋，潇湘夜，橘洲佳景如屏画。碧烟中，明月下，
小艇垂纶初罢。
水为乡，蓬作舍，鱼羹稻饭常餐也。酒盈杯，书满架，
名利不将心挂。
柳垂丝，花满树，莺啼楚岸春天暮。棹轻舟，出深浦，
缓唱渔郎归去。
罢垂纶，还酌醕，孤村遥指云遮处。下长汀，临深渡，
惊起一行沙鹭。

九疑山，三湘水，芦花时节秋风起。水云间，山月里，
棹月穿云游戏。
鼓清琴，倾绿蚁，扁舟自得逍遥志。任东西，无定止，
不议人间醒醉。

卷 896_11【望远行】

李珣

春日迟迟思寂寥，行客关山路遥。琼窗时听语莺娇，
柳丝牵恨一条条。
休晕绣，罢吹箫，貌逐残花暗凋。同心犹结旧裙腰，
忍孤风月度良宵。

· 全唐诗 ·

露滴幽庭落叶时，愁聚萧娘柳眉。玉郎一去负佳期，
水云迢递雁书迟。
屏半掩，枕斜欹，蜡泪无言对垂。吟砧断续漏频移，
入窗明月鉴空帏。

卷 896_12【河传】

李珣

去去，何处，迢迢巴楚，山水相连。朝云暮雨，
依旧十二峰前，猿声到客船。
愁肠岂异丁香结，因离别，故国音书绝。想佳人花下。
对明月春风，恨应同。

春暮，微雨，送君南浦，愁敛双蛾。落花深处，
啼鸟似逐离歌，粉檀珠泪和
临流更把同心结。情哽咽，后会何时节？不堪回首相望，
已隔汀洲，橹声幽。

卷 896_13【虞美人】

李珣

金笼莺报天将曙，惊起分飞处。夜来潜与玉郎期，
多情不觉酒醒迟，失归期。

· 全唐诗 ·

映花避月遥相送，腻髻偏垂凤。却回娇步入香闺，
倚屏无语撚云篴，翠眉低。

卷 896_14【临江仙】

李珣

帘卷池心小阁虚，暂凉闲步徐徐。芰荷经雨半凋疏。
拂堤垂柳，蝉噪夕阳余。
不语低鬟幽思远，玉钗斜坠双鱼。几回偷看寄来书。
离情别恨，相隔欲何如。

莺报帘前暖日红，玉炉残麝犹浓。起来闺思尚疏慵。
别愁春梦，谁解此情惊？
强整娇姿临宝镜，小池一朵芙蓉。旧欢无处再寻踪。
更堪回顾，屏画九疑峰。

卷 896_15【定风波】

李珣

志在烟霞慕隐沦，功成归看五湖春。一叶舟中吟复醉，
云水，此时方认自由身。
花岛为邻鸥作侣，深处，经年不见市朝人。
已得希夷微妙旨，潜喜，荷衣蕙带绝纤尘。

· 全唐诗 ·

十载逍遥物外居，白云流水似相于。乘兴有时携短棹，
江岛，谁知求道不求鱼。
到处等闲邀鹤伴，春岸，野花香气扑琴书。
更饮一杯红霞酒，回首，半钩新月贴清虚。

又见辞巢燕子归，阮郎何事绝音徽。帘外西风黄叶落，
池阁，隐莎蛩叫雨霏霏。
愁坐算程千万里，频跂，等闲经岁两相违。
听鹊凭龟无定处，不知，泪痕流在画罗衣。

雁过秋空夜未央，隔窗烟月锁莲塘。往事岂堪容易想，
惆怅，故人迢递在潇湘。
纵有回文重叠意，谁寄？解鬟临镜泣残妆。
沉水香消金鸭冷，愁永，候虫声接杵声长。

帘外烟和月满庭，此时闲坐若为情。小阁拥炉残酒醒，
愁听，寒风叶落一声声。
惟恨玉人芳信阻，云雨，屏帷寂寞梦难成。
斗转更阑心杳杳，将晓，银缸斜照绮琴横。

卷 896_16【南歌子】

欧阳炯

锦帐银灯影，纱窗玉漏声。迢迢永夜梦难成，
愁对小庭秋色，月空明。

· 全唐诗 ·

卷 896_17【渔父】

欧阳炯

摆脱尘机上钓船，免教荣辱有流年。无系绊，没愁煎，
须信船中有散仙。

风浩寒溪照胆明，小君山上玉蟾生。荷露坠，翠烟轻，
拨刺游鱼几个惊。

卷 896_18【巫山一段云】

欧阳炯

绛阙登真子。飘飘御彩鸾。碧虚风雨佩光寒，敛袂下云
端
月帐朝霞薄，星冠玉蕊攒。远游蓬岛降人间，特地拜龙
颜。

春去秋来也，愁心似醉醺。去时邀约早回轮，及去又何
曾。
歌扇花光点，衣珠滴泪新。恨身翻不作车尘，万里得随
君。

· 全唐诗 ·

卷 896_19【春光好】

欧阳炯

天初暖，日初长，好春光。万汇此时皆得意，竞芬芳。
笋迸苔钱嫩绿，花偎雪坞浓香。谁把金丝裁剪却，挂斜
阳。

花滴露，柳摇烟，艳阳天。雨霁山樱红欲烂，谷莺迁。
饮处交飞玉斝，游时倒把金鞭，风飏九衢榆叶动，簇青
钱。

胸铺雪，脸分莲，理繁弦。纤指飞翻金凤语，转婵娟。
嘈囋如敲玉佩，清冷似滴香泉。曲罢问郎名个甚，想夫
怜。

磬香散，渚水融，暖空濛。飞絮悠扬遍虚空，惹轻风。
柳眼烟来点绿，花心日与妆红。黄雀锦鸾相对舞，近帘
栊。

鸡树绿，凤池清，满神京。玉兔宫前金榜出，列仙名。
叠雪罗袍接武，团花骏马娇行。开宴锦江游烂熳，柳烟
轻。

芳丛绣，绿筵张，两心狂。空遣横波传意绪，对笙簧。
虽似安仁掷果，未闻韩寿分香。流水桃花情不已，待刘

· 全唐诗 ·

郎。

垂绣幔，掩云屏，思盈盈。双枕珊瑚无限情，翠钗横。
几见纤纤动处，时间款款娇声。却出锦屏妆面了，理秦
箏。

金轡响，玉鞭长，映垂杨。堤上采花筵上醉，满衣香。
无处不携弦管，直应占断春光。年少王孙何处好，竞寻
芳。

蘋叶嫩，杏花明，画船轻。双浴鸳鸯出绿汀，棹歌声。
春水无风无浪，春来半雨半晴。红粉相随南浦晚，莫辞
行。

卷 896_20【西江月（一名白蘋香，一名步虚词）】

欧阳炯

月映长江秋水，分明冷浸星河。浅沙汀上白云多，
雪散几丛芦苇。
扁舟倒影寒潭，烟光远罩轻波。笛声何处响渔歌，
两岸蘋香暗起。

水上鸳鸯比翼，巧将绣作罗衣。镜中重画远山眉，
春睡起来无力。
细雀稳簪云髻，含羞时想佳期。脸边红艳对花枝，

· 全唐诗 ·

犹占凤楼春色。

卷 896_21【赤枣子】

欧阳炯

夜悄悄，烛荧荧，金炉香尽酒初醒。春睡起来回雪面，
含羞不语倚云屏。

莲脸薄，柳眉长，等闲无事莫思量。每一见时明月夜，
损人情思断人肠。

卷 896_22【女冠子】

欧阳炯

薄妆桃脸，满面纵横花靥。艳情多，绶带盘金缕，
轻裙透碧罗。

含羞眉乍敛，微语笑相和。不会频偷眼，意如何？

秋宵秋月，一朵荷花初发。照前池，摇曳熏香夜，
婵娟对镜时。

蕊中千点泪，心里万条丝。恰似轻盈女，好风姿。

· 全唐诗 ·

卷 896_23【更漏子】

欧阳炯

玉阑干，金鹓井，月照碧梧桐影。独自个，立多时，
露华浓湿衣。

一向，凝情望，待得不成模样。虽叵耐，又寻思，
争生嗔得伊。

三十六宫秋夜永，露华点滴高梧。丁丁玉漏咽铜壶，
明月上金铺。

红线毯，博山炉，香风暗触流苏。羊车一去长青芜，
镜尘鸾彩孤。

卷 896_24【定风波】

欧阳炯

暖日闲窗映碧纱，小池春水浸晴霞。数树海棠红欲尽，
争忍，玉闺深掩过年华。

独凭绣床方寸乱，肠断，泪珠穿破脸边花。

邻舍女郎相借问，音信，教人羞道未还家。

· 全唐诗 ·

卷 896_25【木兰花】

欧阳炯

儿家夫婿心容易，身又不来书不寄。闲庭独立鸟关关，
争忍抛奴深院里。
闷向绿纱窗下睡，睡又不成愁已至。今年却忆去年春，
同在木兰花下醉。

日照玉楼花似锦，楼上醉和春色寝。绿杨风送小莺声，
残梦不成离玉枕。
堪爱晚来韶景甚，宝柱秦筝方再品。青蛾红脸笑来迎，
又向海棠花下饮。

春早玉楼烟雨夜，帘外樱桃花半谢。锦屏香冷绣衾寒，
怱怱忆君无计舍。
侵晓鹊声来砌下，鸾镜残妆红粉罢。黛眉双点不成描，
留待玉郎归日画。

卷 896_26【清平乐】

欧阳炯

春来街砌，春雨如丝细。春地满飘红杏蒂，春燕舞随风
势。

· 全唐诗 ·

春幡细缕春缿，春闺一点春灯。自是春心撩乱，
非干春梦无凭。

卷 896_27【菩萨蛮】

欧阳炯

晓来中酒和春睡，四支无力云鬟坠。斜卧脸波春，
玉郎休恼人。
日高犹未起，为恋鸳鸯被。鹦鹉语金笼，道儿还是慵。

红炉暖阁佳人睡，隔帘飞雪添寒气。小院奏笙歌，
香风簇绮罗。
酒倾金盏满，兰烛重开宴。公子醉如泥，天街闻马嘶。

翠眉双脸新妆薄，幽闺斜卷青罗幕。寒食百花时，
红繁香满枝。
双双梁燕语，蝶舞相随去。肠断正思君，闲眠冷绣茵。

画屏绣阁三秋雨，香唇腻脸偎人语。语罢欲天明，
娇多梦不成。
晓街钟鼓绝，嗔道如今别。特地气长吁，倚屏弹泪珠。

· 全唐诗 ·

卷 896_28【浣溪沙】

欧阳炯

落絮残莺半日天，玉柔花醉只思眠，
惹窗映竹满炉烟。
独掩画屏愁不语，斜欹瑶枕髻鬟偏，
此时心在阿谁边？

天碧罗衣拂地垂，美人初著更相宜，
宛风如舞透香肌。
独坐含嚬吹凤竹，园中缓步折花枝，
有情无力泥人时。
相见休言有泪珠，酒阑重得叙欢娱，
凤屏鸳枕宿金铺。
兰麝细香闻喘息，绮罗纤缕见肌肤，
此时还恨薄情无。

卷 896_29【三字令】

欧阳炯

春欲尽，日迟迟，牡丹时。罗幌卷，
翠帘垂。彩笺书，红粉泪，
两心知。
人不在，燕空归，负佳期。
香烬落，枕函欹。月分明，
花澹薄，惹相思。

卷 896_30【南乡子】

欧阳炯

嫩草如烟，石榴花发海南天。
日暮江亭春影绿，鸳鸯浴，

· 全唐诗 ·

水远山长看不足。

画舸停桡，槿花篱外竹横桥。水上游上沙上女，回顾，
笑指芭蕉林里住。

岸远沙平，日斜归路晚霞明。孔雀自怜金翠尾，临水，
认得行人惊不起。

洞口谁家，木兰船系木兰花。红袖女郎相引去，游南浦，
笑倚春风相对语。

二八花钿，胸前如雪脸如莲。耳坠金环穿瑟瑟，霞衣窄，
笑倚江头招远客。

路入南中，桄榔叶暗蓼花红。两岸人家微雨后，收红豆，
树底纤纤抬素手。

袖敛蛟绡，采香深洞笑相邀。藤杖枝头芦酒滴，铺葵席，
豆蔻花间趁晚日。

翡翠鸂鶒，白蘋香里小沙汀。岛上阴阴秋雨色，芦花扑，
数只渔船何处宿。

· 全唐诗 ·

卷 896_31【献衷心】

欧阳炯

见好花颜色，争笑东风。双脸上，晚妆同。闭小楼深閤，
春景重重。三五夜，偏有恨，月明中。
情未已，信曾通，满衣犹自染檀红。恨不如双燕，
飞舞帘栊。春欲暮，残絮尽，柳条空。

卷 896_32【贺明朝】

欧阳炯

忆昔花间初识面，红袖半遮妆脸。轻转石榴裙带，
故将纤纤玉指，偷拈双凤金线。
碧梧桐锁深深院，谁料得两情，何日教缱绻。
羡春来双燕，飞到玉楼，朝暮相见。

忆昔花间相见后，只凭纤手，暗抛红豆。人前不解，
巧传心事，别来依旧，孤负春昼。
碧罗衣上蹙金绣，睹对对鸳鸯，空裛泪痕透。
想韶颜非久，终是为伊，只恁偷瘦。

· 全唐诗 ·

卷 896_33【江城子】

欧阳炯

晚日金陵岸草平，落霞明，水无情。六代繁华，
暗逐逝波声。空有姑苏台上月，如西子镜照江城。

卷 896_34【凤楼春】

欧阳炯

凤髻绿云丛，深掩房栊。锦书通，梦中相见觉来慵。
匀面泪，脸珠融。因想玉郎何处去，对淑景谁同？
小楼中，春思无穷。倚阑凝望，暗牵愁绪，柳花飞起东
风。
斜日照帘，罗幌香冷粉屏空。海棠零落，莺语残红。

卷 896_35【生查子】

欧阳彬

竟日画堂欢，入夜重开宴。剪烛蜡烟香，促席花光颤。
待得月华来，满院如铺练。门外簇骅骝，直待更深散。

· 全唐诗 ·

第八百九十七卷

卷 897_1【虞美人】

阎选

粉融红膩莲房绽，脸动双波慢。小鱼衔玉鬓钗横，
石榴裙染象纱轻，转娉婷。
偷期锦浪荷深处，一梦云兼雨。臂留檀印齿痕香，
深秋不寐漏初长，尽思量。

楚腰蛴领团香玉，鬟叠深深绿。月蛾星眼笑微频，
柳夭桃艳不胜春，晚妆匀。
水纹簟映青纱帐，雾罩秋波上。一枝娇卧醉芙蓉，
良宵不得与君同，恨忡忡。

卷 897_2【临江仙】

阎选

雨停荷芰逗浓香，岸边蝉噪垂杨。物华空有旧池塘。
不逢仙子，何处梦襄王？

· 全唐诗 ·

珍簪对欹鸳枕冷，此来尘暗凄凉。欲凭危槛恨偏长。
藕花珠缀，犹似汗凝妆。

十二高峰天外寒，竹梢轻拂仙坛。宝衣行雨在云端。
画帘深殿，香雾冷风残。
欲问楚王何处去，翠屏犹掩金鸾。猿啼明月照空滩。
孤舟行客，惊梦亦艰难。

卷 897_3【浣溪沙】

阎选

寂寞流苏冷绣茵，倚屏山枕惹香尘，小庭花露泣浓春。
刘阮信非仙洞客，嫦娥终是月中人，此生无路访东邻。

卷 897_4【八拍蛮】

阎选

云锁嫩黄烟柳细，风吹红蒂雪梅残。光影不胜闺阁恨，
行行坐坐黛眉攒。

愁锁黛眉烟易惨，泪飘红脸粉难匀。憔悴不知缘底事，
遇人推道不宜春。

· 全唐诗 ·

卷 897_5【河传】

阎选

秋雨秋雨，无昼无夜，滴滴霏霏。暗灯凉簾怨分离，
妖姬，不胜悲。
西风稍急喧窗竹，停又续，腻脸悬双玉。几回邀约雁来
时，
违期。雁归，人不归。

卷 897_6【谒金门】

阎选

美人浴，碧沼莲开芬馥。双鬟绾云颜似玉，素娥辉淡绿。
雅态芳姿闲淑，雪映钿装金斛。水溅青丝珠断续，
酥融香透肉。

卷 897_7【定风波】

阎选

江水沉沉帆影过，游鱼到晚透寒波。渡口双双飞白鸟，
烟袅，芦花深处隐渔歌。

· 全唐诗 ·

扁舟短棹归兰浦，人去，萧萧竹径透青莎。
深夜无风新雨歇，凉月，露迎珠颗入圆荷。

卷 897_8【竹枝】

孙光宪

门前春水白蘋花，岸上无人小艇斜，商女经过江欲暮，
散抛残食饲神鸦。乱绳千结绊人深，越罗万丈表长寻。
杨柳在身垂意绪，藕花落尽见莲心。

卷 897_9【浣溪沙】

孙光宪

蓼岸风多橘柚香，江边一望楚天长，片帆烟际闪孤光。
目送征鸿飞杳杳，思随流水去茫茫，兰红波碧忆潇湘。

桃杏风香帘幕闲，谢家门户约花关，画梁幽语燕初还。
绣阁数行题了壁，晓屏一枕酒醒山，却疑身是梦云间。

花渐凋疏不耐风，画帘垂地晚堂空，堕阶紫萼舞愁红。
腻粉半粘金靥子，残香犹暖绣薰笼，蕙心无处与人同。

揽镜无言泪欲流，凝情半日懒梳头，一庭疏雨湿春愁。

· 全唐诗 ·

杨柳只知伤怨别，杏花应信损娇羞，泪沾魂断轸离忧。

半踏长裾宛约行，晚帘疏处见分明，此时堪恨昧平生。
早是销魂残烛影，更愁闻著品弦声，杳无消息若为情。

兰沐初休曲槛前，暖风迟日洗头天，湿云新敛未梳蝉。
翠袂半将遮粉臆，宝钗长欲坠香肩，此时模样不禁怜。

风递残香出绣帘，团窠金凤舞襜褕，落花微雨恨相兼。
何处去来狂太甚，空推宿酒睡无厌，争教人不别猜嫌。

轻打银筝坠燕泥，断丝高罥画楼西，花冠闲上午墙啼。
粉箨半开新竹径，红苞尽落旧桃蹊，不堪终日闭深闺。

乌帽斜欹倒佩鱼，静街偷步访仙居，隔墙应认打门初。
将见客时微掩敛，得人怜处且生疏，低头羞问壁边书。

风撼芳菲满院香，四帘慵卷日初长，鬓云垂枕响微铎。
春梦未成愁寂寂，佳期难会信茫茫，万般心，千点泪，
泣兰堂。

碧玉衣裳白玉人，翠眉红脸小腰身，瑞云飞雨逐行云。
除却弄珠兼解佩，便随西子与东邻，是谁容易比真真。

何事相逢不展眉，苦将情分恶猜疑，眼前行止想应知。
半恨半嗔回面处，和娇和泪泥人时，万般饶得为怜伊。

· 全唐诗 ·

落絮飞花满帝城，看看春尽又伤情，岁华频度想堪惊。
风月岂惟今日恨，烟霄终待此身荣，未甘虚老负平生。

静想离愁暗泪零，欲栖云雨计难成，少年多是薄情人。
万种保持图永远，一般模样负神明，到头何处问平生。

试问于谁分最多，便随人意转横波，缕金衣上小双鹅。
醉后爱称娇姐姐，夜来留得好哥哥，不知情事久长么？

叶坠空阶折早秋，细烟轻雾锁妆楼，寸心双泪惨娇羞。
风月但牵魂梦苦，岁华偏感别离愁，恨和相忆两难酬。

月淡风和画阁深，露桃烟柳影相侵，敛眉凝绪夜沉沉。
长有梦魂迷别浦，岂无春病入离心，少年何处恋虚襟。

自入春来月夜稀，今宵蟾彩倍凝辉，强开襟抱出帘帷。
啮指暗思花下约，凭阑羞睹泪痕衣，薄情狂荡几时归？

十五年来锦岸游，未曾行处不风流，好花长与万金酬。
满眼利名浑信运，一生狂荡恐难休，且陪烟月醉红楼。

卷 897_10【河传】

孙光宪

太平天子，等闲游戏，疏河千里。柳如丝，偎倚。

· 全唐诗 ·

绿波春水，长淮风不起。
如花殿脚三千女，争云雨，何处留人住？锦帆风，
烟际红，烧空，魂迷大业中。

柳拖金缕，著烟笼雾，濛濛落絮。凤凰舟上楚女，
妙舞，雷喧波上鼓。
龙争虎战分中土。人无主，桃叶江南渡。璧花笺，
艳思牵，成篇，宫娥相与传。

花落，烟薄。谢家池阁，寂寞春深。翠蛾轻敛意沈吟，
沾襟，无人知此心。
玉炉香断霜灰冷，帘铺影，梁燕归红杏。晚来天，
空悄然。孤眠，枕檀云髻偏。

风飏，波敛。团荷闪闪，珠倾露点。木兰舟上，
何处吴娃越艳？藕花红照脸。
大堤狂杀襄阳客。烟波隔，渺渺湖光白。身已归，
心不归。斜晖，远汀鸂鶒飞。

卷 897_11【菩萨蛮】

孙光宪

月华如水笼香砌，金钗碎撼门初闭。寒影堕高檐，
钩垂一面帘。
碧烟轻袅袅，红战灯花笑。即此是高唐，掩屏秋梦长。

· 全唐诗 ·

花冠频鼓墙头翼，东方澹白连窗色。门外早莺声，
背楼残月明。
薄寒笼醉态，依旧铅华在。握手送人归，半拖金缕衣。

小庭花落无人扫，疏香满地东风老。春晚信沉沉，
天涯何处寻。
晓堂屏六扇，眉共湘山远。争奈别离心，近来尤不禁。

青岩碧洞经朝雨，隔花相唤南溪去。一只木兰船，
波平远浸天。
扣船惊翡翠，嫩玉抬香臂。红日欲沈西，烟中遥解觴。

木绵花映丛祠小，越禽声里春光晓。铜鼓与蛮歌，
南人祈赛多。
客帆风正急，茜袖偎檣立。极浦几回头，烟波无限愁。

卷 897_12【河渎神】

孙光宪

汾水碧依依，黄云落叶初飞。翠娥一去不言归，
庙门空掩斜晖。
四壁阴森排古画，依旧琼轮羽驾。小殿沉沉清夜，
银灯飘落香炷。

江上草芊芊，春晚湘妃庙前。一方卵色楚南天，

· 全唐诗 ·

数行斜雁联翩。
独倚朱阑情不极，魂断终朝相忆。两桨不知消息，
远汀时起鸂鶒。

卷 897_13【虞美人】

孙光宪

红窗寂寂无人语，暗淡梨花雨。绣罗纹地粉新描，
博山香炷旋抽条，睡魂销。
天涯一去无消息，终日长相忆。教人相忆几时休？
不堪枵触别离愁，泪还流。

好风微揭帘旌起，金翼鸾相倚。翠檐愁听乳禽声，
此时春态暗关情，独难平。
画堂流水空相翳，一穗香摇曳。教人无处寄相思，
落花芳草过前期，没人知。

卷 897_14【后庭花】

孙光宪

景阳钟动宫莺转，露凉金殿。轻飙吹起琼花绽，玉叶如
剪。
晚来高阁上，珠帘卷，见坠香千片。修蛾慢脸陪雕辇，

· 全唐诗 ·

后庭新宴。

石城依旧空江国，故宫春色。七尺青丝芳草绿，绝世难得。

玉英凋落尽，更何人识，野棠如织。只是教人添怨忆，怅望无极。

卷 897_15【生查子】

孙光宪

寂寞掩朱门，正是天将暮。暗澹小庭中，滴滴梧桐雨。
绣工夫，牵心绪，配尽鸳鸯缕。待得没人时，偎倚论私语。

暖日策花骢，骢鞚垂杨陌。芳草惹烟青，落絮随风白。
谁家绣毂动香尘，隐映神仙客。狂杀玉鞭郎，咫尺音容隔。

金井堕高梧，玉殿笼斜月。永巷寂无人，敛态愁堪绝。
玉炉寒，香烬灭，还似君恩歇。翠辇不归来，幽恨将谁说？

春病与春愁，何事年年有。半为枕前人，半为花间酒。
醉金尊，携玉手，共作鸳鸯偶。倒载卧云屏，雪面腰如柳。

· 全唐诗 ·

为惜美人娇，长有如花笑。半醉倚红妆，转语传青鸟。
眷方深，怜恰好，唯恐相逢少。似这一般情，肯信春光老。

清晓牡丹芳，红艳凝金蕊。乍占锦江春，永认笙歌地。
感人心，为物瑞，烂熳烟花里。戴上玉钗时，迥与凡花异。

密雨阻佳期，尽日凝然坐。帘外正淋漓，不觉愁如锁。
梦难裁，心欲破，泪逐檐声堕。想得玉人情，也合思量我。

卷 897_16【临江仙】

孙光宪

霜拍井梧干叶堕，翠帏雕槛初寒。薄铅残黛称花冠。
含情无语，延伫倚阑干。
杳杳征轮何处去？离愁别恨千般。不堪心绪正多端。
镜奁长掩，无意对孤鸾。

暮雨凄凄深院闭，灯前凝坐初更。玉钗低压鬓云横。
半垂罗幕，相映烛光明。
终是有心投汉珮，低头但理秦筝。燕双鸾偶不胜情。
只愁明发，将逐楚云行。

· 全唐诗 ·

卷 897_17【酒泉子】

孙光宪

空碛无边，万里阳关道路。马萧萧，人去去，陇云愁。
香貂旧制戎衣窄，胡霜千里白。绮罗心，魂梦隔，上高
楼。

曲槛小楼，正是莺花二月。思无憀，愁欲绝，郁离襟。
展屏空对潇湘水，眼前千万里。泪掩红，眉敛翠，恨沉
沉。

敛态窗前，袅袅雀钗抛颈。燕成双，鸾对影，偶新知。
玉纤澹拂眉山小，镜中嗔共照。翠连娟，红缥缈，早收
时。

卷 897_18【清平乐】

孙光宪

愁肠欲断，正是青春半。连理分枝鸾失伴，又是一场离
散
掩镜无语眉低，思随芳草凄凄。凭仗东风吹梦，
与郎终日东西。

· 全唐诗 ·

等闲无语，春恨如何去？终是疏狂留不住，花暗柳浓何处？

尽日目断魂飞，晚窗斜界残晖。长恨朱门薄暮，
绣鞍骢马空归。

卷 897_19【更漏子】

孙光宪

听寒更，闻远雁，半夜萧娘深院。扃绣户，下珠帘，
满庭喷玉蟾。

人语静，香闺冷，红幕半垂清影。云雨态，蕙兰心，
此情江海深。

今夜期，来日别，相对只堪愁绝。偎粉面，撚瑶簪，
无言泪满襟。

银箭落，霜华薄，墙外晓鸡咿喔。听付属，恶情惊，
断肠西复东。

烛荧煌，香旖旎，闲放一堆鸳被。慵就寝，独无憀，
相思魂欲销。

不会得，这心力，判了依前还忆。空自怨，奈伊何，
别来情更多。

掌中珠，心上气，爱惜岂将容易。花下月，枕前人，
此生谁更亲。

· 全唐诗 ·

交颈语，合欢身，便同比目金鳞。连绣枕，卧红茵，
霜天似暖春。

对秋深，离恨苦，数夜满庭风雨。凝想坐，敛愁眉，
孤心似有违。
红窗静，画帘垂，魂消地角天涯。和泪听，断肠窥，
漏移灯暗时。

求君心，风韵别，浑似一团烟月。歌皓齿，舞红筹，
花时醉上楼。
能婉媚，解娇羞，王孙忍不攀留。惟我恨，未绸缪，
相思魂梦愁。

卷 897_20【女冠子】

孙光宪

蕙风芝露，坛际残香轻度。蕊珠宫，苔点分圆碧，
桃花践破红。
品流巫峡外，名籍紫微中。真侣壙城会，梦魂通。

淡花瘦玉，依约神仙妆束。佩琼文，瑞露通宵贮，
幽香尽日焚。
碧纱笼绛节，黄藕冠浓云。勿以吹箫伴，不同群。

· 全唐诗 ·

卷 897_21【风流子】

孙光宪

茅舍槿篱溪曲，鸡犬自南自北。菰叶长，水萍开，
门外春波涨绿。听织，声促，轧轧鸣梭穿屋。

楼倚长衢欲暮，瞥见神仙伴侣。微傅粉，拢梳头，
隐映画帘开处。无语，无绪，慢曳罗裙归去。

金络玉衔嘶马，系向绿杨阴下。朱户掩，绣帘垂，
曲院水流花谢。欢罢，归也，犹在九衢深夜。

卷 897_22【定西番】

孙光宪

鸡禄山前游骑，边草白，朔天明，马蹄轻。
鹊面弓离短鞬，弯来月欲成。一只鸣镝云外，晓鸿惊。

帝子枕前秋夜，霜幄冷，月华明，正三更。
何处戍楼寒笛，梦残闻一声。遥想汉关万里，泪纵横。

· 全唐诗 ·

卷 897_23【何满子】

孙光宪

冠剑不随君去，江河还共恩深。歌袖半遮眉黛惨，
泪珠旋滴衣襟。惆怅云愁雨怨，断魂何处相寻。

卷 897_24【玉蝴蝶】

孙光宪

春欲尽，景仍长，满园花正黄。粉翅两悠飏，翩翩过短
墙。
鲜飙暖，牵游伴，飞去立残芳。无语对萧娘，舞衫沉麝
香。

卷 897_25【八拍蛮】

孙光宪

孔雀尾拖金线长，怕人飞起入丁香。越女沙头争拾翠，
相呼归去背斜阳。

· 全唐诗 ·

卷 897_26【思帝乡】

孙光宪

如何，遣情情更多？永日水堂帘下，敛羞蛾。
六幅罗裙窄地，微行曳碧波。看尽满池疏雨，打团荷。

卷 897_27【上行杯】

孙光宪

草草离亭鞍马，从远道、此地分襟。燕宋秦吴千万里，
无辞一醉。野棠开，江草湿，伫立，沾泣，征骑骎骎。

离棹逡巡欲动，临极浦、故人相送。去住心情知不共，
金船满捧。绮罗愁，丝管咽，回别，帆影灭，江浪如雪。

卷 897_28【谒金门】

孙光宪

留不得，留得也应无益。白纻春衫如雪色，扬州初去日，
轻别离，甘抛掷，江上满帆风疾。却羡彩鸳三十六，
孤鸾还一只。

· 全唐诗 ·

卷 897_29【思越人】

孙光宪

古台平，芳草远，馆娃宫外春深。翠黛空留千载恨，
教人何处相寻，
绮罗无复当时事，露花点滴香泪。惆怅遥天横绿水，
鸳鸯对对飞起。

渚莲枯，宫树老，长洲废苑萧条。想像玉人空处所，
月明独上溪桥。
经春初败秋风起，红兰绿蕙愁死。一片风流伤心地，
魂销目断西子。

卷 897_30【望梅花】

孙光宪

数枝开与短墙平，见雪萼，红跗相映。引起谁人边塞情。
帘外欲三更，吹断离愁月正明。空听隔江声。

卷 897_31【渔歌子】

孙光宪

草芊芊，波漾漾，湖边草色连波涨。沿蓼岸，泊枫汀，

· 全唐诗 ·

天际玉轮初上。
扣舷歌，联极望，桨声伊轧知何向。黄鹄叫，白鸥眠，
谁似侬家疏旷？

泛流萤，明又灭，夜凉水冷东湾阔。风浩浩，笛寥寥，
万顷金波重叠。
杜若洲，香郁烈，一声宿雁霜时节。经雪水。过松江，
尽属侬家日月。

卷 897_32【定风波】

孙光宪

帘拂疏香断碧丝，泪衫还滴绣黄鹂。上国献书人不在，
凝黛，晚庭又是落红时。
春日自长心自促，翻覆，年来年去负前期。
应是秦云兼楚雨，留住，向花枝夸说月中枝。

卷 897_33【南歌子】

孙光宪

艳冶青楼女，风流似楚真。骊珠美玉未为珍，
窈窕一枝芳柳，入腰身。
舞袖频回雪，歌声几动尘。慢凝秋水顾情人，

· 全唐诗 ·

只缘倾国，著处觉生春。

映月论心处，偎花见面时。倚郎和袖抚香肌，
遥指画堂深院，许相期。
解佩君非晚，虚襟我未迟。愿如连理合欢枝，
不似五陵狂荡，薄情儿。

卷 897_34【应天长】

孙光宪

翠凝仙艳非凡有，窈窕年华方十九。鬓如云，腰似柳，
妙对绮弦歌酒。
醉瑶台，携玉手，共燕此宵相偶。魂断晚窗分首，
泪沾金缕袖。

卷 897_35【遐方怨】

孙光宪

红绶带，锦香囊。为表花前意，殷勤赠玉郎。
此时更役心肠，转添秋夜梦魂狂。
思艳质，想娇妆。愿早传金盏，同欢卧醉乡。
任人猜妒恶猜防，到头须使似鸳鸯。

· 全唐诗 ·

第八百九十八卷

卷 898_1【浣溪沙】

张泌

钿毂香车过柳堤，桦烟分处马频嘶，为他沉醉不成泥。
花满驿亭香露细，杜鹃声断玉蟾低，含情无语倚楼西。

马上凝情忆旧游，照花淹竹小溪流，钿筝罗幕玉搔头。
早是出门长带月，可堪分袂又经秋，晚风斜日不胜愁。

独立寒阶望月华，露浓香泛小庭花，绣屏愁背一灯斜。
云雨自从分散后，人间无路到仙家，但凭魂梦访天涯。

依约残眉理旧黄，翠鬟抛掷一簪长，暖风晴日罢朝妆。
闲折海棠看又拈，玉纤无力惹余香，此情谁会倚斜阳。

翡翠屏开绣幄红，谢娥无力晓妆慵，锦帷鸳被宿香浓。
微雨小庭春寂寞，燕飞莺语隔帘栊，杏花凝恨倚东风。

花月香寒悄夜尘，绮筵幽会暗伤神，婵娟依约画屏人。
人不见时还暂语，令才抛后爱微嚬，越罗巴锦不胜春。

· 全唐诗 ·

偏戴花冠白玉簪，睡容新起意沈吟，翠钿金缕镇眉心。
小槛日斜风悄悄，隔帘零落杏花阴，断香轻碧锁愁深。

晚逐香车入凤城，东风斜揭绣帘轻，慢回娇眼笑盈盈。
消息未通何计是，便须佯醉且随行，依稀闻道太狂生。

小市东门欲雪天，众中依约见神仙，蕊黄香画贴金蝉。
饮散黄昏人草草，醉容无语立门前，马嘶尘哄一街烟。

卷 898_2【临江仙】

张泌

烟收湘渚秋江静，蕉花露泣愁红。五云双鹤去无踪。
几回魂断，凝望向长空。
翠竹暗留珠泪怨，闲调宝瑟波中。花鬟月鬓绿云重。
古祠深殿，香冷雨和风。

卷 898_3【女冠子】

张泌

露花烟草，寂寞五云三岛。正春深，貌减潜销玉，
香残尚惹襟。
竹疏虚槛静，松密醺坛阴。何事刘郎去，信沉沉。

· 全唐诗 ·

卷 898_4【河传】

张泌

渺莽云水，惆怅暮帆，去程迢递。夕阳芳草，千里万里，
雁声无限起。
梦魂悄断烟波里。心如醉，相见何处是？锦屏香冷无睡，
被头多少泪。

红杏，交枝相映，密密濛濛。一庭浓艳倚东风，香融，
透帘栊。
斜阳似共春光语，蝶争舞，更引流莺妒。魂销千片玉樽
前，
神仙，瑶池醉暮天。

卷 898_5【酒泉子】

张泌

春雨打窗，惊梦觉来天气晓。画堂深，红焰小，背兰缸。
酒香喷鼻懒开缸，惆怅更无人共醉。旧巢中，新燕子，
语双双。

紫陌青门，三十六宫春色，御沟辇路暗相通，杏园风。
咸阳沽酒宝钗空，笑指未央归去，插花走马落残红，

· 全唐诗 ·

月明中。

卷 898_6【生查子】

张泌

相见稀，喜相见，相见还相远。檀画荔支红，金蔓蜻蜓软。

鱼雁疏，芳信断，花落庭阴晚。可惜玉肌肤，消瘦成慵懒。

卷 898_7【思越人】

张泌

燕双飞，莺百转，越波堤下长桥。斗钿花筐金匣恰，舞衣罗薄纤腰。

东风澹荡慵无力，黛眉愁聚春碧。满地落花无消息，月明肠断空忆。

卷 898_8【满宫花】

张泌

花正芳，楼似绮，寂寞上阳宫里。钿笼金锁睡鸳鸯，

· 全唐诗 ·

帘冷露华珠翠。
娇艳轻盈香雪腻，细雨黄莺双起。东风惆怅欲清明，
公子桥边沉醉。

卷 898_9【柳枝】

张泌

腻粉琼妆透碧纱，雪休夸。金凤搔头坠鬓斜，发交加。
倚著云屏新睡觉，思梦笑。红腮隐出枕函花，有些些。

卷 898_10【南歌子】

张泌

柳色遮楼暗，桐花落砌香。画堂开处远风凉，
高卷水精帘额，衬斜阳。

岸柳拖烟绿，庭花照日红。数声蜀魄入帘栊，
惊断碧窗残梦，画屏空。

锦荐红鸂鶒，罗衣绣凤凰。绮疏飘雪北风狂，
帘幕尽垂无事，郁金香。

· 全唐诗 ·

卷 898_11【江城子】

张泌

碧阑干外小中庭，雨初晴，晓莺声。飞絮落花，
时节近清明。睡起卷帘无一事，匀面了，没心情。

浣花溪上见卿卿，脸波秋水明。黛眉轻，绿云高绾，
金簇小蜻蜓。好是问他来得么？和笑道，莫多情。

窄罗衫子薄罗裙，小腰身，晚妆新。每到花时，
长是不宜春。早是自家无气力，更被你，恶怜人。

卷 898_12【河渚神】

张泌

古树噪寒鸦，满庭枫叶芦花。昼灯当午隔轻纱，
画阁珠帘影斜。
门外往来祈赛客，翩翩帆落天涯。回首隔江烟火，
渡头三两人家。

· 全唐诗 ·

卷 898_13【胡蝶儿】

张泌

胡蝶儿，晚春时。阿娇初著淡黄衣，倚窗学画伊。
还似花间见，双双对对飞。无端和泪拭燕脂，惹教双翅垂。

卷 898_14【如梦令】

冯延巳

尘拂玉台鸾镜，凤髻不堪重整。绡帐泣流苏，
愁掩玉屏人静。多病，多病，自是行云无定。

卷 898_15【三台令】

冯延巳

春色，春色，依旧青门紫陌。日斜柳暗花嫣，
醉卧春色少年。年少，年少，行乐直须及早。

明月，明月，照得离人愁绝。更深影入空床，
不道帷屏夜长。长夜，长夜，梦到庭花阴下。

· 全唐诗 ·

南浦，南浦，翠鬟离人何处。当时携手高楼，
依旧楼前水流。流水，流水，中有伤心双泪。

卷 898_16【归国谣】

冯延巳

何处笛？深夜梦回情脉脉，竹风檐雨寒窗隔。
离人几岁无消息，今头白，不眠特地重相忆。

春艳艳，江上晚山三四点，柳丝如剪花如染。
香闺寂寂门半掩，愁眉敛，泪珠滴破胭脂脸。

江水碧，江上何人吹玉笛，扁舟远送潇湘客。
芦花千里霜月白，伤行色，来朝便是关山隔。

卷 898_17【长相思】

冯延巳

红满枝，绿满枝，宿雨厌厌睡起迟，闲庭花影移。
忆归期，数归期。梦见虽多相见稀，相逢知几时。

· 全唐诗 ·

卷 898_18【相见欢】

冯延巳

晓窗梦到昭华，向琼家。欹枕残妆一朵，卧枝花。
情极处，却无语，玉钗斜。翠阁银屏回首，已天涯。

卷 898_19【抛球乐】

冯延巳

酒罢歌余兴未阑，小桥清水共盘桓。波摇梅蕊伤心白，
风入罗衣贴体寒。且莫思归去，须尽笙歌此夕欢。

逐胜归来雨未晴，楼前风重草烟轻。谷莺语软花边过，
水调声长醉里听。款举金觥劝，谁是当筵最有情？

梅落新春入后庭，眼前风物可无情？曲池波晚冰还合，
芳草迎船绿未成。且上高楼望，相共凭阑看月生。

霜积秋山万树红，倚岩楼上挂朱栊。白云天远重重恨，
黄叶烟深淅淅风。仿佛梁州曲，吹在谁家玉笛中。

尽日登高兴未残，红楼人散独盘桓。一钩冷雾悬珠箔，
满面西风凭玉阑。归去须沉醉，小院新池月乍寒。

· 全唐诗 ·

坐对高楼千万山，雁飞秋色满阑干。烧残红烛暮云合，
飘尽碧梧金井寒。咫尺人千里，犹忆笙歌昨夜欢。

卷 898_20【点绛唇】

冯延巳

荫绿围红，梦琼家在桃源住。画桥当路，临水开朱户。
柳径春深，行到关情处。颦不语，意凭风絮，吹向郎边
去。

卷 898_21【酒泉子】

冯延巳

庭下花飞。月照妆楼春事晚，珠帘风，兰烛烬，怨空闺。
迢迢何处寄相思。玉箸零零肠断，屏帏深，更漏永，
梦魂迷。
芳草长川。柳映危桥桥下路，归鸿飞，行人去，碧山边。
风微烟淡雨萧然。隔岸马嘶何处？九回肠，双脸泪，
夕阳天。

春色融融。飞燕乍来莺未语，小桃寒，垂柳晚，玉楼空。
天长烟远恨重重。消息燕鸿归去，枕前灯，窗外月，

· 全唐诗 ·

闭朱笼。

深院空帟。廊下风帘惊宿燕，香印灰，兰烛灺，觉来时。
月明人自捣寒衣。刚爱无端惆怅，阶前行，阑外立，
欲鸡啼。

卷 898_22【采桑子】

冯延巳

小庭雨过春将尽，片片花飞。独折残枝，无语凭阑只自知。
玉堂香暖珠帘卷，双燕来归。君约佳期，肯信韶华得几时。

马嘶人语春风岸，芳草绵绵。杨柳桥边，落日高楼酒旆悬。
旧愁新恨知多少，目断遥天。独立花前，更听笙歌满画船。

西风半夜帘栊冷，远梦初归。梦过金扉，花谢窗前夜合枝。
昭阳殿里新翻曲，未有人知。偷取笙吹，惊觉寒蛩到晓啼。

酒阑睡觉天香暖，绣户慵开。香印成灰，独背寒屏理旧

· 全唐诗 ·

眉。

朦胧却向灯前卧，窗月徘徊。晓梦初回，一夜东风绽早梅。

小堂深静无人到，满院春风。惆怅墙东，一树樱桃带雨红。

愁心似醉兼如病，欲语还慵。日暮疏钟，双燕归栖画阁中。

画堂灯暖帘栊卷，禁漏丁丁。雨罢寒生，一夜西窗梦不成。

玉娥重起添香印，回倚孤屏。不语含情，水调何人吹笛声。

笙歌放散人归去，独宿江楼。月上云收，一半珠帘挂玉钩。

起来检点经游地，处处新愁。凭仗东流，将取离心过橘州。

昭阳记得神仙侣，独自承恩。水殿灯昏，罗幕轻寒夜正春。

如今别馆添萧索，满面啼痕。旧约犹存，忍把金环别与人。

微风帘幕清明近，花落春残。尊酒留欢，添尽罗衣怯夜寒。

愁颜恰似烧残烛，珠泪阑干。也欲高拌，争奈相逢情万

· 全唐诗 ·

般。

画堂昨夜愁无睡，风雨凄凄。林鹊争栖，落尽灯花鸡未啼。

年光往事如流水，休说情迷。玉箸双垂，只是金笼鹦鹉知。

寒蝉欲报三秋候，寂静幽居。叶落闲阶，月透帘栊远梦回。

昭阳旧恨依前在，休说当时。玉笛才吹，满袖猩猩血又垂。

洞房深夜笙歌散，帘幕重重。斜月朦胧，雨过残花落地红。

昔年无限伤心事，依旧东风。独倚梧桐，闲想闲思到晓钟。

花前失却游春侣，极目寻芳。满眼悲凉，纵有笙歌亦断肠。

林间戏蝶帘间燕，各自双双。忍更思量，绿树青苔半夕阳。

卷 898_23【菩萨蛮】

冯延巳

金波远逐行云去，疏星时作银河渡。花影卧秋千，

· 全唐诗 ·

更长人不眠。
玉笋弹未彻，凤髻黄钗脱。忆梦翠蛾低，微风吹绣衣。

画堂昨夜西风过，绣帘时拂朱门锁。惊梦不成云，
双蛾枕上颦。
金炉烟袅袅，烛暗纱窗晓。残日尚弯环，玉笋和泪弹。

梅花吹入谁家笛，行云半夜凝空碧。欹枕不成眠，
关山人未还。
声随幽怨绝，空断澄霜月。月影下重檐，轻风花满帘。

回廊远砌生秋草，梦魂千里青门道。鹦鹉怨长更，
碧笼金锁横。
罗帏中夜起，霜月清如水。玉露不成圆，宝箏悲断弦。

娇鬟堆枕钗横凤，溶溶春水杨花梦。红烛泪阑干，
翠屏烟浪寒。
锦壶催画箭，玉佩天涯远。和泪试严妆，落梅飞夜霜。

西风裊裊凌歌扇，秋期正与行云远。花叶脱霜红，
流萤残月中。
兰闺人在否，千里重楼暮。翠被已销香，梦随寒漏长。

沉沉朱户横金锁，纱窗月影随花过。烛泪欲阑干，
落梅生晚寒。
宝钗横翠凤，千里香屏梦。云雨已荒凉，江南春草长。

· 全唐诗 ·

欹鬟堕髻摇双桨，采莲晚出清江上。顾影约流萍，
楚歌娇未成。
相逢顰翠黛，笑把珠珰解。家住柳阴中，画桥东复东。

卷 898_24【谒金门】

冯延巳

风乍起，吹皱一池春水。闲引鸳鸯芳径里，手挪红杏蕊。
斗鸭阑干独倚，碧玉搔头斜坠。终日望君君不至，
举头闻鹊喜。

杨柳陌，宝马嘶空无迹。新著荷衣人未识，年年江海客。
梦觉巫山春色，醉眼飞花狼藉。起舞不辞无气力，
爱君吹玉笛。

卷 898_25【清平乐】

冯延巳

深冬寒月，庭户凝霜雪。风雁过时魂断绝，塞管数声呜咽。

披衣独立披香，流苏乱结愁肠。往事总堪惆怅，
前欢休更思量。

· 全唐诗 ·

雨晴烟晚，绿水新池满。双燕飞来垂柳院，小阁画帘高卷。

黄昏独倚朱阑，西南新月眉弯。砌下落花风起，罗衣特地春寒。

西园春早，夹径抽新草。冰散漪澜生碧沼，寒在梅花先老。

与君同饮金杯，饮余相取徘徊。次第小桃将发，轩车莫厌频来。

卷 898_26【更漏子】

冯延巳

风带寒，枝正好，兰蕙无端先老。情悄悄，梦依依，离人殊未归。

褰罗幕，凭朱阁，不独堪悲摇落。月东出，雁南飞，谁家夜捣衣？

夜初长，人近别，梦觉一窗残月。鸂鶒卧，蟋蟀鸣，西风寒未成。

红蜡烛，弹棋局，床上画屏山绿。褰绣幌，倚瑶琴，前欢泪滴襟。

玉炉烟，红烛泪，偏对画堂秋思。眉翠薄，鬓云残，夜长衾枕寒。

· 全唐诗 ·

梧桐树，三更雨，不道离情最苦。一叶叶，一声声，
空阶滴到明。

卷 898_27【喜迁莺】

冯延巳

宿莺啼，乡梦断，春树晓朦胧。残灯和烬闭朱栊，
人语隔屏风。
香已寒，灯已绝，忽忆去年离别。石城花雨倚江楼，
波上木兰舟。

雾濛濛，风淅淅，杨柳带疏烟。飘飘轻絮满南园，
墙下草芊绵。
燕初飞，莺已老，拂面春风长好。相逢携酒且高歌，
人生得几何？

卷 898_28【阮郎归】

冯延巳

南园春半踏青时，风和闻马嘶。青梅如豆柳如丝，
日长蝴蝶飞。
花露重，草烟低，人家帘幕垂。秋千慵困解罗衣，
画梁双燕栖。

· 全唐诗 ·

角声吹断陇梅枝，孤窗月影低。塞鸿无限欲惊飞，
城乌休夜啼。
寻断梦，掩深闺，行人去路迷。门前杨柳绿阴齐，
何时闻马嘶。

卷 898_29【贺圣朝】

冯延巳

金丝帐暖牙床稳，怀香方寸，轻颦轻笑，汗珠微透，
柳沾花润。
云鬓斜坠，春应未已，不胜娇困。半欹犀枕，乱缠珠被，
转羞人问。

卷 898_30【应天长】

冯延巳

石城山下桃花绽，宿雨初晴云未散。南去棹，北飞雁，
水阔山遥肠欲断。
倚楼情绪懒，惆怅春心无限。燕度蒹葭风晚，欲归愁满
面。

· 全唐诗 ·

卷 898_31【醉花间】

冯延巳

独立阶前星又月，帘栊偏皎洁。霜树尽空枝，肠断丁香
结。
夜深寒不寐，疑恨何曾歇。凭阑干欲折，两条玉箸为君
垂，
此宵情，谁共说。

月落霜繁深院闭，洞房人正睡。桐树倚雕檐，金井临瑶
砌。
晓风寒不啻，独立成憔悴。闲愁浑未已，离人心绪自无
端，
莫思量，休退悔。

卷 898_32【芳草渡】

冯延巳

梧桐落，蓼花秋。烟初冷，雨才收，萧条风物正堪愁。
人去后，多少恨，在心头。
燕鸿远，羌笛怨，渺渺澄波一片。山如黛，月如钩。
笙歌散，梦魂断，倚高楼。

· 全唐诗 ·

卷 898_33【南乡子】

冯延巳

细雨湿流光，芳草年年与恨长。烟锁凤楼无限事，茫茫。
鸾镜鸳衾两断肠。
魂梦任悠扬，睡起杨花满绣床。薄幸不来门半掩，斜阳。
负你残春泪几行。

细雨泣秋风，金凤花残满地红。闲蹙黛眉慵不语，情绪。
寂寞相思知几许。
玉枕拥孤衾，挹恨还闻岁月深。帘卷曲房谁共醉，憔悴。
惆怅秦楼弹粉泪。

卷 898_34【舞春风（一名瑞鹧鸪）】

冯延巳

严妆才罢怨春风，粉墙画壁宋家东。蕙兰有恨枝尤绿，
桃李无言花自红。
燕燕巢儿罗幕卷，莺莺啼处凤楼空。少年薄幸知何处，
每夜归来春梦中。

· 全唐诗 ·

卷 898_35【虞美人】

冯延巳

玉钩鸾柱调鹦鹉，宛转留春语。云屏冷落画堂空，
薄晚春寒、无奈落花风。
拏帘燕子低飞去，拂镜尘莺舞。不知今夜月眉弯，
谁佩同心双结、倚阑干。

春风拂拂横秋水，掩映遥相对。只知长作碧窗期，
谁信东风、吹散彩云飞。
银屏梦与飞鸾远，只有珠帘卷。杨花零落月溶溶，
尘掩玉筝弦柱、画堂空。

卷 898_36【临江仙】

冯延巳

冷红飘起桃花片，青春意绪阑珊。高楼帘幕卷轻寒。
酒余人散，独自倚阑干。
夕阳千里连芳草，风光愁杀王孙。徘徊飞尽碧天云。
凤城何处，明月照黄昏。

· 全唐诗 ·

卷 898_37【蝶恋花】

冯延巳

窗外寒鸡天欲曙，香印成灰，坐起浑无绪。
庭际高梧凝宿雾，卷帘双鹊惊飞去。
屏上罗衣闲绣缕，一晌关情，忆遍江南路。
夜夜梦魂休谩语，已知前事无情处。

萧索清秋珠泪坠，枕簟微凉，展转浑无寐。
残酒欲醒中夜起，月明如练天如水。
阶下寒声啼络纬，庭树金风，悄悄重门闭。
可惜旧欢携手地，思量一夕成憔悴。

几度凤楼同饮宴，此夕相逢，却胜当时见。
低语前欢频转面，双眉敛恨春山远。
蜡烛泪流羌笛怨，偷整罗衣，欲唱情犹懒。
醉里不辞金爵满，阳关一曲肠千断。

几日行云何处去，忘了归来，不道春将暮。
百草千花寒食路，香车系在谁家树。
泪眼倚楼频独语，双燕飞来，陌上相逢否？
撩乱春愁如柳絮，悠悠梦里无寻处？

六曲阑干偎碧树，杨柳风轻，展尽黄金缕。
谁把钿筝移玉柱，穿帘海燕双飞去。

· 全唐诗 ·

满眼游丝兼落絮，红杏开时，一霎清明雨。
浓醉觉来莺乱语，惊残好梦无寻处。

谁道闲情抛弃久，每到春来，惆怅还依旧。
日日花前常病酒，不辞镜里朱颜瘦。
河畔青芜堤上柳，为问新愁，何事年年有。
独立小楼风满袖，平林新月人归后。

卷 898_38【寿山曲】

冯延巳

铜壶滴漏初尽，高阁鸡鸣半空。催启五门金锁，
犹垂三殿帘栊。阶前御柳摇绿，仗下宫花散红。
鸳瓦数行晓日，鸾旗百尺春风。侍臣舞蹈重拜，
圣寿南山永同。

卷 898_39【思越人（与本调不同）】

冯延巳

酒醒情怀恶，金缕褪，玉肌如削。寒食过却，海棠零落。
乍倚遍，阑干烟淡薄，翠幕帘栊画阁。春睡著，觉来失，
秋千期约。

· 全唐诗 ·

卷 898_40【上行杯（与本调不同）】

冯延巳

落梅暑雨消残粉，云重烟深寒食近。罗幕遮香，
柳外秋千出画墙。
春山颠倒钗横凤，飞絮入帘春睡重。梦里佳期，
只许庭花与月知。

卷 898_41【薄命妾】

冯延巳

春日宴，绿酒一杯歌一遍。再拜陈三愿。
一愿郎君千岁，二愿妾身长健。三愿如同梁上燕，
岁岁长相见。

卷 898_42【金错刀（一名醉瑶瑟）】

冯延巳

双玉斗，百琼壶，佳人欢饮笑喧呼。麒麟欲画时难偶，
鸥鹭何猜兴不孤。
歌婉转，醉模糊，高烧银烛卧流苏。只销几觉懵腾睡，

· 全唐诗 ·

身外功名任有无。

日融融，草芊芊，黄莺求友啼林前。柳条袅袅拖金线，
花蕊茸茸簇锦毡。

鸠逐妇，燕穿帘，狂蜂浪蝶相翩翩。春光堪赏还堪玩，
恼杀东风误少年。

卷 898_43【忆江南（二首，与本调不同）】

冯延巳

去岁迎春楼上月，正是西窗，夜凉时节。
玉人贪睡坠钗云，粉消妆薄见天真。
人非风月长依旧，破镜尘筝一梦经年瘦。
今宵帘幕扬花阴，空余枕泪独伤心。

今日相逢花未发，正是去年，别离时节。
东风次第有花开，恁时须约却重来。
重来不怕花堪折，只恐明年花发人离别。
别离若向百花时，东风弹泪有谁知？

卷 898_44【木兰花】

徐昌图

沉檀烟起盘红雾，一箭霜风吹绣户。汉宫花面学梅妆，

· 全唐诗 ·

谢女雪诗栽柳絮。
长垂夹幕孤鸾舞，旋炙银笙双凤语。红窗酒病嚼寒冰，
冰损相思无梦处。

卷 898_45【临江仙】

徐昌图

饮散离亭西去，浮生常恨飘蓬。回头烟柳渐重重。
淡云孤雁远，寒日暮天红。
今夜画船何处，潮平淮月朦胧。酒醒人静奈愁浓。
残灯孤枕梦，轻浪五更风。

卷 898_46【河传】

徐昌图

秋光满目，风清露白，莲红水绿。何处梦回，
弄珠拾翠盈盈，倚阑桡，眉黛蹙。
采莲调稳，吴侣声相续，倚棹吴江曲。鹭起暮天，
几双交颈鸳鸯，入芦花深处宿。

· 全唐诗 ·

卷 898_47【抛球乐】

徐铉

歌舞送飞球，金觥碧玉筹。管弦桃李月，帘幕凤凰楼。
一笑千场醉，浮生任白头。

灼灼传花枝，纷纷度画旂。不知红烛下，照见彩球飞。
借势因期克，巫山暮雨归。

· 全唐诗 ·

第八百九十九卷

卷 899_1 【木兰花】

庾传素

木兰红艳多情态，不似凡花人不爱。移来孔雀槛边栽，
折向凤凰钗上戴。
是何芍药争风彩，自共牡丹长作对。若教为女嫁东风，
除却黄莺难匹配。

卷 899_2 【生查子】

刘侍读

深秋更漏长，滴尽银台烛。独步出幽闺，月晃波澄绿。
菱荷风乍触，一对鸳鸯宿。虚棹玉钗惊，惊起还相续。

卷 899_3 【木兰花】

许岷

小庭日晚花零落，倚户无聊妆脸薄。宝箏金鸭任生尘，

· 全唐诗 ·

绣画工夫全放却。
有时觑著同心结，万恨千愁无处说。当初不合尽饶伊，
赢得如今长恨别。

江南日暖芭蕉展，美人折得亲裁剪。书成小简寄情人，
临行更把轻轻拈。
其中撚破相思字，却恐郎疑踪不似。若还猜妾倩人书，
误了平生多少事。

卷 899_4【菩萨蛮】

林楚翘

画堂春昼垂珠箔，卧来揉惹金钗落。簟滑枕头移，
鬓蝉狂欲飞。
笑拖娇眼慢，罗袖笼花面。重道好郎君，人前莫恼人。

卷 899_5【一片子】

无名氏

柳色青山映，梨花雪鸟藏。绿窗桃李下，闲坐叹春芳。

· 全唐诗 ·

卷 899_6【塞姑】

无名氏

昨日卢梅塞口，
整见诸人镇守。都护三年不归，
折尽江边杨柳。

卷 899_7【醉公子】

无名氏

门外猧儿吠，知是萧郎至。
划袜下香阶，冤家今夜醉。
扶得入罗帏，不肯脱罗衣。
醉则从他醉，还胜独睡时。

卷 899_8【菩萨蛮】

无名氏

牡丹含露真珠颗，美人折向庭前过。
含笑问檀郎，花强妾貌强？
檀郎故相恼，须道花枝好。
一面发娇嗔，碎挪花打人。

· 全唐诗 ·

卷 899_9【贺圣朝】

无名氏

白露点，晓星明灭，秋风落叶。故址颓垣，冷烟衰草，
前朝宫阙。
长安道上行客，依旧利深名切。改变容颜，消磨今古，
陇头残月。

卷 899_10【虞美人】

无名氏

帐中草草军情变，月下旌旗乱。褰衣推枕怆离情，
远风吹下楚歌声，正三更。
抚雅欲下重相顾，艳态花无主。手中莲锸凛秋霜，
九泉归去是仙乡，恨茫茫。

卷 899_11【后庭宴】

无名氏

千里故乡，十年华屋，乱魂飞过屏山簇。
眼重眉褪不胜春，菱花知我销香玉。

· 全唐诗 ·

双双燕子归来，应解笑人幽独。断歌零舞，遗恨清江曲。
万树绿低迷，一庭红扑簌。

卷 899_12【撷芳词】

无名氏

风摇荡，雨濛茸，翠条柔弱花头重。春衫窄，香肌湿。
记得年时，共伊曾摘。
都如梦，何曾共，可怜孤似钗头凤。关山隔，晚云碧，
燕儿来也，又无消息。

卷 899_13【鱼游春水】

无名氏

秦楼东风里，燕子还来寻旧垒。余寒犹峭，红日薄侵罗
绮。
嫩草方抽碧玉茵，媚柳轻窣黄金缕。莺转上林，鱼游春
水。
几曲阑干遍倚，又是一番新桃李。佳人应怪归迟，梅妆
泪洗。凤箫声绝沉孤雁，望断清波无双鲤。云山万重，寸心
千里。

· 全唐诗 ·

卷 899_14【阿那曲】

杨贵妃

罗袖动香香不已，红蕖袅袅秋烟里。轻云岭下乍摇风，
嫩柳池塘初拂水。

卷 899_15【乐游曲】

闽后陈氏

龙舟摇曳东复东，采莲湖上红更红。波淡淡，水溶溶，
奴隔荷花路不通。

西湖南湖斗彩舟，青蒲紫蓼满中洲。波渺渺，水悠悠，
长奉君王万岁游。

卷 899_16【杨柳枝】

柳氏

杨柳枝，芳菲节，可恨年年赠离别。一叶随风忽报秋，
纵使君来岂堪折。

· 全唐诗 ·

卷 899_17【字字双】

王丽真女郎

床头锦衾斑复斑，架上朱衣殷复殷。空庭明月闲复闲，
夜长路远山复山。

卷 899_18【菩萨蛮】

耿玉真

玉京人去秋萧索，画檐鹊起梧桐落。欹枕悄无言，
月和残梦圆。
背灯唯暗泣，甚处砧声急。眉黛远山攒，芭蕉生暮寒。

卷 899_19【句】

庭空客散人归后，画堂半掩朱帘。林风淅淅夜厌厌，
小楼新月，回首自纤纤。

春光镇在人空老，新愁往恨何穷。金窗力困起还慵。
一声羌笛，惊起醉怡容。（李后主《临江仙》。

· 全唐诗 ·

前后两调，各逸其半）

寻春须是阳春早，看花莫待花枝老。（后主《菩萨蛮》）

帝乡烟雨锁春愁，故国山川空泪眼。（吴越王钱俶。
《木兰花》）

金凤欲飞遭掣掬，情脉脉。看即玉楼云雨隔。（钱俶）

桃李不须夸烂熳，已输了风吹一半。（韩熙载《咏梅》）

学著荷衣还可喜，年少多来有几？自古闲愁无际。
（冯延巳《谒金门》）

初离蜀道心将碎，离恨绵绵。春日如年，马上时时闻杜
鹃。
（花蕊夫人《采桑子》）

· 全唐诗 ·

第九百卷

卷 900_1【梧桐影】

吕岩

落日斜，秋风冷。今夜故人来不来，教人立尽梧桐影。

卷 900_2【忆江南】

吕岩

淮南法，秋石最堪夸。位应乾坤白露节，
象移寅卯紫河车。子午结朝霞。

王阳术，得秘是黄牙。万蕊初生将此类，
黄钟应律始归家。十月定君夸。

黄帝术，玄妙美金花。玉液初凝红粉见，
乾坤覆载暗交加。龙虎变成砂。

长生术，玄要补泥丸。彭祖得之年八百，

· 全唐诗 ·

世人因此转伤残。谁是识阴丹。

阴丹诀，三五合玄图。二八应机堪采运，
玉琼回首免荣枯。颜貌胜凡姝。

长生术，初九秘潜龙。慎勿从高宜作客，
丹田流注气交通。耆老反婴童。

修身客，莫误入迷津。气术金丹传在世，
象天象地象人身。不用问东邻。

还丹诀，九九最幽玄。三性本同一体内，
要烧灵药切寻铅。寻得是神仙。

长生药，不用问他人。八卦九宫看掌上，
五行四象在人身。明了自通神。

学道客，修养莫迟迟。光景斯须如梦里，
还丹粟粒变金姿。死去莫回归。

治生客，审细察微言。百岁梦中看即过，
劝君修炼保尊年。不久是神仙。

瑶池上，瑞雾霭群仙。素练金童锵凤板，
青衣玉女啸鸾弦。身在大罗天。
沉醉处，缥缈玉京山。唱彻步虚清燕罢，
不知今夕是何年。海水又桑田。

· 全唐诗 ·

卷 900_3【西江月】

吕岩

著意黄庭岁久，留心金碧年深。为忧白发鬓相侵，
仙诀朝朝讨论。
秘要俱皆览过，神仙奥旨重吟。至人亲指水中金，
不负平生志性。

任是聪明志士，常迷东灶黄庭。参同大易事分明，
不晓醉眠难醒。
若遇高人指引，都来不费功程。北方坎子是金精，
认得黄牙方盛。

卷 900_4【沁园春】

吕岩

七返还丹，在我先须，炼已待时。正一阳初动，
中宵漏永，温温铅鼎，光透帘帏。造化争驰，虎龙交媾，
进火功夫牛斗危。曲江上，看月华莹净，有个乌飞。
当时，自饮刀圭，又谁信无中就养儿。辨水源清浊，
木金间隔。不因师指，此事难知。道要玄微，天机深远，
下手忙修犹太迟。蓬莱路，待三千行满，独步云归。

· 全唐诗 ·

火宅牵缠，夜去明来，早晚担忧。奈今日茫然，
不知明日，波波劫劫，有甚来由？人世风灯，草头珠露，
我见伤心眼泪流。不坚久，似石中迸火，水上浮沤。
休休，及早回头，把往日风流一笔钩。但粗衣淡饭，
随缘度日，任人笑我，我又何求？限到头来，不论贫富，
著甚干忙日夜忧。劝年少，把家缘弃了，海上来游。

诗曲文章，任汝空留，数千万篇。奈日推一日，
月推一月，今年不了，又待来年。有限光阴，无涯火院，
只恐蹉跎老却贤。贪痴汉，望成家学道，两事双全。
凡间，只恋尘缘，又谁信壶中别有天。这道本无情，
不亲富贵，不疏贫贱，只要心坚。不在劳神，不须苦行，
息虑忘机合自然。长生事，待明公放下，方可相传。

卷 900_5【卜算子】

吕岩

心空道亦空，风静林还静。卷尽浮云月自明，中有山河
影。
供养及修行，旧话成重省。豆爆生莲火里时，痛拨寒灰
冷。

· 全唐诗 ·

卷 900_6【步蟾宫】

吕岩

坎离乾兑逢子午，须认取，自家根祖。地雷震动山头雨，
要洗濯黄牙土。
捉得金精牢闭锢，炼甲庚，要生龙虎。待他问汝甚人传，
但说道，先生姓吕。

卷 900_7【满庭芳】

吕岩

大道渊源，高真隐秘，风流岂可知闻。先天一气，
清浊自然分。不识坎离颠倒，谁能辨、金木浮沉？
幽微处，无中产有，涧畔虎龙吟。
壶中，真造化，天精地髓，阴魄阳魂。运周天水火，
燮理寒温。十月脱胎丹就，除此外、皆是傍门。君知否，
尘寰走遍，端的少知音。

卷 900_8【酹江月】

吕岩

仙风道骨，颠倒运乾坤，平分时节。金木相交坎离位，

· 全唐诗 ·

一粒刀圭凝结。水虎潜形，火龙伏体，万丈毫光烈。
仙花朵秀，圣男灵女扳折。
霄汉此夜中秋，银蟾离海，浪卷千层雪。此是天关地轴，
谁解推穷圆缺。片晌功夫，霎时丹聚，到此凭何诀？
倚天长啸，洞中无限风月。

卷 900_9【水龙吟】

吕岩

目前咫尺长生路，多少愚人不悟。爱河浪阔，洪波风紧，
舟船难渡。略听仙师语，到彼岸，只消一句。
炼金丹换了，凡胎浊骨。免轮回，三涂苦。
万事澄心定意，聚真阳、都归一处。分明认得，
灵光真趣，本来面目。此个幽微理，莫容易，等闲分付。
知蓬莱自有，神仙伴侣。同携手，朝天去。

卷 900_10【豆叶黄】

吕岩

二月江南山水路，李花零落春无主。一个鱼儿无觅处，
风和雨，玉龙生甲归天去。

· 全唐诗 ·

卷 900_11【浪淘沙】

吕岩

我有屋三椽，住在灵源。无遮四壁任萧然。
万象森罗为斗拱，瓦盖青天。无漏得多年，结就因缘。
修成功行满三千。降得火龙伏得虎，陆路神仙。

卷 900_12【苏幕遮】

吕岩

天不高，地不大。惟有真心，物物俱含载。
不用之时全体在。用即拈来，万象周沙界。
虚无中，尘色内。尽是还丹，历历堪收采。
这个鼎炉解不解。养就灵乌，飞出光明海。

卷 900_13【雨中花】

吕岩

三百年间，功标青史，几多俱委埃尘。悟黄梁弃事，
厌世藏身。将我一枝丹桂，换他千载青春。岳阳楼上，
纶巾羽扇，谁识天人。

· 全唐诗 ·

蓬莱愿应仙举，谁知会合仙宾。遥想望，吹笙玉殿，
奏舞鸾裊。风驭云駟不散，碧桃紫奈长新。愿逢一粒，
九霞光里，相继朝真。

卷 900_14【促拍满路花】

吕岩

西风吹渭水，落叶满长安。茫茫尘世里，独清闲。
自然炉鼎，虎绕与龙盘。九转丹砂就，一粒刀圭，
便成陆地神仙。
任万钉宝带貂蝉，富贵欲熏天。黄粱炊未熟，梦惊残。
是非海里，直道作人难。袖手江南去，白蘋红蓼，
又寻湓浦庐山。

卷 900_15【六么令】

吕岩

东与西，眼与眉。偃月炉中运坎离，灵砂且上飞。
最幽微，是天机，你休痴，你不知。

· 全唐诗 ·

卷 900_16【汉宫春】

吕岩

横笛声沉，倚危楼红日，江转天斜。黄尘边火瀕洞，
何处吾家。胎禽怨夜，来乘风、玄露丹霞。先生笑、
飞空一剑，东风犹自天涯。
情知道山中好，早翠罽含隐，瑶草新芽。青溪故人信断，
梦逐飙车。乾坤星火，归来了、煮石煎沙。回首处，
幅巾蒲帐，云边独是桃花。

卷 900_17【忆江南】

伊用昌

江南鼓，梭肚两头栾。钉著不知侵骨髓，
打来只是没心肝。空腹被人谩。

卷 900_18【句】

伊用昌

暂游大庾，白鹤飞来谁共语？岭畔人家，曾见寒梅几度
花。
春来春去，人在落花流水处。花满前溪，藏尽神仙人不

· 全唐诗 ·

知。

（吕岩《求斋不得》，失注调名。无考）